

**IOSEPHINA
LUCERNENSIS.
IN QUA
LUCERNAE
HELUETIORUM...**

Jacob Reiss, Jacob Tschan,
Christoph Schorrer





BIBLIOTECA

VITT. EMANUELE

NAZIONALE

14

31

H

31

M



**IOSEPHINA
LVCERNENSIS.**

Dom. Prof. Rom. S. I. Bibl. com.

IOSEPHINA LVCERNENSIS.

in qua

Lucernæ Helveticorum

S. IOSEPH

VIR MARIÆ, &c.
centum Elogijs illustratur atque
propugnatur.

P R A E S I D E

I A C O B O R E I S S

Societatis IESV SS. Theologiae Pro-
fessore Ordinario.

R E S P O N D E N T E

R. D. I A C O B O T S C H A N,

eiusdem SS. Theologiae Studioso ac Can-
didato.


Cum facultate Superiorum.

CONSTANTIAE,

Apud Ioannem Geng Episcopalem
Typographum.

Anno M. DC. LVIII.

Ex Dono P. Christoph. Schorrer



SALVATIO
AD
S. IOSEPHVM.

A VE
IOSEPH,
GRATIA PLENE,
DOMINVS TECVM,
BENEDICTE TV IN VIRIS,

ET
BENEDICTVS FILIVS TVVS
IESVS,

SANCTE IOSEPH

VIR
MARIE

ORA
PRO NOBIS PECCATORIBVS,
NUNC
ET IN HORA MORTIS NOSTRÆ,
AMEN.

REVERENDISSIMO ET IL-
LUSTRISSIMO DOMINO DOMI-
NO S. R. I. PRINCIPI

IODOCO

LAVSANENSI EPISCOPO,
ac Comiti, itémq; Collegiatæ Ecclesiæ
S. Leodegarij Lucernæ
P R Æ P O S I T O.

Nec non ceteris

ADMODVM REVERENDIS, NO-
bilibus, & Clarissimis, ejusdem Ecclesiæ
Collegiatæ

DD. CANONICIS.

Patronis meis obseruandissimis.



Tſi de cœlo S. IOSEPHVS huic
suarum Laudum à me ſuſcepto
patrocinio, haud dubiè propitiam
manum porrecturus ſit, non de-
dignatur tamē, more ſanctis viſitatō, etiam
exterrā, Patronos aliquos optari in Socie-
tatem auxilij ſacri. At fierine poteſt, vt
CLERICVS ad alios, quàm CLERIGOS, &

CLERICORVM PRÆCIPVOS, feliciùs ac sapientius confugiat? Nemo opinor, hoc dixerit. Præ omnibus igitur Vestrum, **REVERENDISSIME ET ILLUSTRISSE EPISCOPE AC PRÆPOSITE; ADMODVM REVERENDI, NOBILES, ET CLARISSIMI DOMINI CANONICI**, Nomen, Tutela, & Opera, à me mihi quærenda, roganda, atque exoranda est; nisi fortè aliquis negare possit, **TALES Vos esse**, quales vnà mecum Vniuersa Patria lætabunda agnoscit, hoc est, **PRÆCIPVOS CLERICORVM**. At hoc neque Iustitia, neque Veritas finit. Nam I. Vos, vt in communi alloquar, **HIC IDEM PRÆPOSITVS VESTER**, meritò Sapientiæ ac Virtutis eximiæ, postquam **SANCTISSIMI D. INNOCENTII X. SINGVLARI FAVORE INTERVNCIVS CVM POTESTATE LEGATI A LATERE**, ad Heluetios Rhætósque & adjunctos ijs populos, præclarè fuit, etiam ex alienâ Diæcesi, Constantiensi nempe, **EPISCOPVS LAUSANENSIS AC COMES** renunciatus & confirmatus est. Deinde autem constitutis Vos, **ADMODVM REVERENDI, NOBILES, AC CLARISSIMI DOMINI CANONICI**, præcipuæ istarum partium Ecclesiæ Corpus,

pus, verè principalia membra. Non solum
enim CANONICI estis, quod VOBIS com-
mune est cum alijs multis; sed etiam per
Vos ipsos, eo, quæ CANONICIS præscrip-
sit Trident Sess. 24. cap. 12. religiosissime
obitis; ut meritò, quemadmodum idem
loquitur, ECCLESIAE SENATUS possitis ap-
pellari. Insuper autem emicant in VOBIS
duo hæc præclara Decora, ac nescio, an
vllis alijs CANONICIS concessa: non enim
contenti diuinis nocturnisque Horis Di-
uinum celebrare Officium, etiam ANIMA-
RVM CVRAM, PAROCHIALI LVRE, omnes
& singuli, indefessi geritis; & concionandi
laude tantopere præstatis, ut Vocem, Ze-
lùmque vestrum, ac facundiam singula-
rem etiam Religiosorum Tempia, Festâ-
que audire gestiant. Quamobrem hæc
ipsa quoque IOSEPHINA mea, siue rectius
IOSEPHVS meus, inprimis ad Vos, quem-
admodum dixi, ostendique, PRÆCIPVOS
CLERICORVM, siue ut PATRONOS, siue
verius ut PRÆCONES earum Laudum, quas
Magno huic Sancto assertum venio, reci-
pit se. Et quia gratiarum nihil est in me,
quod reponere possim, id vnum precor AB

A 4

ILLO,

ILLO, ac PER ILLVM, vt Vos Colendissimos Dominos, ac Patronos meos in terrâ fauentissimos, SIBI, ECCLESIAE VESTRAE, PATRIAE item, ac in eâ MIHI, quàm diutissimè optimèque, seruet semper incolumes ac beatos. Lucernæ.

*Rever.^{me} & Illust.^{me} Celsit.^{nis}
Vestra.*

Itemque

*Admod. Rev: Nob: & Clar:
Dom: VV:*

Clicus Infimus

IACOBVS TSCHAN
Presbyter.



M. TERESIA DE IESV BENE-
VOLO LECTORI SALVTEM.

IOSEPH, (cujus Elogia tibi in hac I O-
SEPHINA exhibentur, & multa, & magna)
*præcipuus est corporis atq; anima mea Pater, Patro-
nus, & Medicus. Hunc ego ante alios omnes amo, veneror,
& prosequor honore. Hunc ab alijs agnoscere, laudari, & in-
uocari, vnicè desidero. Hunc palàm pronuncio, Fundatorem
esse Ordinis mei, cui me, meaque omnia, & quotquot se-
quuntur me, post Deum ac Deiparam, summè debeo. Hunc
olim in omnibus itineribus meis fortissimum habui custo-
dem, comitem, ac ducem, illò maxime tempore, cum per
Morena abrupta, aspectabili formâ, me, meaque Sorores,
à præsentis mortis discrimine eduxit. Hunc etiam omni-
um meorum Cœnobiorum Patrem familias liberalissimum,
nec sine prodigijs, experta sum, idèoque ad eorum portas,
eminentiore loco, constitui Statuam, vel imaginem, San-
cti, ne aliquando Beneficiorum, aut gratiarum posteri
oblivisci possint. Ego certè iterum iterumque protestor,
adjutam me ab ipso in omnibus fuisse. Imò, quæ mea
fiducia est, audeo hujusmodi auxilium polliceri alijs qui-
buscunque, qui eum sibi Patronum adsciuerint. Quare
age, experire vnâ mecum, quod ego toties experta sum,
ut incredibile dictu videatur, è quam multis me periculis
seruauerit. Constituit profectò Deus IOSEPH v-
niuersalem Patronum nostrum, eoque locò nunc habet in
cælò, quò habuit in terrâ, vbi ipsi ac MARIÆ per tot
annos fuit subditus. Idq; ego præcipuè coram totò mundò*

A 5

testari

testari possum ; quæ nulla vnquam in re deserta ab hoc Patrono fui. Est autem inprimis festus ille dies , quem eius honori Pontifex decreuit , commemorandus mihi ; quidquid enim id temporis petij , id ego , aut etiam melius aliquid , semper impetraui. At neque , alios impetraturos esse vota sua , sinit dubitare me , tum mea , tum aliena experientia. Quapropter omnes hisce denuo admonéo , ut animum tandem suum omnem , ad talis tantique Patroni venerationem , inclinent. Quos ego , libris quoque in laudem Sancti scriptis adiuuare cuperem ; verùm mea me conditio prohibet , ne quid audeam viribus maius. Ergo hoc vnum precor , seriòque exopto , IOSEPH vti Patronum accipias , atque reipsâ comprobes. Cinget ille te quoque cyclade , monili , ac cruce incomparabilis forma ac prerij. Nam idem dum mihi à munificâ eius manu obuenit , aliud cogitare non possum , quàm Te quoque , exemplò nostrò , siquidem imitari velis , aliquando exornatum iri. Ille tibi orandi Magister erit optimus : ille tibi monstrabit Filium Dei , ille MARIAM Matrem eius ostendet , ille denique Virtutes paulatim omnes , peccatori tuo inferet ; desigèti que. Vale , & hoc affectu , quò è vitâ meâ olim à me scriptâ hac pauca repeto , lege , quæ sequentur , Elogia Iosephinæ Lucernensis. Ex cœlesti Ierusalem.

M. TERESIA
de IESV.



IOSEPHINA LVCERNENSIS.

ELOGIVM PRIMVM.

IOSEPH

Primus Prædestinatorum post IESVM,
& MARIAM.



Tracturus IOSEPHO, VIRO
MARIAE, præaltam Arcus Trium-
phalis molem, fundamentum pri-
us ponere debeo, quibus illa secu-
rè inniti possit. At hæc simillima
sint, necesse est, ipsi Virgineæ Ma-
tri Dei, suæ verò Coniugi, MA-

RIÆ; cuius fundamenta iam inde ab æternò in
montibus sanctis, diuinæ prædestinationis, posita
sunt. Si ergo IOSEPHVM quoque, simul cum
illa, aut proximè post illam, prædestinatum esse
docere possim, habes, opinor, Beneuole Lector,
eiusmodi fundamenta, quibus sine periculò quan-
talibet moles incumbat. At idem hoc de IOSE-
PHO affirmârunt: Carthag. l. 4. Hom. 7 fol. 323.
Eckius Hom. 1. de S. IOSEPH. fol. 129. & ante
hos dudum Gerson in Serm. de Nat. B. V. coram
Con-

Constantiensi Concilio. Est ergo, Auctoritatem si spectes, abundè comprobata hæc veritas; nempe IOSEPHVM, post IESVM, & MARIAM, principem prædestinationis locum, consecutum esse.

Sed est Ratio Auctoritati isti par, vel etiam maior, quam meritò, initiò statim, in conspectum do, redituram deinceps sæpius, & lucem à dicendis accepturam. Sic autem se habet. Eo quis prior maiorque inter prædestinatos est, quò Deo prædestinanti est dignior, ut præ alijs prædestinetur. Atqui post IESVM & MARIAM dignissimus est S. IOSEPHVS. Ipse ergo post IESVM & MARIAM est inter prædestinatos prior maiorque.

Vbi sanè Maior mihi, & ut confido, cuius alteri, solida videtur. Minorem igitur solem probare debeo, probòque hoc modo. Is est Deo prædestinanti dignior, ut præ alijs prædestinetur, qui 1. propius accedit ad Vnionem Hypostaticam Christi primi prædestinatorum; qui 2. magis & arctius coniungitur MARIE Matri Dei proximè prædestinatæ; qui 3. electus est ad summæ dignationis munus, quod sine pari gratiæ affluxu decenter obiri non potest; qui 4. iam inde à Conceptione suâ, ac deinceps per omnem vitam, pluribus priuilegijs gratiosam prædestinatoris voluntatem explicantibus, condecoratur; quique 5. plures habet merendi occasiones, motiua, media, & exempla. Atqui hæc omnia & singula de nullo magis, post IESVM & MARIAM, dici possunt, & debent, quàm de S. IOSEPHO. Est ergo idem inter prædestinatos prior,

prior, maiorque alijs omnibus, solô autem IESV & MARIA posterior ac minor.

At erit fortasse aliquis, qui in ordine prædestinationis constituendo dissentiat à me; negans scilicet, CHRISTVM ac MARIAM nisi præuisô Adami peccatô prædestinatos esse. Verùm, cum sequi non possum omnes, nihil utique obstat, supponere magis placitam doctissimis viris opinionem, quæ etiam est Suar. in 3. p. q. 27. Disp. 1. S. 3. docentis nominatim MARIAM in Matrem Dei electam esse independentem à peccato.

Dico igitur utrisque IESV, inquam, & MARIÆ, ipsâ suffragante Ecclesiâ, conuenire illa Prov. 8. v. 22. verba; *Dominus possedit me in initio viarum suarum, antequam quidquam faceret, à principio. Ab æternô ordinata sum*, &c. At sicut MARIA, inquit, cit. Eckius, præuisa fuit ab æternô in Matrem Filij Dei, ita & IOSEPH in nutritium atquæ custodem IESV & MARIÆ electus, & conuenientibus huic officio donis ornatus est. Ergo &c. Atqui, subsumo ego, non potest inter præuisionem MARIÆ & IOSEPH concomitans in eodem gradu paritas constitui. Est enim, sicut MARIA propter IESVM, ita ipse propter MARIAM & IESVM præuisus. Satis ergo est, constitui propinquitatem, vi cuius nihil inter eos mediet, seruato tamen cuilibet, uti dignitatis, ita prædestinationis gradu, quam Elogij nostri titulus præsefert.

Sed hîc obiter rogabis, fueritne S. IOSEPH gratis prædestinatus, an propter merita præuisa?

Respon-

Respondeo hoc quoque decidi debere ex prorsus cuiusque de prædestinatione sententiâ. Est autem mea, *gratis* illam fieri factamque de facto esse ad gratiam formaliter, & ad gloriam virtualiter; *propter merita* autem *præuisa*, ad gloriam formaliter. At non est Ratio, cur hinc IOSEPHVM, aliûmve, excipiam. Hoc ergo eodem prædestinationis genere ipse quoque prædestinatus est.

ELOGIVM. II.

IOSEPH

Sanctificatus in vterô maternô.

NEquaquam, vt videri posset, pauci sunt, præsentis veritatis, siue testes, siue Auctores. Illam enim admittunt Carthag. lib. 4. hom. 3. & lib. 18. hom. 14. Gerson. Serm. de Nat. B. V. & 3. part. Alfab. 59. lib. 2. vbi id se legisse dicit in officio Hierosol. Iacobus de Valentia super Magnificat. Eckius in hom. 4. de Conceptione MARIÆ, & hom. priore de S. IOSEPH. Villegas in flore SS. Barry mihi fol. 110. Bernardinus de Bultis part. 4. Serm. 12. Cotonus conc. 4. de S. IOSEPH, Barrad. l. 6. c. 8. Polius in Hist. SS. Ioa- chim & Annæ part. 1. § 23. citans Bessæum, & Coppenstein. Salmeron tom. 3. tr. 28. pag. 244. & quem nancisci non potui, Isidorus Isolanus de S. IOSEPH cap. 9. & 10. citans pro se Theophilum, & Chrysostomum. Tandemque Cornelius à Lap, in cap.

in cap. 1. Matth. fol. miki 49. *Sanè, inquit, si Deus post B. Virginem illud alicui alteri ex initio recensitis dedit, S. IOSEPHO eius Sponso idipsum non negasse videtur, nempe eum, quoque sanctificatum in vtero materno esse.*

Atqui (subinfero) testimonijs legitimis, quibus alia censerentur sufficienter probata, ostendi potest non solum recensitos à Cornelio, sed alios quosdam in ipso vtero materno sanctificatos esse. Idem ergo etiam de nostro IOSEPHO prudenter credi potest.

In hoc Cornelij, meoque discursu, fundant se fere omnes citati; & meritò. Quo enim persona est maior siue ratione officij, siue ratione gratiæ & sanctitatis, eo magis credi potest accepisse priuilegia illa, quæ alijs minùs dignis concessa sunt. At est S. IOSEPHVS, vt probat Suarez Disp. 8. Sect. 1. & 2. & ego hîc ex ipso suppono, vtroque modo maior alijs MARIA minoribus; & tamen inter priuilegia ijsdem concessa etiam hujus præstinata sanctificatio probari potest legitimis testimonijs. Ergo eandem etiam IOSEPHVS accepit.

Hîc ego non ignoro, negaturum te, qui hoc, de quo sermo est, priuilegium IOSEPHO abiudicas, idem esse vlli alteri, præterquam Hieremiæ c. 1. v. 5. & Ioanni Baptistæ Luc. 1. v. 22. datum. Vbi equidem primò siue à minori ad maius, siue à pari argumentari pro IOSEPHO possum. Est enim, vt fatetur, cit. Suar. ijsdem dignior; est saltem æ-

quod

què propheta magnus in Israel, vt Abulensis super Matth. ostendit; &c.

Verum quia hæc alibi aptius tractandâ sunt, solum oppono Catalogum eorum, qui præter illos à Scriptura sacra nominatos de facto sanctificati sunt in vtero matris.

Ac primus quidem est Iacob Patriarcha, apud Ambros. l. 4. de Fide cap. 4. & alios. 2. Moses, apud Ephrem in Orat. de Transf. Christi. 3. Iacobus Apostolus frater Domini apud Epiphani-um, hæres. 29. 4. Asella Virgo apud Hieronym. in epist. 15. ad Marcellam. 5. Victor apud Bernardum Serm. de eius vita. 6. Nicolaus Episc, apud Antoninum in 3. p. Sum. tit. 18. §. 5. & 6. 7. Dominicus, apud eundem cit. locô. 8. Georgius Episcopus Suellens. apud Dimasferpi in apodixi illius. 9. Pontius apud Surium tom. 7. 14. Maij. 10. Nicolaus de Rupe Eremita Helvetius apud Hugonem, in eius vita. Samsonem quoque alij & S. Paulum producant. Verum de-sunt de ijs legitimi testes. Et sufficere potest allatus denarius; cui vniuersè nemo opinor nisi iusto-seuerior derogare poterit sub tanto-rum testium authentico In-strumento.

ELOGIUM ILLI.

IOSEPH

Sine fomite Concupiscentiæ natus.

Non est utique necesse, ut Auctores tibi semper omnes affirmantes exhibeam. Sicut ergo in militari acie, ita in hoc Scholasticò certamine alij alijs substituentur. Stant nunc pro IOSEPHO Gratianus l. 5. tit. 1. fol. 414. Salmeron tom. 3 tract. 29. Canisius l. 2. de Virg. c. 13. Carthag. l. 18. Hom. ult. §. 1. & Gerson in Serm. de Nat. B. V. Confid. 3.

Horum autem Rationes aut reipsa sunt, aut esse possunt sequentes. 1. Fomes concupiscentiæ res est admodum fæda, & indigna Patre Filij Dei, & consequenter ipsò hoc Filiò. Ergo prudenter statui in IOSEPHO non potest. Vbi Consequentia manifesta est, quia sicut *gloria filiorum patres eorum*, Prov. 17. v. 6. ita vicissim, dedecus. Antecedens quoque ex SS. Litteris satis aperte colligitur. Fomes enim concupiscentiæ dicitur in 2. d. st. 30. *tyrannus à Basilio, innatus Dæmon omnia suadens*, à Chrysoft. *Lerna serpens multiceps*, in 1. Petri 2. v. 11. *carnale desiderium aduersus animam militans*; ad Rom 7. *Lex peccati, quæ est in membris nostris*, imò & *habitans in nobis*, instar radicis, *peccatum*; atque etiam ad Rom 6. *regnans peccatum*, quoad inclinationem, in nostro mortali corpore. Cuiusmodi rem, esse inprimis fædam, indignamque quis neget? Si enim talis

talis est fomes ignis terreni, quia disponit ad combustionem, quanto magis talis erit ignis infernalis fomes. Atqui fomes peccati fomes est infernalis ignis, hoc est peccati mortalis, quod hoc igne punitur. Si ergo Filius Dei præsumi non potest, permissurus adhærere patri suo fomitem terreni ignis, quomodo ignis infernalis ac peccati fomitem eidem adhærere patiatur?

2. Traduci allata Ratio etiam ad **MARIAM IOSEPHI** coniugem potest. Vti enim huius & aliarum matrum proprium est, obseruare ignem, ne quâ ex fomite foras emicet cum periculo domûs, ita huius Deum parientis Sanctissimæ Matris, multò est proprium magis, illum alterum sibi ac filio suo molestissimum fomitem maturè extinguere; idque de facto alijs Sanctis, ijs maxime qui ad familiam Christi propius accessere liberalissime præstitit.

Sed hoc vltcrius non vrgeo, quia offert sese peculiaris necessitas virginei Matrimonij, ad quod propter præuisam Christi Incarnationem non solum **MARIA**, sed etiam **IOSEPH**, ab æterno, & ante omnem creaturam, prædestinatus est. Inter est nempe amborum istorum coniugum, vt sese inuicem Virgineè ament, aspiciant & procurent, itemque nè aliò oculos manus animùmque inclinent. Hoc autem quàm difficile est, in eo, qui fomite accenditur? Vtenim nil dicam de ipsâ **MARIA** Virgine, quam Salazar in lib. de immacul. Conc. c. 28. §. 2. cum Vasq. Suar. Valent. Barradiô & Cania

Canisio, propterea à fomite liberat, dic, obsecro, an non in hac triginta annorum commoratione magnum parere impudicitiae ignem potuit fomes omnibus ac singulis IOSEPHI membris innatus? At ego tamen de Virgineâ coniuge nil dico, quæ, ut alibi ostendam, cuicunque alteri puritatem se dignam afflare potuit. Solum æstimo plus nimio fragiles intuentium oculos, etiam perfectæ castitati aduersantes, in occasionibus innumeris, per quas penetrare se virtus nonnisi homine major contra innatum hunc hostem potest.

3. Suadet etiam hanc à fomite immunitatem ingens IOSEPHI cum MARIA Coniuge sua necessitudo. Vtique enim talem *Virum* ipse Deus eidem tradidit, qualem suo exemplo dari voluit in Naturæ innocentis Lege. At Gen. 2. v. 18, Deus inquit, *faciamus Adæ adiutorium simile sibi*. Dum ergo IOSEPHVM MARIÆ tradidit Deus, voluit hunc esse *adiutorium simile* eidem. At hoc quid factum sit cogitari non potest, nisi in IOSEPHO quoque fomes, vel extinctus, vel saltem repressus sit. Verissimè ergo dicitur, IOSEPHVM sine fomite natum fuisse.

ELOGIVM IV, IOSEPH

Nomini suo apprimè conformis.

Non solum hominibus, sed etiam Deo, magna inest nominum imponendorum cura, quam ipse etiam persepe per Angelos prodidit.

didit. Vt enim nil dicam de IESV Filio Dei, quem eo nomine vocari, Dei nutu, præcepit **MARIÆ & IOSEPHO** Gabriel Seraphinorum Princeps Michaeli proximus, vt Cornelius à Lap. in Lucam tradit; **MARIÆ** quoque ac **IOSEPHI** nomina per Evangelistam Lucam cap. 1. conceptis verbis, idem nobis Deus commendauit; *Missus est, &c. ad Virginem desponsatam viro, cui nomen erat IOSEPH, &c. & nomen Virgini MARIA.* Ipseque, Lucas postea, & Evangelistæ alij, imò & Angelus Domini, repetitis vicibus his eos nominibus sæpiùs, honoris videlicet causâ, compellarunt. Quas vices numerent sanè illi, quibus magis est commodum; ego interim rimabor, mysteria in **IOSEPHI** nomine velut Granatensi pomo recondita.

Et 1. quidem offert sese vnanimi Auctorum consensu illa Iacobi patriarchæ interpretatio, quidum Genes. 49. benediceret filio suo Ioseph, *filius, inquebat, accrescens Ioseph, filius accrescens, & decorus aspectu.* Talem enim filium significat hoc ipsum Ioseph nomen; & in se tam congruè expressit noster **IOSEPH**, vt non solùm *accrescens*, sed *augmentum Domini* (quod eodem nomine denotatur) dici mereretur. Nihil nempe tam magnum est, quod intra se non contineat *augmentum istud.* Est enim in eo dignitas Patris, dignitati Matris (quam S. Thomas in 1. p. q. 25. a. 6. ad 2. inter ea ponit, quæ habent dignitatem infinitam; quâque melius aliquid fieri nequit) proxima; est itidem dignitas Sponsi, quâ licet non sit par Sponsæ suæ omnibus
in re-

in rebus, est tamen par Conjugij vinculo, & similis castissimo corde, amore, affectuque; est adhuc affinitas inita cum Spiritu Sancto, de quo conceptus est IESVS in ejusdem Virgineâ vxore; est denique vniuersus Virtutum chorus, tali Patri, Viro, & Affini in eo gradu debitus, vt ne quidem mente assequar, in quo præterea assurgere possit.

Adhuc IOSEPH à Mayrone dicitur idem esse, quod *Domini iustus*. In quo idipsum, quod Matth. cap. 1. habetur impletum video, IOSEPH *autem vir ejus, cum esset iustus*, &c. De quâ iustitia suo tempore agam, id vnum hoc attigisse contentus, quod IOSEPH non tam suâ & coniugis causâ iustus fuerit, quàm Domini, cui se vt Auctori iustitiæ perfectissimè submisit.

Iam verò IOSEPH, siquidem Paulo de Barry Viro æquè docto, atque in ipsum deuoto subscribam, etiam *arborem pulchram, & ramum fructiferum prope oculum* significat. Instar enim arboris pulchræ, in qualem sinapi in Syria crescit, extendit quaquaversus se, obversans ante oculos Mariæ ac nostris, ita vt in ramis eius fructiferis crescant volucres cœli, hoc est homines scientiâ & sensu sublimes; itémque Reges & Principes cœlitus electi; atque ij qui se sanctorum desideriorum alis identidem in cœlum ad IOSEPHVM attollunt. Quæ dum attenta mente ruminarè hic loci diutiùs non possum, simul omnia Concionatoribus relinquo.

Quibus denique velut auctarium adiicio Bartholomæi Ricci quatruplicem expositionem; dum

B ;

IOSE-

IOSEPHVM interpretatur *profectum*, *parcentem*, *elevatum*, atque *existentem*. In quibus angustiae temporum non sinunt me immorari. Verbo tamen indico, quod volo. 1. *Profectus* est de loco ad locum prope assiduè. 2. Inimicis, & inter hos vtrique Herodi promptissimè *pepercit*. 3. Ipse quoque est cum anima & corpore *elevatus* in cœlum, ut ostendo Elog. 60. Demum 4. *Existentiâ* dignissimus fuit, utpote spectans ad primam Hierarchiam Creaturarum, ut docet Barry cap. 3.

ELOGIVM V.

IOSEPH

Ab omni peccato actuali immunis.

Paulatim procedas, oportet, cum periculum est, ne impingas. Et hoc ipsum tamen non sufficit semper, sed tibi cine, quò te fulcias, est opus; itémque Duce, qui te dirigat. Igitur, cum periculum huic ipsi Iosephino Elogio immineat, aut imminere videatur, incipio primò à minimis, & gradum protollo ad maxima, quæ sine minimis consistere non possunt. At minimum, quod docere de **IOSEPHO** possum, est immunitas ab omni peccato actuali mortali. Quam illi immunitatem tribuunt expressè penè omnes ij, quorum operâ præcipuè vtor; Gerson, inquam, Bernardinus de Bustis, Carthag. Gratianus lib. 5. mihi fol. 415, citans S. Augustinum, Barry, & alij. Nec video, qui
saluò

saluô hominîs Christiani officiô dissentire possit quisquam. Cûm enim ex vnâ parte Matth. i. v. 19. dicatur apertè iustus , ex aliâ nullibi dicatur aut proberetur iniustus , temerarius sim , si adhuc audeam dicere IOSEPHVM fuisse peccato mortali infectum.

Vbi tamen ego abstraho à dignitate tanti Viri, eiusque compertâ sanctitate, alijsque, quæ sanctitatem ac dignitatem secutæ sunt , prærogatiuis ; sed pono IOSEPHVM hominem esse nobis prorsus ignotum, solô tamen digito Dei, scripto testimonio commendatum , quô significatur omnibus eum esse Virum iustum. Fas igitur nemini Christiano, saluâ proximi charitate, imò & iustitiâ, est, immunitatis ab omni peccato actuali mortali famam, fidemque , sine sufficiente fundamento , eidem auferre

Iam autem progredior per destinatum iter, & dico 1. Si quis doceat, aliquem fuisse, qui non ex viribus liberi arbitrij , sed singulari gratiæ priuilegio peccata omnia venialia vitauerit , eum nec temerè, nec perniciosè errare. Sed hoc tu mihi forte non credes , qui testibus magis , quàm Rationibus moueris. Igitur exhibeo tibi S. Augustinum lib. de Spir. & litt. cap. 2. & epist. 95. Paratûsque sum Suarez, si exegeris à me , veluti publicæ fidei Notarium producere , ipsamque adeò Augustinum monstrare , vnde discas totidem verbis propositam Conclusionem.

Dico igitur 2. Ioannem Baptistam de facto
B 4 vita-

vitauisse omnia peccata venialia. Id enim me docent Galatin. 1. 7. de Arcan. cap. 9. & Catharin. opusc. 2. de Christi prædestinatione. Censetque Suarez Disp. 24. S. 4. hanc opinionem probabilem esse, licet oppositam, ipse, vt probabiliorem, sequatur.

Dico 3. IOSEPHVM, de quo mihi sermo est, sanctitate ac dignitate maiorem esse S. Ioanne Baptista. Hoc iterum nolo, vt credas mihi. Elogium enim 72. tot tibi Auctores ac testes huius adducit, qui, si iure experireris mecum, conuincere te possint, apud æquum iudicem.

Dico 4. Nec me, nec quemquam alium ex SS. Litteris, probare posse, IOSEPHVM non vitasse omnia peccata venialia. Idque vtique tam certum est, quàm certum est, nec me, nec quemquam alium ex SS. Litteris posse contrarium probare, scilicet vitauisse omnia.

Dico 5. Neutrum non solum me, aliòsque ex SS. Litteris, sed neque ex SS. Patribus, aut Ratione verè Theologicà probare posse. Neque hic Auctorem exhibeo; quia licet moraliter impossibile sit, vitare omnia, non est tamen impossibile vi gratiæ & priuilegij, vt patet tum ex dictis, tum, vt puto, ex communi Theologorum doctrinà.

Dico denique 6. In nullo Sancto post B. Virginem, atque in IOSEPHO, tot tantasque gratias inuenisse me; prout probant pleraque Elogia nostra; ac consequenter, præ alijs omnibus, IOSEPHVM, piè iustèque tamdiu haberi debere immunem ab omni actuali, tum mortali, tum veniali peccato,

ato, quoad aliquis pro opinione opposita suffici-
entem fidem, & quidem meis congruentijs, quas
mihi certas ob causas reseruo, maiorem afferat. Tu
autem Lector vides, stetisse me promissis; scilicet
paulatim, ac cum comitibus & ducibus incesse
me, ut periculum magnopere timere non debeam.

ELOGIUM VI.

IOSEPH

Plenus Gratiâ.

SI verè IOSEPH plenus est gratiâ, nihil jam ob-
stare poterit, quò minus, imitatione Angeli, E-
lisabeth & Ecclesiæ Catholicæ, ipsum quoque
salutem. Ave IOSEPH, *gratiâ plene*, &c. Verbis
Angelicæ Salutationis ad Ipsum à MARIA Con-
juge, exemplò jam per libros vulgatò translatis,
quemadmodum initiò Lucubrationis nostræ lege-
re potes, At plenum esse gratiâ, etiam Theologica
Veritas esse potest. Ut enim à minoribus ascendam
ad maiora, plenitudo gratiæ in genere potest esse,
sine præiudicio Fidei; imò debet alijs IESV &
MARIA minoribus sanctis concedi; ut Stephano
Act. 6. v. 8. *Stephanus autem plenus gratiâ*. Et Romanis
in Epist. Pauli c. 15. v. 14. *pleni estis dilectione*. At-
qui IOSEPH ex omnibus Sanctis proximè accedit
ad IESVM & MARIAM. Post istos igitur, nemo
magis, quàm IOSEPH, gratiâ plenus est, dicique
potest, etiam sine Fidei præiudicio,

Sed jam ulterius inspiciam , quæ tandem illa sit plenitudo IOSEPHO si non debita, certè conueniens. Inprimis nihil ei admixtum est mali. Ostendi enim immunem esse saltem ab omni mortali actuali peccato ; quod solum, post dimissum peccatum originale , gratiæ secundùm Theologos opponitur. Insuper verò , quidquid boni gratiæ inest, participat præcipuè IOSEPHVS. Id quod tum ex grauium Auctorum fide ; tum deinde principijs ab omnibus communiter receptis deduco. Ac 1. saltem in vtero sanctificatum esse docent Elogio secundo citati. 2. Confirmatum in gratiâ fuisse post Gersonem in Iosephina & alibi affirmant Barrad. l. 6. concord. cap. 8. Gratian. l. 5. de IOSEPHO c. 5. tit. 1. Carthag. l. 18. Hom. vlt. §. 1. Paulus de Barry c. 5. 3. Vsum rationis in infanti ætate acceleratum illi esse tradit Cotonus Conc. 4. § 2. mihi fol. 50. 4. Gratiâ & Gloriâ superiorem esse Apostolis, & Ioanne Baptistâ , defendunt Franc. Suarez Disp. 9. S. 2. Cornel. à Lap. in Matth. cap. 14 & alij infra Elog. 69. & 70. ac 71. citandi, vbi eum etiam supra Angelos extollam. 5. Propter magnitudinem gratiæ, præparatam illi in gloria à Patre cœlesti iam inde ab æternô fuisse sinistram I E S V dextrâ Matri relictâ ; ideòque hunc Zebedæi filijs Matth. 20. dixisse ; *Sedere ad dexteram vel sinistram, non est meum dare vobis, sed quibus paratum est à Patre meo* , MARIÆ nempe & IOSEPHO ; probat Carthag. lib. 4. Hom. 8. in fine comparans Patrem æternum , instar Tobiz Senioris pensan-

pensantis merita Angeli in juniorem Tobiam collata, hunc honoris gradum IOSEPHO optimè de Filio merituro decernentem.

Cæterum principia, vnde præsumi plenitudo gratiæ IOSEPHO superfusæ possit, hæc sunt. Primum est S. Thomæ in 3. p. q. 27. a. 4. Illos, quos Deus ad aliquid eligit, ita præparat & disponit, vt ad illud, ad quod eliguntur, inueniantur idonei. At officium, ad quod elegit IOSEPHVM Deus, est maius cuiuscunque alterius Sancti officio; vt docet Suarez cit. 2. Quò quis gratiæ & ijs qui gratiam dispensant, propior est, eò vberiore gratiam participat. At hic est IOSEPH proximus IESV & Mariæ, qui gratiam dispensant. 3. Conuenit, non solum in corpore, sed etiam in moribus & animò similitudinem maximam esse inter virum & coniugem diuinitus desponsatos. At tales sunt IOSEPH & MARIA. 4. Gratiæ plenitudo, commensuratur amorì diuino. Atqui inter IESVM, Mariam, & IOSEPH amor, omniũ Sanctorum amore, maior est. Amandi enim media ac motiua singularia habuit. 5. Infimum supremi semper est supremum infimi, vt inductione in Physicis Philosophi probant. At eadem est ratio in moralibus. Moralis autem ac supernaturalis supremæ Hierarchiæ, quam cum IESV & MARIA constituit, IOSEPH est infimus; vt ostendit Barry.

cap. 3, ex Gersone Serm. de Nat.

B. V. Ergo &c.

ELO-

ELOGIVM VII.

IOSEPH

Particeps omnium Benedictionum.

MARIAM benedictam esse, Fides docet, summè benedictam, Ratio Fidei innitens. Sed tamen Angelus Domini nonnisi, benedictam in mulieribus, pronunciauit, suum Sexui virili honorem relinquens, qui IESVM, MARIÆ Filium, agnoscit humani generis simul Ducem, & Redemptorem. Post ipsum quoque proximè incidit IOSEPHVS, paternô jure & amore benedictionem summam Viro conuenientem promeritus.

Sed vt ad vmbilicum metæ propiùs collimem, Conclusio mea est, IOSEPHVM, & meritum, & adeptum esse omnes benedictiones. Quæ Ratione magis, quàm auctoritate constat; quamvis neque ista desit, vt videre est apud Carthaginam lib. 5. Hom. 8. Sed hoc omisso potiùs in ipsos fontes scripturæ sacræ ingrediar; hic enim offerunt se nobis Benedictiones Iacobi Genes. 49. quæ suâ varietate videntur dici posse omnes. Illas modò percurram propriâ inuentione fretus.

Ac I. IOSEPH Ruben est, & ipse primogenitus Iacob, verè *videns filium* omnium filiorum maximum; qui licet sit inter omnes viros fortitudo patris sui, est tamen in IESV inter bestias natô, circumcisô, & ad mortem quæsito, principium doloris ma-

ris maximi: prior in donis gratiæ, maior in imperio in IESVM & MARIAM exercito v. 3.

2. Simeon *audientem*, Leui *copulatum* sonans hoc vnum, quod significant, IOSEPHO æmulandum relinquunt; qui non tantum audiens, sed obediens, nec tantum copulatus, sed vnitus, imò vnus cum IESV & MARIA est, vt videbis Elog. 82. & 83. ideòque licet Simeon & Leui diris potius decorus fuerit, ipse tamen haud dubiè magnopere benedictus fuit. Si enim beatus venter & beata vbera quæ IESVM exiguo tempore seruârunt, beatus est vtique etiam IOSEPH, qui annorum 30. spatio eadem dies noctesque inserviuit, v. 5.

3. Iudam qui *confessio*, siue *laudatio* est IOSEPHVS exprimit gloriosissimis factis; maximèque dignitate à nobis fratribus suis adorabili & fortitudine bellicâ contra hostes Spirituales, ac providentiâ totius familiæ suæ, nostrumque omnium, demumque ter felici aduentu Messiæ, qui dux de femore, siue genere ejus, egressus est, verè antiqua Gentium expectatio, ligans asinam, Synagogam inquam, subjugali pullo per Gentes significato, lauans, in vino sanguinis, stolam carnis suæ & nostræ, palliò gloriæ vestitæ, à v. 9.

4. Zabulon *habitaculum* IOSEPHO, ac cum hoc IESV recens nato dedit. Ipse adeò IOSEPH habitaculum IESV dici potest, positum iuxta mare Galileæ, & vsque ad Sidonem siue *judicij navem* pertingens, v. 13.

5. Illachar duo significat; *asinum offeum*, siue fortem,

fortem, & *premium*. Vtrûmq; IOSEPH conuenit, utpote fabro ad laborandum pro IESV nato factoque, indeque præmium expectanti, v. 15.

6. Dan *iudicium* denotat, vel ut alij volunt, *judicem*. Cujusmodi IOSEPH est, & nobis dat, non minus, quam tribus aliorum Sanctorum; qui etiam coluber est in viâ impijs, & instar cæcæstis Hæreticos in semitâ mordet, IESVM Saluatorem Mundi expectans, v. 16.

7. Gad quoque *accinctus & felix*, IOSEPH est, prælians ante IESVM prælia Domini, semper armatus pro MARIA, v. 19.

8. Non minus Aser, ipsa *beatitudo*, exhibet IOSEPHVM; est enim IESVS panis eius in Eucharistiâ pinguis, & delicias Regibus præbet, v. 20.

9. Iam verò Nephthalim pro *colluctante* accipitur; qualis tunc IOSEPH noster est cum instar emissi cerui fugit Herodem, annuntians Ægyptijs aduentum IESV, & dans Eloquia pulchritudinis; tum eidem IESV, tum MARIAE mulierum pulcherrimæ, v. 21.

10. Sequitur nunc *accrefcens* Ioseph tam similis IOSEPHO nostro, sicut ouum ouo. Ex eius benedictionibus pro nostro faciunt Verba hæc. *Benedictiones patris tui Iacob, &c. fiant in capite Ioseph, & in vertice Nazarai inter fratres*, v. 26.

11. Denique IOSEPH *filius dextera Excelsi Benjamin* est, instar rapacis lupi, mane ac vespere, hoc est semper, propugnantis Ecclesiam, ac spolia diuidentis in amatores suos, v. 27.

E L O.

ELOGIUM VIII.

IOSEPH

Miraculosè desponsatus MARIE.

SP. IGNATII effatum fuit, vt refertur in Dis-
rect. Exerc. cap. 15. fol. mihi 91. si miracula
homini de statu vitæ deliberanti expetenda à
Deo sint, eius vti voluntatem intelligat, expeten-
da esse pro matrimonij statu, cæteris statibus longè
difficiliore, & ad finem Gloriæ diuinæ cuius causâ
creati sumus, contingendum impeditiore. Quò mi-
nus sanè mirari possumus, Deum MARIE futuræ
sue Matri, Virginitatis voto, jam inde à prima æ-
tate, obstrictæ per tria insignia miracula aperuisse
viam, ad ineundum matrimonij statum. Quæ hic
curiosæ Lectoris pietati, quantum per Patres licet,
repræsentare animus est, notisque nostris illustrare.

Ac 1. comperto MARIAM Virginem æterno
Deo, eo, quo dixi modo consecratam esse, Pontifex,
de Sacerdotum consilio, ipsûmet Dominum,
quid fieri veller, consuluit. Ibi repenti de oraculo
& propitiatorio audita coram omnibus vox Do-
mini est, Isaiam requirerent, illique Virginem nu-
ptui ac custodiæ virginali traderent, in quo imple-
ta cernerent eius verba cap. 11. *Egredietur Virgo de
radice Iesse, & flos de radice eius ascendet, & requiescet
super eum Spiritus Domini.* Ita Castrius ex Hierony-
mo, de ortu & educ. Virg. Cuius quidem hoc opus
esse, dubitant aliqui. Sed tamen consentire in rem
viden-

videntur Patres alij; Gregorius, inquam, Nyssenus, Simeon Metaphrastes, Nicephorus, Epiphanius, & Cedrenus ab eodem Castrio citati, qui omnes Sortis interuentu cognitam Dei voluntatem testantur. Idque planè verisimile est factum, tum ob rei, quæ agebatur, magnitudinem, tum ob consuetudinem eius temporis, quo etiam vltro ad Sortiendum, & oracula exquirenda se Deus offerebat, vt patet ex Num. 17. Iosue 7. 1. Reg. 10. Act. 1. multisque alijs Scripturæ Sacræ textibus.

2. Adhæc Virgo votum suum, vtpote ipsum quoque diuino nutu susceptum, apud se pensans, cum quid ageret, non haberet, etiam ipsa confugit ad Dominum supplex atque obsecrans, ne quæ semel habuisset rata, rescinderet, mutaretque in vsus à summâ puritate, quam sectari statuisset, alienos. Nec diutius, Deus Virginem toto mundo cariorum sibi, moratus est; sed *Noli, inquit, metuere Virgo: quàm supra omnes prouidentia meâ complector, Virumque mihi placitum, ac Tibi, licet Virgini æternum permansuræ, placitum semper, de Sacerdotum ac Pontificum manu accipe.* Insinuat sanè apparitionem hanc S. Thom. in 3. p. q. 29. a. 1. ad 1. Castrius quoque apertè in Desponsationis historiam refert; qui similiter cap. 3. probat ex Patribus, MARIAM adhuc templo seruientem, frequentem fruitam Angelorum alloquio, complura Fidei mysteria diuinitus accepisse. Et quidem in hac Conscientiæ grauissimâ causâ (*uouentibus enim Virginitatem, teste Hieronymo, in 1. ad Tim. cap. 5. non solum nubere, sed etiam velle,*

damna-

damnabile est) apparitio aliqua, etiam necessaria, erat.

3. Demum Pontifex dicto die, cum nonnisi de David familiâ domoque MARIA stirpis vnicæ, & paternorum hæredi bonorum, Virum dare posset, iussit adesse, quotquot inde descenderent, conjugio aptos, Virgâque aridam manu prætere. Adfuit tum inter alios IOSEPH, & ipse Virginitatis retinendæ certus; qui primò Virgâ, quâ poterat arte, abscondit; dein verò Sacerdotum imperiò eleuans, enimverò seipsum clarissimè prodidit. Nam & floruit confestim Virgâ; & columba de cœlò advolans, eius apicem insedit; itaque Virginitatem subtimide præstolanti IOSEPH Sponsus adiudicatus fuit. Ita denuò Hieronym. Cui aliud quod addam non est, quàm id temporis, Deum non solum tanti, sed pluris etiam fecisse desponsationem hanc, quam olim Aaronis Pontificis electionem fecisse legitur. Num. 17.

ELOGIUM IX.

IOSEPH

Felicissimus Sponsus.

Altera modò, solâne de futurò sponsalia, an etiam de præsentî, contraxerit IOSEPH & resflorescente aridâ Virgâ manifestatus. Id namque proximè examinabò. Nunc autem id vnum declarandum est, quibus ex causis supremus

C

huma-

humane felicitatis gradus eidem IOSEPH ob hæc sua Sponsalia tribuatur. Inprimis tractarunt ante me argumentum istud Barrad. l.6.cap.8. Ribaden. in festo S. IOSEPH, Cornet in cap.1. Matth. Carthag. lib.4. Hom.5. & Suarez Disp.8. S.1.Ex quibus me doctrinam meam, certè occasionem eius accepisse, gratus profiteor.

Igitur 1. Felicitas Sponsi IOSEPH est in eò ordine, in quo est felicitas Sponsæ. Correlatiua enim sunt. At est felicitas Sponsæ MARIE, etsi nunquam peperisset, summa, propter eximia Gratiae & Naturæ dona. 2. Eadem correlatiua est felicitati Matris Dei, quæ sola summam gratiam inter puras creaturas inuenit apud Deum, quem peperit ipsi, tanquam Viro suo. De quo Viro S. Ioannes Damascenus Cant.3. in Natiuit. B.V. *Dicu*, inquit, *illum virum MARIE, hoc est prorsus ineffabile, & nihil præterea dici potest.* 3. Peccatum quoduis, & quidquid aliud speciali modò refertur ad Deum, accipit inde infinitatem aliquam, siue malitiæ, siue bonitatis. Atqui post MARIAM, & cum MARIA, refertur IOSEPH præstantissimò modò ad IESVM Dei filium, eius cum humanà naturà hypostaticam vnionem cõseruando, gubernando, nutriendo, &c. 4. Quæ felicitas importat intimam communicationem supremæ felicitatis, ea quoque suprema indidem est. At est IESV & MARIE felicitas suprema, & huius vtriusque intimam communicationem importat felicitas IOSEPHI; vtpote Patris, & Viri. 5. Summam oportet esse felicitatem eius,

eius, qui, bonum, quô quis, nonnisi perbreui tempore perfruens, ad ipsum felicitatis fastigium ascendit, possidet stabiliter per annorum plurimorum decursum. At sic ascendit Ioannes Baptista vnicâ Virginis salutatione, ac IESV nondum nati vicinitate, exultans; prophetizans, muri patris resolvens linguam, & in maternô vterô sanctificatus. 6. Huc etiam accedit, quod si qui partem thesauri occupat, felix sit, erit utique summa felicitas illius, qui totum iure & reapse possidet. At est felix Ioannes, cui IESVS pectus; Maria Magdalena, cui caput & pedes; Thomas, cui latus; Simon Cyrenensis, cui crucem; Petrus, cui claves; Martialis postea Lemouicensis Episcopus, cui brachia; Veronica & Abagarus, quibus faciem syndoni impressam dedit. 7. Qui eorum, qui viuendi genere æquales sunt Angelis, & filij Dei sunt, ac filij resurrectionis, caput & Dux est, illius est felicitas suprema. At Virgines (pro maribus ac fæminis accipio) utpote cum neque nubant, neque nubantur teste IESV apud Luc. cap. 20. v. 35. sunt tales; & earum caput & Dux est IOSEPH primus omnium ad Virginitatis votum à Virgineâ suâ Sponsâ indutus; de quo Elogio 14. pluribus agetur. 8. Eius est felicitas summa, cuius vita & mors est felicissima. At est vita & mors IOSEPHI felicissima propter alloquium, aspectum, conuietum, exemplum, magisterium, & auxilium IESV, quô supra mortales omnes, longissimo tempore, ad ipsam vsque mortem fruitus est; adeo ut cum triduo vnico ab-

C 2

esset,

esset, eum officij paterno maternoque jure admovere auderet Virgo. *Fili quid fecisti nobis sic? Ecce Pater tuus, & ego, dolentes quarebamus te.* Luc. 2. v. 48.

ELOGIUM X.

IOSEPH

Vir MARIAE, de qua natus est IESVS, qui vocatur Christus.

Fuere olim Doctores non contemnendi, qui nescio quò Zelo abrepti docere sunt ausi. Sponsalia, non matrimonium inter IOSEPH & MARIAM intercessisse; Eos nunc tempora nostra communi consensu, vel omnino damnant, vel opportunò moderamine interpretantur, solum negasse consummatum matrimonium. Cum his igitur interpretibus propugno, & ego matrimonium ratum IOSEPHI cum MARIA. Ita post S. Thomæ q. 29, a. 2. & alios bene multos Canisius l. 2. c. 11. Salian. mihi folio 760. Suar. in cit. q. S. Thomæ. Cornel. à Lap. & Barrad. in cit. c. Matth.

Ad id autem mouet me 1. quia verba Scripturæ Sacræ ut S. August. de Gen. ad lit. cap. 1. & 7. & sæpe alibi, cum Basil. hom. 9. in Hexameron, docet, & ipsa conuincit ratio, semper in sua propria significatione accipienda sunt, quando nullum inde sequitur absurdum. At est verborum Scripturæ propria significatio, quòd IOSEPH contraxerit cum MARIA Virgine matrimonium, Non contrahi-

trahitur autem consummatum. Ergo si nullum inde absurdum sequitur, contraxit matrimonium ratum. Probo verò jam contraxisse; Primo, quia Virgo dicitur desponsata Viro; & Vir, **MARIÆ**. Atqui Sponsus cum de matrimonio est sermo, non dicitur propriè vir, sicuti Sponsa non dicitur conjunx. 2. Quia non potest velle dimittere conjugem, qui conjugem non habet. At voluit occultè dimittere conjugem **IOSEPH**. Habuit ergo conjugem tunc. At hoc fieri sine matrimonio saltè ratò non potest. 3. Quia Christus etiam ab inimicis putabatur esse filius **IOSEPHI**, absque conuitiò illegitimi; ad quod proferendum vtiq; sua eos in ipsum concepta rabies impulisset, si verè, extra matrimonium, natum esse comperissent. 4. Quia aliàs genealogiæ Christi arbor malè diceretur inniti **IOSEPHO**. In eà enim Sponsalia de futuro neminem collocare possunt.

2. Mouent me Prouidentia diuinæ Rationes variae, quæ nisi cum matrimonio ratò nequaquam consistunt. Illæ autem sunt 1. Quia latere Demones oportebat Incarnationem Dominicam. At si **IOSEPHVS** vir egregiè Sanctus nullò matrimonij vinculo teneretur Virgini, longè adhuc magis pudicæ sanctæque, latere eos tam facile non poterat. 2. Quia haud sine scandalo, ne dicam periculo, potest diu Sponsus conuiuere Sponsæ suæ. At annis plurimis conuixit **IOSEPHVS MARIÆ**. 3. Quia malè consultum fuisset siue **IOSEPHO**, siue **MARIÆ**, siue etiam **IESV**, si indiuiduam vitæ societa-

tem non firmâssent perpetuo matrimonij nexu, æternâque relatione Filij, Matris, Patris, & coniugum. 4. Quia præsumi non potest, à MARIA IOSEPHVM, audiente Doctorum præcipuorum cætu, Patris nomen accepturum fuisse. Esset enim æquiuocatio, vt, quod minimum est, dicam, dedecens grauitatem Virginis. At accepit ab illâ clarissimis vtente verbis PATER TVVS ET EGO, &c.

3. Mouent me circumstantiæ multiplices, quæ, si bene ponderentur, non parum pro matrimonio rato sunt. Vt 1. Quia Lex Mosis non Sponsalia, sed matrimonium præscribit. 2. Quia Sacerdotes deuotam Deo Virginem & ab ipsis nubere coactam meritò timere poterant, ad nuptias non processuram, si à se liberam dimitterent. 3. Quia matrimonium figura est amoris summi, quò Christus in Ecclesiam fertur. At si non illud esset inter IOSEPHVM & MARIAM, nunquam data fuisset figura tanto mysterio vsquequaque idonea. 4. Quia decebat, non solum Virginibus, sed etiam coniugibus proponi exemplaria Virtutis, quæ imitationis gratia inspicere possent. At dari melius hoc Virgineo matrimonio non potuit. Ergo.

LVCERNENSIS.

ELOGIUM XI.

IOSEPH

Verò, licitò, sanctoque matrimonio MARIE Virgini obstrictus.

Non parum interest IOSEPHI, eius cum Virgine MARIA matrimonium omni ex parte perfectum agnoscere. Si enim Gregorius Nazianzenus, Gorgoniæ Sororis suæ maritum laudaturus, exclamare est ausus in Orat. II. *Vultis unò verbò viram describam? Vir fuit illius; nec enim scio, quid amplius dicere necesse sit; ad summam laudum maximarum faciet IOSEPHI, eum probare Virum MARIE fuisse. At hoc quis potest, nisi simul, ab iniuria omni, matrimonium eius vindicet?*

Ain' ergo tu, verum non esse? vnde obsecro, id habes? An quia matrimonij essentia sine copulâ stare non potest? At ego tibi ostendo, stare posse. Nam 1. matrimonium, nonnisi in mutua corporum traditione & potestate, consistit. At potest traditio & potestas, sicut aliarum rerum, ita & corporum separari ab usu; sæpèque de facto separatur, ut videre est in aliquibus Societatis nostræ Religiosis, qui etsi dominium retineant, v.g. hæreditatis paternæ, usu tamen carent, impediti voto paupertatis. 2. Parentes primi in paradiso verum matrimonium contraxerunt. At hoc ibi non consummârunt per copulam. Est ergo etiam matrimonium

ratum verum. 3. Florentinum Concilium quoque in decreto Eugenij ait, matrimonium perfici mutuo consensu. Et Trident. Sess. 24. disertè matrimonium ratum à consummato distinguit. Nihil ergo obstat, quo minùs, etsi matrimonium IOSEPHI nonnisi ratum sit, verum tamen & validum sit.

Sed iam licitum esse, negabis forsitan. Quid ita autem? an quia de re non sua, de suis inquam corporibus Deo, per votum perpetuæ Virginitatis, traditis contrahere? an quia, contra naturam matrimonij, corporum traditionem & potestatem, non ordinârunt ad id, cuius præcipuè causa fit; nempe ad copulam, sed potius excepere contra illam, similes ijs, qui tibi panem donarent, cum conditione ne quis eo aliquando vescatur? an denique nimia sanguinis propinquitate impediti propter legem aliquam Moïsis vetabantur contrahere?

At ostendo, nihil istorum iure dici posse. Nam 1. licet utique contrahere de re non sua, si Dominus consentiat. At consensit hic Deus, ut antè ostensum est. 2. Votum non importat obligationem Iustitiæ, sed solum Religionis. Possunt ergo hæ duæ obligationes à se mutuò separari; potest inquam aliquis obligari ex Iustitia, quin obligetur ex Religione; & vicissim. 3. Dupliciter ordinatur matrimonium ad copulam. 1. Ut ad obiectum. 2. Ut ad effectum. At est posterior ordinatio merè accidentalis; prior verò sola essentialis, quam etiam Virginei coniuges habuerunt, quorum matrimonialis

nialis consensus directè ferebatur in traditionem & potestatem corporum, indirectè autem in copulam ijs per modum objecti connexam. Ita Dicastill. Disp. 2. à num. 20. 4. Instantia panis prorsus inepta est; quia ideo tantum accipitur, ut nutrimentum habeamus. 5. Neque Lex vlla Mosis vetans adduci contra consanguinitatem potest.

Sic ergo, qui se adhuc matrimonio isti opponere velit, ad solam eius sanctitatem oppugnandam se ut conuertat, necesse est. At hoc qui tandem vel in speciem præstabit? Quid enim sanctius esse potest, quam vi Virginei matrimonij tutari famam Matris Dei; eamque cum IESV Dei filio custodire, alere, vestire, ac gubernare? Sola obstare bigamia sanctitati huic tantæ videtur posse. Verum illam quoque ipsam non multò post indidem auferam, aptiore loco.

ELOGIVM XII.

I O S E P H

Dignus MARIE dexteram contingere, annulo ornare, ac eam pallio obnubere.

IOSEPHVM cum MARIA Matrimonium contraxisse, *Majorum more & ritu*, dubitari non potest. Est enim, id etiam jam inde à Lege Naturæ, Sacramentum, non illud quidem propriè tale, quod gratiam, quam usu suo confert, significat, sed impropriè, quatenus est signum rei sacræ institutum à

C 5

Deo.

Deo. At est, fuitque etiam olim Matrimonium, signum à Deo institutum amoris, quò per Christum Deus fertur in Ecclesiam, ut ex Leone Ep. 92. ad Rustic. cap. 4. & August. l. 1. de nupt. & conc. cap. 21. probat Coninc Disp. 24. dub. 2. n. 11. fol. 728. Idoneis ergo cæremonijs obire par erat, ut rectius sanctitatem signi exprimeret apud eos, qui minimos legis & traditionum apices studiosissime sectabantur. Subsumo autem: At hæc, quæ titulo præscripta sunt, requirebat, siue Lex vetus, siue rectius traditio antiquissima Iudæorum. Non ergo ex illis aliquid prætermisum à IOSEPHO & MARIA esse, dici potest.

Ac 1. quidem Tobiz 7. v. 15. vbi Raguel filiam suam dicitur secundum Legem Moïsis despondisse Iuniori Tobiz, habentur hæc verba. *Et apprehendens dexteram filia sua, dextra Tobiz tradidit dicens: Deus Abraham, & Deus Isaac, & Deus Iacob vobiscum sit, & ipse coniungat vos, impleatque benedictionem suam in vobis, & acceptâ chartâ fecerunt conscriptionem conjugij.* At est Raguel juxta etymon nil aliud, quam *Pastor Dei*, qualis hîc haud dubiè summus aliquis Sacerdos fuit coniungens eo modo Saram, **MARIAM** inquam, quæ verè est *Domina odoris*, Tobiz, siue *bono Domino*, hoc est, IOSEPHO, quò melior Dominus post Deum nec fuit, nec est, nec erit.

Deinde annulum lego dedisse novæ nuptæ Sponsum, Genes. 38. & quidem annulum aureum, Patrem prodigo filio cum nuptiali veste obtulisse, Luc. 15. Quæ tamen, fateor, haud satis convince-

vincerent, imitatum esse IOSEPHVM. Verum trahunt me alia, ac penè credere cogunt, Historias IOSEPHO proprias recensentem. Cecinit enim iam dudum in Iosephina dist. 5. Gerson;

Miro Parrhysijs templum molimine structum est.
Annulus est illic duplex, cui gemmula duplex,
Auro conseritur tenui, quos, Virgo, ferunt te
Cum digitis aptasse tuis, est abdita Zona,
Incertum tibi vir si tradidit ista subarrans.

Perusina etiam ciuitas 22. Ianuarij, quò diuersis in locis Desponsatio MARIE cum IOSEPH festa religione colitur, annulum eius pronubum aureæ capsæ vndecim seris inclusum venerationi publicæ exponit, prout ad annum Christi 1480. Bzouius commemorat.

Hic autem mihi simul in memoriam venit symbolica annuli significatio, quam ipsi puto IOSEPHO potuisse placere. *Annulus* enim, ait Beda, synceræ fidei signaculum est. Idem est vt refert Cornel. à Lap. in 15. Luc. fol. 197. col. 1. Chrysost. in *Catena signaculi salutaris Symbolum*; & in Glossa, *signaculum fidei*, quò signantur promissa in cordibus credentium; & Interlin. *Signaculum similitudinis Christi*, & *expressio veritatis*; & Augustin. *Spiritus S. signum*: gratiæ enim participatio significatur per digitum, in quò venulæ quædam ad ipsa cordis penetralia ducuntur; vt Anatomici apud Carthag. lib. 4. Hom. 5. tradunt; & habetur cap. fæminæ 30. q. 3. Quæ alij, vt volent, ingenio excolere poterunt.

Sed

Sed me nunc vocat Iosephini pallii super Virginem expansio; qualem Ruth, *Saturata*, cap. 3. à Booz fortitudinem significante desponsationis causâ petiit. *Expande*, inquit, *pallium tuum super famulam tuam*. Tegere nempe Vir debet providentiâ suâ coniugem, & velut pallio à tempestatibus integram servare. Sed hîc meritò dubitas, annon potius virum texerit servârîque MARIA coniunx. Certè propter hanc omnia pariter bona venerunt IOSEPHO, Sap. 7. v. 11.

ELOGIUM XIII.

IOSEPH

Primus Virginum, Coniunx.

O Stendi, IOSEPH MARIE Virginis non solum Sponsum, sed virum, coniugem, maritumque ritè inauguratum fuisse. Superest modò, ut Virginem, & quidem inter Virgines primum coniugem fuisse demonstrê.

Et Virginem quidem fuisse, negabant olim non pauci Patres à Carthag. lib. 4. Hom. 3. citati, quos ibidem legere poterit, qui IOSEPHO diffidit. At affirmant remotò bigami conuitiò Virginem cum Virgine perstitisse, Hieronymus contra Heluid. *Tu dicis*, inquit, *MARIAM Virginem non permansisse: ego mihi plus vendico, etiam ipsum IOSEPH Virginem fuisse per MARIAM, ut ex Virginali conjugio Virgo filius nasceretur. Si enim in virum sanctum forni-*

fornicatio non cadit ; & aliam eum uxorem habuisse non scribitur , &c. relinquitur Virginem eum mansisse cum MARIA. Augustin. Serm. 15. de Natiuit. Beda in cap. 2. Ioan. & lib. 2. in Marc. cap. 23. Petrus Daman. epist. 11. ad Nicol. cap. 4. Anselm. in 12. & 13. Matth. & ad Galat. 1. Rupert. lib. 2. in Cantic. S. Thomas in 3. p. q. 28. a. 3. ad 5. multisque alijs locis: Gerson. in Serm. de Natiuit. B. V. Canisius, Suarez, Castrius, & communis, solis nunc Hæreticis exceptis, qui IOSEPHVM sibi similem mallent.

Porro Rationes nostræ sunt ; 1. Quia status gratiæ, quando perfectissimus est ; simillimus est innocentiae Statui, illi, inquam, qui fuit in paradiso. Atqui fuit is perfectissimus in IESV, MARIA, & IOSEPHO. Ergo Status gratiæ in IESV, MARIA, & IOSEPHO fuit simillimus Statui innocentiae, siue paradisi. Atqui fuit Status hic Status Virginitatis, Ergo. 2. Qui moriens matrem suam non nisi Virgini commendat ; præsumi non potest eam viuens alicui alteri, præterquam Virgini commendauisse. At IESVS moriens matrem suam non nisi Virgini commendauit ; Ioanni nempe sub Cruce stanti. Ergo. 3. Si IOSEPH bigamus esset, magis esset dissimilis MARIAE. Ergo non est dicendus bigamus esse. Consequentia patet, quia aliàs elegisset MARIA adiutorium minus simile sibi. Antecedens verò constat, quia utique Virgo Virgini similior est, quam bigamus Virgini. 4. Bigamia cor viri diuidit ; auget curas, ministerium distra-

distrahit. Ergo IOSEPHO minus conuenienter tribui potest. 5. Ij, qui modò dicuntur fratres Domini, fuère filij alterius Viri, & Matris, quàm IOSEPH & MARIAE. Ergo filij IOSEPHI & MARIAE esse non possunt. Antecedens probatur, quia sic Iacobus minor, & Iudàs Thaddæus Apostoli, itémque Ioses siue Ioseph, & Simeon siue Simon, Discipuli, qui fratres Domini dicuntur, Alphæi siue Cleophæ, aut ab alijs Clopæ dicti filij sunt, nati matre, Maria Cleophæ, intellige vxore, de quibus Elog. 19. dicitur.

Iam verò posterius quoque propugnandum est, quòd scilicet IOSEPH primus Virginum coniunx fuerit. Vbi vtique Verba omnia simul componenda sunt. Nam primum Virginem fuisse, quis somniet? Præiùere IOSEPHVM Abel à Caino occisus, Iosue, Melchisedec, Maria soror Moïsis, Elias, Elisæus, Hieremias, Daniel, cuius corpus Damasc. lib. 4. de fid. cap. 25, ait, Virginitate ita obduratum fuisse, vt Leonum dentes infigi illi non potuerint; tres pueri Babylonico igne superiores, Esseni, Virgines pro Salomonis templò excubantes, &c. vt Barrad. lib. 7. cap. 8. docet. Solum ergo ex Virginibus, quæ nempe Virgines perstiterint, primum fuisse coniugem IOSEPHVM pronuncio. Et Ratio est, quia nulla Virgo coniunx afferri prior potest. Quæ enim allatæ sunt, coniuges nunquam fuère; vel cum ingressæ coniugium sunt, jam excidère propositò Virginitatis, solâ morte præuentæ, ne prorsus priuarentur.

ELOGIVM XIV.

IOSEPH

Primus Virginum æmulatus votum Virginitatis à MARIA emissum.

Virginitas, religiosa nempe, perfecta, ac perpetua, vnius Ecclesiæ Christi singulare donum est, vt Canisius de B. V. lib. 2. cap. 12. fol. 205. sapienter obseruat. Eò magis autem oportebat eos, qui primi Ecclesiam hanc, ipso Duce, constituere, hoc ipsum Virginitatis decus anteferre cæteris. At fuit inter hos IOSEPHVS dignitate, gratiâ, ac prærogatiuis facile maior, vt fusè per complura Elogia docebitur. Non ergo idem decus abesse debebat etiam à IOSEPHO. At est consuetudo hominum vbilibet recepta, vt ea, quæ pretiosa sunt, annulò consignentur, serisve concludantur. Nihil autem Virginitate pretiosius est. Nihil etiam magis annuli seræque naturam exprimit, quàm Votum, quò Virginitas, & quæcunque alia Supererogationis, vt vocantur, opera, Deo consignantur, atque tam arctè connectuntur, vt neque ipsa à vouente, neque vouens à Deo auelli, vllò vnquam tempore, possit. Hoc ergo voto etiam IOSEPHVS Virginitatem suam, ceu annulo, serâve Deo consignauit.

Neque sanè est, quod à me quæras, quæ annulo isti imago incisa fuerit. Circumspice enim tempus,

pus, quo eum primò fabricatus est. Nulla tum imago siue exemplar vouendi erat præter vnicam **MARIAM** Virginem. Hæc prima mortalium in eam cogitationem venit; prima, inquam, in ætate prima, templi Salomonici parietibus inclusa, se suamque Virginitatem voto consignauit. Docet hoc **Abdias** lib. 8. *Hist. Apost.* *Hæc Virgo*, inquiens, *cum execraretur omnem Virum, &c. Virginitatis votum prima vouit. Primam autem ideo dixi, quia ex quò homo factus est ab initio seculi, nulla hoc votum Deo obtulit. Hæc ergo prima inter feminas constituit in corde suo, ut diceret: Domine, offero tibi Virginitatem meam; cum hoc à nullo homine, nec verbo didicisset, nec exemplo* Ita **Origines** in cap. 13. **Matthæi**. **Ambrosi.** de instit. Virg. cap. 5. **Gregor.** referente **Strabo**, in 1. **Lucæ**. **Ildéphons.** Serm. 5. de Assumpt. **Beda** lib. 1. in **Luc.** cap. 3. **Rupert.** l. 3. in Cantic. **Honorius** lib. 3. de æter. gaud. **Albert.** super Missus est cap. 82. **Bernard.** Serm. 4. de Assumpt. **Bonav.** l. 1. pharet. cap. 5. & alij, quorum verba **Castrius** cap. 3. & **Carth.** lib. 3. **Hom.** 5. prolixè referunt; quos perlegere, pretium est operæ.

Hanc ergo Virginem solam potuit **IOSEPHVS** statuere imaginem sui istius annuli, de quo agimus, & imitatione celeri suo corde imprimere. Sed quid dico, potuit? reipsa statuisset, & impressisset, ait **S. Thom.** in 3. p. q. 28. a. 4. ad 3. & quidem communi vtriusque consensu. Plures autem alij præcisè docent **IOSEPHVM** vouisse. Quod ipsum tamen ad hoc, quod præcipuè intenditur, satis

fatis est. Cum enim matrimonium ex naturâ suâ sit contractus mutuus, quô tam vir se tradit fœminæ, quam fœmina viro, neuter alteri præiudicare potest. At hoc haud dubiè fieret, si IOSEPH vir MARIÆ, traditum corpus, eâ vel insciâ vel inuitâ ad alium transferret. Æmulatus ergo, siue exemplum conjugis, siue certè voluntatem, quod perinde est, credi debet.

Quæris autem, primûsne Virginum negativè sit, an etiam positivè. Vtrumque affirmo; & illud quidem, quia saltem ex viris IOSEPHVM tali votô nemo antecessit; hoc verò, quia innumerabilis Virginum exercitus subinde huius sui Ducis signa secutus est. In quo exercitu si de conjugibus tantum Virgineis loquar, etiam inter illustres familias paria duodecim numerat Carthag. lib. 4. Hom. 5. At quanto maior est exercitus aliarum Virginum, quæ se æterno Sponso, torô passim Mundô, nunc deuouent, tum intra Religiosa claustra, tum foris, sequentes Agnum, quocunque ierit, Apocal. 14.

Est ergo & negativè & positivè, primus Virginum Deo consecrantium se, IOSEPH.



ELOGIUM XV.

IOSEPH

Dominus **MARIÆ**, **Dominæ** **supremæ.**

INeomparabile ac prorsus singulare est, inquires, hoc **IOSEPHI** Elogium, si verum est. At verum esse vno tibi clarissimo syllogismo demonstrabo.

MARIA est **Dolina** **suprema.** **IOSEPH** est **Dominus** **MARIÆ.** Ergo **IOSEPH** est **Dominus** **Dolinæ** **supremæ.**

Nega mihi hîc, Sodes, quidquid voles; vnam excipio consequentiam, quam te Logica docere debet. Sed in biuiô propositionum constitutus hærebis scilicet, vtram negare possis. Præueniam ergo te; & Maiorem ipsemet probo.

1. Mater Domini supremi est **Dolina** **suprema.** **MARIA** est Mater Domini supremi, Christi inquam, cuius regni non erit finis. Ergo **MARIA** est **Dolina** **suprema.** 2. Quæ **Dolina** gyrum cœli circuiuit sola, & profundum abyssi penetravit in fluctibus maris, & in omni terra stetit, & in omni populo & gente primatum tenuit, vt Ecclesiastici 24. v. 8. dicitur, ea vtique est **Dolina** **suprema.** At talis **Dolina** **MARIA** est, dominans cœlo, abyssu duplici, purgatorij & inferni, fluctibus maris ventorum impetu agitata, terræ quoque omni, omnique populo & genti. Ergo **MARIA** est **Domi-**

Domina suprema. 3. Quæ dominium vniuersale totius mundi, obtinet iure diuino, & naturali, meritis suis, titulo donationis, atque emptionis, ea est Domina suprema. At his omnibus modis illud obtinet MARIA. Hanc enim Deus vt Athanasius verba Proverb. 8. v. 22. legit, præfecit iam inde ab æterno initium viarum suarum. Huic se Christus, vt filium Matri, suæque bona omnia, iure naturæ verissimè subiecit, vt Maldonatus in cap. 2. Lucæ agnoscit, negans emancipatum fuisse ab æterno Patre. Hanc Anselm. de excell. Virg. cap. 11. prædicat meritis suis cuncta reparasse, reparando scilicet genus humanum per se ac filium suum, quem peperit Deo, ac obtulit. Huic etiam, suus & Dei Filius, donauit omnia, ceu Salomon, hoc est, *pacificus*, Bethsabæe, siue *domini iuramenti*, in quâ iurauit Dominus Domino meo, cum dicto 3. Reg. cap. 2. v. 20. *Pete Mater mea: neque enim fas est, vt auertam faciem tuam*, ei scilicet causam præbendo auersionis talis. Hæc denique, dum Carnem & Sanguinem Filio dedit, simul dedit pretium, quo dominium vniuersale, emptionis titulo, sibi compararet. Quamdiu ergo hæc ipsa Caro & Sanguis MARIE est, tamdiu eidem tribui debet vniuersalis dominijs emptio.

Simul minorem quoque præbo. 1. quia, vt est in 1. ad Corinth. 11. v. 3. & ad Ephes. 5. v. 22. *Caput mulieris Vir*. 1. Pet. cap. 3. v. 1. *Mulieres subdite sunt viris suis*, Genes. 3. v. 16. *Sub viri potestate eris*.

2. MARIA istam mulieris subiectionem palam professæ est. Vt enim Brigittæ lib. 6. cap. 59. & lib. 7. cap. 29. reuelauit; IOSEPHVM Dominum suum compellabat & obseruabat. Ideoque Gerson in Serm. de Natiuit. *O miranda prorsus, inquit, IOSEPH; sublimitas tua, ô dignitas incomparabilis, vt mater Dei, regina cæli, Domina mundi appellare te Dominum non indignum putauerit.* Vbi mihi in mentem veniunt, quæ tibi quoque mi Lector venire volo, verba Christi ad Ioan. prolata Matth. 3. *Sine modò: sic enim decet nos implere omnem iustitiam.* Per ly, nos, quis magis intelligi potest, quàm ij, qui Christo coniuncti sunt. At nemo est coniunctior MARIA. Si ergo IOSEPH cunctabatur præcipere aliquid; sine, inquiebat modò, nos enim, IESVM inquam, & me matrem eius, omnem iustitiam implere decet. Igitur IOSEPH verè Dominus fuit Mariæ Dominæ supremæ.

ELOGIUM XVI.

IOSEPH

Perpetuus Comes Mariæ.

PRætereo hîc dignitatem Comitum, inter palatina aulæ officia iam inde à primis Cæsari-
bus relatam. De quâ, qui laudem IOSEPHO accersere velit, non est necesse, vt ad interiora doctrinæ cœlestis penetralia se inferat, Comitem ego perpe-

perpetuum **MARIÆ IOSEPHVM** statuo, significatione vocis omnibus, qui Latine sciunt, notâ; quod nempe, ex quo semel illi adiunxit se, nunquam abiunxerit amplius, nisi forsitan necessarij operis causâ, ad perbreue tempus, cuius interruptio non possit venire in censum.

At opponunt se epinioni nostræ nec pauci Auctores, nec contemnendi, dicuntque fauere sibi **Luc.** qui dum cap. i. commemorat festinatam **MARIÆ** ad Elisabetham profectionem, moramque trimestrem, **IOSEPHI** nuspiam meminit; nec meminisse posse videtur, propterea quod tum primum, ubi in patriam reditum est, dicat **MARIAM** inuentam esse in vterô habentem de Spiritu Sancto.

An igitur tempori, foro, causæque cedendum? Non finit me Veritas, ut cedam, nec prætensa Ratio. Nam an Lucas omnium, quorum mente tenus meminit, etiam calamo vocæque meminisse debuit? Nonne **S. P. IGNATIVS** vir rerum diuinarum apprimè callens, cum videret, non deesse, qui simili ex causâ negabant **IESVM** è sepulchro resurgentem suæmet matri apparuisse, in **AVREO EXERCITIORVM LIBRO**; objeci posse asseruit, *adhuc & vos sine intellectu estis?* Tum verò quo quæso in capite versûque siue Lucas, siue Evangelista alius cogitationem illam de dimittendâ Virgineâ Coniuge, ait, animo **IOSEPHI** iniectam post reditum eius? Equidem nus-

piam vel verbum reperio. Quid si ergo eidem IOSEPHO Angelus Domini à Matre digrediens, lætissimum hunc nuncium, attulerit? quid si ipsa hæc Mater illi suo viro mysterium hoc aperuerit? quid si idem Angelum loquentem coniugi suæ coram vel ex propinquo audiuerit? Hoc sanè tam incredibile non est, quàm fortè opinetur quis, ignorans hosce coniuges cohabitasse sibi conceptionis tempore. At docet hoc Suar. Disp. 7. S. 2. cum Chrysost. Hom. 4. in Matth. Nyssen. in Orat. de Christi natiuit. Epiphan. hæc. 78. Docentq; hoc etiam Patres alij à Castrio cap. 4. num. 20. citati. Quid si deinde in Elisabethæ domo, aspectuque, & auditu, rerum tam mirabilium in eas angustias coniectus est? Tu quidem in fine colliges, quæ nostra sit mens.

Interea verò, ut quæ mihi propiora sunt propugnem; Affero, IOSEPHVM, etiam in montana Iudææ, Cariath-Arbam nempe, properanti Virgini, ibidemque commoranti trimestri spatio, ac inde redeunti, comitem adhæsisse. Ita Bonav. in Med. Vitæ Christi cap. 5. Isolanus in Vita Virg. Gerson dist. 6. Iosephinæ Litt. I. & K. Eckius mihi fol. 257. pag. 1. Caietan. in 3. p. q. 29. a. 2. Barry cap. 7. Medit. 4. Bonifac. lib. 1. cap. 11. Carthag. lib. 6. Hom. 1. Suarez Disp. 7. S. 2. Masell. de vita Virg. lib. 2. & 4. Salmeron tom. 3. tr. 10. Orascus declam. 5.

Rationes autem meæ sunt; 1. Quia vel IOSEPHVS

SEPHVS tunc solùm fuit Sponsus; vel maritus. Si prius, euanescent matrimonij causæ. Si posterius, defuit officio IOSEPHVS non parum necessario. 2. Nihil indecens de Virgine hac præsumi potest. At indecens est per milliaria 95. (ita Riccius computat vsque Hebron siue Cariath-Arbam) proficisci, tantoque tempore abesse à Viro sanctissimo, 3. IOSEPHVS ne quidem triduò auelli à IESV duodenni potuit, quin ipsum requireret, etsi semper manserit cum Matre IESV. Multo minùs ergò credi potest incontinentam tanto tempore dimisisse simul IESVM & Matrem. 4. Dubitatio de incontinentiâ Virginis non fuisset propria IOSEPH, sed communis omnium ac præcipuè Hostium IESV. At hoc factum non est. 6. Nemo magis obseruatur, quàm Sponsa à Sponso. 7. Si prius IOSEPHVS MARIÆ solùm desponsatus de futuro fuisset, postea nec causam timendi, nec causam acceptam coniugem dimittendi habuisset. At habuit vt colligitur ex Luca. Prius ergo accepit, tunc scilicet, quando Virga Virginem Virginis prædedit.



ELOGIVM XVII.

IOSEPH

Præfectus primus Congregationis MARIE Virginis annuntiatae.

IGnoscite ROMANI SODALES, qui in Almar Urbis Templô sub Virginis MARIE annuntiatione titulo constituitis primam primariam Congregationem reliquarum omnium, quæ toto passim orbe sub cura Societatis IESV, exemplo vestro, ductûque eriguntur, si vestro videar honori derogare. Videor enim tantum; at reipsa honorem longè maximum concilio vobis, tum auctoritatis, tum sanctitatis, cuius omnes percupidi sumus.

Est nempe IOSEPHVS PRIMVS VESTER PRÆFECTVS, illâ vtrâque laude ita præstans, ut nemo magis. Cum Deus ipse verè primæ primariæ Congregationi in Nazarethana Domo erectæ, penè necessitate quadam initio statim Præfectum designavit. Cum enim in eam nonnisi IESVS, MARIA, ac IOSEPH, & si placet, Gabriel Seraphinorum princeps, nomina dedissent, audeo dicere, suffragij passivi iure ex his quatuor Sodalibus solus atque vnicus gaudebat IOSEPH.

Idque inductione probo. euidenter. IESVS namque 1. infans erat, in ipso quidem primo conceptu suo, corpore simul & animo perfectissimus, ut Ba-

vt Basiliius Hom. 25. de hum. Christi gen. & Ang. Doctor, in 3 p. q. 33. a. 2. testantur, veruntamen agendi genere alijs infantibus similis, & ideo regendi incapax. Deinde MARIA quoque, utpote fœmina viro subiecta, eidem vicissim imperare non debebat. Tandem Gabriel inuisibili natura præditus nihil pæne nobiscum commune habet, & ideo potius Minister ac monitor Congregationis, quàm Præfectus eligi potuit, prout insinuat Apost. ad Hebr. I. v. 14. *Nonne omnes sunt administratorij Spiritus, in ministerium missi propter eos, qui hereditatem capient salutis.*

Reliquum ergo erat, vt IOSEPH, qui solus supererat, in quo nemo quidquam desiderare posset, hoc Præfecti munus capesseret, tractaretque. Sanè, si quod res est, loqui velimus, ynà cum comunere, etiam Assistentis, Secretarij, ac Consultoris partes omnes, sapientiâ ac fortitudine maximâ, per omnem vitam, sustinuit atque impleuit. Idque ipsa eius opera, etiam tacente me, abundè contestantur; vt adeò mirari debeat nemo, hac postremâ mundi ætate ad interitum inclinante Marianas Congregationes subiecisse se etiam IOSEPHO, ceu Atlanti cuidam cœlesti; eumque Patronum & Aduocatum suum apud Deum Deique Matrem, quibus gratissimus est, voce ac syngraphâ publicâ, adoptauisse. Mirari potius debeo Maiores nostros tam diu defuisse sibi suisque ærumnis, quibus conflictabantur, & prope ignorâsse IOSEPHVM. Sed eius cau-

fas, sub finem laboris nostri, quia minùs sunt notæ, persequar.

Nunc verò, laudare conuenit Iosephini amoris licet serò erumpentem flammam, quam ipse haud dubiè accendit in nobis IOSEPHVS, à charissima coniuge diutius separari non ferens. Ille *Ius-Patronatus* nostri ijs omnibus modis, quibus mereri quis potest, promeritus est, Templum simul, templiq; aream, ac dotem constituens in MARIA Virgine, quæ templum est Spiritus S. in pulcherri-
marum Virtutum areâ, quam aperuit sanctitate vitæ, in intercessione multiplici, quam dotis nomine suis sibi deuotis Clientibus dedit. Sed tamen ad *Beneficia* cœlestia neque digniores, neque etiam dignos clientes suos promouere tenetur. Sufficit illi Reum esse, & comparere, vt Reum, quisquis opem eius expetit. Ideoque Patroni titulo, Aduocati officium, adiungit; quia Aduocatus esse non potest, nisi etiam Reus sit. Reum ergo profiteri te, quisquis IOSEPHVM patronum & aduocatum tuum vis experiri.



ELOGIUM XVIII.

IOSEPH

Proximus IESV & MARIE Consanguineus.

SI ostendam, IOSEPHVM tam esse IESV & MARIE propinquum Consanguineum, vt propior esse non possit, verè ostendam eum esse IESV & MARIE Consanguineum proximum. At ostendi prius penè ad oculum à me potest. Ergo IOSEPHVS est proximus IESV & MARIE Consanguineus, quod Elogium præsens dicit.

Probo autem minorem. Quia 1. non potest esse Consanguineus IESV in 1. gradu, Neque enim est eius carnalis pater, frater, aut filius. Nec deinde potest esse in 2. Non enim est auus IESV, quia non est pater MARIE: nec nepos IESV ex fratre aut sorore; quia ipse est vnigenitus Matris suæ. Si ergo velim adhuc, præ alijs omnibus propiorem esse, dicere debeo, esse in 3. gradu. Et hoc est, quod volo, vnicèque contendo. Si enim habeam, esse in 3. consanguineum IESV, iam etiam habeo, esse in 2. MARIE, nisi dicere quis audeat, esse in 4. quod auditu impium, propterea quod neque MARIA filio alio carnali, quàm IESV, neque etiam IESVS filijs alijs, nisi Spiritualibus gaudeat. At verè possum & dicere debeo, IOSEPHVM esse

Con.

Consanguineum IESV & MARIÆ in 3. gradu. Est enim eius filius, cuius soror est Anna, mater MARIÆ & auia IESV. Nempe in Mathan tanquam communi stipite conuenit tum generatio Annæ, MARIÆ, & IESV ex vna parte; ex alia verò generatio IOSEPHI indidem descendens. At dantur sic vsque ad IESVM generationes tres; ad IOSEPHVM verò duæ, scilicet vna ad Iacob, qui frater Annæ fuit; & altera ad IOSEPHVM. Si ergo nunc calculos ineam ritè, est IOSEPHVS in 2. ad 3. respectu IESV, & in 2. respectu MARIÆ; quò propior Consanguinitas inter eos, qui ex diuerso matrimonio oriuntur, dari nequit. Vel enim instituitur quæstio facti; & hæc paulò ante clarè composita est: vel quæstio iuris; & hæc ab aliquibus tollitur, propter repugnantiam naturæ; ab alijs, vt Dicastil. Disp. 7. dubit. 23. quo cum ego sentio, propter mutuam reuerentiam sanguini debitam. Est ergo IOSEPHVS proximus IESV & MARIÆ consanguineus.

Verum 2. non video, qui capi hæc ad oculum, prout promisi, possint. Necessè est ergo ipsam tibi totalem arborem Consanguinitatis, quantum capere vna pagina potest calamo prius representare.

Ea hunc in modum se habuit.

1. Descendit IESVS ac IOSEPHVS ex communi stipite David: & quidem per Salomonem Matth. 1. per Nathan Luc. 3. IESVS; per solum verò Salomonem IOSEPH.

2. Ge-

2. Generatio IESV per Salomonem post interpositas propagines viginti sex à me ex Mathæo descriptas, tandem ad Mathan peruenit; vicissim autem eadem per Nathanem post generationes triginta quinque intermedias ducta desinit in Mathat.

3. Mathan genuit Annam; hæc deinde MARIAM, ac demum MARIA IESVM peperit.

4. Contrà, Mathat, genuit Heli virum Annæ, & Heli MARIAM, &c.

5. Vicissim verò ad IOSEPHVM quod attinet; Mathan genuit Iacob, fratrem Annæ; Iacob deinde IOSEPH & Alphæum siue Cleopham, aut ab alijs Cloram dictum.

6. Sobe, siue Ismeria, vel secundum Sanctum Augustinum Ismara, soror fuit Annæ ac mater Elisabeth, à quâ & Zacharia Ioannes Baptista susceptus est. Qui proinde Ioannes ex auia Sobe non minùs accedit ad IESVM, MARIAM, & IOSEPHVM, quam Fratres Domini nati ex auo Iacobo.


7. Maria Cleophæ vxor Cleophæ fuit ac Soror Iacobi. Debet ergo ad Annam & per hanc ad MARIAM & IESVM, per Iacobum verò ad IOSEPHVM ascendere. Ita Hyppol. Portuensis Episcopus MARIAM Dei Genitricem ex Anna, Mariam Salomen ex Maria Cleophæ, & Elisabeth ex Sobe, tanquam tribus Sororibus deducens.

8. Non

8. Non solum IESVS, sed etiam IOSEPHVS filius David est, ut patet ex Evangelistis, diuerso tamen tramite. Nempe per MARIAM &c. & Nathanem IESVS, per Salomonem autem IOSEPHVS, ut Tirinus & Cornelius docent, nixi ordine ab Evangelistis præscripto: quem cum ijs interpretibus sequi malo, quam Polium in Hist. SS. Ioachim & Annæ, part. I. §. 8.

9. Maria, Iacobi Apostoli mater est, & alio siue nomine, siue cognomine, Salome dicitur. Iam autem suprâ dixi, duo hæc nomina debere pro vna persona accipi. Neque enim ex Matthæ 28. v. 1. vllum infertur solidum fundamentum distinguendi, quidquid dicant citati Tirinus & Cornel. Vide, lege, & considera præsentem imaginem, quem honori S. IOSEPHI incidi curavi.





Genealogia IESV, MARIE, et IOSEPH

ELOGIUM XIX.

IOSEPH

Consanguineus plurimorum Sanctorum.

Non sum nescius, Canonizandi potestatem omnem summo Pontifici modò reseruatam esse. Igitur dum Syllabum hîc suppono eorum Sanctorum, quos IOSEPHVS, cognatione contingit, ne quæso putes adscripsisse me mihi tibi que forsan placitos. Sed Martyrologia sequor, Romanum, & Canisij, Viri de Ecclesia summè meriti. Ab ijs mihi discedere, fas esse non putaui. Notas tamen etiam ex alijs rerum peritis adieci. Porro

Primus omnium est Abraham Patriarcha ac Pater omnium credentium. Martyr, Rom. 9. Octob. Matth. 1. & Luc. 3.

2. & 3. Isaac & Iacob itidem Patriarchæ. Martyr. Canisij 6. Octob. Matth. & Luc. cit.

4. Iesse Pater Daudis, dictus etiam Isai. Mart. Can. 29. Decemb. Matth. cit.

5. Daud Rex & Propheta. Martyr. Rom. & Canisij. 29. Decemb. Matth.

6. & 7. Ezechias & Iosias Reges. Mart. Canis. 23. Iunij Matth.

8. IESVS Dei filius, & Mariæ; consanguineus IOSEPHI in 3. gradu iuxta ante dicta.

9. MARIA Sponsa & vxor IOSEPHI, eiusque consanguinea in 2. gradu.

10. Io.

10. Ioachim, sive Heli Socer IOSEPH, descendens ex Leui saltem mediante Barpanthere & Panthere, vt docet Damasc. lib. 4. de Fide c. 15. 20. Martij. Martyr. Rom. apud Luc, cap. 3. quia Heli & Ioachim idem sunt.

11. Anna Mater MARIE, Ioachimi vxor, IOSEPHI simul amita, & socrus. 26. Iulij. Martyr. Rom. & Damasc. in Serm. de Nat. B. V.

12. Zacharias Sacerdos & Propheta, Pater Ioannis Baptistæ, maritus Elisabeth cognatæ MARIE Virg. & IOSEPHI, & ideo vtriusque affinis. 5. Novemb. Martyr. Rom. Luc. 1.

13. Elisabeth filia Sobe, (quæ fuit soror Annæ & Iacobi) & consequenter amita IOSEPHI; itemque vxor Zachariæ Sacerdotis oriundi ex tribu Leui, & familia Aaronis. 5. Nouemb. Martyr. Rom. Luc. 1.

14. Ioannes Baptista Præcursor Christi, Zachariæ & Elisabeth filius; cōsanguineus IOSEPHI in 3. gradu. 24. Iunij. Martyr. Rom. & omnes Evangelistæ.

15. Iacobus Maior Apostolus, Zebedæi & Mariæ Salomes filius, IOSEPHI pronepos, & ideo consanguineus in 3. gradu. Patronus Hispanorum, quibus Evangelium Christi prædicauit. 25. Iulij. Mart. Rom. Evangelistæ passim.

16. Ioannes, Evangelista & Apostolus, Discipulus, quem diligebat IESVS & MARIAM matrem de cruce iussit in sua accipere; itidem IOSEPHI

SEPHI pronepos , & filius Zebedæi & Salomes.
27. Decemb. citati passim.

17. Iacobus minor Apostolus , filius Cleophræ, qui frater fuit IOSEPHI , adeoque Nepos IOSEPHI ex fratre , & in 2. gradu, frater Domini appellatus, ad Galat. 1. v. 19. 1. Maij. Martyr. Rom. & Evang.

18. Iudas Thaddæus Apostolus frater Iacobi minoris, eodémque patre natus, &c, 28. Octob. Mart. Rom. & citati.

19. Cleophas siue alio nomine Alpheus , frater IOSEPH , cui Christus se manifestauit in fractione panis, eiusdem Discipulus , & Martyr, pater Iacobi minoris & Iudæ itémque auus Iacobi maioris & Ioannis Evangelistæ 25. Sept. Martyrol. Rom. & citati.

20. Simeon secundus Hierosolymorum Episcopus, & Martyr. & 21. Ioseph Episcopus Eleutheropoli in Palæstina, filij Cleophræ, & Nepotes ex fratre IOSEPH , Discipuli Christi. Colitur Simeon 18. Febr. Ioseph 20. Iulij. Martyr. Rom.

22. Martialis Episcopus Lemouicensis, Discipulus Christi, filius Eliud fratris Elisabeth , & idem consanguineus IOSEPHI in 2. 30. Iunij. Martyrolog. Rom. & Castrius ex Tradit.

23. Seruatius Episcopus Tungrensis; nepos Eliud. 13. Maij. Martyrol. Rom. ex Sigeberto ad annum 399.

24. Maria Cleophræ, vt Cornel. vult, vxor Cleophræ, & mater fratrum Domini, puta Iacobi minoris,
E Iudæ

Iudæ Thaddæi, Iosephi, & Simeonis, ac Mariæ Salomes (quâ Tirinus diuidit in duas, Mariam, & Salomen, verum tamē sine fundamento solido) ex quâ nati sunt Iacobus maior & Ioannes Evangelista Apostoli, filij Zebedæi, adeoque etiam in 2. gradu 9. Aprilis Martyrol. Roman. & Evangelistæ.

25. Maria Salome filia Cleophæ, vxor Zebedæi, & neptis IOSEPHI ex fratre. 22. Octobris. Martyrolog. Rom. & Evangelistæ.

26. Sobe, siue Esmeria, aut Ismeria, vel Ismara S. Augustino Serm. 25. ad fratres in Eremito. Soror Annæ, & Iacob patris IOSEPHI, & ideo huius amita & consanguinea itidem in 2. gradu. S. Augustin. cit. & Corneli. in cap. 3. Luc.

27 Matthæus filius Alphæi siue Cleophæ, consanguineus IOSEPHI, sicut Iacobus minor. 21. Septemb. Ita Euthymius ex Chrysost. apud Castr. cap. 1. Martyrolog. Rom. Verum de hoc, quia dissentiant alij omnes, malim ego fidem suspendere, quoad certiora afferantur. Ob quam etiam causam, neque Zebedæum huic stemmati directè inferere possum, etsi forte reipsâ mereatur.



ELOGIUM XX.

IOSEPH

Nunquam MARIAM coniugem cognoscens.

Ignorare non potuit MARIA Virgo, quod tota sciebat Synagoga, Emmanuelis in Lege promissi si matrem Virginem fore, *Virginem* inquam *manentem*. Cum enim Isaïæ 7. v. 14. dicitur; Ecce Virgo concipiet, non ibi ponitur vox *Aalma*, hoc est *Virgo nubilis*, sed *Haalma*, siue *Virgo manens*. At sciebat eadem, se eam fore matrem ab Isaïa & alijs prædictam. *Ecce concipies*, &c. Lucæ 1. Quid est ergo, quod opponat Angelo. *Quomodo fiet istud, quoniam virum non cognosco*? Nempe sensus verborum est. Magna quidem res est, Angele, maternitas Dei, quam per te à Deo efferri mihi minime ancillæ suæ verissimè credo. Verùm ius omne in virum virique corpus iam antè æternùm abstuli à me voluntario Virginitatis summæ voto. Quem proinde ne quidem ea ratione cognoscere possum, volo, & debeo, quocum stare eadem adhuc integra possit. Dic ergo, amabo, quomodo fiet istud?

Sed non minus IOSEPH, *Vir* MARIÆ, hæc eadem potuit vsurpare verba. Idem enim tam sancti coniuges velle debebant. Non cognosco ego Virginem, nec cognoscam, dum vixero vnquam, quocunque cognitionis carnalis genere. Sit licet paternitas Dei res omnium maxima, Virgo tamen ex

voto, quod Domino voui, mori malo, quàm fieri Pater Dei contra votum, etiam releuatum.

Neque mihi dicas, quod Hæretici toties debellati obijciunt, obflare IOSEPHO Scripturæ S. verba, quæ Matth. c. i. v. 25. habentur. *Et non cognoscebat eam, donec peperit Filium suum primogenitum.* Vox enim, *donec*, terminum præstituit, ante quem non cognoscebat. Cognouit ergo postea, vbi ille impletus est, & eos quos Scriptura Fratres Domini appellat, suscepit ex MARIA.

Nam contra est 1. Quia vt Elog. 18. & 19. ostensum est Fratres Domini longè alios habent parentes, quàm IOSEPHVM & MARIAM Matrem Dei. Habent nempe Alphæum siue alio nomine Cleopham, & Mariam Cleophæ, quæ aliter Maria Soror Matris Dei, ac Maria Iacobi, cuius Mater fuit, dicitur. 2. Vox *donec* nequaquam est terminus finiens, vltra quem egressa non sit Virginitas IOSEPHI. Vel enim esset vniuersaliter; Vel tantùm in materia subiecta. Atqui neutrum dici potest. Et quidem non potest dici 1. Genes. enim 8. v. 8. *Non reuertebatur, donec siccarentur aquæ.* Atqui nunquam postea coruus, de quo ibi sermo est, reuersus est, 1. ad Cor. 15. v. 25. *Oportet autem illum (Christum nempe) regnare, donec ponat omnes inimicos sub pedibus eius.* Atqui etiam postea & quidem gloriosior regnabit. Et Matth. 5. v. 26. *Non exies inde, donec reddes nouissimum quadrantem.* At hîc, *ly donec*, cum æternitate stat. Sed nec 2. dici potest; quia, deest affirmandi causa, cum causa non vna adsit

ad sit negandi. 3. Quia primogenitus non tantum significat eum qui antecedit omnes alios, sed etiam, quem nemo antecedit, uti vnigenitus est, ut patet Exod. 4. v. 22. & cap. 13. v. 2. Esto igitur Christus nullos post se fratres habuerit, adhuc primogenitus dici potest & debet. 4. Quia, ut docet Damian. Epist. 11. ad Nicol. Pontif. cap. 4. *Ecclesie fides est, ut MARIA mater Christi sit Virgo, & is, qui simulatus est pater.* 5. Quia id temporis polygamia in usu non erat; & MARIA IOSEPHO superstes in virginitate sub cura Ioannis itidem Virginis, permansit. 6. Quia si postquam peperit Virgo, eam cognouisset, reddidisset eam similem alijs mulieribus auferendo decus virginitatis à matre conseruatæ, cum præiudicio voti, ac Spiritus Sancti, de quo prius Dei filium conceperat. Scio autem, verba Matthæi adhuc aliter exponi posse, Sed tu nunc quod dixi, expende,

ELOGIUM XXI.

IOSEPH

Inueniens Virginem in utero habentem
de Spiritu Sancto.

VT ab eo, cui ceteri originem suam debent ordinar sermonem; Spiritui sancto, non vno in loco Scripturæ sacræ, tribuitur conceptio Christi. Quod utique factum non est, quasi duæ aliæ Personæ Trinitatis non æquè concurrissent ad

eum conceptum. Sunt enim, vt axioma Theologicum testatur, opera omnia ad extra communia Trinitati toti. Et in præfenti habeo verba Concilij Toletani 16. *Cum Spiritum Sanctum superuenturum in ea dicit, vt Virtutem altissimi, qui est Dei Patris Filius, obumbraturam eam præmonuit, eiusdem Filij carni totam Trinitatem cooperatricem esse monstratur. Cum ergo Spiritum Sanctum Sacræ Litteræ prætermis-
sis alijs, Auctorem incarnationis Dominicæ sæpius, vt dictum est, faciant, meum erit, eius afferre causas aliquot dignas Theologo.*

Prima est; *Quia generatio maximum est Amoris opus. At in amore consistit formalis processio Spiritus sancti. 2. Quia eadem est donum inter creata maximum, tam ex parte Filij, quam Matris. At hoc immediatè debetur dono essentiali, qui solus est Spiritus sanctus. 3. Quia rursus illa est suprema sanctitatis participatio. At sanctitas in voluntate consistit, & à voluntate diuinà, per quam solus procedit Spiritus S. ad nos vsque propagatur.*

Sed cur, inquires, dicitur hîc Virgo, habere *de* Spiritu sancto, & non potius *ex* Spiritu sancto? S. Thomas q. 32. a. 2. ait, per *ly, de*, exprimi vtramque habitudinem, quam habet Spiritus sanctus ad Christum, nempe consubstantialitatis ad diuinitatem eius, & coëfficientiæ ad eius corpus; at verò *ly, ex*, significare apud Philosophos nonnisi causæ materialis concursum, qui hîc à sola Matre præstitus est. Verùm, quod de consubstantialitate dicit, diffi-

difficile est, admitti. Vt enim S. Augustinus in Enchir. cap. 39. obseruat, *nascitur de homine capillus; nec tamen consubstantialis homini est.* Dicit tamen potest ly, *de* ibi sumi à S. Doctore in suo famosiore significato; non verò à S. Augustino. Durius autem est, quòd in a. 4. neget B. Virginem aliásque mulieres effectivè concurrere ad conceptionem. Semper enim contraria opinio mihi ac plerisque alijs visa probabilior est, quam in re à foro Theologico aliena vel in gratiam MARIE meritò suppono. Sed est tamen hæc efficientia longè debilior alterà, quàm viri, & quam hîc, tres diuinæ Personæ, exercent; vt adeò minus propriè verum sit, *de MARIA* Virgine conceptum Christum esse.

Hinc autem, vt puto, manifestum est, quid sit habere Virginem de Spiritu sancto. At ignotum remanet, quando, à quo, & quænam inuenta sit sic habens. Et quidem Matthæus *antequam conuenirent*, inquit, *inuenta est.* Sed quid est hic conuenire? Patres aliqui ad nuptias, alij ad maritalem congressum referunt. Ex quibus posteriores necessariò præfero, quia nuptias ante Christi incarnationem factas esse, IOSEPHVMque Virgini iam tum cohabitasse supra Elogio 16. docui cum Theologorum consensu.

Ad alterum quod attinet, docet Origenes ab Angelis inuentam esse. Sed refutari meretur, quia hæc inuentio nihil facit ad dubitationem. An enim, quia tu inuenis thesaurum, ego dubito? Certum

ergo est, & esse debet, inuentorem esse IOSEPHVM.

At quid, inquires, inuēnit? illámne, quæ habet de Spiritu sancto? Nequaquam; quia non inuenio, quod semper habeo. At semper habuit Virginem IOSEPHVS ab causas alibi explicatas. Inuenit ergo totum hoc, quod est *habens de Spiritu sancto*. Intellexit nempe IOSEPHVS, concepisse Virginem de Spiritu sancto. Id enim affirmant, Basiliius, Theophylact. & alij non multo post citandi, imò etiam citati suprâ, cùm causæ dubitationis IOSEPHO subortæ sunt. In re autem, in qua ne ipsi quidem Patres conueniunt, licet vtique opinionem eligere, quæ cum honore personæque IOSEPHI magis consistit.

ELOGIUM XXII.

IOSEPH

Inueniens IESVM natum, priusquam esset natus.

ELogio huic, vti alijs multis, viam, etiam Matthæus, aperuit cap. i. v. 20. *Quod enim natum est, de Spiritu sancto est.* Quæ quidem verba, propterea paradoxa videri possunt, quia si tempus, in quo prolata sunt, inspicias, dicunt, id natum esse in Virgine, quod nondum est natum. Nempe non solum ille dicitur natus, qui, vel totus, vel principali aliqua parte euasit extra vterum matris, sed etiam ille, qui

qui adhuc eidem vtero inclusus habet omnia ad essentiam hominis requisita. At habuit hæc omnia & quidem in valde eminenti gradu IESVS Virgini inclusus, vt ex supra dictis colligi potest. Ergo iam tum natus dici potest, priusquam erat natus illo priore modò.

Sed fortè non meministi satis, quomodo habuerit omnia, repetam breuiter ea, quæ dixi, & addam alia, quæ ex Theologorum placitis, iudico, Christum, simul ac Virgo vocem creantis Dei, fiat, pronunciauit, accepisse. Igitur accepit Christus in 1. instanti Physicò temporis à Deo definitò corpus perfectè organizatum, etiam quoad formas partiales propriè tales ex hypothese quòd dentur, mihi olim probatâ. 2. Corpus animatum vnica rationali animâ eiusdem nobiscum essentia & individualis perfectionis. 3. Idem assumptum à Verbo. Cum enim verbum præexistat, per se subsistens, & humana natura sic non præexistat, sitque propterea verbum infinitè excedens naturam hanc, verbum ipsum assumpsisse dici debet, natura autem, exinaniuisse. 4. Idem instructum thesaurò sapientia, gratia, virtutum & gloriæ, iure & actus possesso, prout is conuenit Capiti totius humani generis, etiam quoad visionem beatificam. 5. Idem passibile & mortale, subiectum Legi diuinæ reuelatæ etiam per scientiam infusam, circa substantiam mortis pro nobis peccatoribus redimendis tolerandæ.

Vides ergo, quid sit illud, quod inuenit IO-

E 5

SEPHVS

SEPHVS, omne scilicet bonum est, Deus-homo, in quò, vt loquitur Apost. ad Coloss. 2. v. 3. *Sunt omnes thesauri Sapientia, & scientia absconditi.* Et v. 9. *in quo inhabitat omnis plenitudo diuinitatis corporaliter.* Et v. 10. *qui est caput omnis principatus & potestatis.* At fieri nequit, vt hoc tali tantòque thesauro pretiosior inueniatur. Debet ergo IOSEPHI, qui inuenit, felicitas, esse omnibus felicitatibus felicior.

At duo sunt, quæ litem inuentori isti mouere possint. 1. An fortuitò inuenierit. Est enim, vt S. Thom. in 1. Matth. notat, *inuentio eius rei, de quâ non sperabatur*; siue vt Iurisconsulti in lib. 3. §. ult. ff. de iure fisc. l. 1. C. de thesauro l. 10. habent, *quæ fortuitò, & operâ non datâ obtinetur.* At ideo vir in mulierem consentit, quia fructum de arbore quærit, matrimonij vsu. 2. An inuenierit in fundò suò, vel publicò; aut alienò. Hæc igitur duo meritò decidenda sunt.

Ac 1. quidem affirmo, IOSEPH propriè fortuitò inuenisse. Nam 1. nec sperauit aut sperare potuit thesaurum hunc homo; Deo & hominibus per opificium fabrilè intentus. Nec 2. operam vllam adhibuit, qualis adhiberi ad hunc finem ab ijs, qui matrimonio illigantur, solet. Remota autem cura in inuentionibus iuxtà est.

Circa 2. fateor dubitari posse, annon fuerit MARIA Virgo publicus potius fundus totius humani generis; vel omnino proprius, Verbi incarnati, totiùsve Trinitatis, in quo sibi bene complacuit. In qua re vnusquisque sanè arbitrato suo faciat.

piat. At ego, cui claritas inprimis adamatur, candide fateor, etsi negari non possit diuerso respectu MARIAM esse fundum publicum, & proprium; proprium tamen fundum esse etiam IOSEPHI. Est enim IESVS non solum thesaurus in fundo plusquam dotali, MARIA inquam, sed etiam fructus Horto concluso per matrimonium comparato naturaliter cohærens.

ELOGIUM XXIII.

IOSEPH

Ab ipso Deo iussus manere cum MARIA
Coniuge sua.

Relinqui IESVS MARIAM Matrem suam à nobis, non sustinet. Ideo enim nondum natus Gabriele internunciò; IOSEPH, inquit, *Fili David noli timere accipere MARIAM coniugem tuam: & in cruce cum morte luctans, ad Ioannem, ecce, inquit, mater tua.* Sed hæc non pensant Hæretici nostri, qui non secus, ac Sagæ, initiò statim, abiurant MARIAM & Sanctos, planè vt videas, eos à Spiritu Christi procul abesse.

Hic tamen ulterius progredi nolo, qui præsentem laborem vni præcipuè IOSEPHO consecraui. Is nunc mihi minus sanctè decentèque tractari videtur ab ijs Catholicis Doctoribus, qui ipsum docent, MARIAM, licet grauidam, ritèque desponsatam dimittere voluisse, propterea, quòd Castitati eius,

eius, à nescio quô, siue homine, siue spiritu, illatam esse vim, metueret. Cum his ergo potius agendum est.

Ac 1. negari non potest, Auctores istos & numerô & virtute magnos esse, quos tibi velut in a-
ciem educunt Castrius, & Cornelius à Lap. in cap. 1. Matth. Sed his opponi possunt saltem æquè mul-
ti & graues Doctores, vt non iam de viris; sed de
armis, Rationibus inquam, earûmque pondere, cu-
ra esse debeat.

Et illi quidem, qui aduersantur nobis, præten-
dunt Scripturam Rationum omnium Dominam,
quæ 1. ait, *traducere noluisse, cum esset iustus*. Atqui
tantum de crimine potuit traducere. 2. ait, Ange-
lum iussisse, ponere timorem, addendo causam;
quod enim in ea natum est, de Spiritu Sancto est. Igno-
rauit ergo hoc antea IOSEPH.

At non tenet 1. quia traduci dupliciter po-
tuit purissima hæc Coniunx. 1. In actu signato,
2. In actu exercitô; narrando scilicet factum, quod
ordinariè cum crimine coniunctum est. At priori
modô iustus traducere non potuit; nec probare in
iudicio causam, ob quam traduceret. Posteriori
quoque modô abstinere à traducendo debuit; quia
iam se vna cum Virgine ludibrio & risui audien-
tium exposuisset.

Sed neque dici potest 2. quia particula, *gar*,
enim, non semper est causam reddentis, sed inter-
dum asserentis, vt hic tradit Salmeron infra citan-
dus. Quare sensus Verborum hic est; noli timere,
propte-

propterea, quia id, quod natum est intra eam, de Spiritu Sancto est. Et rationem addit: *Pariet autem filium, & vocabis nomen eius IESVM.* Nempe; Pater eris in omnibus, sed tamen sine copula coniugali. Ita Salmeron tom. 3. tr. 30. fol. 241. ex Theophyl. in cap. 1. Matth. & Hebr. Cod. eiusdem Matth. Et sanè Salmeron 13. Rationibus rem suam & meam in eo tractatu fortissimè gessit, pronuncians ex mera reuerentia, & humilitate dimittere MARIAM grauidam de Spiritu sancto voluisse, vtpote conscium Incarnationis Dominicæ. Idipsum verò dudum ante sensere Origen. hom. in hoc Evang. Basilii hom. de hum. Christi gen. Theophyl. in cap. 1. Matth. Bernard. hom. 2. super missus est. Leont. in Matth. Gerson in Iosephina, & alibi. Viguerius in Theol. Instit. cap. 20. §. 9. Eckius in Serm. de S. IOSEPH. Richard. de S. Viç. Catharinus, Brigitta lib. 6. cap. 59. & lib. 7. cap. 25. & Barry cap. 8.

Rationes præcipuæ sunt 1. Quia verba Matthæi *inuenta est habens de Spiritu Sancto* ponuntur ante subortam cogitationem. Atqui non inuenio, quod nescio, an, & ubi sit. 2. Quia prius super omnia montana Iudææ diuulgata sunt miracula, circa Ioannem præcursores Domini, &c. 3. Quia Virginem, sciebat, sanctissimam esse. 4. Quia Virgo hoc ipsum mysterium alijs, quibus minus obligata fuit, reuelavit. 5. Quia eadem causam tristitiæ immeritò dedisset viro. 6. Quia utique IOSEPH iure suo interrogaturus fuerat Virginem, & hæc illi respondere debebat. 7. Quia salua

saluâ iustitiâ potest vir manere cum coniuge imprægnata; imò tenetur manere, si crimen sit occultum, & alia causa non subsit. 8. Quia dubitatio de adulterio nec CHRISTO, nec MARIE, nec IOSEPHO honorifica est; est autem humilitas, honorifica omnibus. 9. Quia Angelus non dixit; noli suspicari, sed *noli timere*; item non dixit; *noli timere accipere*, quæ tua non est, sed quæ iam est tua, & quam tu ex humilitate dimittere vis paulo ante acceptam. 10. Quia, vt in Orient. Relat. habetur, IOSEPHVS Scripturæ Sacræ peritissimus fuit. Si ergo alij minùs periti significârunt Herodi, aduenisse tempus Salutis, dubitari non debet, IOSEPHVM multò certius id agnouisse. 11. Quia contemplationi præ quàm vllus alius fuit addictissimus. Annon ergo Dominus ipsi quoque dixit. *Num celare potero IOSEPH, quæ gesturus sum?* Genes. 18.v.18. 12. Quia intima cum Angelis consuetudine fruebatur. 13. Quia vt supra probatum est, longè est credibilius, habitasse cum Virgine iam inde à conceptu ac nominatim illam comitatum ad Zachariam esse, spectâsseque & audiuisse prodigia, quæ Dominicam Incarnationem clarè demonstrabant. 14. Quia hæc opinio facilius assignat causam, ob quam sine peccato cogitare potuit de dimittendâ tam charâ, & sanctâ coniuge. 15. Quia reuelationem mysterij exigit fides uxoris, nulli magis, quàm viro obligata, propter periculum, Zelotypiæ & aliorum peccatorum.

ELO-

ELOGIVM XXIV.

IOSEPH

Pater Spiritualis IESV.

Nemo magis vsurpare potuit illa Apostoli ad Ephes. 3. v. 15. verba; *Flecto genua mea ad Patrem, ex quo omnis paternitas, in cœlis, & in terrâ nominatur*; quàm IOSEPHVS. Nemo enim pluribus nominibus Pater est. At est signum, omne, distributivè accipiendum, ita vt Paternitatum genera omnia complectatur. Quibuscunque ergo modis IOSEPHO paternitas tribuitur, debet ea nominari, hoc est, descendere à paternitate supremâ Dei. Iam autem, sicut in rebus creatis omnibus, primò locò, Spiritus ponitur, isque in esse physico, & in esse morali consideratus, sic oportet paternitatem Spiritualem, vbi ea inuenitur, antecedere alias omnes, quæ non sunt Spirituales.

At estne hæc in IOSEPHO? Nego inprimis esse physicam; nego etiam posse esse. Et Ratio est, quia nec homo Spiritus est, nec si esset, aliter produci, quàm per creationem posset. At implicat assumi IOSEPHVM aliudve creatum agens, etiam per modum instrumenti ad creandum, vt docet S. Thom. in 1. p. q. 45. a. 5. in c. & q. 47. a. 1. & q. 65. a. 3. in c. & q. 90. a. 3. in c. & q. 104. a. 2. ad 1. & 3. Neque enim, dominium nihili, alteri præterquam Deo convenit.

Sed tamen Paternitatem illam alteram, Spiritualem

tualem inquam, quæ physicâ præstantior est, etiam in capite ponimus reliquarum paternitatum, quas deinceps IOSEPHO liberaliter, & quidem cum fundamento in retribuam. Est autem, *paternitas hæc, Spiritualis*, denominatio obiectiua, resultans à parte rei, ac nemine nostrum cogitante, ex actione Spirituali, quâ quis, quantum est ex se, alterum instruit, impellit, manuducit in ijs, quæ Dei sunt. At huiusmodi actionē copiosè exercuit IOSEPHVS erga Filium Dei, non quidem ex indigentia eiusdem; quid enim deesse Filio Dei potest? Sed, quia decebat ipsum implere omnem iustitiam. Sicut ergo ob hanc causam ipse Baptismi auctor, ut Baptismum obtineret à Ioanne, dixit; *Sine modò*; ita haud dubiè, ut obtineret illam à IOSEPHO actionem Spiritualem, idem, *Sine modò*, sæpius repetijt, extorsitque. At hoc ego ipse primus commentus nequaquam sum. Docuit verò dudum antè Gerson in Iosephinâ. dist. 2. Cui ut refrager, idem amoris in IOSEPHVM conatus non finit: quin potius, ut subsidio quibuscunque Rationibus veniam, etiam pertrahit.

Igitur 1. nonne IESVS proficiebat sapientiâ, & ætate, & gratiâ apud Deum & homines? Negare hoc nemo sine hæresi potest, propter Luc. cap. 2. v. 52. At non potuit ullibi magis proficere, quàm apud eos, cum quibus maximam partem fuit; fuit autem cum MARIA & IOSEPH. Sed neque magis in manuum labore, quàm in animæ causis ipsum proficere decebat. Ad utrumque ergo præcipuam operam

operam proprij contulêre parentes; eo mōdo, quō proficiebat. 2. Illimitatē dicitur ab eodem Luc. v. 51. *Et erat subditus illi.* At nihil est indecens, Christum esse subditum IOSEPHO, etiam vt filium Spiritualem. Si enim esset indecens, ideo esset, quia ipse potius IOSEPHVS fuit filius Spiritualis IESV. At nihil obstat vnum eundemque diuerso respectu esse Patrem & Filium Spiritualem. 3. Hæc paternitas Spiritualis tantū requirit, vt quis ad Spiritualia iuuet alterum ex intentione iuuandi. Et si ergo demus, quōd IESVM in Spiritualibus nunquam instruxerit, saltem mille modis alijs eundem & alios adiuuit. 4. Eadem maximi est meriti. Ergo à IOSEPHO auferri non debet. 5. Varijs exemplis ostendi potest, CHRISTVM vsum esse verbis instructionem petentibus in rebus minoris momenti. Ergo verisimile est, simile officium à IOSEPHO petiisse saltem propter ipsum IOSEPHVM.

ELOGIVM XXV.

IOSEPH

Pater Legalis IESV.

ALtera paternitatis species, eaque à Spirituali Paternitate totū genere diuersa est *Paternitas Legalis*, quæ ferè ex adoptione, & arrogatione, Legum constitutione nascitur. Sed adoptio utique potior est. Arrogatur enim ille, qui sui est iuris;

F

at ve-

at verò adoptatur, qui non est sui iuris. Ego tamen hîc apices Legum non sector, & ideo, fas esse vnicuique volo, vt me de adoptione loquentem, laxius accipere possit.

Quare hoc vnum modo dico IOSEPHVM Patrem esse Legalem IESV, adoptando ipsum in Filium, eîque paterna officia omnia, prout huiusmodi Patres solent, largiter præstando. Ita quidem apertè sentit Augustinus lib.2. de consensu Evang. cap.1. hisce verbis vtens. *Nec enim propterea non erat appellandus IOSEPH pater Christi, quia illum non genuerat, quandoquidem rectè pater illius esse potuit, quem non ex sua coniuge procreatum aliunde adoptasset.* Hæc ille; quæ forte sciolus aliquis primo oris flatu subruere se posse credet, dicendo; pessimè inferri: potuit adoptare IESVM. Ergo adoptauit. Adoptare enim possunt Infideles; qui tamen illum non adoptant.

Verùm fallitur quisquis sic obijcit; & ostendo falli. 1. Quia IOSEPHI potentia est determinata ad actum. Ergo agit, nisi quid obstat. At nihil obstat. Si enim obstaret aliquid, vel id teneret se ex parte potentiae, vel ex parte obiecti ad quod se illa per adoptionem extendit. At nihil obstat primò modò; potentia enim adoptans est voluntas IOSEPHI, parata ad omne possibile bonum sibi conueniens. Nec secundò; quia dubitari non potest, paternitatem istam legalem esse tale bonum. Nihil ergo obstat. 2. Ad hoc, vt IOSEPH, & quicumque alius fiat Legalis Pater, sufficit eligi ab eo, qui

eo, qui ius eligendi habet, & electionem haberi ratam ab illo, qui eligitur. At habet utique IESVS ius ratam habendi electionem sui. *Data est enim ipsi* (etiam ut homini) *omnis potestas in cælo & in terra*, Matth. 28. v. 18. potestas, inquam, excellentiæ, fundata in vnione Hypostatica. Eundem etiam reipsa elegit IOSEPH in Filium, nullum excipiens Paternitatis munus, nisi quod à carne & sanguine nascitur; ut neque Filius vllum exceptit officium filiationi conueniens. Ideoque IOSEPH non solum ab ijs, qui mysterium Incarnationis ignorabant, Pater est creditus atque appellatus. *Nonne hîc est fabri filius?* Matth. 13. v. 55. Sed etiam à Luc. 2. v. 27. *Et cum inducerent puerum IESVM parentes eius*. Et v. 33. *Et erat pater eius, & mater, mirantes super his*. Imò & à propria matre, Luc. cit. v. 48. *Ecce pater tuus, & ego dolentes quarebamus te*. Vbi etiam patet IOSEPH reipsa functum esse imposito Patris qualiscunque munere; ut proinde Legalis Paternitas non nisi temerè excipi possit. 3. Per hoc quod adoptari se IESVS sinat ius sibi comparat Filiationi carnali simillimum, cui in Patre IOSEPHO correspondet, obligatio providendi ipsi in omnibus, utpote Filio, ac legitimo hæredi omnium bonorum paternorum. IOSEPH quoque dum fit ipsius Filij Pater, consequitur dignitatem maximam, ius intimum in bona talis filij, ipsumque filium, itemque ius in eos omnes & singulos, quos hic suus filius ulterius adoptat. At hi prope innumerales sunt. *Vidi turbam magnam, quam dinume-*

rare nemo potuit, Apoc. 7. v. 9. Huic ergo IOSEPH, ceu alteri Abrahamo, siue Patri multitudinis, iure dixerit Filius suus Patrem multarum gentium posui te. Ad Rom. cap. 4. v. 17.

ELOGIVM XXVI.

IOSEPH

Pater ciuilis IESV.

RECTISSIMÈ Apostolus ad Galat. 4. v. 1. *Quanto tempore, inquit, hæres paruulus est, nihil differt à Seruò, cum sit Dominus omnium: sed sub tutoribus & actoribus est.* At fuit IESVS quoque hæres paruulus, formam serui accipiens, cum sit Dominus omnium. An ergo etiam ipse sub tutoribus & actoribus fuit? Fuit vtique, vel hoc ipso nomine, quia fuit propriissimè pupillus. Est enim hic Hieronymo teste apud Tholosan. lib. 12. Syntag. cap. 1. qui sine Patre est. At est haud dubiè IESVS sine Patre, carnali nempe. Est ergo propriissimè pupillus, non verò orphanus, qualis ille tantum est, qui & Patre & Matre caret. Habet autem Matrem IESVS, solo Patre destitutus. Interest ergo Reipublicæ humanæ, cuius pars præcipua, caput inquam, IESVS est, ei providere de *Patre ciuili*, hoc est *Tutore* aliquo, cui securè inniti possit, approbante Matre idem pupillus IESVS.

At, quis, inquires, qualisve & quantus Vir debebit esse is, qui tutelam, cui innitatur IESVS, susci-

suscipere possit? Si enim filio Ptolomæi vnus Ægypti Regis, Romani, nonnisi Marcum Lepidum, Pontificem Maximum, bis consulem, virum rebus domi forisque gestis clarissimum, Tutorem constituerunt, mille Lepidis, aut etiam infinitis maiorem oportet esse Tutorem IESV omnium Domini.

Verum an alius hic esse potest, quàm IOSEPH Vir Matris IESV? Negat id Rupert. de diu. officijs c. 18. & lib. 1. de glor. & hon. filij hom. in Matth. cuius verba apud Suar. Disp. 8. S. 1. legere potes. Et meritò negat. Si enim circumspiciam, cuiusmodi Vir sit IOSEPH, est is 1. in arbore consanguinitatis à Luc. cap. 3. descriptæ supremus vertex, cui deinde subsunt rami omnes eorum, à quibus originem IESVS ducit. At cur ipsum ex eo loco tam diu pacificè possessio deturbemus? Est 2. IOSEPH Vir MARIÆ, sanguine, matrimoniò; sanctitate, charitate coniunctissimus. Tutari ergo MARIAM, & quidquid MARIÆ est, nemo tenetur magis. At inter ea, quæ MARIÆ sunt, nihil melius, nihilque gratius IESV reperitur. 3. Est primus, qui adiit possessionem ac tutelam IESV, inter omnes viros alios. At melior est conditio possidentis, sunt etiam bona derelicta primò occupantis. Ipse ergo etiam de iniuriâ expostulare aduersum nos posset, si ei IESVM præripere vellemus. 4. Est iam antè à Sacerdotibus deputatus æquè Tutor, ac Coniunx: Neque enim à coniuge tutela separari potest. Idemque est con-

firmatus à Deo miraculô virgæ florentis, & columbæ eidem insidentis. 5. Est placitus B. Mariæ Virgini, quæ ius habet supremum & vnicum istius pupilli, fundatum in communicatione purissimi sui sanguinis ac lactis materni, nullo alio homine, siue passiuè, siue actiuè concurrente. At deferre tutelam filij nulli alteri potest Mater, præterquam Viro, & quidem tali Viro, quô Mundus inter Adæ filios præstantiorem nec habuit, nec habebit. 6. Est reipsa, quoad vixit egregiè tutatus IESVM, non solum contra Herodem Ascalonitam, & Archelaum Reges, sed etiam contra Idololatrias Ægyptios, magnamque Iudæorum, qui tum vitæ, tum virtuti eius aduersabantur, partem. At in omni sententiâ modus denominandi sequitur modum essendi. Cum ergo IOSEPH tam operosè tutatus IESVM sit, cur non & tutor ac Pater ciuilis IESV salutetur?

Ne autem mirere tutorem me vocare Patrem ciuilem. Vt enim Seruius ex Theophilo apud Tholos. c. 2. docet, *tutela nonnisi paternô animô & ciuili imperiô suscipi ac sustineri potest.* Agnoscunt etiam Iurisconsulti quodam modô tutorem, tutando pupillum, plus esse Patrem, quàm qui eundem genuit. Et si ergo IOSEPHVS non genuerit IESVM solumque tutatus sit, adhuc eminenter Pater dici debet.

ELOGIUM XXVII.

IOSEPH

Paterfamilias IESV.

Collegium, inquit Tholosan. Syntag. lib. 15. cap. 32. in vnô retinetur, nonnisi in tribus constituitur. At secus se familia habet; hæc enim; si propriè loqui velimus, Cicerone teste in Orat. pro Cæcin. ne quidem retineri in vnô potest. Nempe familia, vt eam Varro lib. 1. cap. 16. definit, est congregatio plurium in eâdem domô sub vnus, qui paterfamilias dicitur, curâ & imperiô.

At si nunc Nazarethum ad IESVM, MARIAM, & IOSEPHVM abeam, video ibi huiusmodi Congregationem aliquam, & talem quidem, quæ iure reliquarum omnium exemplar sit: Ea ipsa igitur familia quædam necessariò est. At, vt dixi, abesse à familia Paterfamilias non potest. Hic ergo ante omnia constitui debet. At is 1. non est IESVS quia officium Patrisfamilias est, regere, ipsius verò, subesse. Nec 2. potest esse MARIA, quia licet regeret, adhuc tamen non esset nisi Materfamilias. Sed tamen ipsa quoque imperia accipere quàm dare mault. Sors ergo & munus Patrisfamilias soli IOSEPHO remanet. Sic enim ex Chrysost. hom. 4. in Matth. argumentor. *Quodcunque proprium est Patris, si nihil ladat Virginis dignitatem, facile concedendum est IOSEPHO.* At esse Patremfamilias est proprium Patris, idèmq; dignitatem Virginis ni-

hil lædit. Igitur esse Patremfamilias, IOSEPHO facile concedendum est.

Neque dices, hoc ideo fieri non posse, quia IESVS non est filius IOSEPHI. Iterum enim se tibi citat, loc. Chrysostomus opponit, IOSEPHVM, inquit, *Patrem IESV non generatio, sed cura paterna facit.* Vt ergo ipse Pater est, sic IESVS eius est filius.

Verum vrget me hic alius; & si, inquit, vt tu vis, IOSEPH est Paterfamilias IESV, erit vtique Paterfamilias Evangelicus. At non esse, propè demonstrari posse videtur. Nec enim 1. similis est Patrifamilias qui seminavit bonum semen in agro suo Matth. 13. v. 27. quia sibi tantum ac domui suæ prouidit. Neque 2. operarios in vineam suam conducenti. Matth. 20. v. 1. quia neque Iosephum cognomine, quantumuis etiam iustum, & ab Apostolis pro vinea Domini destinatum, eiusdem vineæ operarium esse contigit. Neque 3. Vineam ipsam plantanti Matth. 21. v. 33. quia hæc gloria non nisi Sanguine IESV comparanda fuit. Neque 4. sinenti per inertiam somni, perfodi domum suam. Matth. 24. v. 43. talis enim inertia in dedecus IOSEPHI non mediocriter cederet.

Verum contra est, quia ne quidem demonstrationis umbram, habet discursus iste. Ad hoc enim, vt IOSEPHVS dicatur Evangelicus paterfamilias IESV, summum duo hæc etiam disiunctim accepta sufficiunt. 1. vt, saltem patrifamilias, cui laudem tribuit in Euangelio IESVS, similis sit.

Alte

Alterum, ut ipsis suis operibus ostendat, verum se esse patremfamilias IESŪ. At hoc vtrumque etiam coniunctim habet IOSEPH. 1. enim *similis est homini patrifamilias, qui profert de thesauro suo noua & vetera.* Matth. 13. v. 52. Vbi ego quidem hæc in moralem sensum traducere percommode possem. Sed cum ipse sibi Lector aperire potest. At propriè ibi sermo est de patrefamilias, verè tali, qui quidquid est necessarium aut vtile familiæ alendæ, siue vetus, siue nouum sit, comparat precario, aut manuum labore. At hoc IOSEPHVS optimè præstitit, à Pastoribus vilia, à Regibus pretiosa accipiens mûnera, indeque tolerans septennale Egypti exilium; opificio quoque per annos bene multos victum conquirens; rem adeò nullam deesse passus, quæ idonea familiæ suæ esset.

Idem verò IOSEPHVS etiam auctoritatem Patrisfamilias, & prouidentiam, amorèmq; verè paternum habuit. De quorum postremò, quia præcipuum est in tali Patre, audi Rupert. in Matth. qui; *Paternum*, inquit, *Deus Pater Viro MARIE pro Filio infudit amorem.* Ergo reliqua etiam, quibus eminere Paterfamilias hic debuit, ab eodem Deo Patre infusa esse affirmo.



ELOGIVM XXVIII.

IOSEPH

Pater matrimonialis IESV.

Patrem *matrimonialem* illum esse dico, quem alij voce magis *vitricum* nominant. Verum prævaluit apud me meritò prior compellatio; tum quia causam paternitatis huius, quam itidem IOSEPHO tribuo, aptius exprimit, tum quia, hæc posterior Vitrici, communiter fastidium parit, propter eos, qui paternitatem inde excludunt. Est autem siue Vitricus, siue quod idem est, Pater matrimonialis ille, qui iure matrimonij sibi coniugem obligat, liberorum ex alio viro susceptorum matrem. Hi liberi tunc succedaneum Matris coniugem agnoscere patrem suum, salutaréque patrem, & patrem audire, ac sequi tenentur. Neque est, qui hoc negare auit. Imò si rem potius conueeamur, ob eam maximè causam transit mulier ad secunda vota, vt habeant liberi, Patrem, cui sese denuo committant, cuius ductum, consilia, imperiûmque sequantur, nullo magis fræno coercendi, quàm hoc sericeo filo gratissimæ paternitatis.

Verum, ne, quæso, insiste nimium cortici, quem tibi Vitrici nomen obtendit. Neque enim, dum IOSEPHO idem adscribo, compellans eum Matrimonialem Patrem, adiungo MARIE, virum alium, aut IESV alium, cùmque carnalem, Patrem præstituo. Hæc enim esset impietas; imò blasphem-

blasphemia grauissima in vtrumque hoc nomen. Quod equidem vel ex solis Evangelistis, clarè intelligi posse puto. Cur enim dicerent mitti Angelum ad Virginem desponsatam, prætermisso viro? Spiritum sanctum in eam solam superuenturum? inuentam esse, habentem de Spiritu sancto? à IOSEPHO accipiendam tractandamque vt coniugem, esse? Ipsum IOSEPHVM putatum fuisse patrem IESV?

Sed hæc supponere malo, quàm vltèrius probare, vt ad id, quod in præsens agitur, rectè pertingam. Agitur autem de IOSEPHO Patre matrimoniali IESV; quem hoc nomine insigniri debere iam olim agnouit Epiph. hæres. 79. & Gerson confid. 4. Serm. de Natiuit. Quò etiam faciunt complures Rationes allatæ supra; quibus nunc subiungo istas.

1. Si mater suscipiat prolem ex damnato quolibet thoro, adhuc vir ille, qui huiusmodi matris coniunx fieri sustinet, simul fit pater eiusdem prolis iure matrimonij. Ergo multò magis iure matrimonij fit coniunx matris, vnàque pater prolis, ab ea, nullà suà culpà susceptæ. Quid si autem talis mater non solùm sine culpà, sed etiam cum publicæ vtilitatis incremento, Deique singulari imperio adacta, eam prolem suscepisset, annon adhuc promptiùs paternitatem talem superueniens coniunx admittat? At est postremo hoc modo à MARIA Virgine IESVS Deus-homo susceptus; vt ipse IOSEPH ex Angelo diuinitus didicit. Est ergo eiusdem IESV matrimonialis Pater.

2. Si

2. Si IOSEPH nollet esse matrimonialis Pater, IESVS non esset filius matrimonialis. At hoc sine scelere quis dicere potest? Si enim recte assequor Ecclesiasticos Canones, non solum ille irregularis est, qui re ipsa laborat natalium defectu, sed etiam qui laborare hinc & nunc propter urgentes causas, ex vulgata opinione hominum, eo defectu præsumitur. Ergo IOSEPH non potest non velle esse Pater matrimonialis IESV.

3. Paternitas hæc est dignitas non solum in se maxima, sed etiam æterna & indefectibilis. Correspondet enim maternitati Dei, quæ ipsa teste Suar. Disp. 12. in q. 35. art. 5. talis est. Sicut enim ad hanc sufficit ut sit fundamentum & terminus, præcedatque ratio fundandi, vi cuius verum sit dicere, quod genuerit mulier, ita præter fundamentum & terminum ad paternitatem illam plus non requiritur, quam ratio fundandi, quod IOSEPHVS fuerit maritus siue vir MARIE, de qua natus est IESVS. At nihil horum perire vnquam potest. Est ergo etiam paternitas hæc ijs positis æmanentibus iugiter resultans in IOSEPHO, intrinseca etiam, & indefectibilis, saltem ex hypothesi; eamque inter prima eius decora merito colloco.



ELOGIUM XXIX.

IOSEPH

Pater nutritius IESV.

Nilladum Paternitas IOSEPHO sapiens ab Authoribus tributa est, quàm hæc Nutritij Patris. Fas ergo mihi non est, eam silentio præterire. Quin aperitur hîc campus, qui fortè ante me patuit nulli. Quem referare etiam tibi Lector, paratus sum, si tamen profanos imperitumque vulgus remoueas procul, quibus scandalum persæpe parit doctrina, quantumuis sana, sed intellecta minus.

Animus inquam meus est ex hoc Patris Nutritij titulo deducere; IOSEPHVM posse verò à liquò sensu dici Genitorem IESV, tametsi ab alijs Genitoribus totò, quod aiunt, coelò, differat. Vt ergo antè, omnem *carnalem generationem*, à IOSEPHO, calamòque meo, penitus amando, ita tamen bona multorum Philosophorum venia Nutritionem hominis dico esse *adgenerationem*; & quia IOSEPHVS IESVM tantà constantiâ per annos non pauciores 30. nutriuit, pronuncio eum alterum eiusdem IESV Genitorem, licet non carnalem, attamen nutritium vocari debere. Vbi simul in conspectum do non solùm ipsam assertionem nostram, sed etiam postulatum, hoc est, fundamentum Philosophis placitum. De quò me utique nemo iure conuenerit. Sed tamen breuiter, quid obstat

obstat beneficium nutritionis comparare cum Generationis beneficio ? Certè nutritio habet inprimis omnia, quæ de Generatione præfiscinè eloqui possumus; illa autem alia, quæ honestè commemorari nequeunt, penitissimè præscindit.

Habet, inquam, 1. Nutritio eundem terminum *qui*, hoc est, hominem, qui non minus nutriri & conseruari dicitur, quàm generari; imò tardius longe nutritur, quàm generetur. 2. Eundem terminum *quo* siue formalem, nempe formam vt nouiter vnitam accessorij materia primæ partibus; non verò vnionem, etsi modus sit; quia tum generatio, tum nutritio est via ad naturam. At vnio natura non est. 3. Idem subiectum, cum hîc solò discrimine, quòd hîc sit materia 1. alimenti & aliti, in generatione autem materia organizata ab utroque parente decisa. 4. Eundem terminum *ad quem*, hoc est substantiam, quæ de nouo utrobique acquiritur. 5. Eundem terminum *à quò*, siue priuationem formæ introducendæ. 6. Eandem actionem, ita vt qualis vna est, sit etiam altera, nempe substantialis, vel accidentalis; modus, vel formalitas. 7. Idem, saltem in propositâ causâ, principium suò modò effectiuum. Nempe 1. sicut vir generat, ita IOSEPHVS vir MARIE nutrit. 2. Non generat vir hominem immediatè. Si enim fides Medicis apud Henric. Wagnereck in Disp. de Anim. habenda sit; generatio hominis nonnisi triduo post copulam in disposita materia fit. Ergo nec nutritius Pater immediatè nutrire debet, sed satis est, vt materiam nutri-

nutritionis procuret. Vides ergo, quàm sit nutritio similis generationi, ac proinde meritò ad generatio dicatur.

Cui similitudini nihil sanè derogat quòd generans sit principium vitæ coniunctum circa materiam sui corporis, quam impendit supposito nouo; nutriens verò tantùm materiam alienam largiatur. Nam præterquam, quòd materia à generante decisa non sit viuens, neque pars generantis, sed vt ita dicam, superfluum alimentum eius; habet hoc nutritio à IOSEPHO procurata planè singulare, quia non ad breue aliquod temporis momentum, prout tamen in generatione accidit extendit se, sed ad annos plurimos est protracta. Ad hæc verò generatio generanti voluptatem affert, à genito verò nihil percipitur. At nutritio, nutritio patri, parit molestiam longissimam; nutritio autem iucunditatem perpetuam conciliat. Demum, etsi IOSEPHVS nihil de suo corpore impendat, paratus est tamen non solùm corpus, sed etiam sanguinem impendere IESV omnia nutrienti; Vt adeò neque hac ipsa ratione Nutritius iste Pater sit inferior Genitore.

Lubet autem hîc cum Methodio apud Barry cap. I. exclamare. *O nutritie cuncta nutrientis! Aue IOSEPH! cuius Deus factus est indigus. Euge! qui debitorem illum habes, qui omnibus mutuatur: omnis enim creatura Deo debet; ille autem tibi debitor est.*

Pater, aliquò modò, naturalis IESV.

PRiusquam, quod assero, probem, rem ipsam tibi, remoto obscuritatis velo, libens commonstro. Non ergo 1. IOSEPH *naturalem IESV patrem* illimitatè dico. Talis enim est, à quo IESVS quoad humanam naturam, aut quiscunque alius homo mediante generatione accipit esse. At accepit IESVS hoc suum esse tantum à MARIA. Sed neque 2. in paulò laxiore sensu audeo hoc patris naturalis nomen eidem IOSEPHO imponere; quatenus nempe soli illi confertur, qui homini suum esse naturale immediatè, & paterna providentià vnicè dat atque conseruat. Hic enim non nisi Deus est, cui paternitatem istam nemo potest aut debet eripere. Si ergo IOSEPHVS à me laudatur aliquo modo naturalis IESV pater, non est ille 1. modò; quia non est carnalis. Nec 2. quia non est vniuersalis.

At superest adhuc modus alius, quò commodè, & ex Doctorum placitis, eius nominis fiat compos. Quem tibi modum planissimo dicendi genere vtens, ne vnà mecum impingere possis, sic explico.

1. Is est Pater naturalis aliquo modo, qui simul est Pater aliquo modo supernaturalis. At est IOSEPHVS simul aliquo modo supernaturalis Pater IESV. Nam 1. est naturalis; quia IESVM quoad

quoad naturam humanam omni paternâ prouidentia per totam suam vitam procurauit. Est deinde etiam supernaturalis; quia siue precibus suis de congruo, siue vñico Beneficio Dei nulli alteri concessio, per grandia miracula obtinuit supremam paternitatem, summum inquam affectum, sollicitudinem, ac Patris auctoritatem, vt Suarez Disp. 8. in q. 27. S. I. v. 3. docet, in IESVM, immediatè quidem Filium MARIE; mediatè autem suum. Est ergo IOSEPH, aliquo modo, naturalis Pater IESV, & aliquo supernaturalis. Idque tam constanter propugno, vt nesciam, an quis hoc saluo Christiani hominis nomine negare possit.

Vltèrius autem non teneo te, Lector beneuole; sed promoueo gradum ad secundum modum, qui sic se habet. Is est aliquo modo naturalis pater, qui aliquo modo est, & aliquo non est naturalis Pater. Atqui IOSEPH sic habet se respectu IESV. Nam 1. est naturalis Pater IESV, qui est Pater IESV iure naturæ. At est IOSEPH Pater IESV iure naturæ. Qui enim est iure matrimonij Pater, ille est iure naturæ. At est IOSEPH Pater iure matrimonij. Ergo.

Hic verò Maiorem sic probo. Quia matrimonium non est contractus ciuilis, sed naturalis; vt suppono ex communi Theologorum. In eo autem naturali contractu 1. ad Cor. 7. v. 4. *Mulier sui corporis potestatem non habet, sed vir. Similiter autem & vir sui corporis potestatem non habet, sed mulier.* Est ergo mulier quasi fundus viri, & vir quasi fundus mu-

lieris. At si quis fundum etiam iure ciuili compareret sibi, simul comparat sibi omnes eius naturales fructus. Imò, in instit. de rerum diuisione §. cum in suo solo. Vers. Ex diuerso. Et in L. etiamsi frumentum §. penult. ff. de rei vendit. Et in L. 2. C. eodem tit. quod in alieno solo nascitur, vel ædificatur, vel seminatur, aut plantatur, statim vt in terram radices egit, eius est, cuius est solum, & fundus. At quantò verius est hoc, cùm solum ac fundus est iure naturæ alicuius, sicuti mulier est viri, & vir mulieris. At est IOSEPH, vt ad probationem etiam minoris veniam, vir MARIÆ, Matth. i. v. 16. Est ergo iure naturæ Dominus non solum MARIÆ, sed etiam fructus, qui post aditam possessionem ex eius vtero & consentiente Domino legitimè natus est. Hic autem est IESVS, verè benedictus fructus ventris eius. Est ergo IOSEPHVS iure naturæ huius fructus Dominus. At non est Dominus, nisi paternus. Ergo.

2. Non est Pater naturalis; quia vt dixi, nec est carnalis, neq; vniuersalis. Est ergo IOSEPH tantum aliquo modo, & non omni, naturalis Pater IESV. Circa quod vltèrius si dubites, consule Suar. cit. Gratian. lib. 2. cap. 2. de 10. paternit.

IOSEPHI & Carthag. lib. 4.

Hom, 11.



ELO-

ELOGIVM XXXI.

IOSEPH

Pater Superior IESV.

M Iraris Lector, IOSEPHVM me *Patrem Superiorem* potius IESV inscripsisse, quàm *Præpositum*. At mirari defines, si memineris, IESVM Dei filium, quoad vtramque naturam, etiam humanam, subsistere subsistentia verbi, ideòque ab ipso suo conceptu exemptum esse ab omni iurisdictione ac superioritate publica tum sacra Pontificum, tum profana Augusti & Herodis, itemque priuata IOSEPHI ac MARIE strictè tali. Non ergo poteram, siue Rectorem, siue Præpositum familiæ suæ, IOSEPHVM nominare. Neque enim regere sufficit, aut præfici ad hæc Prælatorum nomina imponenda; sed præterea iurisdictione requiritur, cuius IOSEPHVS in IESVM capax esse non potest. Quæ ipsa etiam causa fuit, cur ne ipsis quidem, *Abbatibus*, aut *Ministri*, nominibus, quorum illud IESVS Marc. 14. v. 36. hoc Marc. 10. v. 43. usurpauit, vtendum existimarem. Sunt enim, quoad fieri potest, in sua famosa significatione accipiendæ voces. Cum ergo hæ, quæ modò allatæ sunt, afferrique possent, iurisdictionem qua IOSEPHVS caruit, propriè talem, supponant, meritò confugere ad amabilem Patris nomen debebam.

Quod si tamen meo in Religionem, quam profiteor, affectui vndique obligatissimo, quid licet:

Nazarethana Domus videtur mihi prima Domus Professæ Societatis IESV. Nam, Societatem IESV primò omnium Nazarethi coaluisse, res ipsa loquitur. At non est ibi propriè Collegium erectum, ut itidem palàm est. Est tamen Domus illa, Professæ Domui simillima; in qua de annuis prouentibus nihil; nihil de vineis, pascuis, syluis, nihil de gregibus & armentis; nihil de mercibus ac quæstu propolarum inuenitur. Habitat ibi pauperrima Mater, texendo victitans; habitat IESVS, *non habens, vbi caput suum*, commodè scilicet, *reclinet*. Matth. 8. v. 20. statere etiam vnico, quam in censum penderet, carens; habitat demum etiam IOSEPHVS fabrili opere, suam & familiæ suæ necessitatem perægrè sustentans. Quos etiam hanc suam paupertatem aliâque Professorum vota palàm videas cum IESV Pontificis Summi approbatione profiteri, ne illo quidem quarto voto prætermisso, quo nunc se Societas ad Apostolicas Missiones eiusdem in terra Vicario supremo obstringit. Auspicatus est istas primus omnium ipse IESVS. Hunc etiam suo modo secuta est Mater, ne quidem à cruce abesse sustinens. Verùm IOSEPHO eò usque, ut infra Elog. 67. dicetur, viuere non licuit. Et si licuisset, abesse à Professæ sua Domo Pater Superior non debebat. Hoc enim officium Præpositus Generalis IESVS, cui vni Iurisdictio suprema & ordinaria eius Domus competit, delegauit illi, ceu nunc solet Adm. R. P. N. committere Ministro tanquam Vicepræposito curam Romanæ Domus;

Domus; qui etsi etiam ipse regat limitata tantum potestate, verè tamen est Pater Superior Domus. Hac ergo eadem ratione IOSEPHVM quoque Patrem Superiorem IESV Domusque Nazarethanæ appellare iuvat. Vt ut autem recuset hoc alterum Superioris nomen, est tamen debitum ipsi, & impositum ab inquilinis suis, qui potestatem constituendi habuerunt. Illi nunc Patris prædulce nomen meritò præfigitur, argumento futurum omnibus Superioribus ut Patres præcipuè studeant esse, dicique. Ideo Christus, velut inculcans, iucundam Paternitatis memoriam, *Abba Pater*, exclamat apud Marc. loc. cit. repetitque Apost. ad Rom. 8. v. 15. & ad Galat. 4. v. 6.

Cæterum duo hîc obijciuntur. 1. est, quòd inter Regulares Patris nomen non nisi Sacerdotibus conveniat. At IOSEPHVS Sacerdos non fuit. Deinde, quòd Matth. 23. v. 9, dicatur; *& Patrem nolite vocare vobis super terram.* Verum nec obstat prius; quia excipi haud dubiè Superior debet. Nec posterius, tum quia adhuc genitores nostros licitè appellamus Patres, tum quia sermo ibi est, ad eos, qui affectu pharisaico ambiunt, citra meritum & officium, Patres, & Rabbi, appellari, quos primò agnoscere oportebat Patrem cœlestem, & Christum vnicum Magistrum totius mundi. Fuit ergo IOSEPHVS non minus Pater Superior IESV, quàm IESVS ei ac Mariæ fuit subditus & obsequens filius.

ELOGIVM XXXII.

IOSEPH

Pater Sacramentalis IESV.

NE, quæso, detorqueas in me illa Domini ad Iob de Eliu verba Iob 38. v. 2. *Quis est iste inuoluens sententias sermonibus imperitis?* Quam parum enim diei noctem, tam parum claritati sermonis præfero obscuritatem eius. Is certe conatus meus est; & loqui malo tacendo, quam loquendo tacere, dum ea loquor, quæ intelligere nemo potest.

Igitur hic per *Patrem Sacramentalem* accipio *Patrinum* cuius munus est supplere defectum Patris, suscipere de Sacramento recens initiatum, imponere illi nomen, ubi id in usu est. Si ergo ostendam tibi, hæc tria integrè à IOSEPHO per id tempus, quò IESVS Sacramento circumcisionis initiatus est, obita esse, næ tu negare non potes, eundem IOSEPHVM Patrinum esse IESV, hoc est, esse Sacramentalem Patrem. At id ipsum docet Carthag. lib. 4. Hom. 11. & Gratian. lib. 2. cap. 2. & verisimile cuius videri potest, propter vrgentes Rationes.

Nam 1. certum est, primum quæstionis huius cardinem esse, quòd circumcisio sit verum Sacramentum, & quidem antiquius Sacramentis veteris Legis, quæ per Moysen promulgata est. At hac in re Coninck q. 61. a. 3. *conuenit, inquit inter omnes, circum-*

circumcisionem fuisse verum Sacramentum, Stat ergo cardo quæstionis pro nostra parte.

Sub hæc autem cardo alter est, quòd IESVS idipsum circumcisionis Sacramentum acceperit. Sed eum loco nostro tam validè defigit Luc. 2. v. 21. vt auelli contra nos à nemine possit. Ait enim: *Et postquam consummati sunt dies octo, vt circumcideretur puer, &c.* Verè igitur IESVS Sacramentum circumcisionis accepit. Equidem haud operosè eius causas complures dare possum. Sed absoluit me labore isto Cornel. à Lap. in Luc. cap. 2. quem si adeas non pœnitebit. Mihi autem id vnum abunde sufficit, circumcisum esse IESVM.

Reliquum est, vt cardinibus his, ipsam Resolutionis meæ ianuam affigam, hoc est, vt declarerem, tres Patrini partes, omnes, ac singulas, IOSEPHVM suscepisse. Vbi vtique de prima, videor mihi, silere posse. Nam si quis fortè pupillus est, nonne curam ac paternitatem eius is suscipit in se, qui proximus est, siue matri pupilli, siue ipsi pupillo. At nemo IESV, Matrîque IESV propior est IOSEPHO. Dic deinde, si quis præuentus necessitate graui Sacramentum Patrinum requirens accipere debeat, annon is simul & Ministri & Patrini munus obire tenetur, qui necessitati tali vltro occurrit. At præter IOSEPHVM, intra primum nati IESV octiduum, ne quidem cogitari potest, occurrisse alios, cum eundem etiam vrbe ac hospitio cum MARIA, ipsóque IOSEPHO excluderint.

Hæc autem qui concedit mihi, profectò negare non potest istud alterum, videlicet suscepisse IOSEPH IESVM vulnere, ac sanguine, cruentatum. Si enim suscepit illum de Virgineò exilientem vterò, vbi nullum vulneris sanguinisve vestigium erat, quomodo in dolore tanto, tantòque periculo, sine graui crimine, destituere potuit, quem alius nemo, ne quidem communi lecto voluit suscipere?

Sed ad tertiam partem transeamus. Eam Matth. 1. v. 21. recenset, dum Angelum inducit IOSEPHO apparentem, cum dictò: *Pariet autem Filium*, sibi nempe & tibi, & *vocabis nomen eius IESVM*. Debet ergo IOSEPH primò Pater esse; tum verò talis Pater, qui ius habet imponendi natiuum nomen. Quid autem hîc, obsecro, clariùs dici potest? Annon autem reipsa imposuit nomen IESV, quod *vocatum est ab Angelo priusquam in vtero contiperetur*? Nefas est, opinari aliud de Viro MARIE, Patre & Patrino IESV. Sed si nobis diuinare licet, credimus IOSEPHVM, dum dixit, IESVS est nomen eius, simul huius vocis anagramma apprehendisse; *Tu es Ovis*; hoc est *ὁ ὢν ὁ ἴς*. Nequè enim in hoc minor fuit præcursores Ioanne hic diuturnus præcursor IESV; ex quibus ille itidem dixit Ioannis 1. v. 26. & 29.

Ecce Agnus Dei.

ELO-

ELOGIUM XXXIII.

IOSEPH

Compater Spiritus Sancti.

DVobus modis ostendi potest, IOSEPHVM esse Spiritus sancti Compatrem, respectu IESV. Quod quidem fidem tuam, ac fortè rationem superat; Verùm, si sinis, ea tum fidei, tum rationi tuæ, momenta appendam, vt in sententiam meam vltro concessurus sis, dummodo vocem Compatriis non nimis rigidè accipias.

Igitur 1. sic ratiocinor pro IOSEPHO nostro. Pater Legalis est compater Patris naturalis. At est IOSEPH pater Legalis, Spiritus sanctus verò est pater naturalis, ea nempe ratione, quâ Deus dici potest esse pater noster naturalis. Ergo IOSEPH est compater Spiritus sancti. Hæc consequentia certa est, vtpote illata ex ratiocinandi forma omnium præstantissima. At materia, inquires, præmissarum peccat? Itane verò? & an Maioris, minorisve? At est Maioris materia ex terminis nota. Compater enim est pater filij, cuius alius itidem est pater. Debet ergo pater Legalis esse compater patris naturalis. Est autem pater Legalis, prout hic accipitur, qui etsi illiberis moriatur, fauore tamen Legis Mosai- cæ Deuter. 25. v. 5. accipit filium à fratre suo exci- tante semen mortui in superstite vxore, siue fratri; qui proinde pater talis filij solùm naturalis est, hoc ipso, quòd ille ad familiam defuncti computari debe-

G 5

debeat. Ex hoc verò, & minoris materia, pendet. Si enim has patris Legalis conditiones IOSEPHVS, & naturalis Spiritus sanctus habeat, quis porrò de illius bonitate dubitet? At probari potest habere. Nam 1. IOSEPH illiberis est. 2. Per Virginitatis votum mortuus est carni suæ. 3. Indidem proximè accessit ad Deum. *Virginitas enim, inquit Basil. lib. de ver. Virg. incorruptibili Deo hominem similem facit.* Et Nazianzenus in carm. de Virg. *Prima Trias Virgo est, &c.* Et Christus consubstantialis Spiritui sancto apud Matth. 22. v. 48. *Quicumque, inquit, fecerit voluntatem Patris mei, qui in cœlis est, ipse meus frater, & soror, & mater est.* At IOSEPH vir iustus hanc haud dubiè fecit. 4. Conceptus est IESVS de Spiritu sancto ex MARIA Virgine. Concursum ergo patris Legalis suppleuit idem Spiritus sanctus; vt verè dicatur IESVS incarnatus, & conceptus de illo, iuxta vtrumque Symbolum. 5. Est IESVS non solum filius MARIE, sed IOSEPHI. Nam Matth. 1. v. 21. dixit ad IOSEPH. *Pariet autem filium;* subintellige, tibi. Voluit enim inducere IOSEPHVM, vt maneret cum MARIA, Est ergo etiam minor plenè probata.

Rursum verò 2. simili argumentandi genere alterum quoque modum exhibeo. Nimirum Patrinus est compater patris, cuius voluntate in Sacramento leuat Filium, nomènque imponit. At, vt ostensum proximè est, IOSEPH est patrinus, siue vt dicebam, pater Sacramentalis IESV. Ergo etiam ex hoc capite est compater Spiritus sancti
Maior

Maiores Trident. Sess. 24. cap. 2. constat, ubi inter compaternitates, siue cognationes spirituales, ponit hanc ipsam, quæ inter patrinum & eos, ad quos patrini designatio spectat, consurgit. Minor quoque omni ex parte ex dictis deducitur.

Solum exigere à me posse videris, ut probem, quod patrini munus, eorum voluntate, quorum maximè interest, suscepit. Id quoque perfacile est. Nam 1. Mater ne quidem aspectum ferre posse videtur sanguine manantis vulneris IESV innocentissimo inflati. 2. Urbe, domo, focoque, & thoro exclusa, habere nequit, quem patrinum roget. Eadem autem fortuna conflictatur IOSEPHVS. Præter ipsum ergo, qui patrinus sit, nemo est 3. Spiritus sanctus qui cætera, quæ Patris sunt, egit, IOSEPHVM apertè in patrinum assumpsit cit. v. 21. *Et vocabis nomen eius IESVM*; quasi diceret. Etsi tibi pro Patre naturali in generatione Filij fuerim, te tamen, cuius vices egi, Patrem eius constituo, simulque in hac tam graui necessitate patrinum designo. Tuum adeò sit, ex me & MARIA coniuge, imponere nomen IESV. Vides ergo IOSEPHVM esse compatrem IESV, hoc ipso, quia nomen hoc primus inter homines pronunciauit; quod præcipuum compatrum, siue patrinorum officium est,

IOSEPH

Minister IESV in Circumcissione.

IGnosce, Lector, si paternitatum genera omnia executus non sim. In tanta enim amplitudine Laudum, quæ IOSEPHO conueniunt, quî fieri potest, vt tuo in eundē ardentissimo amorī faciam satis? Igitur scito relinquere me *Patres electos, Patres conscriptos, Patres patratos, Patres ciuitatis, ac Patria Patres*; quos tu quidem, vt voles, in IOSEPHVM transferre poteris. Verū me exspectat noua dignitas eiusdem IOSEPHI, vel par prioribus, vel etiam maior. Ea dignitas est, ipsum esse Ministrum IESV in circumcissione.

Igitur scopus modò meus esse debet, vt omīssis alijs omnibus, hoc vnum iam probemus, IESVM à IOSEPHO circumcisum esse. Ad hoc autem duo requiruntur. 1. quod potuerit circumcidere; deinde quod ipse, & non alius circumciderit. Atqui perlibenter probabo vtrumque, dummodo liceat supponere pauca quædam. Scilicet 1. circumcisum esse IESVM octauo, postquam natus est, die. 2. circumcisum esse in loco natiuitatis. Vt enim Suar. Disp. 15, S. 1. certum est, inquit, ab eo loco MARIAM Dei Matrem, vsque ad diem Purificationis nunquam discessisse. Idque Suar. ex Epiphani. lib. 1. contra hæres. tom. 1, cap. vlt. post hæres. 20. se didicisse fatetur. 3. non apparere, quis alius

alius id loci præter IOSEPH circumciderit IE-
SVM.

His autem suppositis; probo inprimis prius,
& quidem in forma, quod potuerit circumcidere;
hoc modo. Si IOSEPH non potuisset circumci-
dere, ideo non potuisset, quia vel Lex obstat, vel
consuetudo. At neutrum obstat; potestque potius
ostendi, & Patrem, & Matrem, & quemuis alium
potuisse circumcidere. Potuit ergo circumcidere
IOSEPH. Hic tu quidem obfirmes te, quantum-
cunque velis. Sed tamen palmam vt cedas, etiam
spes est, cogi te posse; si quidem minor probetur.
At eam sic probo 1. de Patre Genes. 17. v. 23. Tulit
Abraham Ismael filium suum, & omnes vernaculos domus
sue, vniuersosque, quos emerat, cunctos mares ex omni-
bus viris domus sue, & circumcidit carnem præputij eo-
rum statim in ipsa die. Et cap. 21. v. 4. Vocauitque
Abraham nomen filij sui Isaac, & circumcidit eum octauo
die, sicut præceperat ei Deus. Actor. 7. v. 8. Et sic genuit
(Abraham) Isaac, & circumcidit eum die octauo, &
Isaac Iacob, & Iacob duodecim Patriarchas. 2. autem
de Matre. Exod. 4. v. 25. Tulit illico Sephora acutissi-
simam petram, & circumcidit præputium filij sui. 1. Ma-
chab. 1. v. 63. Et mulieres, quæ circumcidebant filios
suos, trucidabantur. 2. Machab. 2. v. 20. Duæ mulieres
delatæ sunt, natos suos circumcidisse, quas infantibus ad
vbera suspensis per muros præcipitauerunt. 3. de alijs
ex cit. Genes. 17. Et Iosue 5. v. 7. Horum Filij in lo-
cum successerunt patrum, & circumcisi sunt à Iosue, quia
sicut nati fuerant, in præputio erant, nec eos in via ali-
quis

quis circumciderat. 2. Machab. 2. v. 46. Et circumciderunt Matthatias, & amici &c. & circumciderunt pueros in-circumcisos. Actor. 16. v. 3. Hunc voluit Paulus secum proficisci, & assumens circumcidit eum propter Iudeos. Ergo IOSEPH quoque potuit circumcidere IESVM.

Posterius verò, quod nempe IOSEPH circumciderit, pro me testatur Ephrem. in Orat. de Transf. Domini. *Si non erat Deus, pastores, quem adorabant? si non erat caro, IOSEPH quem circumcidebat?* Et Berni. Serm. 1. de circumc. *Sed nec ipsius Ministri contemnendum est testimonium, ei, qui imitari querit Saluatoris exemplum; hic est IOSEPH.* Verè ergo ab eo circumcisis est puer, à quo vocatum est nomen eius IESVS. At sic vocatum est à IOSEPHO. Ergo.

Hic tu mihi quidem fortè alios Patres, qui non circumciderunt, oppones. At ego tibi vicissim oppono meos; ac præterea obtendo hinc pauperatatem Bethlehemitici stabuli; inde holocaustum Filij Dei à nullo magis, quàm à Patre offerendum. Fuit ergo IOSEPH etiam Minister circumcisionis IESV.

ELOGIVM XXXV.

IOSEPH

Angelus custos IESV.

ET si suus unicuique homini Viatori Angelus custos sit, etiam Apostolis, Ioanni Baptistæ, IOSEPHO, ac MARIE Matri Dei, excipi-
unt ta-

unt tamen cum S. Thom. in 1. p. q. 113. a. 4. & 3. p. q. 29. a. 1. Theologi IESVM. Et rectè; quia vel consideratur, quâ Deus, vel quâ homo. At non est ipsi Angelus custos, primò modò; quia tunc periculum adire damnûmve pati non potest. Nec secundò; quia, quâ homo, adhuc dupliciter consideratur; scilicet secundùm animam, & secundùm corpus. Atqui IESVS secundùm animam est comprehensor; secundum corpus, Viator quidem ratione passibilitatis est, simul tamen cum anima immediatè regulatur à Verbo, carètque fomite & rebellionem hominis inferioris contra superiorem, siue rationem; vtpote sapientiâ & gratiâ ita plenus, vt in ijs nihil ipsi additum fuerit; prout docuisse S. Thom. in 3. p. q. 7. a. 12. supra dixi. Ergo IESVS Angelo custode opus non habuit.

At, inquires, varia Angeli obsequia præstitere IESV? Ita est, vt patet Luc. 1. in Annunciatione B. Virgini MARIÆ factâ, Luc. 2. in aliâ factâ Pastoribus. Item Matthæi 1. & 2. in quatuor factis IOSEPHO. Et Matthæi 4. in deserto, vbi IESV ministrabant. Luc. 22. in monte oliuarum, vbi eidem apparuit Angelus de cœlo confortans. Matth. 28. Marc. 16. Luc. 24. Ioan. 20. in Resurrectione. Actor. 1. in Ascensione. Matth. 24. in extremo iudicij die. Hinc tamen plus inferri non potest, quàm Angelos fuisse ministros IESV; non verò fuisse custodes. Inter hæc duo enim hoc graue discrimen est, quod si propriè loqui velimus, minister sit inferior, custos superior eò ad cuius custodiam deputatur.

tatur. At repugnat Angelum dari superiorem IESV; aut non esse Ministrum & inferiorem ipso. Imò si Cornelio à Lap. in Luc. cap. 2. creditur, omnes Angeli, nullo excepto, IESVM recens natum adorârunt, ac Musica sua cœlesti salutarunt, simul homagium præstantes, ministrandi illi, & propter illum alijs.

Sed tamen hæc ipsa nihil officere possunt destinatæ IOSEPHI gloriæ; quam ei Paulus de Barry cap. 5. mecum tribuit. Nam 1. vt in Elogio 71. significabo, etiam omnibus Angelis collectivè sumptis, maior est, Nihil ergo mirum, maiorem ipsi honorem habuisse IESVM. 2. Custodiâ cum paternitate, iure naturali, indiuidua est. At hanc non Angeli, sed IOSEPHVS habuit, agnovitque in eo IESVS, & coram discipulis, vt testantur Morales in Matth. & Isidorus Dominica, laudavit, hisce vtens verbis. *In rebus omnibus ita cum IOSEPHO agebam, velut filius eius essem: eum ego Patrem vocitabam; vicissim ille me filium appellavit: eius omnes nutus & imperia sequebar, & IOSEPHVM Patrem meum, non secus, imò plus, quàm pupillam oculorum meorum diligebam.* 3. IESVS fuit saltem suiipsum custos. Atqui IOSEPH, vtpote Pater, est pars IESV. Ergo etiam est pars custodis. Vbi minor, quod Pater pars sit filij, Aristot. est lib. 5. Ethic. cap. 6. Et Iurisconsultorum reputantium Patrem & Filium pro vna persona. 4. Custodire, præcipuum est Tutorum munus. At IOSEPH est IESV tutor, Ergo custos eius necessariò est. 5. Ex SS.

Litte-

Litteris constat, IOSEPHVM custodiæ causæ subtraxisse Herodi & Archelao IESVM, perditumque sollicitè requisivisse. Atqui denominari, sequitur esse. 6. Nulla est Ecclesia sine *custode*. Atqui Domus Nazarethana, in quâ IESVS, MARIA, & IOSEPH habitârunt, Ecclesia est omnium Ecclesiarum sanctissima. Ergo debuit aliquis esse *custos* eius. At nemo potuit esse præter IOSEPHVM. Ergo IOSEPH fuit *custos* eius, itémque IESV, qui pars præcipua est eiusdem Ecclesiæ, siue Sacræ Congregationis. 7. IOSEPH est Angelus, & quidem ut Gratianus tradit probâtque lib. 4. & 5, tit. 4. vitâ, meritis, gratiâ, ministeriô cum omnibus Angelorum Choris communi. Est ergo verè Angelus, Custos.

ELOGIVM XXXVI.

IOSEPH

Coadiutor IESV Redemptoris nostri.

INter ea, quæ inimici nostri reprehendunt in Societate IESV, tum à pontificibus summis seorsim, tum à Concilio Trident. Sess. 25. cap. 16. approbatâ, est etiam gradus Coadiutorum, diversus à Professorum gradu, ac minor illô, utpote solubilis à Præpositô Generali eiusdem Societatis.

Verùm hac in re, siue imperitia instituti, siue malevolentia animi nova omnia fastidientis transversos eos agit. Nam 1. quæ potest esse servitus

H

manci.

mancipatione maior ? At hæc licet maxima manumissione soluitur. Quid igitur mirum, hunc ipsum Coadiutorum gradum simul esse gradum perfectissimæ seruitutis, quò se homo obligat Deo? Atqui tamen quæcunque seruitus à legitimo Magistratu destrui potest. 2. Annon matrimonium in Veteri Lege soluebatur repudij libello ? At est hic ipse Status Coadiutorum quædam matrimonij spiritualis species. 3. Nonne & Professorum gradus quantumlibet firmus, quâ coiuit Pontificum potestate, denuo confringi, & potest, & aliquando solet? At huic eidem potestati innituntur Superiores Societatis, dum aliquando ex grauib. causis dimittunt eosdem Coadiutores. 4. Annon iisdem indulgentijs & gratijs Pontificijs, atque in genere eodem victu, vestitûque, Professorum instar, prouidentur Coadiutores ? 5. Annon ij maxime ad Rectorum obeunda officia admouentur, & admouendi conquiruntur ? Etsi autem aliqui ex ijs, propterea, quòd Sacerdotio initiati non sint, & ad officia Marthæ applicentur, illuc vsque non pertingant, occasiones tamen complures habent, quibus, non tam Patrum Fratres, quàm *Patres charitate*, fieri possint.

Sed vilescit his Societatis obtrektoribus ipsa hæc Coadiutoris vox. Quasi verò non esset eadem cum Adiutoris voce; quæ, quia toties Deo tribuitur in Sacris Litteris, diuinitatem quandam accepisse videtur. Et malim ego tamen Coadiutoris nomen præcipuè retineri; tum quia placitum fuit

S. P. N.

S. P. N. Viro sapientissimo; tum deinde, quia origo etiam huius vocis perantiqua est, valdeque honorata; adeò ut ijs quoque, qui Episcopis senio morboque fractis in subsidium cum successionis spe adiunguntur, honoris causa imponatur.

Verum longior sum, quam patiatur præsens forum. Igitur ad IOSEPHVM recipio me, probòque Coadiutoris nomen, supremum dignitatis & gloriæ apicem ab eodem IOSEPHO accepisse, hoc ipso, quòd verè ac propriè fuerit Coadiutor IESV in redimendo genere humano. Inprimis autem id docuit Carthag. lib. 4. Hom. 5. à fol. 314. ubi, *Trinitas*, inquit, *Personarum, nostram Redemptionem operata est; IESVS, ut auctor salutis; MARIA, ut mediatrix; IOSEPH, ut coadiutor.* Vnde sicut cum bellum initur, victoria non solum tribuitur militibus, qui cum hostibus congressi sunt, sed etiam excubijs; & exploratoribus, qui per abscondita itinera, clam, milites, & arma introduxere, ita licet Redemptio generis humani soli Christo, tanquam principali causæ, debeat adscribi, &c. *MARIÆ tamen eatenus etiam attribui debet, quatenus contulit Christo carnem & sanguinem, pretium nostræ Redemptionis ei subministrans.* IOSEPHO etiam eius Sponso, suo modò partim debet dari, quia ipsum fortissimum Ducem Diaboli debellatorem, dum infans erat, & puer, abscondit, & clam educauit, ac enutrit, &c. Hæc ille.

Quibus accedunt etiam Rationes hæ. 1. quia IOSEPH vnus omnia Coadiutorum, quos temporales vocamus, munia complexus est. 2. quia non

paucas etiam Spiritualium Coadiutorum functiones obiuit, regendo ferè occupatus, & **MARIÆ** Virginitatem custodiendo. Christum quoque diutissimè & operosissimè adiuuit, ac demum se quoque eius honori & amori superimpendit. Iniurius ergo in **IOSEPHVM** est, quisquis negare audet Coadiutorem esse **IESV** Redemptoris nostri.

ELOGIVM XXXVII.

I O S E P H

Propheta magnus in Israel.

BEne sit Abulensi, qui me clarissimis verbis quæst. 57. in cap. 1. Matth. primus docuit, **IOSEPHVM** Prophetam fuisse. At Rationes insuper reperio, quibus ex S. Thoma demonstratur, omnium Prophetarum fuisse præcipuum. Credisne autem mihi, hæc, Amice Veritatis? Dubitas nimirum de rebus, quæ communem vulgi excedunt fidem; cuiusmodi ista quoque sunt. Verùm accomoda paxillum vacuum affectibus mentem; dum pro **IOSEPHO** depugnem.

Primum tria requiruntur à Doct. Ang. in 2. 2. q. 171. a. 1. ad hoc, ut quis Propheta sit; nempe cognitio inspirata à Deo rerum procul remotarum à cognitione hominum; earundem rerum reuelatio in bonum Ecclesiæ; & operatio miraculorum. At ex his tribus 1. requiritur principaliter; 2. secundariò; 3. verò nonnisi per accidens prophetiæ coniun-

coniungitur. Ita S. Thom. cit. Est enim operatio miraculorum solum propter alios, qui credere nō-
lunt; & ab Apost. 1. ad Corinth. 12. expressè distin-
guitur à prophetia; & à plerisque prophetis re ipsa
abfuit; puta, Ieremia, Ezechiele, Daniele, & uni-
uersim a duodecim prophetis minoribus, ipso eti-
am S. Ioanne Baptista. Atqui tamen maior inter
natos mulierum propheta Ioanne Baptista nemo
est, Luc. 7. v. 28. de quo apud Ioann. 10. v. 41. multi
dicebant. *Quia Ioannes quidem signum fecit nullum.*
Quamuis ergo IOSEPH miraculum viuens ope-
ratus non sit, propheta tamen propterea non desi-
nit esse. Atqui, vt patet, auctoritate S. Thomæ, & A-
bulensis, neque alterum tam strictè ad prophetiam
requiritur, vt abesse non possit. Id enim Scriptura
iclaris verbis affirmat, Genes. 20. v. 7. *nunc ergo red-
de viro suo uxorem, quia propheta est.* Atqui Abraham
(de illo enim ibi sermo est) nulli tum annuntiavit
prophetias suas. Suadètque Ratio, quia prophetia
est donum intellectui communicatum, sæpe tem-
pore longissimo distans ab enunciatione, quæ per
os fit.

Sed hac limitatione neque ego, neque IO-
SEPH opus habemus. Est ille, fuitque propheta
etiam his duabus conditionibus ad prophetiæ pro-
priè talis donum requisitis. Nam 1. Angeli diuinæ
voluntatis certissimi internuncij erudierunt IO-
SEPHVM minimùm quaternis vicibus de rebus
procul ab eius intellectu positis. Matth. 1. v. 20. cap.
2. v. 13. & 19. & 22. Est ergo in IOSEPH prima

H 3

condi-

conditio prophetiæ ; quam tamen cuius prudens sæpius impletam esse dubitare non potest.

2. Idem IOSEPH ea, quæ Angelis docentibus didicit, in bonum Ecclesiæ, tum immediatè, tum mediatè euulgavit. Et immediatè quidem, quia IESVS & MARIA cum ipso, aut tota fuerunt Ecclesia, aut certè pars præcipua. At mediatè nobis quoque vel maximè consuluit, quia conseruari membra corporis Mystici, quod Ecclesia est, aliter non possunt, nisi prius caput conseruetur & collum. At caput eius IESVS est, collum verò MARIA, quibus prophetia sua consuluit IOSEPH. Habet ergo IOSEPH totum illud, quod ad prophetam iure requiritur.

Sed iam ad alteram partem aggrediar ; pro qua sumo gladium, quod est verbum Dei, porrectum ab Apostolo Paulo in 1. ad Corinth. 14. vbi, dum comparat dona Spiritus sancti inter se, vult illa esse maiora alijs, quæ Ecclesiæ magis proficiunt ; & nominatim prophetam idcirco maiorem esse eo, qui linguis loquitur. Atqui nullius vnquam prophetia, (MARIAM semper excipio) profecit magis, quàm IOSEPHI, vtpote redundans in IESVM & MARIAM. Sed neque me hîc Angelicis suis armis destituit S. Thomas, qui in 1. p. q. 57. a. 5. ad 3. & 2. 2. q. 174. a. 6. in c. ait : *Quantò Propheta sunt viciniore Christo, tantò sunt maiores, & magis pòst, quàm antè, plenius enim pòst instructi sunt.* At IOSEPH inter omnes Prophetas vicinissimus fuit Christo, antè, vt pòst. Ergo. Tandem verò
nil ob-

nil obstant verba eiusdem Christi supra ex Luca de maioritate Ioannis Baptistæ allata. Iis enim statim subiecit, *qui autem minor est in regno Dei, maior est illo.* At IOSEPH est minor vita priuata, paucis, dum vixit, cognitus, &c.

ELOGIUM XXXVIII.

IOSEPH

Exul primus propter Fidem in IESVM.

HOc Elogium Matthæus cap. 2. in tanta veritatis luce tribuit IOSEPHO, vt face alia ingenij humani magis illustrari non possit. Adijt enim eodem teste idem IOSEPH exilium suum per id tempus, quô IESVS tres Orientis Regios Magos per aliam viam dimisit in regionem suam. At nemo ipsum simili exilio præuertit, aut præuerrere potuit. Illud igitur vnum mihi curæ esse debet, vt ex ijs, quæ hoc exilium circumstant, repræsentem posteritati virtutem Viri. Sic enim omnia in fastigio per se posita esse videntur, vt supra modum necessariò sint collocanda, siquidem Evangelio parère velim.

Ac 1. Exul iste noster, noctis, & somni tempore ad quietem destinato, percellitur tristissimo nuncio, circa rem & personas omnium gratissimas. 2. Iubetur abrumpere somnum, nunquam magis necessarium, ad laborem, quô nullus esse acerbior & periculosior potuit. 3. Nulla permittitur

H 4

mora;

mora ; ne quidem dum noctem dies discutiat. 4. Nulla excusatio auditur , quæ tamen posset esse plurima, propter innumeras difficultates. 5. Fuge, inquit Angelus. Sed quid fugâ viro forti molestius ? 6. Per iter longissimum , trecentorum scilicet miliariorum , aut ducentarum Leucarum. 7. Via prorsus ignota ac periculosa. 8. Absque omni Viatorio apparatu , quô teneri se contra cæli inclementiam , terræque incommoda potuissent. 9. Sine omnibus comitibus, ac ducibus. 10. Cum IESV Dei Filio ; qui licet Mundique totius Dominus supremus sit , adhuc tamen vagit in cunis, & lacte Virgineo pascitur.

11. Cum Matre vixdum purificationis Legem implente ; imò vixdum ab itinere Ierosolymam instituto respirante. 12. Relicta paterna domo , vrbeque sancta Ierosolyma Daudis , Regumque inde descendentium, ac plerorumque Prophetarum Sede ; in qua etiam Deus templum sibi per Salomonem condidit. 13. Relicta quoque terra Israel toties promissa à Deo, & per tot ærumnas, prodigia, & victorias obtenta. 14. Ex gremio Ecclesiæ veræ. 15. Ne quidem amicis salutatis. 16. Omnibus omnino inscijs & inconsultis. 17. Propter Herodem Idumæum , impium, ac tyrannum , IESV puero, iam iam imminentem. 18. Cum manifesto periculo tot innocentum parvulorum, per quorum cædem Christum perditum ibat Herodes. 19. Sine omni æquitatis respectu, ac iu-

ac iudicij forma. 20. Propter solam dominandi libidinem.

21. Non ad prouinciam magis vicinam.

22. Nec ad trium Magorum regna, quibus utique cum familia ista sua futurus erat acceptissimus.

23. Sed ad Gentem conuulsam Ægypti, & dilaceratam vitijs ac Damonum cultu; ad populum terribilem, post quem, siue præ quo, non est alius; cuius diripuerunt flumina terram eius, Nilus scilicet, ut Cornelius exprimit Esaiæ cap. 18. v. 2. 24. Gentem adeò idolatricam, ut boues, mures, cæpas, & allia adoret. 25. Non procul Heliopoli in qua vna ciuitate colebantur simulachra 365. 26. Cum periculo extremæ necessitatis. 27. Absque omni exercitio, cæremonijs, Sacerdotibus, & templo. 28. Inter quoscunque aduersos casus, etiam famæ & virtutis. 29. Incerto tempore; dum nempe Angelus illud Dei iussu determinauerit. 30. Nullo certo loco ad habitandum designato, &c.

At horum nihil terruit IOSEPHVM; qui proinde eo momento, quo imperium acceperat, *consurgens accepit puerum, & matrem eius nocte, & secessit in Ægyptum*, primus propter Fidem in IESVM exul, ideoque dignus, qui Dux & Caput reliquorum constituatur. Verùm infra expendam ipsum exilium, prout est in se. At nunc solum exilij aditum aliqua ex parte descripsi. Vide ergo Elogia 86. & 97.

IOSEPH

Triginta annorum Auditor IESV.

Q Vis neget, beatissimam fuisse Reginam Austri, siue Sabæ Arabiæ, quæ venit ab ultimis finibus terræ, quam mare Indicum alluit, audire sapientiam Salomonis. At, ecce! quanto Salomone maior est IESVS? Si ergo beatitudo audientis mensuram accipit ab excellentia loquentis, infinita quodammodo debet esse IOSEPHI, qui IESVM increatam sapientiam rerum omnium plenissimè consciam audiuit. Et ego quidem non solum calamus scribendo, sed animum quoque cogitando succumbere video ac profiteor. Votum proinde est, ut vnusquisque hanc ipsam IOSEPHI beatitudinem appendat in iudicij sui lance, & quia assequi nemo potest, tacitus apud se æstimet & miretur. Ego hîc ijs solum capita quædam, vnde ad fastigium eius beatitudinis propius contuendum enitantur, proponam.

1. Audiuit IESVM IOSEPH per annos non pauciores triginta; transgressus ea in re omnium Auditorum diligentiam, etiam Aristotelis, qui per annos 20, Platonem auscultasse scribitur.

2. Idem IESVM aspectabili formâ loquentem constanter illo omni tempore audiuit, beneficiô supra omnes Sanctorum fauores maximô, nulloque

lique alteri, præterquam **MARIÆ** in hac vitâ, ac Beatis in patria concessio, & concedendo.

3. Etiam nocturno tempore, vnâ cum coniuge sua eundem audire solitus est. Vt enim Petrus Chrysologus Serm. 15. testatur; **IOSEPH** pariter cum **MARIA**, quasi Monasticam vitam agerent, consurgere de nocte consueuerunt ad preces Christo Domino effundendas, quem medium inter se constituebant, aspicientes in hunc iustitiæ solem, indèque lucem ceu Sydera accipientes.

4. Multò autem frequentius loquentem interdum satagebat audire, nunc assidens ad pedes Domini, nunc manu vtrâque pectori apprimens, aut etiam oculis labrisque dulcissimè dissuauians, supra Magdalenam, Petrum, ac Ioannem audiendi cupidus.

5. Nominatim Brigittæ lib. 6. cap. 58. reuelatum accepimus, **IESVM** parentibus suis in priuatis ac domesticis colloquijs multa arcana detexisse, multaque mysteria abstrusa ac penitus abdita explicasse, ea verborum gratia ac dulcedine vtendo, vt sese vterque audiens præ voluptate vix capere possent.

6. Ipse etiam audiuit primam Theologicam Disputationem, quam **IESVS** duodennis cum Iesu Siæ filio per id tempus Pontifice Summò, in Templo Ierosolymitano, coram Doctòrum præcipuorum cœtu, instituit. Vbi forte miraberis nostram de Iesu Siæ assertionem. Verùm eam **Castrius** cap. 13. ex **IOSEPHO** lib. 17. Antiq. cap. 19. crudi-

eruditè probat contra Salianum ad ann. 464. Illum vide; & mihi præ altero placuisse propterea scito, quia Archelaus ad decem annos extendit regnum ac vitam. Atqui IOSEPH tum primum, cum ex Ægypto rediret, audiuit, quòd Archelaus regnaret. Non potest ergo IESVS disputasse diu post Archelai mortem. Certè Cornel. quoque in cap. 2. Luc. nobis consentire videtur, dum ait ad v. 41. IESVM disputasse eo anno, quò Archelaus ab Augusto in exilium actus est. At tum adhuc gessit Pontificatum Iesus Siæ filius; quem ego piæ considerationi aptiorem existimo.

7. Ei disputationi finem imposuit IOSEPH; quem idcirco si quis primum Cancellarium, aut Præfectum, Studiorum superiorum dicere velit, ego quoque suffragio nostro iuuare paratus sum. Est enim hoc eius præcipuum munus, moderari Disputationem, & quasi cancellis quibusdam restringere. At hoc IOSEPH cum MARIA Matre IESV reipsa præstiterunt, IESVMque secum abduxerunt, dimissis Doctoribus.

ELOGIVM XL.

IOSEPH

Triginta annorum Præceptor IESV.

EX ijs, quæ proximè dicta sunt, possunt huc non pauca transferri. Verùm ego proseguì viam, quàm relegere malo. Illis ergo præteritis,
Præce-

Præceptoris nomen dico ab Apostolis maximi habitum, & propterea ab ijs solito frequentius tributum IESV fuisse. Nam ad nomen, Rabbi, quod attinet, est illud spurcò ludæ Iscariotis ore contaminatum, & corruptum ambitu Phariseorum primas in Synagogis cathedras prensantium. At secus se res habet circa nomen Præceptoris semper integrum & incorruptum. Quod propterea etiam IOSEPHO gloriosum fore censuimus, nisi aliud quid obstat. At obstat nihil potest. Si enim est qui *subsit*, est & qui *præsit*, siue *præcipiet* illi. At IESVS subfuit, siue, vt phrasi Evangelica loquar, Luc. 2. v. 51. *erat subditis illis*, hoc est MARIE & IOSEPHO. Ergo MARIA & IOSEPH præfuere, siue præcepere IESV. At qui præfuit ac præcepit, Præceptor est. Est ergo etiam IOSEPH Præceptor IESV. At IESVS est Præceptor omnium supremus. Nihil igitur deest IOSEPHO, quin instar reguli supra aquilam, quemadmodum in paræmijs est, sursum euolantis exclamet: *plus ultra*.

Sed hîc diem quispiam mihi dicit, tanquam memoriâ lapso, qui ante hac dixi, IESVM ab omni potestate humanâ exemptum esse. An igitur comperendinam causam, donec temporis progressu refrigescat feruor accusatoris? Id quidem hâc nostrâ ætate in omnibus fere iudicijs solenne est. Sed non sinit me expectare tum IOSEPHI, tum veritatis amor. Igitur iam nunc pareo; & quia lis tota ex eo dependet, an IESVS potuerit obligari præceptis

ceptis IOSEPHI, hoc ipsum ante omnia decido ex Theologorum placitis, hoc modo.

1. IESVS triplices actiones habuit ; diuinas, vt creare, conseruare, gubernare omnia ; Theandricas, siue Dei-viriles, vt docere, facere miracula, discipulos conuocare, &c. & humanas, vt comedere, ambulare, laborare, fabricari, &c. Ratio est, quia idem IESVS simul Deus est, & Deus-homo, ac Homo. Ergo necessario triplices actiones habet, primas Deo, alteras Deo-homini, & tertias homini correspondentes.

2. Quoad primas actiones, siue diuinas, nulli, ne quidem Deo Patri obligari potest. Ratio est, quia ex vna parte coequalis est Patri ; ex aliâ actiones istæ vel sunt notionales, vel liberæ, vel essentialles. Atqui notionales sunt simpliciter necessariæ ; liberæ, communes sunt toti Trinitati ; itémque essentialles.

3. Circa secundi generis actiones obligari potest soli Patri Cœlesti, à quo missus est propter nos homines & propter nostram Salutem ; ideoque ad parentes suos ; *nesciebatis*, inquit, *quia in his, quæ Patris mei sunt, oportet me esse* ? Luc. cap. 2. v. 49. Ratio est 1. quia etsi mitti etiam Spiritui sancti conueniat, vt donum est, mitti tamen, vt Sanctificationis auctor est, soli conuenit filio, quatenus refertur ad Patrem. Atqui sanctificare est Theandrica actio. S. Thom. in 1. q. 43. a. 7. 2. Quia Deus-homo habet modum significandi personalitatem verbi, prout

prout est vnum principium actionum Theandricarum.

4. At in actionibus merè humanis potest obligari etiam homini; & ipsa IOSEPHO & MARIÆ obligatus fuit. Ratio est, quia dupliciter potest quis obligari 1. simpliciter & indefinitè. 2. secundum quid, & ad certum tempus, siue limitatè. Itémque 1. absolutè & per vim alterius mihi prædominantis. 2. ex hypothesi pacti aut propositi, quò quis se vltro obligat alicui alteri. At IESVS dum se obligavit parentibus, solùm obligavit se his posterioribus modis, eâ fere ratione, quâ se obligavit ad reddendam mercedem æternam meritis. Sicut autem obligatio hæc sufficit ad iustitiam propriè talem constituendam in Deo, ita sufficiet prior ad propriè dictam obedientiam IESV, quia sic ipsemet voluit, tribuendam, similem nostræ, quâ vi voti tenemur obedire Prælati.

ELOGIVM XLI.

IOSEPH

Libri Generationis IESV Christi pars ordine postrema, dignitate suprema.

TRes præcipuè Libros Deus conscripsit, quos præter ipsum explicare integrè nemo potest.

Primus est Liber vitæ; ad Philip. 4. v. 3. Apoc. 3. v. 5. & alibi sæpius; scriptus in memoria Dei

Dei secundum duplicem præscientiam absolutam, & conditionatam; absolutam, quâ absolutè & determinatè Deus præscit omnes prædestinatos, qui ad gloriam reipsa peruenturi sunt; & conditionatam, quâ solùm omnes iustos præscit sub conditione, si vsque ad mortem vitæ perseuerent in iustitiâ, ad gloriam peruenturos. Vbi priori præscientia scriptus liber est simpliciter immutabilis; at mutabilis posterior; ideoque meritò rogamus, vt omnium fidelium nomina beatæ prædestinationis liber adscripta retineat. S. Thom. in 1. p. q. 24. a. 2. & 3.

Secundus est Liber Conscientiarum; isque itidem duplex, agendorum, & actorum. Et ille quidem est in primis vtrûmque Testamentum; deinde dictamina vnicuique impressa, ac Leges multiplices. Sed actorum Liber est ipsa Dei notitia nostrorum operum, cuiusmodi sint; qui tum demum coram toto mundo aperietur diuina vis, quando IESVS venerit iudicare viuos & mortuos, hoc est, iustos & peccatores.

Tertius Liber, est Liber Generationis IESV Christi in carne (nam *Generationem eius* diuinam quis enarrabit! Isaïæ 53. v. 3.) In eo libro noster quoque IOSEPHVS est, Vir MARIE, quem genuit Iacob, proximus IESV natalitius ramus. Quem proinde Notis aliquibus, in Discipulorum gratiam, par est, vt illustrare coner. Igitur paucis ausculta multarum cogitationum segetem daturum.

1. Vnus idemque Liber Generationis est IESV,

IESV, MARIE & IOSEPH. Si ergo nil præstantius est Libro Generationis IESV, nil etiam Libro Generationis IOSEPH præstantius esse potest. 2. Tum demum Librum hunc perdiscet aliquis, cum ad finem peruenerit. At finis eius IOSEPH est, finis inquam virorum, per quos IESVS descendit. Disce igitur IOSEPHVM prius, ut perdiscas librum. 3. In hoc libro ipse IESVS permittit sibi præponi IOSEPHVM. Quò ergo iure tam multi, adhuc nostrâ ætate, à publico cultu reijciunt IOSEPH? 4. Ita IESVS, MARIA, & IOSEPH hîc arctè coniunguntur, ut nullo vnquam tempore separandi sint. Proximè igitur ad Diuinitatem accedunt. 5. Etsi horum trium nominum initiales tantum litteras quis scribat, I. M. I. definitionem tamen IESV, Græcè legentibus, certissimam exhibet, *εἰμὴν*, Sum. 6. In generatione hominis principalia membra, Caput, cor, & hepar sunt. Similiter in generatione hâc, caput est IESVS, *scriptus in capite libri*, ad Hebr. 10. v. 7. MARIA verò est cor eius, vigilans, dum dormit IESVS. Quid ergo aliud esse potest IOSEPH, nisi hepar nutriens nos sanguine IESV? 7. Hic Liber vnicò verbò absoluitur, quod IESVS est, olim à patre, nunc à matre procedens. At Libro isti præest IOSEPH. *Bibliothecarius* ergo supremi Regis meritò videtur dicendus. 8. Quotquot in Libro generationis ponuntur, aut sunt genitores, aut geniti. At IOSEPH non est genitus à IESV. Ergo debet esse genitor eius. Nempe locum hîc habet

I

axioma:

axioma : quod quis per alium fecit , per se fecisse censetur. At genuit IOSEPH per MARIAM. Potest ergo censerī genuisse per se. 9. IOSEPHO immediatē IESVS succedit , & velut Syriæ Rex innititur Naamano , hoc est , *pulchro*. Nam verè pulcher est noster IOSEPH Speciosi IESV præ filijs hominum Pater , ac Vir Mariæ itidem pulcherrimæ. 10. Tria sunt omnia , dixere Antiqui. At iam dicere possumus : tria nomina , IESVS, MARIA, IOSEPH, sunt omnia nomina. Si ergo simul eloqui vis omnia nomina, dic, IESVS, MARIA, IOSEPH. Nec obstat ea postrema esse in Libro, de quo agimus. Sæpe enim primum est, quod est postremum. Atque ita etiam IOSEPH, postremus ordine, est supremus dignitate, utpote proximus dignissimo.

ELOGIVM XLII.

IOSEPH

Legatus Apostolicus IESV, primus omnium.

SI IOSEPH Legatus est Apostolicus IESV, tunc etiam primus omnium est. Est enim in confinio utriusque Testamenti, ut nescias, magisne sit vnius, quàm alterius. At esse Apostolicum Legatum IESV certum esse videtur. Nam 1. IESV haud dubiè est, qui tot ad IESVM nominibus refertur. Est autem 2. etiam Apostolicus, non quidem

dem prout significat Papam , siue Pontificem summum ; sed , quia fungitur Apostolico munere. Est 3. Legatus Apostolicus, & quidem triplex; *missus, natus, & à Latere*, qui Cardinalis est , vel saltem *cum potestate Legati à Latere*.

Nam 1. *Legatus missus*, est idem, quod *Datiuus* vel *Temporarius* , quia nonnisi ad certum tempus constituitur. At talem renuntiavit IOSEPHVM Angelus, Matth. 2. v. 13. *Fuge in Ægyptum*, inquit, & *esto ibi, vsque dum dicam tibi*. Vbi præscribitur 1. munus. 2. abeundi modus. 3. tempus indeterminatum. 4. Locus. Et hæc omnia quadrant Legato tali. Nam 1. munus maximè spirituale est redundans in bonum Pontificis primi, nempe IESV, & MARIE matris eius. *accipe puerum, & matrem eius*. 2. Fugere iubetur , abeundi genere nonnisi periculosis Legationibus accommodatò; cuiusmodi Legatio etiam hæc fuit. 3. Tempus Legationis septennio circumscriptum esse tradunt Anselm. in cap. 2. Matth. Petrus Comestor in hist. Evang. cap. 23. Ammon. Alexand. in harm. Evang. quibus & nos accedimus cum Castriò cap. 12. Nec obstat, hos temporis limites IOSEPHVM initio ignorasse. Hoc enim vfitatissimum est; vt iubeantur Legati manere, donec expressè reuocentur. 4. Locum Legationis Ægyptum accepit, primum ac præcipuum Apostolicorum Legatorum theatrum , qualem postea Locum Franciscus Xaverius in India, & Andreas Quietus in Abassia , alijque alibi inter Barbaros pro IESV & MARIE gloriâ acceperunt,

Sed neque Legato IOSEPHO defuit reuerentia, digna maximo, quod gerebat, munere. Nam 1. Perseis, arbor antiquissimæ superstitionis, Hermopolim ingredienti; se sponte demisit in terram, velut inclinans se, ac potestatem hospitem agnoscens. 2. Etiam Simulachra & Statuæ à Dæmonibus occupatæ quæ passim toto itinere occurrebant, humi iisdem fugientibus conciderunt, in signum victoriæ. De quibus testimonium dixere Sozomenus lib. 5. Hist. Eccles. cap. 20. Cassiod. lib. 6. Trip. Hist. cap. 42. Druthmarus in 2. Matth. Euagrius in vitis PP. de Apollonio, & alij, conuenienter Isai. 19. v. 1. *Ecce Dominus ascendet super nubem leuem*, hoc est, MARIAM & IOSEPH leues instar nubium, propter fomitis carentiam; & *ingredietur Ægyptum, & commouebuntur Simulachra Ægypti à facie eius*, concidendo in terram,

2. IOSEPH est *Legatus natus*, potestate officio annexa ex gratuita dispositione mittentis Pontificis Summi, vel potius eius, cuius ipse vices agit. Cuius Ratio est, quia ad hoc non requiritur, ut simulac quis nascitur, hanc potestatem accipiat, tunc enim exercere illam nemo potest, saltem sine miraculo. Requiritur tamen officium exigens illam. At IOSEPH tale officium certò habet. Est semper Pater summi Regis & Sacerdotis; estque Vir MARIÆ eiusdem Matris; est etiam Virgo, & propter eximias virtutes non solum capax, sed dignus Legationis; est denique supremus Præses in aula cœlesti vtriusque Signaturæ, gratiæ & iustitiæ. Et gra-

tis

tiæ quidem, vt dicetur, ordinariè subscribit, requisitus à Clientibus; Iustitiæ verò, cum exigit necessitas.

3. Idem IOSEPH est *Legatus à Latere*, quem Cardinalem ipsa sua dignitas facit, cum sit cardo Ianuæ Cœli, *MARIÆ* inquam, per quam Dei Filius se penetrauit in Mundum. A Latere quoque, Consanguinitatis Christi arborem, proximè contingit. Nec deest virtus idonea cuilibet honori. Quam si in tenebris delitescere finit Mundus, non finit tamen Deus. Ideo IOSEPHVM nunc quoque pro IESV suo Legatione fungi credere possumus, ad quam ipsum illa sua Virtus euexit.

ELOGIVM XLIII.

IOSEPH

Intimus Amicus Angelorum.

QUod hîc dixi, apertè res ipsa vel tacentibus nobis loqueretur. Cum enim de IOSEPHO à scriptura sacra apprimè parùm tradatur, inter ea tamen sunt apparitiones quaternæ, in quibus ipsum Angeli (plures an vnus fuerint, postea dicetur) de rebus grauissimis, ipsique & familiæ suæ vtilissimis, informârunt: De magna igitur amicitia Angelorum erga IOSEPH, quod sit, sicut dubitandi locus non est, ita nec est dicendi. Cui vacat, Gerson, dist. 5, litt. E. Eckium mihi fol. 134.

& Salmeron. tr. 45. adeat, qui me simul prærogatiuæ præsentis admonuere.

Sunt tamen alia quædam magis recondita quæ in lucem proferri, quibus optare possit. Sed sunt hoc tempore ingenia tam seuera, quibus sæpe testes oculati non faciunt satis. At his in rebus, de quibus hîc agitur, ne quidem testes de auditu haberi producere possunt. An igitur te sine responso dimittam? Equidem faciam, quod possum, & auctores profero, quales haberi possunt in rebus longissimè remotis à nobis.

Igitur 1. Plurèsne, an vnus tantum Angelus, IOSEPHO apparuerunt? Affirmo, vnum fuisse. Ratio est, quia vniformiter vocatur Angelus Domini; diciturque eodem apparenti genere vsus, itemque loquendi. Causæ quoque quæ ad vnum finem tendunt, melius cohærent, si tractentur ab vno. Castrius cap. 6. num. 11.

2. Quis ille Angelus toties apparens fuerit? Supra aliquid de eius nomine dixi. Nunc denuo repeto, fuisse Gabrielem. Ita Eusebius Emis. in cap. 1. Matth. & Druthmarus ibid. cum Haym. apud Castr. cap. 6.

3. Ex quâ Hierarchiâ, Chorove Gabriel sit? Id quoque iam dixi; nempe esse ex tertia Hierarchia, Choro Seraphinorum, vnum de septem principibus, qui adstant coram Deo, vniuersalem Ministrum Oeconomix Incarnationis IESV CHRISTI. Ita Scot. in 2. dist. 10. q. vnica. Durand. q. 1. Molin. in 1. p. q. 112. Valent, Disp. 8. q. 6. punct. 2. Salmer.

Salmer. tom. 3. c. 3. & alij multi. Quorum Ratio est dignitas causæ ipsi demandatæ; est autem Gabriel 1. idem, quod *fortitudo Dei*; tum quia prælijs præest; tum quia IESVM in agonia confortavit. Corn. in Luc. c. 22. 2. *Vir Deus*; quia Incarnationem, in qua Vir Deus factus est annuntiavit MARIAE. 3. *Fortis meus*; quia IOSEPH timore, & periculis familiam suam liberauit; itémque beneficium hoc alijs præstat.

4. Quamdiu manserit cum IOSEPH: Mansisse Dico nouem horis, flexis genibus insistentem cum MARIA Virgine, non quidem Legatione tantum tempus exigente, sed obstupefactum Maiestate, ac Virtute Matris Dei. Ita Corn. in cap. 1. Luc. refert ex monumentis Congregationis S. Georgij in Alga. Inde quiuis æstimare poterit, etiam cum IOSEPHO, si quidem tunc in domo fuerit, aliquamdiu mansisse.

5. Cur semper in Somnis apparuerit? Causam do, 1. quia non decebat IOSEPHVM à fabrilis operis auocari, sub cuius vilitate latendum id temporis erat Filiò Dei. 2. quia de rebus admodum secretis informandus erat IOSEPH. 3. quia mens hominis tempore somni à curis terrenis prorsus avocatur, ideòque diuinis motibus opportunior est.

6. An dormienti apparuerit? Negant aliqui apud Abulens. q. 56. in cap. 1. Matth. detorquentes verba scripturæ ad sensum dipisum, quod scilicet apparuerit ei, qui dormiebat. Sed non placent;

quia *exurgens IOSEPH à Somno*, Matth. i. v. 24. *fecit, sicut praecepit ei.*

7. An imaginariè, vel potius intellectualiter apparuerit? Etiam oculis potuit apparuisse, eò modò, quo Petrus credidit se in somno & imaginariè tantum liberari ab Angelo. Sed verius est, imaginariè apparuisse; quia verba scripturæ loquuntur de somno propriè tali. Si tamen audire me, grave non est, credo IOSEPH gratiam habuisse alijs minoribus Sanctis sæpe concessam, simul dormiendi corpore, & animo, per rationis vsum, vigiliandi. Hoc autem admissò, facillimè, IOSEPH veritatem apparitionis cognouisse potuit.

Cæterum somnia diuina, sicuti vina salutaria discernuntur, efficacità, dulcedine, claritate, vt adeò etiam hinc illum iuuari potuisse, absolutè non sit negandum. Sed tamen si quis alius ob hanc congruentiam moueri nolit, nã ille per me quidlibet aliud dicere poterit, dummodo ego respondere non debeam.

ELOGIUM XLIV.

IOSEPH

Balsami inter Gentes propagator.

M Agisne vllum decuit, Balsamum propagare inter Gentes, quàm IOSEPHVM, qui Christum, sic dictum ab vñctione (tum quâ ipse vnctus à Deo Patre est Rex, Propheta, & Summus

mus Pontifex; tum qua vbilibet Gentium credentes in se mediantibus Sacramentis vngit) à teneris vnguiculis ad virilem vsque ætatem nutriuit. Est enim Balsamum saltem necessaria Sacramenti Confirmationis materia. Non ergo in vnica Iudæa, paucisque iugeribus montium Engaddi, includi, per id etiam tempus, debebat, quo tempore idem Christus, duce IOSEPHO, secessit in Ægyptum.

Sed me decentiæ soli hîc inniti, necesse non est. Vt enim ex Brocard. & Saligniaco, Adrichom, in Descript. terræ sanctæ, pag. 47. num. 127. testatur, IESVS ipsemet secum in illud regnum intulit Balsamum. At à quo illud accepisse infans potuit terræque infixisse, nisi opera IOSEPHI? Nam mater vni huic Infanti vacabat; Vicinos etiam latebat fuga. Et si, quod fieri posse negare non possum, accepisset ab alio, puta Zacharia Ioannis Baptistæ Patre, non tamen tam magno temporis intervallo, quo proficiscendum fuit, conseruare potuit sine industria IOSEPHI; multoque minùs alieno solo, aridoque inferri, plantari, ac propagari.

Sunt præterea coniecturæ aliquæ minimè leues, quæ in re per se obscura multum ponderis habere posse videntur.

Ac 1. Quia exilij locus, in quo commoratus est cum suis IOSEPH, est medius inter Babylonem & Heliopolim. At ibi tunc erat hortus Balsami. Ergo vel in horto, vel prope illum idem commoratus est. At hoc fieri non potuit, si tum hortus Balsami, aut initium eius non fuit. Fuit ergo saltem

initium eius. Hîc autem maior prima est Brocardi cit. Bonifacij & Castrij. 2. Quia prope hortum Balsami fons est eundem irrigans, in quô MARIA IESVM paruulum sæpe lauit, eiûsque panniculos deterfit. Ita Iansen. in Concord. cap. 11. Est etiam ibidem lapis, in quo, quæ lauit, exsiccare solita fuit. Itêmque ficus ibi est, quæ ad nostra tempora perdurat, ijsdem vsibus à Virgine adhibita. Quæ postquam semel contigère Auctorem Salutis, Salutem posteris, hortoque ipsi, non cessant propinare. Idque etiam Saraceni affirmant, qui, dum, propè, fontem alium effodissent, aliter salutarem efficere non potuère, quàm prioris admixtione fontis intra illum admissi. 3. Nihil IESV accomodatius Balsamo est. Parens ergo eius nihil sæpius, quàm Balsamum offerre ipsi debuit.

Antecedens probatur. 1. Quia IESVS optimô modô vnctus est. *Oleum enim effusum nomen tuum*, Cantic. 1. v. 2. At non est melius oleô Balsaminô, siue chrysmate. 2. Et IESV & MARIE accommodantur illa, Eccles. 24. v. 20. *Sicut cinnamomum & Balsamum aromatizans odorem dedi*. Et v. 21. *quasi Balsamum non mistum* (sæpe enim miscetur atque adulteratur) *odor meus*. 3. Balsamum est, Commentatore Diascorid. ad c. 28. teste, omnium Saluberrimum ad conseruationem totius generis humani. At IESVS est Saluator Mundi. 4. Balsamum exsudat incisione corticis, non tamen ferrô, sed acutis lapidibus, & osseis cultellis. Vicissim Balsamum gratiæ non nisi ærumnis, heroicæque patientiâ

tientia ex Vulneribus Christi exsudat; ferrô autem, hoc est impatientiâ prorsus exarescit. 5. Balsamum à solis Romanis in triumphum ductum est, clamante Pompeio M. In triumpho arbores quoque duximus. Neque ab alijs quàm Românis copiosius est acceptum Balsamum, Balsamum & doctrinæ & gratiæ Christi. 6. Balsamum Venenis omnibus ac præcipuè Viperarum resistit. At idem fecit respectu Diaboli Balsamum Christi, odore bonæ ædificationis, venenatas omnes peccandi occasiones præscindens.

ELOGIUM XLV.

IOSEPH

Faber omnium præstantissimus.

PRimo ponam opinioniones aliorum; tum deinde quid mihi videatur, subiungam.

Sic autem 1. IOSEPH *fabrum ferrarium* fuisse putârunt Hilarius can. 14. in Matth. Petrus Chrysolog. Serm. 48. Leander Hispal. libel. de instit. Virg. ad Florentinam Sororem. Isidor. in Reg. Monach. cap. 5. Beda lib. 2. in Marc. cap. 23. Anselm. in Matth. 13. 2. *Fabrum camentarium* fuisse, ait, Augustin. Serm. de Natiuit. Dom. & Serm. 1. Dom. infra octauam Epiphaniæ. 3. *Fabrum aurificem*, vel *murarium* fuisse testatur Hugo apud Cornel. à Lap. in 13. Matth. 4. Ambrosius super c. 13. Matth. ait simul fuisse *ferrarium & lignarium*.

Verum

Verum non probantur nobis opiniones hæ. Nam 1. vultus manusque ferrarij fabri haud satis decent etiam externam IESV & MARIÆ pulchritudinem; nec deuotionem intuentium excitant; nec exprimunt ipsius IOSEPHI internam animæ elegantiam. 2. Cæmentarij fabri plerumque domo absunt, peregrè laborantes. 3. Aurifices, etsi quidem re ipsa fabri sint, fabrorum tamen nomine non veniunt, præipue cum exprobratur alicui, quod faber sit. Adhæc aurum maximè tractant aurifabri, vnde & nomen habent. At aurum quis nisi post abitum Magorum inueniat in domo IOSEPH? 4. Idem aurificis & murarij fabri officio fungi non potest. Sed neque vllibi vsquam coniungitur officium ferrarij & lignarij Fabri.

Igitur, his dimissis opinionibus, Sententia nostra est, IOSEPH fuisse *fabrum lignarium*. Ita sentiunt Iustin. in Dial. cum Tryphon. post med. Ambros. Serm. 16. in Natal. Dom. Chrysostom. Serm. 30. in c. 1. Epist. ad Rom. Auctor imperf. in Matth. hom. 1. & hom. 32. in 19. Matth. Sozom. lib. 6. Hist. Eccles. cap. 2. Theodoret. lib. 3. hist. Eccles. cap. 23. Nicephor. lib. 10. hist. cap. 33. S. Thom. in cap. 12. Matth. & Recentiores communiter.

Rationes meæ sunt. 1. quia hic est sensus Ecclesiæ & traditio antiquissima; quantum colligi potest ex Statuis & Imaginibus, vbi sculpitur, & pingitur IOSEPH cum ferra & ascia. Sed neque sine graui fidelium scandalo, representari habitu & forma ferrarij fabri posse videtur. An autem IESVS

Patrem

Patrē elegerit, qui eo habitu & forma, quā fuit, sine scandalo aspici non possit. 2. Id opificium non tractauit IOSEPH, in quo verisimile est, ipsum non esse adiutum à IESV. At in nullo opificio antea reprobato, verisimile est adiutum esse IOSEPHVM à IESV. 3. Opificium, quod exercuit IOSEPH, conuenire debet muneri, quod gessit circa IESVM & MARIAM. At nullum magis conuenit, quam fabri lignarij. Nam 1. nonnisi paucis instrumentis opus habet. 2. vbilibet exerceri potest. 3. Ipsimet tali patrifamilias prodest. 4. ordinariè immune est à grauibus peccatis, & peccatorum occasionibus. 5. Et in stabulo Bethlemitico & in Ægypto, vbi exulauit cum suis, nihil magis necessarium aut vtile esse potest.

Sed iam inter lignarios fabros lis inualescit, quibusnam adscribendus sit IOSEPH; magisne inquam, *arcularius*, quàm *lignarius* fuerit. Cuius litis equidem, nec arbitrum, nec iudicem, adhuc reperi. Duo autem mihi probabiliora sunt. 1. Fabrum fuisse ex eorum genere, qui quiduis operantur in ligno. Tales enim in Iudæa fabri sunt teste Gratiano lib. 2. cap. 5. 2. Ordinariè *arculariam* factitasse, partim, quia *arcularij* se fere intra domesticos parietes tenent; partim verò, quia minus laboribus premuntur. Eorum quoque opera aptiora sunt IOSEPHINÆ familiæ; plusque ingenij atque artis habent. Demum *lignarij* fere crassioribus moribus præditi sunt; quàm *arcularij*. Interim verò IOSEPHVS vt dixi, dici debet absolute Faber

ber lignarius, & non limitate tignarius, vel arcularius. Ratio est, quia talis utique Faber fuit, quales solent esse in Iudæa. Atqui ibi Faber quidvis operari novit in ligno. Ergo.

Sed anne propterea IOSEPH est Faber omnium præstantissimus? Nègo propterea esse; nec ea, quæ dixi propterea attuli. Aliud enim non volui, quàm ostendere, qualis Faber fuerit. Et nunc iterum dico, IOSEPHVM esse Fabrum præstantissimum 1. quia virtute. 2. quia dignitate, 3. quia Magisterio fuit præstantior alijs omnibus Fabrīs. Fuit ergo & materialiter, & formaliter præstantissimus omnium. Verùm id quod de Magisterio dictum est, probabitur Elogio sequente.

ELOGIVM XLVI.

IOSEPH

Magister Filij Dei in arte fabrili.

Non est, inquit Filius Dei, Discipulus supra Magistrum. At, subsumo, est Filius Dei, discipulus IOSEPHI, & IOSEPHVS est Magister eius. Non est ergo Filius Dei supra IOSEPHVM. At hoc quis sine blasphemia audiat, nisi verba illa Filij Dei aspergat sapientiæ sale. Sal autem istud, aliud non est, quàm Discipulum non esse supra Magistrum, præcipiendo. Sicut enim Magistri est præcipere, ita Discipuli est subesse, & obedire præcipienti. Atqui, qui præcipit, supra est; infra, qui subest.

est. Si ergo IOSEPH est Magister Filij Dei, Filius Dei est eius Discipulus, & infra IOSEPHVM.

Hic autem subsistes forsitan, qui hæc legis; & nonne, inquires, Filius Dei est Filius Dei? At est haud dubiè Filius Dei maior IOSEPHO, etiam præcipiente. Est ergo Filius Dei supra Magistrum.

Verum non est, cur à concepta discedam sententia. Nam si præcipere plus est, quàm subesse, cur recusem, Filium Dei, dicere, esse quid minus præcipiente IOSEPHO, in eo nimirum ordine, in quo præcipit iste, subest ille? Nihil ego quidem causæ video, nisi simul me adigas dicere, fundamentum alicuius domus esse supra tectum; in quo nostrimet nos oculi damnant. Igitur ad id potius, quod hic tribui IOSEPHO, vendicandum accedam.

Tradunt IOSEPHVM, Magistrum IESV in fabrili arte, fuisse plerique, adeò vt facilius longè sit, recensere, qui negant, quàm, qui affirmant. His ergo omnibus omissis præter aliquot Sanctos Patres infra citandos, negant apud Cornel. à Lap. in Luc. 2. v. 51. Paulus Burgenis in Matth. cap. 6. Barrad. hic, & Simon de Cassia lib. 4. cap. 2. ducti excellentia status contemplatiui, nulli magis, quàm Filio Dei conuenientis. Qui etiam, si iubeantur explicare verba, Marc. 6. v. 3. à Nazarenis prolata? *nonne hic est Faber?* confestim obtendunt mihi S. Augustin. lib. 2. de Consil. Evang. cap. 42. *Eò Fabrum credebant, quò Dei Filiū*, qui est Faber totius vniuersi.

Sed his, quod arborum ætatem ferentium propri-

proprium est, inclino me solùm, cæterà radicibus pro Veritate fixis firmisque. Pro quâ veritate, vt omitram alios ætate posteriores, stant etiam Iustin. in Dial. cum Tryphone. Basil. in Const. Monast. c. 5. Sozomen. lib. 4. cap. 3. Hieronym. epist. 47.

Rationes præterea sunt; 1. Quia Luc. 2. v. 51. compendium traditur totius vitæ IESV vsque ad 30. vitæ annum perductæ. *Et erat subditus illis.* Vbi verba, Bernard. Serm. 1. super Missus est, cogita, nostra esse. *Quis?* (intellige, subditus erat) *quibus?* *Deus hominibus, nec tantum MARIE, sed & IOSEPH? utrimque stupor; utrimque miraculum, &c.* At, quæso te, in quibus subditus erat? In ijs vtique, quæ parentes aliàs facitabant. At, vt textoriæ MARIA, ita fabrilis vacabat IOSEPH. 2. Perlubenter IESVS loquebatur de fabrilibus operibus; vt de iugo, Matth. 11. v. 29. *Tollite iugum meum super vos, v. 30. iugum enim meum suave est.* Luc. 9. v. 62. *Nemo mittens manum ad aratrum, & respiciens retrò, aptus est regno Dei.* Placuitque hæc Ratio interpretibus Scripturæ, prout Cornel. noster ostendit in allata verba; *Subditus erat.* 3. Quod Deus egit ab æterno, credibile est, suo modo, imitatum esse filium Dei. At fuit Deus ab æterno Faber concipiendo ideas fabricandorum operum. Ergo & IESVS filius Dei ipse quoque Faber fuit. 4. Verisimile non est, eum, quem odisti, Fabrum à te dici, quem dicere poteras, otiosum & frugiperdum. At Iudæi, qui grauissimè odere IESVM, maluerunt illum Fabrum Marc. 6. v. 3. & Fabri filium Match.

13. v. 55. dicere. 5. Ruinosum est aduersariorum principium. Christus enim à Contemplatione ne quidem inter seruilia opera, aut dormiendum cessauit.

Iterum verò iterumque expendi volo verba :
ET ERAT SVBDITVS ILLIS. Mihi certè dubitandi locum non relinquunt, IESVM subditum fuisse Fabro IOSEPHO, & textrici MARIE, etiam quâ tales erant.

ELOGIVM XLVII.

IOSEPH

Musicus cœlestis in terra.

Nemo facilè Principum est, qui Musicos sibi non comparet Maiestati suæ pares, à quibus inter imperij curas subleuentur. Cœlum quoque eo, quo conditum est die (primum mundi nos censemus fuisse) Musica se digna illico insonuit, canentibus Angelis, quos vna Deus produxit, suauissimum Trisagion, Sanctus, Sanctus, Sanctus ; & Alleluia lætissimum, quæque alia suprema Imperatori grata erant.

Sed neque eadem Angelica Musica, dum in stabulo Bethlemitico Dei Filius inuiolata ex Virgine coram IOSEPHO nasceretur, defuit ; deserto enim, ac ferè fastidito cœlo suo empyreo in illo ipso stabulo, ceu cœlo longè amœniore præcinuit destinatum Pastoribus melos, Gloria in altissimis

K

Deo.

Deo. Alijs quoque compluribus occasionibus, ac præcipuè, dum nocturno tempore IOSEPH & MARIA contemplarentur IESVM admirabili lute circumdatum, huius laudes Angeli decantabant, teste Birgitta lib. 6. cap. 58. & lib. 9. cap. 5.

Verùm putásne in hac publica cœli lætitia prorsus tacuisse terram? Minimè Gentium; Habet enim IESV nascente terra, quod præ cœlo eiusdem tenellis auribus offerat, Patrem, inquam, IOSEPHVM, ac MARIAM Matrem, Virgineos Musicos ac supra Angelos felices, quos ei sæpius, ac præcipuè, exilij tempore, accinuisse, Gerson Parisiensis Cancellarius testatur. Eius tibi verba extr. 4. super Magnificat litt. M. coram profero. Discipulus. *Putásne credendum, quod vocale canticum addiderit nonnunquam Beata Virgo. Magister. Sanè puto, maximè in peregrinatione laboriosissima, comitibus IESV puero, & Virginali Sponso IOSEPH: vt adimpleret ad litteram illud, Psal. 118. v. 54. Cantabiles mihi erant iustificaciones tuæ in loco peregrinationis meæ. Cur præterea non cecinerit corporalem recreando laborem; nunc psalmos patris sui David, nunc canticum proprium, nunc illud Zachariæ, nunc Simeonis; alludens Sponso blandienti & dicenti: Vox tua sonet in auribus meis; vox enim tua dulcis. Nunquid existimas Beatam nostram in iucundissimo partu, & post partum, dum natus erat Salvator Mundi, concinentibus Angelis, Gloria in excelsis Deo, siluisse? Nunquid non infanti in præsepio posito & flenti, debuit aliquod Amoris purissimi carmen, & consolatorium fescenninum dulci susurro velut aura tenuis, resonare?*

sonare ? Quid verò de celebri ritu propriarum nuptiarum, coniecturas, quæ nuptijs alienis interfuit hilariter honorandis ? & vino de aqua factò gratuita pietate solandis ? Quid in templo nutrita & de canticis Sion edocta, debuit, quæso, silere ? Discipul. Grata commemoras, quæ non abhorrent à pia credulitate, etiamsi addideris, iustum IOSEPH cum puero IESV nonnunquam vnà cecinisse. Sed hæc hæctenus ; quæ Seculi prudentibus in oculis suis nugæ videbuntur aniles, & indignæ ; quasi non multo amplioris humiliationis, vel Crucis mysterium ; vel lotio pedum sit, &c. Quæ quia IOSEPHVM quoque Musicum faciunt, meritò videbantur, integrè recitanda.

Sed his insuper de mea inopia aliqua addam pro eodem nostro IOSEPHO. 1. Quod vſitarum est alijs omnibus, ac nominatim Iudæis, non est credibile, prætermiſſum à IOSEPHO. At omnibus parentibus vſitarum est, canere coram parvulis liberis ; ac nominatim Iudæis, canere ante, & post mensam, Corn. ad Eph. cap. 5. & in Matth. cap. 26. v. 30. 2. Musica medium est aptissimum ad inflammandum diuino amore pectus. Quò utique non abstinuit IOSEPH optimus filius David, eiusque imitator. 3. Ipsemet Christus, Passionis suæ initiò, hymnum bene longum, septem psalmis, qui inter 111. & 119. sunt, constantem, cecinit, unde Conc. Tolet. IV. ait, nos habere exemplum hymnos cantandi, At nemo vicinius imitatus est Christum, quàm IOSEPH. Sicut ergo Christus Musicus cœlestis est, ita est & IOSEPH. 4. Nemo

plura prædestinationis signa habuit. At inter hæc etiam Musica deuota est, vtpote pars aliqua lætitiæ cœlestis.

ELOGIUM XLVIII.

IOSEPH

Theologus profundissimus.

Theologia nobis hîc est Scientia sacra, ac reuelata, saltem mediatè, de Deo, rebûsque diuinis comparata; quâ vt Augustin. lib. 14. de Trinit. cap. 1. ait, Fides gignitur, nutritur, defenditur, roboratur. Cuius studiosum fuisse IOSEPHVM, iam supra ostendi. Elog. 39. dum probarem, tricennarium fuisse Auditorem IESV. Non enim, quemadmodum nostrorum mos fert temporum, studiosi munus à munere Auditoris, licentia viuendi auulsit. Nihil igitur mirum esse debet, si vocem ipsum Theologum profundissimum,

Sed præterea alia quædam sunt, quæ rem nobis prope demonstrare videantur. Nam 1. Ipsum Theologiæ obiectum tum attributionis, tum formale Quod, simul fuit Professor eiusdem; Deus inquam, optimus maximus. Neque hæc felicitas vlli alij contigit, præterquam MARIE Matri Dei; siquidem æstimemus diuturnum tempus studiorum. 2. Hic ipse Diuinus Professor nulli vnquam Discipulo adeò obligatus fuit, quemadmodum huic, quem sustinuit putari Patrem carnalem, re ipsa verò

verò agnouit coluitque vt Patrem , ijs omnibus modis, quibus sine generatione Pater quis esse potest. 3. Vicissim inter omnes homines, sola excepta Virgine MARIA, optimè de eodem Professore meritus est IOSEPH. At fieri nequit, vt vel obligationis suæ, vel meritorum cuiusquam, obliuiscatur talis tantusque Professor. 4. Nihil ad docendum aptius est, quàm si Magister Discipulorum oculis subijciat claras aliquas rerum percipiendarum ideas. At hoc Deus IOSEPHO cumulativè præstitit. 5. Ideas istas inprimis MARIA IOSEPHI coniunx & condiscipula optimè intellexit: Vt enim Luc. 2. v. 19. testatur, *conseruabat omnia verba, conferens in corde suo*. At cor ipsius, IOSEPHVS fuit. In IOSEPHO ergo contulit, velut repetens, ruminans, & expendens cum ipso, collatitia opera, quæ prius audiuerat, & viderat. 6. Hæc eadem Virgo, non paucos clientes suos, vnis precibus ad Deum filium suum fufis, repentè Theologiam simul omnem perdocuit. At primus omnium Clientum eius IOSEPHVS fuit. An ergo primas eiusdem preces reijcere Filius ille potuit? 7. Inductione partium optimè probatur totum. At ostendi inductione potest, IOSEPHVM Theologiæ partes singulas complexum esse.

Nam 1. vt Gratian. lib. 5. ex consensu quorundam Sanctorum docet, probabile est, adhuc in hac vita clarè & intuitivè aliquando vidisse essentiam Dei, prout de Apostolo Paulo concedit S. Thom. in 2. 2. q. 175, 2. Immediato ministerio,

consortio, & alloquio Angelorum sæpenumero fructus est. Quis ergo de Angelis rectius loqui posset? 3. Grauitatem peccati itidem ab Angelis audiuit; nempe tantam esse, à qua saluari homo non possit, nisi vnus Dei filij interuentu: *ipse enim saluum faciet populum à peccatis eorum*, Matth. 1. v. 21. 4. Gratiam quoque ex IESV auctore gratiæ, ex MARIA puteo aquarum viuientium eiusdem gratiæ, & ex suâmet anima, in cuius labium se illa proximè effudit, abunde comprehendit. 5. Fidei mysteria pleraque ac præcipua coram aspexit in tanta motiuorum credibilitatis luce proposita, vt nemo vnquam vltèrius progressus sit. 6. Idem attigit supremum spei & charitatis apicem; vtpote Pater Filij Dei, promissionibus, beneficijs & illustrationibus maximis illuc euectus. 7. Studuit deinde Iustitiæ in omni vita, ideòque nomen Viri iusti ab Euangelista accepit. 8. Adhæc Fortitudinem in exilio, & temperantiam, etiam moribus expressit. 9. Prudentiæ tantopere se dedit, vt nihil aggredi vellet, nisi prius secum ipse & cum Angelis deliberâset. Tandem verò & Incarnationis, & Sacramentorum, quæ id temporis erant, difficultates præcipuas ipsemet exhaustit. Quod tamen ego hic explicare supersedeo, fretus Sapiencia Legentium, qui vtique mecum fatebuntur, IOSEPHVM esse profundissimum Theologum.

ELOGIUM XLIX.

IOSEPH

Religionem perfectissimam professus.

SI verum sit, Religionem 1. Martyrio compara-
 ri. 2. ad paradysum cœlumque proximè acce-
 dere. 3. promereri plenariam peccatorum re-
 missionem. 4. centuplum esse à Christo promif-
 sum, Matth. 19. v. 29. 5. Esse certissimum pignus
 vitæ æternæ. Et 6. Spirituale matrimonium esse
 animæ cum Christo, omnibus matrimonijs digni-
 us, amabilius, iucundius ac fructuosius, negare pro-
 fectò nemo potest, IOSEPHVM quoque Religio-
 nem suscepisse ac palàm professum esse. At verum
 est prius; vti cum Theologis demonstrant Ascetæ.
 Ergo & posterius verum est. At implicat prædicari
 genus de aliquo, nisi in certâ quadam specie. Si ergo
 IOSEPH Religionem in genere professus sit, hanc,
 vel istam, vel illam, &c. professus est. At hoc quis di-
 xerit, dum Religiosi status singuli, quasi æmulatione
 quâdam pia concitati, suo illum cœtui adiun-
 gunt, siue Socium, siue Ducem? In quam litem ego
 hodie falcem non mittam, acquiescens ijs, quæ in
 1. ad Cor. 1. v. 9. ait Apostolus.

Quæ quidem alij, vt lubet, accipere poterunt.
 Interea verò certum id esse fixumque debet, si qui-
 dem aliquam Religionem IOSEPH professus sit,
 professum esse perfectissimam. Et Ratio est, quia
 quò quis ad perfectiorem finem prædestinatur, eò

prædestinatur ad media perfectiora. At est ex vnâ parte IOSEPH prædestinatus ad perfectissimum finem; ex alia, perfectissima Religio est perfectissimum medium consequendi eum finem. Ergo IOSEPH reipsa professus est perfectissimam Religionem.

Huc ergo tandem recidit proposita quæstio, quænam in specie Religio reliquis perfectior sit. In specie, inquam; quia consultò succidimus hîc nihil profuturam determinationem alteram, cuinam particulari Religioni primas perfectionis demus. In illa etiam latitudine speciei, & scopuli, & fluctus obijciunt se nobis, quos euitare labor erit. Verùm sub Angelici Doctoris auspicijs quis potest esse metus, nisi vanus?

Cum hoc ergo 1. Tria sunt Religiosæ vitæ genera; nempe vnum, quod agit; alterum, quod contemplatur; tertium, quod agit, & contemplatur. Ac primum ex his secuta est Martha; alteri se Magdalena addixit; tertium denique Christo & Apostolis placuit. 2. Genus alterum vitæ Religiosæ, quod contemplantium est, excellentius est primo Agentium. Ratio est 1. quia Luc. 10. v. 41. ait Christus; *Martha, Martha, sollicita es circa plurma, &c. MARIA optimam partem elegit.* 2. quia excellentius est occupari circa finem, quàm circa media. Atqui contemplans occupatur circa finem, quò obtentò cessat actio; at agens circa media occupatur. 3. Mixtum genus ex contemplatione & actione excellentius est quolibet alio diuissim sumpto, sal-

ptò, saltem in hoc præsentì viæ statu. Ita S. Thom. 2. 2. q. 188. a. 6. & q. 189. a. 8. Rationes sunt 1. plus est illuminare, quàm lucere. At mixtum genus ardet & illuminat. 2. quia MARIA, tantum optimam partem, & non optimum totum, elegit. 3. quia tale vitæ genus duxit Christus cum Apostolis, ducuntque modò Episcopi. At hoc haud dubiè perfectissimum est. 4. quia non tantum actio contemplationem non destruit, sed eandem persæpe iuvat, siquidem fini accommodata sit. Hoc ergo genus vitæ religiosæ, etiam IOSEPH, professus est, sub tribus votis. Quam enim causam habuit Virginitatem vouendi, habuit & Paupertatem, cum Obedientiâ, vouendi. Christus quoque Pontifex summus auctoritatem votis haud dubiè dedit. Denique mendicasse hunc satis clarè colligitur ex Suar. Disp. 28. S. 2. vt proinde neque hoc ignores, IOSEPHVM *ex ordine, siue statu, mendicantium fuisse.*

ELOGIUM L.

IOSEPH

Vir secundum cor Dei.

Multarum instar laudum est, esse Virum secundum cor Dei. Ideo quærere non destitit etiam Dominus illum, 1. Reg. 13. donec inueniret Dauid filium Isai. Verum successere Dauidi mortuo ætates bene multæ, quibus ne qui-

dem si in Lucernis scrutatus Israel esset, inuenturus fuerit Dauidi similem virum secundum cor Dei. Serò tandem, *vbi venit plenitudo temporis, misit Deus filium suum*, ad Gal. 4. v. 4. denuo quæsitum; qui illico, vt verbis vtar Bernard. Serm. 2. super Misus est, IOSEPHVM, *tanquam alterum Dauid, inuenit iuxta cor suum, cui tutò committeret sacratissimum sui cordis arcanum*. Vbi quidem mihi verba singula mirificè extollere videntur eundem nunquam satis laudandum IOSEPHVM. Sed iam officium meum præuertit Carthag. lib. 9. Hom. 7. Cuius ego vestigia, has inter angustias Lucubrationis meæ, isthic premam solùm, declaraturus paucis, IOSEPHVM non tantum esse Virum secundum cor Dei, sed etiam esse ipsissimum cor Dei.

Igitur 1. Cor à cura dicitur. At hanc tam Deus circa IOSEPH, quàm IOSEPH circa Deum adhibuit maximam,

2. Pulmonum ventilabro temperatur Cor à nimio sanguinis æstu. Hoc quoque tum Deo, tum IOSEPHO contulit Spiritus sanctus; cuius nomen ne quidem auditum est vnquam in veteri Lege, sed primùm insonuit tempore IOSEPHI, quò & amor Dei ex cœlo in terram, & è terra in cœlum validius exarsit. Ibi enim uero Spiritus ille diuino ventilabro utrobique sustulit sanguinis æstum, æstum, inquam, iræ, siue iustitiæ, in Deo, & amoris incasti in IOSEPHO, ne quidem fomite concupiscentiæ relicto.

3. Cor alternis motibus constringitur & dilatatur.

latatur. Similiter verò tam Dei cor quàm IOSEPH primò constringitur per timorem ; dein per lætiti-
am dilatatur. Loquor enim hîc de Deo incarnato
ex Virgine ; quem cum parentibus suis vicissitudi-
nes illæ per omnem vitam exercuere.

4. Cor hominis versus sinistram partem in-
clinat, secus quàm aliorum animalium corda so-
lent, quæ nonnisi in medio sunt. Id autem eo con-
silio fecit Author naturæ nostræ Deus, vt desideria
nostra præcipuè inclinaremus ad partem sinistram
aduersitatum. Ipse quoque Cor Filij sui, ac IOSE-
PHI illuc iugiter depreffit. Certè IOSEPH, com-
perto illum Dei, ac suum Filium in Ligno, nostri
causa periturum, quoties deinceps quodcunque li-
gnum manibus subiecit, simul cor suum dulci re-
cordatione affixit ligno illi viuifico, paratus ibi-
dem, & compati, & commori. Barry.

5. Cor duas intra se valuulas habet, auribus
humanis persimiles, quas etiam ob hanc formam
auriculas appellant Medici. Has iterum in corde
Filij Dei quiuis faciliè deprehendet, memor, subdi-
tum fuisse parentibus suis factumque pro nobis o-
bedientem vsque ad mortem Crucis. Verùm & IO-
SEPHO suo debetur obediendi laus ; quam infra
Elog. 88. singillatim describam.

6. Cor amoris sedes est ; ideòque amor cùm
pingitur, sub cordis schemate exprimi solet. At quid
est aliud Deus, nisi amor, merumque cor, quo sui
quodammodo oblitus fertur in IOSEPHVM. v-
nâque nos. Et IOSEPH quidem eidem cereum
suum

suum cor , subtrauit sine mora , inuitans cæteros exemplo suo , vt & nos ab amore diuino consignaremur, vel si ferrei simus aut plumbei, colliqueſceremus. Ideo idē aliquando spectabilem se præbuit, manu sinistra præferentem Cor supernè flammæ euibrans. Faxit autem Deus, vt his flammis subigatur etiam nostrum Cor ; vt enim S. Augustin. lib. 1. Conf. cap. 1. agnouit ; *Fecisti nos Domine ad te , & inquietum est cor nostrum, donec requiescat in te.* At requiescimus in Deo , si omnes eius voluntates faciamus. Hoc ergo agendum iam est , quod olim egit IOSEPH, Vir secundum cor Dei.

ELOGIUM LI.

IOSEPH

Septem maximis doloribus exercitus.

SI Christum oportuit pati, & ita intrare in gloriam suam, mirari nemo debet, eandem viam oportuisse prius IOSEPHVM pertransire. Est enim hic parentum amor & cura , vt quam postea filij ingressuri sunt viam, ipsi antea suomet periculō prætentent. At verum est, pati oportuisse Christum. Id namque prolixè ex Mose & omnibus Prophetis Luc. 24. v. 27. ostendit. Oportuit ergo antea etiam IOSEPHVM pati, & quasi prætentare viam Regiam Crucis. At quis ritè hanc ipsam viam, grauēsque dolores eiusdem enumeret, tot annorum spatij distans? Nobis certò ex Scripturis

pturis sacris, eò quòd ferè de Christo tantùm loquantur, nonnisi dolores septem à IOSEPHO tolerati occurrunt, quos tamen ante nos dudum Maiores nostri & agnouerunt, & reueriti sunt. Ab his autem acceptos ego quoque posteritati, quoad calamò meò consequi potui, transmitti exopto.

Igitur primus IOSEPHI dolor fuit cùm iniecta menti grauissima dubitatio, deferendi clam Vxorem summè dilectam, totàmque Spiritus S. de quò grauidatam videbat, relinquendi. Quam quidem dubitationem alij negant ex humilitate conceptam, (cuius contrarium supra affirmabam); ponuntque metum & suspensionem eius causam. Sed non perinde dolorem minuit quisquam. Cum enim is nascatur ex apprehensione mali, videtur æqualis esse vtrobiq̃ue, quia & maximum malum est, deferere coniugem, quam retinere teneris. Id solum obiter notari cupimus, si IOSEPH timuit, ne suâ maritali præsentiâ, Virgineæ Conceptioni Matris Dei & Dei filij officeret, frustra profectò inquireretur dolendi causa maior. At hoc mihi multisque alijs verissimilius est.

2. Dolor; cùm IESVM Dei filium, in stabulò, duro fœno incubantem, & frigori hiberno expositum vidit. Vbi singula, quæ siue tali filio, siue Matri eius, fuerunt dolendi causæ, in paternum pectus IOSEPHI, vnò velut impetu, irruerunt.

3. Cùm Circumcisioni IESV siue vt Patri-nus, siue etiam vt Minister adstitit; collegitque sanguinem eius; ac carnem abscissam præputij. Quod
ei spe-

ei spectaculum longè acerbissimum fuit, quia prò-
bè sciebat ex adeò rubente aurorâ secuturum alia
quando imbrem sanguinis totius, vitæque inevita-
bilem interitum,

4. Cùm Simeonis Sacerdotis ac Prophetæ
tristissima verba, audiuit. *Ecce positus est hic in ruinam, & in resurrectionem multorum in Israel, & in signum, cui contradicetur, & tuam ipsius animam pertransibit gladius, Luc. 2. v. 35.* In quibus verbis adverte sis mentem ad hæc *tuam ipsius animam*. Referrî enim possunt æquè ad IOSEPHVM, ac IESVM. Sed hoc fortè magis ex coniectura dicitur. Interim tamen facile alia complura obiecta doloris inuenieris pro IOSEPHO tam tristem Simeonis prophetiam audiente.

5. Cùm metu Herodis in Ægyptum exul abiit cum IESV puero, & MARIA matre eius, incertus de loco, tempore, victu, vestitu, cæterisque omnibus necessarijs comparandis. Isque dolor totum septennium tenuit.

6. Cùm ex Ægypto reuertens audiit regnare Archelaum, Herode patre multò immaniore. At erat Herodes tamen supra exemplum crudelis. Quantum ergo, Deus bone, ex Archelao metus in IOSEPH incubuit?

7. Cùm IESVM duodecennem nihil tale cogitans, perdidit, perditumque toto triduo quæsiuit. At erat IOSEPHO IESVS omni thesauro pretiosior.

Cæterum hæc vt assequare propius, scito et dolores

dolores istos fuisse internos, qui externis grauiores sunt, vt docet S. Thom. 1. 2. q. 35. a. 7. & q. 37. a. 1. 2. processisse ex intima apprehensione mali præsens, 3. Malum vbiq; ex Christo quandam infinitatem traxisse. 4. IOSEPHVM nulla sua culpa eos omnes dolores tolerasse. 5. Propter Christum summè diligibilem, & dilectum omnes sustinuisse. 6. Infinites maiores, eius causa, perferre optauisse. 7. Ad Christi Patientiam exprimendam nullum vnquam propius accessisse, &c.

ELOGIUM LII.

IOSEPH.

Septem maximis gaudijs perfusus.

Non falli Deus propter omniscientiam, nec fallere propter bonitatem, etiam materialiter, potest. At, inquit ille per David psal. 93. v. 19. in personâ hominis iusti: *Secundum multitudinem dolorum meorum in corde meo, consolationes tuæ latificauerunt animam meam.* Si ergo IOSEPH noster septem maximis doloribus exercitus est, prout proximè ostendi, meritò Deus tristissimum cor eius alijs septem gaudijs æquè magnis perfudit. Hæc nunc gaudia ex Paulo de Barry c. 6. & Carthag. lib. 4. Hom. 3. vnde dolores quoque accepi, proferam.

Ac 1. est; Cùm animi pendens, à Gabriele Seraphinò Angelò suauissima hæc verba audiuit: IOSEPH

SEPH *filii David, noli timere accipere MARIAM coniugem tuam; quod enim in eâ natum est, de spiritu sancto est* Matth. 1. v. 20. In quibus verbis equidem censeo, IOSEPHO summam obtigisse votorum omnium, quorum esse capax animus humanus potest, simul enim diuinô oraculô possessionem certam æternamque adiit, non solûm coniugis suæ inter omnes supremæ, sed etiam Filij Dei inde nati. Tum verò hæ solæ duæ voces, *Noli timere*, etsi à reliquis auellantur, causa summi alicuius gaudij haud dubie fuerunt. Lege-sis enim Matth. 6. v. 50. c. 14. v. 27. c. 28. v. 5. & 10. Marc. 16. v. 6. Luc. 2. v. 10. c. 5. v. 10, c. 8. v. 50. c. 24. v. 36. Ioan. 6. v. 20. & fatebere nobiscum, nihil optabilius esse posse verbis, **NOLI TIMERE**, iubente Deo prolatis.

2. Cûm in stabulô Bethlemiticô Saluatorem Mundi recens de Virgine natum adorauit, vnâ cum totô Angelorum exercitu, vt Corn. in 2. Luc. ait, dulcissimè ac deuotissimè accinente. Quô tempore ijdem Angeli, promissum initiô creationis suæ incarnando Verbo homagium, re ipsa præstiterunt incarnato, iuxta illud ad Hebr. 1. v. 6. *Et cûm iterum introducit primogenitum in orbem terræ, dicit: Et adorent eum omnes Angeli Dei.* At quid magis volupe esse potest tali tantôque spectaculô, vbi Creator in carne reperitur cum suis præcipuis Creaturis?

3. Cûm nomen IESVS, à Deo & Angelis præscriptum primus omnium hominum pronun-
ciavit, impesuitque Filio Dei, qui se *Filius hominis*

VOCAT

vocabat, siue in gratiam **MARIÆ**, quæ per antonomasiam homo est, siue potius **IOSEPH** ipsius; dicitur enim $\tau\omicron\varsigma\ \alpha\nu\theta\rho\omega\pi\omicron\varsigma$, hoc est *hominis viri*; nemôque, vt ex dictis patet, pluribus nominibus est Pater **IESV**, quàm **IOSEPH** Vir **MARIÆ**, stirps vltima Daudis, & proxima.

4. Cùm à Simeone intellexit, **IESVM** tot tantisque laudibus celebrari; scilicet esse Saluatorem Mundi; Lumen ad reuelationem Gentium; gloriam plebis Israel; Auctorem Resurrectionis multorum. Quis enim Pater non delectetur de tanta filij sui felicitate? At huic æquari nulla alia potest.

5. Cùm eundem **IESVM** vidit in ingressu **Ægypti** vnâ suâ præsentia inclinare Perseidem arborem pro diuina habitam, deijcere idola à Dæmonibus infessa, eosdèmq; etiam ex regno profligare. Fuit namque victoria hæc Symbolum eius, quam postea in cruce consummaturus erat contra omnes Tartareos Spiritus.

6. Cùm denuò iussus est Angelica voce, cum Matre & Filio redire in Iudæam. Qui nuncius vtî finem attulit ærumnarum grauissimarum, quibus pæne confectus fuit, ita initium dedit lætitiæ multiplicis, cuius vnica Nazarethana Domus conscia est, nemine illuc arbitro admissio.

7. Cùm **IESVM** reperit in templo, disputantem audiuit, domumque ad diuturnam commorationem reduxit.

Atque hæc gaudia eodem animo, quò dolores, accipi volo. Illud præterea aduerte, etsi, tum
L dolor-

dolores , tum gaudia intra genus suum maxima fuerint, maiora tamen fuisse gaudia doloribus. Imò impossibile est, aliquam tristitiam, vel dolorem esse summum malum; vt docet S. Thom. in 1.2. q. 39. a. 4. in corp. Non est autem impossibile, aliquod gaudium esse bonum summum.

ELOGIVM LIII.

IOSEPH

In virili ætate omnibus senibus maior.

IMmeritò irascuntur Pictoribus aliqui, propterea quòd IOSEPHVM pinxerint senio curisque grauem, cernuo vultu affixum terræ, ac rugis canisque obsitum. Didicerunt enim uerò id ex Epiphan. hæresi 51. & 78. & Cedreno octogenarium constituentibus; quibus aliud quiduis credimus alijs in rebus.

Verùm, liceat dicere tantorum Virorum pæce, idem est veracitatis humanæ, qui viarum trames. Nec via enim vlla, nec veracitas ex omni parte integra est. Eligenda ergo à meipso via est, quoad iudicio assequi possum, optima, & illa intrepidè tenenda. At ea est *virilis* IOSEPHI *ætas*, cum in manus Mariæ venit, vt Sponsus, & custos Virginitatis illibatæ. Quam ætatem illi tribuunt Suar. Disp. 7. S. 3. Viguerius in inst. cap. 20. §. 9. Maior in 1. Matth. Carthag. lib. 4. Hom. Salian. ad ann. Mundi 4051. Castr. cap. 4. Barrad. lib. 6. cap. 8. Bonif.

Bonif. mihi fol. 41. sed hi tamen non determinant ætatis annos, vno Maiore excepto, qui triginta, aut non multo plures posuit : Ego autem eos ipsos etiam ad quadraginta extendi sino, illam nempe ætatem, quæ sufferre matrimonij onera, prolem inquam suscipere, & eam cum coniuge tueri ac sustentare possit.

Cuius Rationes sunt 1. Quia Isaïæ 62. vbi de tempore aduentus Messia sermo est, dicitur v. 5. *Habitabit enim iuuenis cum Virgine.* At senex utique iuuenis non est. Non ergo IOSEPH habitans cum Virgine senex fuit; sed iuuenis. Et meritò; quia Lyran, locum hunc interpretans; *habitabit*, inquit, *iuuenis cum Virgine*, vt IOSEPH cum MARIA, Valerianus cum Cæcilia, Chrysanthus cum Daria.

2. Quia teste Luc. 3. v. 23. IESVS putabatur filius IOSEPH, carnalis scilicet. At senis decrepiti, cuiusmodi octogenarius est, filius aliquis putari non potest, saltem ab ijs, qui aliud non cupiunt, quam vita famæque ipsum funditus deijcere; prout fecere Iudæi.

3. Quia eiusmodi, par est, fuisse coniugium IOSEPHI & MARIAE; cuiusmodi recta ratio dictat debere esse aliorum. At hæc dictat non debere esse nimiam impropotionem inter virum & fæminam.

4. Quia IOSEPH appellatur Luc. 1. v. 27. Vir; itémque Matth. 1. v. 16. Vir MARIAE. At hæc vox, Vir, in sua propria significatione, quam cæteris paribus Sacrae Litteræ præferunt, distinguit Virum à sene.

5. Quia senex si fuisset, non ipse MARIAM custodire potuisset, sed

hæc ipsum debuisset custodire. Quid autem custodire dicimus? debuisset, inquam, manu ducere, gubernare, alere, &c. Senem hunc. Quasi verò tenella Virgo aliud, quod ageret, non haberet; & Ægyptus Nazaretho, ac Hierosolyma, quò quotannis peregrinabantur, prorsus contermina esset. 6. Quia, quæ causa sacerdotibus fuit, properandi matrimonium **MARIÆ**, etiam fuit non nimium differendi matrimonium **IOSEPHI**. Si ergo **MARIAM** non potuit à matrimonio eximere votum Virginitatis, neque idem potuit eximere **IOSEPHVM** ad vsque decrepitam ætatem, in qua ne quidem sine risu & ludibrio spectantium nouam nuptam deducere poterat.

Sed hîc mihi os penicillis suis pictores oblinere conantur. Verùm viuo adhuc, & colores omnes abstergere possum penicillo linguæ, quali non ante multos annos absterfit Theophilus Raynaudus, accusans hoc hominum genus portentosæ pietatis. Si tamen, quod malo, audire me antè velint, suadeo, vt ijs, qui se incessunt, dicant, **IOSEPHVM** meritò Virtutis & Sapientiæ, senem fuisse, non annorum causa; adhæc paucos **IOSEPHO** similes se reperire potuisse, qui iuuenem cum Virgine, in tanta formæ ac morum indulgentia, impunè intueri possent; ac demum labores suos ad simplicem potius plebem, quàm viros doctos attrinere;

qui tamen illam informare sapienter de omnibus possint.

E L O.

IOSEPH

Grauissimè vindicatus à Deo;

POena, inquit S. Thom. in 1. 2. q. 87. a. 3. & 4. proportionatur peccato secundum acerbitatem, in iudiciò diuinò & humanò. Si quis ergo nosse velit, quantum ij, qui IOSEPHVM offendere, peccârint, intueatur primò pœnam, quâ illos Deus propterea pessum dedit. Hi autem sunt præcipuè Bethlehemitæ, qui IOSEPHVM, apud se oriundum à Maioribus, non solùm vrbe, & domibus cognatorum, sed etiam diuersoriò publicò, vñ cum prægnante matre partui proximâ, excluserrunt. Tum verò commemorandi sunt etiam Herodes, & Archelaus Iudææ Reges, quorum ille IOSEPHVM in exilium fugere coëgit; hic ab exilio reducem, patriâ in Galilæam expulit.

Igitur ad Bethleemitas quod attinet, luère primò in suis met infantibus, quos per summum nefas prætuleraut Infanti Diuino IESV. Cum enim Herodes à Sacerdotibus & Sribis intellexisset non ablatum iri sceptrum ex Iudâ, & Ducem de femore eius, donec veniat qui mittendus est; Gen. 49. v. 10. in eam sententiam venit, se. qui primus externorum occupasset id sceptrum, Messiam esse oportere. Id autem negabant præter Herodianos alij omnes; nupérque tres Magi Orientis, publicâ Religione alteri apud Bethleemitas nato Messia

impensâ, damnârunt. Hunc ergo Subuentaneum, vt videbatur, Messiam, etiam per innocentissimorum infantum cædem scrutari, tolleréque è mediô, decreuit, inductus maximè Magorum, adoratum puerum prodere nolentium, contra datam fidem, clandestinô abitu. Nec desuère, decreto immanissimî tyranni, Carnificum turmæ; sed confestim, velut indagine, cinxère omnes Bethlehemi fines totam inquam tribum Iudam & Benjamin, & quotquot vsquam Liberorum erant, qui nòdum biennium excessissent, conquistos, in conspectu ciuium Bethlehemitarum, intra ipsa eorum roznia, domósque paulo ante IOSEPHO negatas (Decker, in Thes. an. 10. ex Origen. & Nyssen.) crudelissimè trucidârunt; ne quidem Antipatrô ipsius Herodis filiô superstite relictô. Testantûrque tum Aethiopes in Liturgia sua, tum in Menaïs Græci ad 29. Decembris, eâ solâ lanienâ cæsa esse quatuordecim millia huiusmodi paruulorum. Vbi enimvero parentes omnes etiam ipsi grauissimas dedère pœnas Vltori Deo; quorum comploratio & vlulatus multiplex vsque in Rama extendit se, omni consolatione maior.

Sed Herodis quoque meminisse debemus, qui carnificinæ isti suæ vix momentô interpositô, miserrimè succubuit. Simulac enim ea perpetrata erat, & IOSEPH cum suis ex Iudæâ aufugit, cœpit corpus eius calore tabifico torrerî; stomachus insatiabili fame vexari; cruciari viscera colicis passionibus; pedes pellucidô phlegmate distendi; infamia
libi-

libidinibus membra fœdissimis vermiculis, iuxtaque putredine infestari, artus omnes neruque ingenti cum dolore contrahi; donec tandem circa paschale tempus impiam animam ad æuiternos inferni cruciatus transmisit. Ita Euseb. l. 1. Hist. c. 8.

At non dissimilis Herodi fuit Archelaus filius eius, qui cum initio Regni tria ciuium millia in ipso templo ceu victimas, trucidasset, aliâque scelera, digna sanguine paterno, perpetrasset, demum Augusti iussu exul ire in Gallias debuit, qui IOSEPHVM ab exilio reversum, ne in patria consisteret, crudelitatis notissimæ exemplis, in externam Galileæ provinciam compulit abire.

Hic ergo tum pœnas, tum peccata ipsa eorum, qui IOSEPHVM persecuti sunt, vides. Sed quæso te, transfer nunc animum ad dignitatem viri, quam præcipuè notam cupio. Est hæc eò maior, quo iniuria; & iniuria, quo pœna; & vicissim. At est pœna longè maxima. Non est ergo iniuria minor. At iniuria à dignitate offensi desumitur. Si ergo iniuria par est pœnæ, maxima maximæ, dignitas quoque IOSEPHI maxima sit, necesse est. At licet omnia maxima sint, non tamen negare possumus, Deum, etiam in summo iustitiæ rigore, & circa iniuriam longè maximam adhuc misericordem esse, vt S. Thom. in 1. p. q. 21.

a. 3. & 4. docet.



ELO-

ELOGIVM LV.

IOSEPH

Baptizatus à IESV.

SI quæ IOSEPHO diuina Beneficia collata sunt, memoriæ nostræ sacræ Litteræ prodidissent, hoc vtique labore supersedere poteram, quem vnus eius amor extorsit. At nunc ex innumeris nonnisi pauca pervenerunt ad nos. Equum igitur est, tum nostro, tum tuo, Lector in hunc Diuum amori, laxare dicendi vela, plurâque Beneficia vulgò ignota aliunde colligere.

Inter hæc autem pœne necessarium mihi videtur Baptismi collatio. Pœne; inquam, necessarium: Incertum enim est, magisne IOSEPH ad veterem, quàm novam pertineat Legem; audieritne etiam, seuera Christi verba: *Nisi quis renatus fuerit*, Ioan. 3. v. 3. simillima illis Ioan. 6. v. 54. *Nisi manducaveritis carnem filij hominis*, &c. Igitur cautiùs loquendum fuit, ne veritatis nauicula, in ipso suo è portu egressu, hæreret in vado, auxilij speique imposita. Sed iam animò totò, si quis in me est, conitar, ostendâque, Baptismo, Beneficio saltem utili, si non necessario, IOSEPHVM initiatum à Christo esse. Hoc mihi nulli quidem directè & explicitè dixere testes; quis enim hos vbique compareret? suasere tamen Rationes aliquot quas tibi representandas, duxi.

Prima est; Quia ipsemet Christus, ab ipsa Baptismi

ptismi Lege, utpote Auctor eius, planè eximius, accepit nihilominus à Ioanne Baptista Baptismum, & quidem pœnitentiæ solùm, non gratiæ, ut docet S. Thom. in 3. p. q. 29. a. 2. neque ob aliam causam, quam propter exempli vim nobis profuturi, virtutemque omni ex parte perfectam. *Sic enim docet nos, me nempe, ac meos, implere omnem iustitiam,* Matth. 3. v. 15. At hæ duæ causæ IOSEPHVM Christo non minùs virtute, quàm sanguine proximum, manifestè concernunt, ut nil dicam, de plenitudine gratiæ Baptismo Christi propriæ, modòque sanctificandi certissimo ex opere operato.

2. Quia Christus illo adhuc tempore, quò nondum Baptismi Lex obligabat, (obligare enim nonnisi prima post eius mortem pentecoste cœpit) baptizavit primò MARIAM Matrem, Euthym. in cap. 3. Ioan & Suar. Disp. 18. S. 3. Dein, Ioannem Baptistam. Auct. imp. oper. hîc hom. 4. & Hieronym. cum Castrio cap. 25. & Cornel à Lap. in 3. Matth. Atque etiam Petrum. Niceph. lib. 2. cap. 3. & Clemens Alexand. in 5. Hypotyposeon apud Sophron. in Prato cap. 76. Ac tandem alios omnes Apostolos, Euodius apud Corn. in cap. 3. Matth. Scrutare autem obsecro iam causas, quæ Christum inducere potuère ad impertiendum his omnibus illud Baptismi Sacramentum. Sed necesse non est scrutari, quod in propatulo iacet. Scilicet aut Christus dignitatis, quæ officium consequitur, aut virtutis, quæ merita, rationem habuit. At dignitas in IOSEPHO maior fuit; Virtus au-

tem par, si non maior; dignitati, virtutique Ioannis, Petri & reliquorum; Et de virtute quidem postea videbo, cum sufficiat Dignitatis apex ex tot Paternitatum titulis, quos suprà latè exposui, ad immensam altitudinem consurgens.

3. Quia qui confert Beneficia specialia alicui, non videtur negare communia, siquidem aliunde haberi non possunt. At est Baptismus Beneficium nonnisi commune; Christusque alia complura magis specialia contulit IOSEPHO. Ergo illud quoque Christus eidem contulit, siquidem alius, qui conferret, non erat.

4. Quia nil magnopere opinioni isti aduersatur. Si enim quid esset, vel esset 1. Euodij testimonium apud Niceph. lib. 2. cap. 3. ubi dicitur Christus manibus suis Petrum tantummodò baptizasse. At hoc verisimile non videtur, propter ea, quæ dixi. Nil ergo inde ego expugnor. Vel 2. esset perbreuis IOSEPHI vita, succisa nempe, antequam Baptismi nomen auditum est. At hoc quoque assertur tantùm, non verò probatur. Imò contrarium eius confido probari posse. Sed tu modò respira nonnihil; vt aures animùmque alibi rectius aduertas.



ELOGIUM LVI.

IOSEPH

Antiquus conuictor IESV.

O Prabat S. Ignatius Parens noster, cum Parisijs operam Litteris daret, nancisci eā in vrbe Herum aliquem, cui veluti Christo IOSEPHI instar, seruiret deuotam seruitutem. Sed id ei uotum, vt dispar est hominum fors & conditio, nequaquam ē sententia cessit. Licet ergo vni IOSEPHO, sic esse felicem, & quidem per annos admodum multos, nisi fortē hanc ipsam eius tam diuturnam felicitatem aliquis Parcarum Nepos succidat; quod vtique ferre non debeo, si possim non ferre. At lis hæc aliter absolui nequit, quā si declarem, quamdiu IOSEPH conuixerit seruieritque Christo, ac Matri Virgineæ: Ob hanc ergo causam.

Dico 1. Verisimile non est, IOSEPHVM paulò post duodecimum Christi annum migrasse ē vita; quod Epiphanio Hæres. 78. Baronius credit de Augusto agens. Rationes meæ sunt; 1. quia Desponsationis IOSEPHI cum MARIA finis, maximam partem, periret. Is enim est, vt habeatur Paterfamilias, nutritius, & custos, tum MARIE, tum IESV. 2. quia de toto illo vitæ tempore, quod inter duodecimum & trigesimum Christi annū intercessit, aliud Lucas 2. v. 51. non dicit, quā; *Et erat subditus illis.* At dici de tam longo tempore non potest.

test, subditus fuisse illis, si eorum vnus non multò post est mortuus. 3. quia illigari curis domesticis nec Christum; nec Virginem decet. Quorum tamen alterutrum sublato IOSEPHO planè necellarium esset.

Dico 2. Minùs adhuc probabile est, IOSEPHVM Christo superuixisse. Quod aliàs magnis Auctoris placuit; puta Cypriano in Serm. de Passio. Dom. & Ambros. in cap. 23. Luc. Quibus malè Chrysostom. hom. 5. in 1. Matth. & August. addunt aliqui. Sed Rationes ego modò solas exhibeo, de auctoritate postea decreturus. Probatur igitur assertio 1. quia non apparet, quomodo Christus sine scandalo adstantium Cruci inimicorum suorum Matrem auferre Legitimo Viro, & hætenus, pro parente culto, publicè potuerit, & commendare alteri, ceu viduam, cum vidua nondum esset. 2. Quia utique IOSEPH etiam ipse Passioni ac Cruci Christi adstitisset. An enim à mulieribus patiatur se vinci vir? an illum deserat morientem, quem viuentem in Ægyptum deduxit, indeque reduxit; quem etiam olim perditum, toto triduo, cibi, vt Gratianus refert lib. 4. cap. 4. potùsque expers tam sollicitè requisivit? an denique præterito isto suo tam charo IOSEPH, ad vltimum summumque pietatis officium asciscat sibi Ioseph alium, ab Arimathia nempe, longè priori imparem?

Dico 3. Probabilius est, IOSEPH desisse viuere, post Baptismum Christi ante Passionem eius, & quidem paulò ante nuptias Canæ Galileæ,
inter

inter quas & Baptismum, annum intercessisse rectè probat Suar. Disp. 26. S. 1. Porro Auctores conclusionis sunt Hieronym. lib. contra Heluid. Cedren. in Comp. Hist. Bonavent. in vita Christi cap. 27. Gerson de S. IOSEPH. Canis. lib. 2. cap. 13. Salmeron tr. 41. Card. Tolet. in cap. 2. Ioan. Suar. cit. & alibi, Barrad. lib. 3. super verba: *Et erat Mater IESV ibi. Castr. cap. 13. & nouissimè Carthag. lib. 18. Hom. vlt. §. 7. plures alios citans.*

Rationes supra eas, quas iam attuli, sunt 1. Quia nulla, in nuptijs illis Canæ, fit mentio IOSEPHI. At erat ibi, præter IESVM & Discipulos, MARIA Mater IESV. 2. Quia dum Ciues eius Nazareni loquuntur de familia IESV, ex vna parte tacent, IOSEPHVM eo adhuc tempore, viuere, ex alia parte satis clarè insinuant, non diu antè vixisse. Nonne enim, inquiunt, Ioan. 6. v. 42. *hic est Filius IOSEPH, cuius nos nouimus patrem & matrem?* 3. Quia neque tum quidem adesse legitur, cum Matth. 12. v. 47. dicit: *Ecce Mater tua & fratres tui foris stant, quærentes te.* 4. Quia sic optimè defenditur Baptismus IOSEPHI, & quod haud dubiè in votis vnice habebat, tempus aliquod audiendi Evangelicam Doctrinam, videndique progressum eius conceditur. 5. Quia ad id vsque tempus conseruari Patrem hunc à Filio non minus decet, quàm Patriarcham Iacob conseruari à Ioseph Filio.

Ad mortem beatissimam à IESV præparatus.

TRia sunt probationum genera, ac quidam quasi gradus, quibus præfens Lucubratio nititur, Primum ex Scriptura, S. Concilijs Traditionibus, & vnanimi patrum consensu petatum, cui refragari, Catholico nefas est. Alterum in Auctoritate Doctorum placitisque consistit, quò priori probationis genere destitutus recipio me. At euenit non rarò, vt neque istud inueniri possit, ibi ergo ad tertium confugiendum est, quod coniecturæ prudentes, præsumptiones, & iudicia pariunt. Si ergo nonnulla ex his, quæ de IOSEPHO scribo, neque ad primum, neque ad alterum probationis gradum pertingant, noli, obsecro, apocrypha, hoc est digna tenebris, appellare, Nam apocryphum dupliciter accipitur; 1. pro eo, quod Hagiographum, siue Canonicum non est; 2. pro eo, quod non nisi tenebris ac silentiò dignum est. At, subsumo, non quidquid non est Hagiographum, siue Canonicum, illico dignum tenebris est, & 2. modo apocryphum, vt doctè obseruat Iacobus Kellerus de Cathol. Papat. a. 16. cap. 1.

Igitur videndum hîc prius est, quibusnam argumentis præfens Elogium lucem fidemque mereatur. Ante omnia stant pro illo testes Gerson
in Io:

in Iosephina S. Bernardin, p. 4. Serm 12. Gratian. l. 4. in fin. Carthag. l. 4. Hom. 2. & alij plures. Deinde pro eodem stant Rationes variz minimè leues, quarum aliquas tantum attingam.

1. est; Decet, IOSEPHVM sic à IESV esse præparatum. Ergo præparatus est. Antecedens patet, quia nihil omissum est à IESV quod decet. 2. Dedecet, non esse præparatum. Ergo præparatus est. Antecedens constat ex quarto Decalogi præcepto; *Honora patrem*, &c. At hoc est humani diuinique iuris vbique recepti, vbi ius adhuc habet locum. Ergo in eo, neque Deus Deique Filius ex Virgine natus quoad substantiam, dispensare potest. Vel ergo IESVS est Filius IOSEPH; Vel non est. Si non est; MARIA imperitè dixit; *Fili, quid fecisti nobis sic? Ecce Pater tuus, & ego dolentes quarebamus te*. Si est, honorare debet etiam ipse IOSEPHVM patrem suum. At vbinam magis, quàm in casu extremæ necessitatis, siue mortis? Dicendum ergo est, ad hanc à IESV filio suo præparatum esse IOSEPHVM patrem.

Sed pergo nunc, & singillatim ostendo, quomodo idem reipsa præparatus sit. Eum modum nobis inprimis exactè tradidit Isidorus Isolan. lib. 1. de S. IOSEPH, ad Adrian. VI. Pontificem ex quadam Orientali Historia fide dignâ, in qua Christus Discipulis suis illam ipsam præparandi methodum exposuit. Deinde autem Gerson alia eodem spectantia, itémque Carthag. adiecerunt, quæ tibi omnia, velut in Satura, promiscuè apponam.

Ac 1.

Ac 1. misit IESVS Angelum decretæ mortis nuncium, & tempus designauit, 2. Ei nuncio summa cum animi promptitudine assensit IOSEPH; cum dicto nulli alteri vsurpato; Cupio dissolui à Christo homine, & esse cum Christo Deo meo. 3. Idem petijt Michaëlem, Angelorum omnium, etiam Seraphinorum, Principem, cum tutelari suo Angelo, lætis vultibus morienti sibi adesse, simulque obtinuit 4. Ipse IESVS ac MARIA coniunx ad IOSEPHVM se contulerunt, sederuntque ad caput lecti, & decumbentem dulcissimo colloquio, aspectuque recrearunt. 5. Ibi IOSEPH, Confiteor, inquebat, ô IESV te esse verum Deum & Saluatorem Mundi, te quoque ô MARIA esse immaculatam virginem, & Matrem Dei. Tum 6. erumpens in verba Simeonis: *Nunc dimittis*, &c. quantas potest gratias egit assidenti IESV. Vicissim IESVS 7. laudat præstita obsequia, promittitque præmium æternum. Ad hæc 8. Legatum constituit ab animas Limbo inclusas; quia appropinquaret redemptio illis; celeremque Resurrectionem promisit. Demum 9. cum manus suas IESVS & MARIE manibus inseruisset, cumque aliud in ore, oculis & animo non haberet, quam eosdem IESVM & MARIAM, prius acceptâ benedictione à IESV dormienti similis, migravit è mortali ad immortalem vitam; quam nobis IESVS intuitu IOSEPHI Patris sui concedere dignetur. Vide hic etiam Bernardin, de Bust. 1. 12 de Despons.

E L O.

ELOGIVM LVIII.

IOSEPH

A IESV & MARIA

comploratus.

SI IESV, erga IOSEPHVM recēns defunctum, pietatem comparem, cum pietate quorumcunque Veterum, quorum meminerunt Litteræ Sacræ, fidenter affirmo, etiam eâ ipsa pietate suâ, solum atque vnicum complexum esse omnia ac singula priscæ pietatis in defunctos exempla.

Nam 1. Iuxta Orientalem Historiam clausit mortuo IOSEPHO oculos, & os composuit, IESVS, etiam supra Tobiam pius, qui Tob. 14. v. 15. solum oculos clausisse Socerorum legitur. 2. Eidem IOSEPHO IESVS Sepulchrum comparavit, (pretiô, vel prece incertum) in valle Iosaphat, locô sepulchro Mariæ coniugi vicinissimô, idque perpetuum ac semper gloriosum futurum. Cuiusmodi vtique præstantius est sepulchro Saræ, licet in eo sepulti sint Abraham, Isaac, & Iacob; itêmq; Rebecca & Lia. Hoc enim tandem Turcis in suâ superstitionis templum cessit, ac profanatum est. Sed neque Iosifæ sepulchrum ætatem ac memoriam tulit. Dic enim, vbi id inveniri possit? & si possit, an æquè gloriosum modò sit, ac fuerit. Equidem evolvi peregrinationes non paucas; at de Sepulchro Iosifæ præaltum vbique silentium est; contra verò sepulchrum IOSEPHI, quamvis octo &

M

quadra-

quadraginta gradibus infra terram, nunc temporis sit, eminet tamen, & gloriam suam magis magisque propagat. 3. Non contentus sepulchrum comparasse, feretrum ac Matrem pullâ veste sequentem, ad usque locum quietis, simili in veste comitatus, & postea consolatus est. Ita Gerson. In quo denuo fateor, ignorare me, quod exemplum pietatis, etiam potuerit sequi. Nam tametsi alij quoque suorum cadavera destinatis sepulchris intulerint uti intulisse legimus Ioseph cadaver Patris Iacob, Gen. 50. non istamen vestem posuit, aut aliam accepit; nec defuncti coniugem consolatus est, sed potius in morem militaris exercitus, ascendit in terram Chanaan cum curribus & equibus, & multitudine hominum. 4. Super defuncti corpore, ac tumulo lacrimas profudit, velut adiuvens MARIAM Matrem suam, quæ desiderium Viri, adeo sancti & utilis sibi, lacrimis testari fatis non potuit. Idem Gerson & Barrad. l. 6. c. 8. Et ego hîc lacrimarum causas frustra scrutor. Nam quid amplius dici potest, quàm quod IESVS sit filius IOSEPHI & MARIÆ; hi vero parentes eius?

Sed lacrimari, inquires, turpe est viro forti? Quis neget, si quidem debilitas animi impar dolori in causa sit? At procul est à Christo debilitas hæc: profudit enim lacrimas suas, ut testetur pietatem suam, merita chari parentis, miseram humani generis conditionem, suum pro eodem sublevando vehemens desiderium. Et has lacrimas nullô unquam risu distinguit, semper serius, ac gravis, ut
etsi

etſi aliquando oculi exareſcant, non ceſſet tamen animus alienâ triftitia, cûm propria deeft, intra ſemet laborans. Vt verò lacrimantis IESV, recorderis ſemper, præter illas pietati datas, nôris, ipſum ternis vicibus oculorum laxâſſe fontem. Nempe in morte Lazari Ioan. 11. v. 35. aſpectu breui perituræ Ieroſolymæ Luc. 19. v. 41. ac demum in Cruce, ad Hebr. 5. v. 7. vbi *preces ſupplicationeſque cum clamore validò & lacrimis offerens, exauditus eſt pro ſua reuerentia.*

Poſtremò autem diem paterni obitûs, qui in vigefimum Iunij, vt Orientalis Hiſtoria refert, incidit, anniuerſaria Religione exornauit Diuinus Filius. Iis enim, qui, in honorem mortui ſacrificium Miſſæ eò die oblaturi eſſent, ſingularem benedictionem, promiſit. Quâ tamen haud dubiè neque nos carebimus, qui ritum Eccleſiæ Romanæ ſequimur, & feſtum ſancti celebramus 19. Martij vti neque carebunt Græci, qui 20. Decembris id colunt. Ipſa enim IESV pietas in exemplum proponitur nobis, quâ & nos IOSEPHVM, communem parentem noſtrum, quoad poſſumus, & intelligimus, proſequamur.



ELOGIVM LIX.

IOSEPH

A IESV crucifixo reuocatus
ad vitam immortalem.

DE fide est, IESV in cruce mortuo multa corpora sanctorum, qui dormierant, resurrexisse, ac post Resurrectionem eius venisse in sanctam ciuitatem, multisque apparuisse. Id namque pœne totidem verbis affirmat Matth. 27. v. 52.

At est solùm Theologicum problema, an ipsi Rediuiui sancti post aliquod elapsum tempus denuo corpora reddiderint monumentis, an verò immortales perstiterint. In quo problemate pars mihi posterior & autoritate & Rationibus potior est. Tenent namque eam Origen. sup. ep. ad Rom. c. 1. Remig. in 27. Matth. Anselm. hic Clemens Alex. l. 6. Strom. Hieronym. Beda, Euseb. Epiphan. S. Thom. in 27. Matth. & in 4. dist. 43. q. 1. a 3. (etsi dissentiat in 3. p. q. 53. a. 3.) Iansen. c. 143. Cornel. à Lap. hic, & passim Recentiores.

Et Rationes sunt. 1. Quia ideo resurrexere vt testimonium ferrent de Christi ad immortalem vitam Resurrectione. 2. Quia animæ beatæ & glorioſæ non exigunt vniri, nisi corpori glorioso & immortalis. 3. Quia, vt ex Iavolenô Canisius in Reg. 15. Iuris in 6. refert, Beneficium Principis quàm plenissimè interpretari debemus. 4. Quia Christi in cœlum triumphalis ingressus destitutus fuisset

Præ-

præcipuô victoriæ argumentô de redemptis captivis, eiusdem etiam sacratissima Humanitas caruisset comitatu, aspectu, & alloquio omni cōvenienti.

Sed, quid hoc, inquires, ad IOSEPHVM attinet, si licet resurrexerint multi, ipse tamē præteritus sit. Quod fieri potuisse nemo est, qui neget. At, an est, qui argumentari contra me velit? IOSEPH *vi verborum Scriptura sacra potuit fuisse præteritus alijs resurgentibus. Ergo de facto præteritus est?* Ego quidem eiusmodi imperitum Dialecticum nequaquam spero fore. Quid enim notius, quàm non dari Locum argumentandi à potentia ad actum, Sed è conuerso ab actu ad potentiam? Aliàs sanè eodem argumenti robore nos quoque inferre possemus. IOSEPH *potuit vi verborum Scriptura sacra non fuisse præteritus alijs resurgentibus, Ergo de facto non fuit præteritus!* Quod tamen tu negas, & affirmo ego.

Igitur quæstionem facti, superest, vt decidam. At hîc principem partem sibi vendicant authentica testimonia, adversum quæ iure excipere non possis. Ausculta-sis ergo bene longum Nomenolatorem eorum, qui IOSEPHVM inter alios multos etiam ipsum ad immortalem vitam resurrexisse testentur. Il sunt Bernardin. Senens. qui in Serm. de S. IOSEPH. cap. 3. a. 3. Inter suscitatos, inquit, piè credendum est, quòd fuerit sanctissimus vir IOSEPH. Additque idem sentiens Bernardin. de Bustis in 4. p. ferm. 12. quò tempore prior Bernardinus Paduæ pro concione ad populum exclamavit. *In animo & corpore sanctus IOSEPH in calis gloriosus est:*

continuò super caput eius auream crucem visam esse. Deinde verò Gerson Cancell. in serm. de Natiuit. B. V. ad Patres Concilij Constant. habito. Itémque Viguerius de Incarn. §. de Annunc. Dom. c. 20. Fonseca in vita Christi c. 9. Gratian de sancto IOSEPH. l. 5. tit. 5. Andr. de Soto l. 3. de sancto IOSEPH. c. 33. Carthag. l. 18. Hom. vlt. Suarez Disp. 8. f. 2. Salian. ad annum Mundi 4065. Barradius l. 6. c. 8. Paulus de Barry de S. IOSEPH. c. 8.

Nec dubium est, quin adhuc plures alij testes adfuturi sint, si præsentés non suffecerint fastidioso Iudici. At hoc quis timeat; præcipuè, cum præiudicia ac præsumptiones omnes apertè pro IOSEPHO stent utpote qui de Christo optimè meritis sit, & ab ipsa ac Deipara summè adamatus. Alia quoque iudicià proximè adiungam, quæ Veritati huic nostræ ut videri ab omnibus possint, lucem accensura confido.

ELOGIVM LX.

IOSEPH

MARIÆ dilectissimæ coniugi gloriosus
apparens.

Affirmant resurrexisse & apparuisse, Gerson. in Serm. habito de Nat. B. V. in Conc. Constant. S. Bernardinus Serm. de S. IOSEPH. a. 3. Carthag. lib. 4. Hom. 3. Cornel. à Lap. in 1. Matth,

Matth. mihi fol. 48. Barrad. l. 6. cap. 8. Salian. ad an. Mundi 4065, & alij complures, quos brevitatis causâ omitto, producturus, cum necesse fuerit.

Sed potestne, inquires, probari assertio hæc? Non posse ex Sacris Litteris, Concilijs, consensu SS. Patrum, Rationibus inde efficaciter deductis, velim, nolimue, tam diu concedere debeat, quamdiu eorum nihil uspiam reperitur. At rursus velim nolimue, si quod vult Vasq. alijque, inter Theologiæ locos poni potest accommodatus Scripturæ sensus; sique ponderis habent aliquid coniecturæ multò iam usu Viris doctis probatæ, fateri cogor, imprimis verisimile esse, quod affirmatum esse initio dixi. Sed tu, qui hæc legis, mihi credere noli, crede rationibus, & quidem non meis, sed illorum, sub quorum clypeo pro IOSEPHO pugno, qui eas primi protulerunt in conspectum hominum.

Igitur 1. Gerson & Salian. cit. referunt huc illa Pauli ad Hebr. 11. v. 35. *acceperunt mulieres de Resurrectione mortuos suos.* Quæ illustrari à me, nemo utique prohibere poterit. Dico ergo, inter mulieres has, longè eminere MARIAM Virginem; cuius pretium procul & de vltimis finibus. Et subsumo; si quæ aliæ inferiores mulieres acceperunt de resurrectione mortuos suos, multò magis accepit ipsa mulierum omnium Regina MARIA suum mortuum. At est iste solùm IOSEPH, Vir eiusdem.

2. Ferè omnes citati; *multa*, inquiunt, *corpora Sanctorum, qui dormierant, surrexerunt. Et exeuntes de*

M 4

monu.

monumentis post resurrectionem eius, venerunt in sanctam Ciuitatem. Vbi ego quidem per hanc ciuitatem, exemplô Doctissimorum Virorum, denuo intelligere possem prædictam Matrem Dei. Est enim & ipsa dicta pacis visio. Est fortitudinis nostræ Sion; Saluator (IESVS nempe) ponetur in ea murus & antemurale, vt Cornelius noster hic vult ex Isa. 26.v. 1. *Non ingreditur urbem hanc MARIAM Hostis infernalis, nec mittet in eam sagittam* 4. Reg. 19. v. 32. *Et nomen ciuitatis ex illa die, Dominus ibidem.* Ezechiel. ult.v. 35. Sed fastidiunt hæc aliqui, vt supra dixi, Theologi, solidioribus assueti alimentis. Quos vt reliqua considerent hortor.

3. Proinde, sic argumentor. Quia nihil magis post IESVM desiderare potuit, siue IOSEPH, vt MARIAM videret, siue MARIA vt videret IOSEPHVM, Nihil ergo magis petierunt. At credere, vt puto, Theologus potest, vel certè non prohibetur, id quod maximè MARIA & IOSEPH petunt & desiderant, præcipue obtinere. Nihil ergo obstat, quò minus hoc commune, & æquè gratum, ac iustum solatium vtrique concedatur.

4. Inter eas probationes, quas pro anticipatâ Resurrectione Matris Dei afferunt, est etiam hæc, quòd de eius corpore nullæ vsquam reliquię afferuntur. Cum enim veræ Dei Ecclesiæ nihil carius sit hac eadem Matre, verisimile non est, latere corpus eius potuisse tot eximios Amatores. At neque de IOSEPHO quidquam, nisi vacuum sepulchrum, infra

infra terram, vt magis declarabo Elogio sequenti, non procul à sepulchro Virginis inuenitur.

5. Nemo hôc sanctorum, qui surrexerunt, beneficio dignior est, quàm IOSEPH, supra omnes bene meritus de IESV, & quod palmarium mihi videtur, præreptus ex vitâ eô tempore, quô vivendi causæ ardentissimæ erant; ipsi inquam, Evangelicæ doctrinæ primordijs. Quare si quis adhuc neget resurrexisse IOSEPHVM & apparuisse MARIÆ penè audeo repetere illud. Adhuc & tu sine intellectu es.

ELOGIUM LXI.

IOSEPH

Cum IESV ascendens ad Gloriam
cœlestem.

IN primis tenent hanc sententiam Auctores, proximè citatis; illisque nunc accedit Suarez Disp. 8. in fine. Fierine autem potest, vt ea omnia principia, è quibus Elogij alicuius veritas emanat, de nouo in conspectum dentur? Non posse videtis, opinor omnes, quotquot videtis, distare à radicibus arbores, à scaturigine flumina, & Lumen à Sole. Si ergo non vbilibet omnia reperiantur, illa, quæ præcedunt & quæ sequuntur, necesse erit præsentibus coniungi; nam meum hoc esse arbitror ne recocta crambe fastidium pariam stomacho novorum cupido.

Igitur nunc IOSEPHVS proponitur ascendens cum IESV ad Gloriam cœlestem, vindicias

calami mei postulans adversus eos, qui eum vel omnino resurrexisse vel certè ascendisse negant gloriosum in cœlum. At quæ potest esse pugna cum victis, prostratisque? illis, inquam, quibus nuper per testes & Rationes omni exceptione maiores ostendi verissimè resurrexisse.

Vos igitur, qui gloriosum IOSEPHI ascensum tollitis, in certamen venite. Vnde obsecro iniecta vobis est hæc mens? Nam in IOSEPHVM amor vester etiam maiora decora persuadere posse videtur. Nimirum veritas ipsa iniecit amorì vestro violentas manus. At quænam illa veritas? Veritas nempe Brigittæ revelata. Apud hanc enim l. 6. Revel. cap. 94. affirmat Mater Dei Sanctos, qui cum Christo resurrexere, animas quidem in cœlum cum eodem transmisisse, corpora verò terræ reliquisse ut expectent supremi iudicii diem. Et l. 7. c. 26. eadem, scias, inquit, quod nullum corpus humanum in cœlo sit, nisi corpus gloriosum filij mei, & corpus meum. At huic tam contestatæ veritati quis non attemperet amoris sui æstus? Nihil ego sanè repugno, siquidem contestata sit. At negant ij omnes, qui nobiscum stant; & inter hos nominatim Cornel. à lapide in c. 27. Matth. ubi tamen Brigittam in medium adducit.

Recusant præterea Brigittæ adhibere fidem alijs in rebus Theologi non pauci; ut 1. quòd MARIA Virgo quindecim dies in sepulchro tenuerit l. 7. c. 26. 2. quòd non sit prævisa ab æternò sedere super omnes creaturas l. 7. c. 25. 3. quòd magnitudine doloris

doloris ex Passione Christi concepti à sensibus abducta fuerit l. 4. c. 70. 4. quòd IOSEPH fuerit senex Christò nascento. l. 7. c. 21. 5. quòd Gregorius animam Traiani ex Infernò liberauerit. l. 5. c. 13. Non est ergo, quidquid huic sanctæ reuelatum est, eò sensu contestata Veritas, vt nemo illi iam audeat refragari.

Deinde verò cur non liceat & sanctæ opponere Sanctum alium, Bernardinum inquam Senensem; cuius Oratio (*in anima & corpore sanctus IOSEPH in cælis gloriosus est*) adhuc auribus meis insonat; cuius etiam manus crucem, quæ capiti sub eâ oratione imminere visa, oculis spectandam exhibent? At hoc si fas mihi est, enimvero extrapericulum sumus, & immunes ab illa contestatæ veritatis impressione. Videtis ergo neque Nos ab opinione nostrâ, neque IOSEPHVM inde deiici à gloriosò suò statu.

Verùm absit à nobis, vt hoc tam graue vulnus celeberrimis Reuelationibus infligamus, præcipuè si necesse non sit. At neque hîc, neque alibi vsquam necesse est. Et quia allata exempla non nihil urgere videbantur. Dicimus cum Duranto graui Theologo, ad 1. & 2. malè legisse alios, quod bene scriptum fuit; ad 3. malè inde spasnum siue conuulsionem neruorum colligi; ad 4. Senem ibi vocari, morum grauitate, ad 5. id defendi à Theologis multis, & recentissimè à Ioanne de Dicastillo Disp. 1. de Purg. Dubit. 7. fol. 903. Egoque ipse etiamnum hoc defendere paratus sum.

Iam

Iam verò mentem, & ad eas Revelationes, quæ nobis propius adversari videbantur, converto. Primane aliquid de S. IOSEPHO pronunciat? Nihil sanè. Relinquit ergo liberum nobis. At indefinite loquitur? Loquitur quidem, sed sapientibus, qui norant nullam regulam sine exceptione esse. Et ego causam aliorum sanctorum, præterquam IOSEPHI, hîc non propugno.

Ad alteram verò quod attinet, 1. opponere possum, ut dixi, sanctæ Brigittæ, sanctum Bernardinum. 2. Adhuc eâ allatâ perstat, in sententia mea, Cornel. in c. 27. Matth. 3. Non est tam certum, Revelationes sanctæ Brigittæ esse ritè impressas sicuti certum esse videtur, Revelationes eius esse veras. Et si neque hoc sit omnibus certum & de Fide. Quid si ergo hîc quoque Lectio corrupta esset? 4. Suppositò, quòd opinio mea sit vera, itèmq; vera sit Revelatio, dici debet, sensum esse. Scias ibi nullum esse, &c. nisi corpus meum, hoc est, meum, ratione naturæ, & meum ratione matrimonij, in sensu ampliante. Sed tamen circa hoc libenter discam ab alijs.

ELOGIUM LXII.

IOSEPH

Aureola Virginum insignis.

NEC Aurea à Laureæ, nec Aureola à Laureola, nisi nomine tenus, apud Theologos differt. Significant enim, coronam auream, siue lauream

ream omnibus Beatis communem, quæ ijs in Visione beatificâ imponitur; & minores quasdam coronas, seu rectius corollas, aliquibus tantum Beatis debitas, quæ ijs propter singulares quasdam de suis olim hostibus victorias relatas dantur.

Patet autem hinc, nonnisi vnum esse Aureæ genus; tria verò Aureolarum. Sunt enim tres gravissimi hostes nostri, Caro, Mundus, & Diabolus. Dantur ergo totidem pugnæ, totidemq; victoriæ, ac Symbola earundem. At Carnem quidem Virgines, Mundum Martyres, Doctores Diabolum triumphant, suis singulis aureolis honorum insignes.

Vt verò de Virginibus dicendi initium fiat, dat illis, 1. Deus in Domo sua locum & nomen melius à filiis & filiabus, Isa. 56. v. 5. 2. Sequi agnum, quocunque ierit, & cantare canticum novum. Apoc. 14. v. 3. 3. Amiciri stolis albis. Apoc. 7. v. 13. 4. Vestiri linô mundô & candido; & 5. præcingi circa pectora Zonis aureis, quæ aliàs Angelis tribuuntur Apoc. 15. v. 6. Ac 6. esse sicut Angeli in cælis sunt, Marc. 12. v. 25. Demum 7. lilijs in capite & manibus exornari; Sotus in 4. dist. 49. ex Augustin. ferm. 1. de Omnib. SS.

Sed hinc, an aliquid ad nostrum quoque IOSEPHVM exornandû, facit? Ne dubita; quidquid Aureolæ Virginum, siue pretij, siue odoris, siue formæ ac venustatis, inest, totum id debetur IOSEPHO, nisi fortè quis, fuisse Virginem, aut permanfisse, neget. At ostendi iam supra. 1. IOSEPHVM primum Virginum coniugem fuisse. 2. Exemplò despon-

desponsatæ Virginis **MARIÆ** Virginitatem suam Deo voto consecrâsse. Nihilne ergo præter ea, quæ dicta sunt, superest dicendum? Superfunt sanè etiam hîc fragmentorum cophini aliquot, quos exhaurire ne nunc quidem possum.

Igitur 1. Sponsus & Sponsa, Vir ac mulier, communibus ornamentis circumdari debent. At **IOSEPH** & **MARIA** sunt sponsus & sponsa, vir & mulier. Atqui **MARIA** aureolam Virginitatis de facto meruit. Ergo & **IOSEPH** Isolan. 4. p. c. 4. & alij. 2. Non est ille Custos Virginitatis alienæ, qui non est custos propriæ. At est **IOSEPH** testis simul, & custos Virginitatis **MARIÆ**. Est ergo etiam ipse custos propriæ. Brigitt. l. 5. Interrog. 12. & l. 6. c. 59. 3. Similis simili gaudet. At est **MARIA**, & quæcunque Mulier iuxta Dei voluntatem, desponsata, adiutorium simile Viro. Est ergo similis **MARIA IOSEPHO**. At Virgo non-Virgini similis esse non potest. Barry c. 8. 4. **MARIA** Virgo eos omnes qui se aspicerent ad Castitatis studium, extincto Concupiscentiæ fomite inflammavit. Bernardin. de Bust. p. 4. ferm. 12. At nemo diutius, quàm **IOSEPH**, cum eâ vixit. 5. Eadem Virgo ex facie splendorem quendam diuinum, & radium decentissimum emisit, vt inde nihil nisi præclarum de eâ **IOSEPH** cogitare potuerit. Eckius in ferm. de S. **IOSEPH**, ex quadam Glos. sa. Nullius ergo Virginitas securior fuit virginitate **IOSEPHI**. 6. **IOSEPH** meruit Virginitate suâ, vt fieret vir **MARIÆ**, & pater **IESV**. Augustin.

fin Serm. 24, de Natiuit. Dom. Ergo dubitari non potest, quin & aureolam meruerit. 7. Nihil repugnat meruisse aureolam. Si enim repugnaret, esset carentia fomitis. At hæc causa non est. Est enim duplex carentia, vna intrinseca, qualis in Christo fuit; alia verò extrinseca (quæ etiam in IOSEPH fuit) proveniens à gratiâ diuinæ protectionis alijsque auxilijs diuinis, quibus intellectus illuminabatur, & voluntas corroborabatur ad resistendum extrinsecis tentationibus. Ergo nulla est causa cur repugnet. Est autem causa vt dictum est, propter quam hæc ipsi aureola concedatur, vt paulò antè, tum hîc, tum superiùs, ostensum est. Hæc ergo IOSEPH est insignitus à IESV Filio suo.

ELOGIVM LXIII.

IOSEPH

Aureola Doctorum conspicuus.

QUòd aureolâ Virginum Virginem IOSEPHVM insigniverim, Auctore maximè Isidoro, Isolano in 4. p. cap. 4, factum est. At idem modò aureolam Doctorum porrigit imponendam Doctori magno IOSEPHO, quod vtique ego, qui vitam hætenus discendo docendèque exegi sine morâ, & vt in proverbio dicitur, ambabus manibus exequi debeo.

Sed ante omnia inspiciam aureolam hæc, vt quid mereri nobiscum possint alij intelligent. Est eâ inprimis magnificus ille Aaronis & filiorum eius

eius à Deo præscriptus ornatus; quem legere potes Exod. 28. v. 4. In quò eminere videtur Rationale iudicij, tum propter præstantiam operis cum materia certantis, tum propter Symbolicam significationem earum rerum, quæ Doctoribus inesse debent; *doctrinæ* nempe & *veritatis*, quas ibidem v. 30. Deus præcepit eidem Rationali inscribi. De quibus optimè commentatus est Corn. à Lap. in cit. loc.

Adhæc verò Dan. 12. v. 3. quasi compendiò, istius aureolæ elegantia exponitur. Nam, *qui docti fuerint, fulgebunt quasi splendor firmamenti : & qui ad iustitiam erudiunt multos quasi stella in perpetuas æternitates*. Nempe præmium labori respondeat, necesse est. At torus Doctorum Labor est, stellarum instar, lucere, & illuminare, Æquum igitur est, vt, quod erant mystice, deinceps reipsâ esse perseuerent.

At iam, quorûmnam, inquires, Doctorum Aureola hæc est? Affirmo esse eorum, qui quæ docent exemplò & opere, dirigunt ad praxin sacram. Hoc est enim propriè ad iustitiam erudire. Imò perquam probabile videtur, etiam eos Doctoribus accensendos, qui cum aliud non possint, etsi velint, favore suo Doctores complectuntur, consilijs dirigunt, alimentis procurant, occasionibus instruunt, monitis impellunt, precibus iuuant, ad hunc finem, vt illi immediatè doceant alios, quæ ad salutem sunt. Per se enim fecisse quis censetur, quod per alios fecit. Et sequitur hoc ex communi Docto-
rum

rum admittentium ad hanc suam Laureolam etiam Prælatos Apostolicarum Religionum, qui tamen aliter, quam dicto modo, non docent.

Neque tamen hoc, licet probabili, privilegio, opus habet etiam IOSEPHVS noster, quem ego paulo antè Doctorem magnum appellavi. Cuius causæ sunt illæ ipsæ, quas Isolanus attulit, & ego hîc redhibeo cultiores.

Nimirum 1. *Qui fecerit, & docuerit* (subintellige, faciendo) hic magnus, (nempe Doctor) *vocabitur in regno cælorum* Matth. 5. v. 20. At fecit, & faciendo docuit IOSEPH. Est ergo magnus Doctor. At nemo magis faciendo docuit. Est ergo etiam Doctor maximus. 2. Doctores aureolâ digni, illuminantur à Deo, & Angelis, suò tempore loquuntur, & ad Deum verum agnoscendum, quoscunque conuertere conantur. At nonne IOSEPH illuminatus est à Deo & Angelis? Nonne pastoribus æquè ac Magis locutus est magnalia Dei? Nonne Zachariæ, dum in Ægyptum proficisceretur, imminentem Herodis tyrannidem detexit, admonens vt cautè & fortiter gereret se? Castr. cap. 10. Nonne ipsis Ægyptijs annunciauit, impletum esse vaticinium Ieremiæ olim apud ipsos exulantis, cuius causa Epiphanius apud Canis. l. 2. c. 7. fol. 169. testatur, Sacerdotes id loci Virginem in lecto; iuxtaque in præsepi infantem posuisse & adorasse? Nonne cum Nazareth revertisset ciuibus suis ac cognatis, velut præueniens Ioannem

Baptistam, suò etiam digito commonstravit IESVM & MARIAM matrem eius, & quinam essent, quorumue bono, edocuit? Est ergo IOSEPH dignus, Doctoris tum aureolâ, tum voce. At iam & priuilegium ante insinuatum nemo magis meruit, quàm IOSEPH. Sed ego reliqua, quia opus esse non puto, tuæ malo sapientiæ relinquere consideranda, contentus causis duabus ex Isolano allatis, cuius fragmentum (nam Auctorem ipsum non habeo) apud Carthag. 10. 4. l. 18. Hom. vlt. fol. mihi. 521. legere potes.

ELOGIUM LXIIM.

IOSEPH

Aureola Martyrum ornatus.

Aureola Martyrum meritò duabus alijs aureolis antepositur ab Augustin. lib. de Virginit. c. 46. in fin. tom. 10. Ratio est, quia plus est vitam pro Fidei causâ, quàm carnem, & vsum vitæ, offerre Deo.

Possunne ergo calamo istius Aureolæ excellentiam assequi? Tentare iuuat ex Doctrina reuelata, quæ 1. Apoc. 2. v. 17. Martyribus dat *manna absconditum*, Et 2. *calceamentum candidum*. Et 3. *in calculo nomen scriptum, quod nemo scit, nisi qui accipit*. Apoc. 7. v. 9. Et 4. *stare ante thronum suum stolis albis, & palmis in manibus suis*. Et 5. cit. cap. v. 15. *seruire Deo die ac nocte in templo eius* &c. Et 6. v. 15. *ab Agno, qui in*

qui in medio throni est, regi, deducique ad vitæ fontes aquarum &c.

Hac verò Aureolâ denno Isolanus IOSEPHVM exornat; consentitque Isolano Carthag. lib. 4. Hom. 2. & lib. 18. in fine sed repugnant plures alij, propterea, quod ad Martyrij gloriam violentia mortis reipsa toleratæ necessaria sit. At non est, inquit, IOSEPH vllam mortis violentiam passus. Vtros ergo sequar in hac lite? Equidem Isolano & Carthaginæ citatis accedam.

Et Rationes sunt 1. Quia hæc ipsorum & mea opinio SS. Patrum est; puta Hieronymi serm. de Assumpt. Deiparæ, quàm Martyrem vocat, quamvis in pace vitam finierit; Tertulliani c. 8. Scorpiani, vbi tres pueros Martyrium subiisse dicit sine Martyriô perfectum; Gregorij lib. 3. Dialog. qui; incunctanter, inquit, colligitur, esse & sine aperta passione Martyrium. 2. Quia idem sentiunt graves Theologi, & inter hos Suarez to. 3. in 3. p. admittens, casu, quô quis præservatur à morte aliàs perferenda talem deinceps in gratia confirmandum esse, ne excidere possit brauiô, quô nullâ suâ culpâ priuatus est. Less. de Fortitudine. Item Benzoni super Magnificat, cap. 22. dub. 8. Viguerius to. 3. Disp. 29. S. 3. in fin. Tanner, in 4. Disp. 4. q. 3. Henriq. l. ult. cap. vlt. 3. Quia Ecclesia ipsa agnoscit colitque vt Martyres, quos tamen tranquilla morte decessisse palàm in Martyrologio fatetur. Sic namque se habent Tecla, Felix, Hyginus, vt de alijs taceam. Ex ijs autem, quos attuli,

postremus, ne quidem miraculô, opus habuit, vt mortem evaderet: vt proinde S. Thom. sat causæ habuerit, adhuc laxius loquendi. in 4. dist. 95. a. 5. &. 2. 2. q. 124. a. 5. quàm nobis hîc necessariû sit. Ego enim hoc vno fundamento contentus iam sum, quòd ad hoc vt IOSEPHVS aureolâ Martyrum donetur, sufficiat, eum esse tam grauiâ passum, quæ si Deus non confirmâisset viri pectus, mortem causâ Fidei, illatura fuerint. At hæc illum ipsâ esse passum, partim ex dictis patet, partim ex dicendis constabit.

Ac 1. passus est IOSEPH causâ IESV Filij sui, quæ causa à Fide separari nullo modo potest. 2. Passus est, à ciuitate, domibus, ac diuersorio. Bethlehem excludi se, reijci que ad locum feris tantum destinatum, absque omni auxilio humano, in summâ rerum necessariarum inopiâ, &c. 3. Passus est, ab Herode omnium vitæ imminente, de nocte, è strato, somnôque in exilium longissimum & septennale ad Idololatrias Aegyptios se m. tti. Cuius ærumnas alibi expono. Iam verò illud solum addendum est, quòd in eius exilij itinere, etsi aliâs quindecim diebus confici posset recta incedentibus, viâ, ipsi nonnisi duorum mensium spatio emensi fuerint, prout Bonau. cap. 12. vitæ Christi retulit; quem animus devotus sine lacrimis vix perleget. 4. Passus est, cor suum confodi doloris gladio, quoties confossa est anima MARIÆ, Luc. 2. v. 35. At est MARIA propterea Hieronymo cit. & Anselmo lib. de excell. Virg. cap. 5. Martyr. Est ergo etiam

iam IOSEPH Martyr, & Martyrum aureolâ æquè, ac alijs, condecorandus. Vide etiam Nierenberg. de Orig. S. Script. lib. 10 cap. 34. & in meo opusculo de Priuilegijs Morient, Lucernæ impresso, Priuil. XVIII. fol. 17.

ELOGIUM LXV.

IOSEPH

Similis Ioseph Patriarchæ.

Similitudo, Philosophis est inter ea, quorum qualitas est vna. Quam inter hos duos IOSEPHOS adeò non quæro, vt etiam vnitatem essentialem ac obiectiuam, quæ omnibus hominibus ante omnem Intellectus operationem communis est, hîc missam faciam. Similitudinem ergo figuræ ac figurati solam volo. Hæc mihi adeò numeris omnibus inter IOSEPHVM hunc nostrum, & inter illum primum Patriarcham absoluta videtur, vt si quis vnius decora recenseat, simul descripsisse laudes alterius dici possit. Idque iam Bernardus in Hom. 2. de B. Virg. Canisius de eadem l. 2. cap. 13. & Carthag. l. 4. Hom. 12. & 13. agnouerunt. Ex quibus proinde nunc ea tantum, quæ Patriarchæ sunt, referam. Tu postea per temetipsum facile huic nostro IOSEPHO eadem accommodare poteris.

Igitur Ioseph Patriarcha 1. filius fuit Iacob.
2. Accepit nomen sibi apprimè conueniens; quod

N 3

Elog.

Elog. 7. interpretati sumus. 3. Plus alijs fratribus propter eximiam Virtutem suam à Patre dilectus fuit, ideóque eorum inuidiam grauissimã incurrit. 4. Diuina somnia complura habuit, cognouitque esse diuina, 5. In Ægypto diu exulauit, non procul Heliopoli. 6. Vir fuit in cunctis prosperè agens, cum quo Dominus esset, omnia, quæ gereret, dirigens. 7. Castitatem maximopere semper coluit, paratus eius retinendæ causâ etiam mortem perpeti. 8. Cognomen iusti sibi Virtutibus suis comparauit, prout videre est sapient. 10. v. 13. 9. In Martyrem euasit tolerantia acerbissimarum ærumnarum, licet in pace & gloriâ vitam clauserit. Ambros. apud Corn. à Lap. c. 39. in Gen. 10. Fuit nutritius Regis, & quasi Pater Pharaonis, & Dominus vniversæ terræ domus eius, ac princeps in omni terra Ægypti. Gen. 45. v. 8. Itemque secundus à Rege omnium genibus venerandus, tanquam Saluator Mundi, absque cuius imperio nemo manum pedemue mouere deberet, Gen. 41. v. 43. & 45.

11. Triginta annorum cum esset, duxit Aseth, hoc est, ignem distillantem, filiam Putiphar Sacerdotis, optimè educatam, & inclusam in arce paternâ Virginem, vt Vincentius in suo spec. Hist. & quidem cum sex auri millionibus, vt ex Sixto Sen. l. 2. Gratian. l. l. c. 2. docet. 12. Ex ea suscepit Manassen & Ephraim, quibus obliuio laborum perpetua significatur Gen. 41. v. 51. & 52. 13. Mirâ benignitate amplexus est fratres suos de se pessimè

peſſimè meritos. Toto c. 45. 14. iſdem tradidit
 terram Geſſen, optimum Ægypti locum, ac mul-
 tis poſtea miraculis illuſtrem. Gen. Cap. 47. v.
 6. & Exod. 8. v. 22. 15. Iuſſit, fratres ſuos dice-
 re Pharaoni. *Paſtores ovium ſumus ſervi tui, & nos, &*
patres noſtri. Gen. 47. v. 3. 16. Univerſa horrea
 àperuit ad propulſandam totius orbis famem. Gen.
 41. v. 54. & c. 47. v. 13. 17. Meruit benedici
 hiſ ſanctiſſimis verbis. *Benedictio illius, qui apparuit*
in rubo, veniat ſuper caput Ioseph, & ſuper verticem Na-
zaræi. Deuteron. 33 v. 16. itémque alijs Gen. 49. v.
 22. 18. Etiam filijs benedictionem impetravit à
 patre Crucis formam manibus decuſſatim poſitis
 exprimente Gen. 48. & adorante ſaſtigiū virgæ
 eius ad Hebr. 11. v. 21. 19. Vaticinijs plurimis
 confirmatus eſt ad imminentes perſecutiones ani-
 moſe perferendas Gen. 49. 20. Terram promiſ-
 ſionis deſideravit ex animo; itaque ſanctam vitam,
 ſine non minus ſancto, clauſit. Gen. 50. in fin.

Iam autem obſecro te, quiſquis hæc legis. an-
 non omnia & ſingula ad amuſſim quadrant etiam
 IOSEPHO noſtro? Docerem ſancte, ſi ignorare
 crederem. At hoc quæ credam? Si tamen au-
 dire aliquid enucleatius velis, ad id, quod
 proximè dicetur, oculos transfer.



IOSEPH

Præstantior Iosephô Patriarchâ.

A Bsit, vt similitudo figuræ cum figurato inferat æqualitatem morum. Quàm enim multæ sunt figuræ in Veteri Lege Christi nasci-
turi ex Virgine! At est Christus haud dubiè maior omnibus figuris suis, Potest ergo etiam IOSEPH etsi Iosepho Patriarchæ, vt dictum est, simillimus, esse maior & præstantior eodem Iosepho Patriarchâ. Et hoc est, quod hîc præcipuè probatum eo, declaraturus simul ea, quæ proximè obscuriùs dicta, quàm singuli velint, videri possunt.

I. Nempe IOSEPH noster Patriarcha est; tum quia suscepit ex coniuge IESVM Patrem omnium ritè credentium; tum quia ex quo cæpit huius esse Pater, simul esse cæpit Pater generis humani vniuersi, tum quia sub Paternitatem suam paulatim trahit post se Cõgregationes omnes quotquot sub MARIÆ Virginis titulo à PP. Societatis IESV toto passim orbe eriguntur, tum denique, quia plurium Religiosorû Ordinum filij, vt de alijs, qui suo arbitrio seruiunt Deo, nil dicam, palàm se filios IOSEPHI profitentur. 2. Ita IOSEPH gratiâ & Virtutibus creuit, vt nomini suo fuerit admodum conformis; 3. Idem amorem Patris æterni meruit, vt nemo magis; quemadmodum Elog. 84. & 85 ostendam. 4. Idem Somni tempore etiam

tiam Angelorum alloquio fruitus est. Et 5. Eodem prope loco exulauit, diutiùs tamen & duriùs longè. 6. Cum eo Dominus immediatè fuit, exercens prouidentiam suam. 7. Nihil ipso Virgineum erat magis. Et 8. iustius nihil. Quem etiam 9. Aureolâ Martyrum cinxit non tam calamus meus, quàm suamet inuicta patientia. An non autem 10. idem fuit nutritius IESV Regis cælestis omnia nutrientis? Annon eiusdem fuit Pater, & hòc ipso Dominus, ac Princeps omnium, & non tantùm Saluator Mundi, sed Saluator Saluatoris Mundi, eundem huc illúcque transferendo, vt seruari illæsus ac integer posset destinatæ morti? 11. Etatem quoque Patriarchæ idem excessit, desponsatus Virgini pretiosissimæ in templo Salomonis à Sacerdotibus incluse, quæ non tantùm ignem amoris diuini in huius sui Sponsi cor distillauit, sed incendij instar effudit. 12. Eiusdem filij Manasses & Ephraim nos sumus, qui credimus IESV, & numero & virtute maiores. 13. Ille nos omnes in IESV, & per, ac propter IESVM, suauissimè amplegatur, etsi haud dubiè còplures nostrùm pessimè meriti sint. Et tamen tradit 14. Singulis terram Gessen, quæ est Ecclesia, optimo loco sita, verèque mirabilis. Quam illi præcipuè excolunt 15. qui se Pastores esse profitentur. His enim uerò 16. aperit horrea Sacramentorum, & ex domo Bethlehemi profert Panem cæli, atque Angelorum, licet aliàs idem hic panis multis in locis haberi non possit. *Petierunt paruuli panem, & non erat, qui frangeret*

illis. Thren. Ierem. 4. v. 4. Idem etiam 17. fuit cuius Benedictio originem traxit ex immaculatâ Virgine, rubo verè incombusto, procedens inde super caput ipsius & verticem IESV Nazaræi maximi. Sed 18. deriuari benedictio hæc in alios non potuit, nisi per crucem eiusdem; cuius fastigium per fidem adorari debet. Vaticinia autem 19. vbi plura sunt, quàm in hac noua lege? Vbi 20. Terra promissionis vitæ æternæ non tantùm à IOSEPHO, sed nobis omnibus, ardentissimis studijs expetitur. At quantò beatior est ista vita, vitæque promissio? quantò etiam mors securior ac suauior, quàm mors Patriarchæ Ioseph, ac promissionis terra ab ipso exoptata? Iure igitur dicere possum, IOSEPHVM nostrum esse Ioseph Patriarchâ præstantiorem, Suâ, Virginis, IESV, & nostrâ causâ.

ELOGIVM LXVII.

IOSEPH

Iosephos omnes Euangelicos antegressus.

ECkius, quem in ea editione, quam præ manibus habemus, appellant Galli in fronte libri, *unicum prope priore sæculô Catholica Fidei assertorem, hæreticorumque omnium impugnatorem*, initio serm. de S. IOSEPH ait, si vniversam reuoluamus scripturam, singulorum Iosephorum laudes huic vni IOSEPHO tribui decenter posse. Et ille quidem quatuor in lucem dedit. Sed quoniam inter eos etiam ipse, de quo agitur, est, licebit vtique ex
Euan-

Euangelica Historia illi etiam substituere, quocum is minori verecundia comparari possit.

Est autem primus idem de quo proxime egi, Patriarcha *Ioseph* Cuius laudes Ecclesiasticus 49. v. 16. et. 17. complectens, *nemo inquit, natus est in terra vt Ioseph, quinatus est homo, princeps fratrum, firmamentum Gentis, rector fratrum, stabilimentum populi: & ossa ipsius visitata sunt, & post mortem prophetaverunt.* Quæ verba equidem lubens volensque pluribus exponere cuperem; Verum nec tempus nec amor me finit abiuungere tantisper institutionis Orationis cursum. Dic enim, amabo, quis inter eos, qui consuetæ naturæ ordine nati de mulieribus sunt, ita natus est vt IOSEPH noster? Nascuntur alij hominibus porius similes, quàm homines. At noster dum natus est, iam homo fuit, rationis compos, plenus gratiâ, sine fomite & peccato instar hominis primi, priusquam Infernali serpenti auscultaret. In quo quæ primò dixi, hîc quoque eo sensu intelligi volo.

Cæterum quia reliqua Eccles. verba clariora sunt, quàm vt interpretis face habeant opus, transeo potius ad *Iosephum* alterum; ab Arimathiâ cuius festum 17. Martij agitur, nobilem centurionem, virum bonum ac iustum, testem veritatis publicum, expectantem Regnum Dei, qui audacter à Pilato Corpus IESV petijt, obtentumque deposuit à cruce, ac Syndone involutum intulit monumento suo, recens in petra exciso, advolvens ad ostium eius prægrandem lapidem, In quo, quod desideret

fideret aliquis nihil; quod verò laudet, plurimum fanè est. At non est aliquid, quo noster IOSEPHVS minor sit? Ille enim, quæ præstitit officia, mortuo præstitit; & vnico die paucisque horis; ac sine grauiore damnò, damniue periculo. At hic, noster nondum integrè natum, eiusque coniugem accepit, & operam postea perdifficilem inter innumeras ærumnas, ac pericula quauis morte acerbiora, per annos non pauciores triginta, constanter impendit.

Huic porrò tertius succedit *Iosephus*, ignotus ille quidem vulgò, sed prolatus in lucem à Baronio in Notis Romani Martyrologij ad diem 20. Martij, quo ipsum inter martyres Ecclesia celebrat vnà cum Victore fratre suo, ac matre Photinià samaritanà muliere, quæ olim IESV dixit, Ioan. 4. v. 15. *Domine da mihi aquam*, accepitque, illo mortis genere defuncta, quo sine diuerticulo ascenditur ad Cælum. Hæc aqua verò quam longe vberior inundauit IOSEPHVM nostrum? si enim dulcius ex ipso fonte bibuntur aquæ, en ipse fons perennis IESVS immergit se in labia, & genas, & manus ac pectus IOSEPHI Patris sui. Totus adeò huius est, & esse vult, vt iam ne quidem desiderij locus esse possit.

Demum quartò loco *Ioseph* ille adest Alphæi & Mariæ Cleopæ filius, frater Simeonis, & Iudæ & Iacobi minoris, quem Iosephum dixi ab Ecclesia colli 20. Iulij; quemque, Barsabam hoc est *filium conversionis & iustum*, compellant acta. c. 1. v.

23. Hic quidem inter discipulos IESV eo prouectus est famâ virtutis, vt apostolatu dignus videretur. Verum non fuit Spiritus sanctus vltius progredi iudicium Apostolorum ne hoc insuper addito IOSEPHI nomine alterius nostri tum dignitatem tum sanctitatem aliquâ ex parte obscurarent. Igitur etiam nunc hic noster IOSEPH super alios omnes facile eminet, tam charus MARIÆ Virgini, vt eius memoria Hermano Steinfeldensi Monacho Præmonstratensi imponeret idem IOSEPHI nomen, ac deinceps, ceu sponsum, alterumque IOSEPHVM haberet. De quo Surium legito ad 7. Aprilis.

ELOGIVM LXVIII.

IOSEPH

Maior sanctis Ioachimo & Anna

CAsparus Tausch de SS, Matre Dolorosa l. 3. prax. 16, §. 2. *Inter amatores inquit, B. Virginis primum locum, videntur obtinere debere sanctissimi parentes eius, Ioachim & Anna. Et rationem dat, quia genuere, atque educauere, diligentia & affectu maximo, MARIAM filiam suam; eidem imposuere designatum à spiritu sancto nomen; vitam duxere omni ex parte sanctissimam, eamque etiam à peccato veniali immunem, imo & originali, priusquam nascerentur, celeriter exemptam.*

Sub-

Subinde verò in particulari præfert eos etiam S. Ioanni Baptistæ, & Apostolis 1. quod plus debeant IESVS & MARIA parentibus. 2. quod ad vnionem Christi propius isti concurrant, 3. Denique quod conversatione eiusdem Christi ac MARIE diutissime frui sint. Cùm autem vltterius ad S. IOSEPHVM gradum faceret, fortasse inquit, *excellentiâ sanctitatis parentibus B. Virginis aut non cessit, aut eos etiam excessit, de hoc enim aliqui disputant. Ego nihil definio.* Hæc ille, quæ mihi nunc ansam præbent, iuxta scientiæ, quam profiteor, principia, quæstionem indecisam terminandi in favorem IOSEPHI nostri.

Dico igitur 1. omnia verisimilia esse quæ docuit prædictus Pater, etsi auctoritate & testimonijs veterum (vt idem Tauschius ait) confirmari non possint : sufficit enim prudens iudicium ac discursus à minori ad maius deductus in ijs rebus, in quibus nihil statuitur de Fide, aut sanctis patribus, at nihil hic statuitur tale sed solum quid deceat, quidue probabiliter factum sit asseritur, decet autem haud dubiè erga eos præcipue liberalem esse Christum, quos pro parentibus habere debet. Atqui Aui, seu parentes matris vt dicitur L. 120. ff. de Verb. signif. in ijs quæ benigne accipienda sunt & clementi interpretatione adiuuanda, patris nomine & priuilegio intelliguntur.

Dico 2. Quædam adhuc non minus gloriosa adijci prædictis posse. Nam 1. soli inter omnes parentes, & quidem vt Galatin. l. 7. c. 8, ait, sine vlla et.

la etiam licita libidine concepere filiam, etiam à debito proximo contrahendi peccatum originale præservatam à Christo, illisque gratijs exornatam, vt solò Deo sit minor, minúsque potens; ita hunc passim Theologi 2. Soli geminà reuelatione ab Angelis admoniti sunt de futuro conceptu præmemoratae suæ filiae, eiúsque incomprehensibili dignitate, qua super omnes mulieres benedicenda esset. Niceph. l. 1. c. 7. 3. Soli rem præstantissimam Deo, MARIAM inquam, devouerunt, & obtulerunt iure perpetuò Greg. Nyss. in Orat. de Nat. Christi.

Dico 3. Nihilominus IOSEPHVM his ipsis tam sanctis MARIE parentibus Ausque IESV maiorem esse, cuius rationes sunt illæ ipsæ, quibus S. Thom. 2. 2. q. 26. explicat Charitatis ordinem. scilicet quia maior est, qui est coniunctior Christo. At est IOSEPHVS coniunctior Christo, quam SS. Ioachim & Anna. Suarez Disp. 8. s. 1. sunt enim hi coniuncti solum mediatè, ille autem immediatè. 2. quia gratia naturam non destruit, sed perficit. At est Pater maior alijs in animo Filij per naturam. Verisimile ergo est, etiam maiorem esse alijs per gratiam. 3. quia eò maior quis est, quò plures experitur affectus amoris. At est IOSEPHVS longè plures expertus, quàm parentes MARIE: Ipse enim à IESV, quamdiu vixit, per annos admodum 30. nunquam auulsus est. Ipse inter IESV & MARIE manus vitam atque oculos clausit. Ipse corpus gloriosum primus inter homines post Christum cælo intulit. At nihil horum contingit parenti-

rentibus MARIE. 4. Quia IOSEPHVS, quidquid est Patris, habuit, vnâ carnali generatione excepta, At patrem, vt ait cit. Doctor præcipuè amare filius debet. Fuit ergò Charissimns IESV IOSEPHVS, Atque eò maior quis est, quò est Charior IESV. Fuit ergo idem maximus.

ELOGIUM LXIX.

IOSEPH

Maior sancto Ioanne Baptista.

DE Fide est, inter natos mulierum non surrexisse maiorem Ioanne Baptista. At non est de Fide, neminem quouis modo maiorem surrexisse; sed potius de Fide est, eum qui minor est in regnò cælorum, esse maiorem illo. Vti enim prius affirmat Deus apud Matth, 11. v. 11. ita posterius idem eò ipso loco affirmat. Est igitur ante omnia inquirendum, quò sensu non surrexerit Ioanne Baptista maior.

Vbi meas interpretationes, quas accepi, afferò candidè. 1. est, non surrexisse maiorem quoad nos hoc est, quoad hominum venerationem, vsque ad Christi adventum Bern. de Bust. serm. 12. 2. Non surrexisse Prophetam maiorem. Lucas enim c. 7. v. 27. *Non surrexit, inquit, maior Propheta S.* Augustin. l. vet. & no. test. q. 26. 3. Non surrexisse maiorem, austeritate vitæ, quam ab infantia sua duxit. Glossa. Possunt ergo alij alio aliquò sensu

sensu dici maiores illo. Talis autem est 1. Christus. Estque 2. MARIA Mater eius, quod utique Catholicis omnes fatentur. 3. IOSEPH quoque iisdem addi potest, & de factò additur à Gerson, Bernardino de Bustis, Cartag. l. 4. hom. 8. Cornel. in c. 1. Matth. Suarez 3. p. q. 29. Disp. 8. s. 1. Barry cap. 8. & alijs.

Hoc autem non ignoro, mirabile, & fortè etiam incredibile, videbitur multis, qui cum de IOSEPHO vix quidquam sciant, vicissim tamen tot ingentia decora proferunt de Ioanne Baptista, ut non solum præferri, sed ne comparari quidem cum hoc posse videatur. Neque ea decora hic imminutum eo. Sed potius cum scènore iustissimarum laudum, in publicam lucem auctiora atque ornatiora produco. Audi enim, oro te, in primis Petrum Chrysologum in serm. 27. Hic, Ioannes, inquit, est schola virtutum; magisterium vite sanctitatis forma, norma iustitie, virginitalis speculum, pœnitentie via, peccatorum venia, fidei disciplina: Ioannes maior homine, par Angelis Legis summa, Euangelij sanctio, Apostolorum vox, Silentium Prophetarum, Lucerna mundi, præco Iudicis, præcursor Christi, metator Domini, Dei testis, totius medius Trinitatis.

Simul verò & Cotonum lege, qui dum Medit. 3. vnam, en? Ioannis Natiuitatem considerat recenset priuilegia 23. quæ id temporis consecutus est, & ex ipsa Scriptura. S. erui possunt. Cornelius quoque supra cit. vide. sis, quam præclarè loquatur; dum ait: Ioannes fuit quasi continuum mira-

O

culum

culum in conceptione, in vtero, in natiuitate, in vita angelicâ. Probatque postea quod dixit.

Sed hæc mihi iustò longiora sunt, vt perveniam ad IOSEPHVM; quem vti concedo minorem esse splendore vocationis, & eorum quæ magis extrinseca sunt, persevero tamen dicere, maiorem esse sanctitate, quàm sit Ioannes Baptista nunquam satis laudandus.

Rationes sunt 1. quia qui Dignitate sanctitatẽ requirente maior est, maior est ipsâ sanctitate. At est IOSEPHVS maior Dignitate, quam sit præcursoris Dignitas, eaque IOSEPHI Dignitas requirit Sanctitatem. Ergo est maior Sanctitate, quàm sit Sanctitas Ioannis Baptistæ. Minor probatur; quia Dignitas IOSEPHI est paternitas, & cõiugiũ cum sanctissimis Personis, Dei Filiõ & Matre Dei; & vtraq; hæc dignitas requirit sanctitatẽ cum proportionẽ ad se.

2. Quia media sanctitatis adipiscendæ longè plura habuit IOSEPHVS, quàm Ioannes Baptista. At nullò ex capite colligi potest, quod ijs medijs non sit vsus IOSEPHVS. Ergo, Maior videtur evidens; quia IFSV & MARIE præsentia, sapientiã, amore, exemplis, diutissimè fruitus est.

3. Quia IOSEPHVS dici potest σωτηρ siue salvator Ioannis Baptistæ. Veri simile ergo est quòd ipsemet Ioannes Baptista eum, vt maiorem se, coluerit. Antecedens probatur auctoritate Christoph. de Castro l. 10. affirmantis, ab ipso, dum per Hebron in Ægyptum exul abiret, parentes Ioannis Baptistæ

Baptistæ admonitos esse de periculo ab Herode imminente,

ELOGIVM LXX.

IOSEPH

Maior sanctis Apostolis.

SI IOSEPHVS Maior est Apostolis admirari nemo debet, Deum ne nomen quidem IOSEPHI permisisse inseri Apostolorum albo. Atqui maiore esse, contendunt, Suarez in q. 29. Disp. 8. s. 14. Holanus p. 4. c. 18. Carthag. l. 18. Hom. ult. & l. 4. Hom. 8. Laudare igitur potius quis debet providentiam Dei, cuius nutu Barnabas Act. 4. primarium illud IOSEPHI nomē vltro deposuit, ascititiō Barnabæ contentus, itēque Act. 1. Ioseph, qui iustus & Barsabas cognominabatur, tametsi primo loco votisq̃ue omnium designaretur, ad Apostolicæ dignitatis apicem non potuit ascendere. Nempe satis esse Iosephis debet, habere vnum aliquem Cognominem ipsis Apostolis maiorem. At, vt vides, habet aliquem, hunc scilicet IOSEPHVM pro maiore agnitiū a doctissimis viris.

Quorum rationes aut sunt, aut esse possunt. 1. quia IOSEPH, Pater IESV à MARIA Coniuge Virginē, appellatus est, fuitque reipsa decem Paternitatum modis, vt supra declaratum est. Atqui Apostoli tantū sunt Amici eius. 2. IOSEPH ministerium obiuit, proximē coniunctū

O 3

cum

cum persona verbi. Fuit ergo primus ordinis. 3. Inter virum & vxorem debet esse proportio dignitatis. Atqui dignitas vxoris MARIE longè excedit dignitatem Apostolorum; Ergo etiā dignitas IOSEPHI est Apostolicā maior. 4. IOSEPH vitæ genus secutus est aptissimum ad exercendas perfectissimè actiones quarumcunque virtutum ac præcipuè charitatis, correspondentes vtrique vitæ, tum actiuæ, tum contemplatiuæ; prout egregiè demonstrat cit. Suarez, facileque colligitur ex comparatione eorum, qui cum millesimam partem huiusmodi occasionum conuersandi cum IESV & MARIA non haberent, euasere tamen ad supremum fastigium sanctitatis. 5. IOSEPH ex perfectissimā cognitione & amore IESV iugiter operatus est. Fuit enim copiosissimè adiutus, septem donis Spiritus S. vt inductione ostendit Gratian. l. 3. c. 4. probātque ex eō, quia ipse unus Magistros, Duces Spirituales, Testes, Adiutores, Dominos habuit IESVM Mariam, & Angelos. Inde ergo comparavit sibi sapientiam, intellectum, consilium, scientiam, fortitudinem, mansuetudinem, & timorem omnibus maiorem, solā Virgine exceptā. 6. IOSEPHI proprietates morales præstantiores sunt Apostolorum proprietatibus moralibus. Ergo & sanctitas ejus quæ radix & quasi natura illarum est, est maior sanctitate Apostolorum. Antecedens probō, quia ut Isolanus ait, cit. c. 18, Quatuor sunt proprietates Apostolicæ dignitatis: Annunciatio Evangelij; *Euntes predicate Evangelium omni Creatura.*

Illum.

Illuminatio; Vos estis lux mundi; Reconciliatio; Quorum remiseritis peccata; Et per Spiritum S. locutio; Non enim vos estis qui loquimini. Atqui proprietates IOSEPHI sunt; Desponsatio Reginae cœlorum; Nominatio patris Regis Angelorum; Defensio Messiae promissi in lege; ac denique educatio Salvatoris omnium, suntque proprietates istæ præstantiores illis, illæ enim à Christo, sub Christo, & propter Christum; istæ autem super Christum, ad Christum, & propter Christum. Quia tamen obijciuntur aliqua, adversum hæc, Nota, IOSEPHVM spectare ad ordinem Vnionis Hypostaticæ, Apostolos autem ad ordinem gratiæ gratum facientis. Atqui duo isti ordines inter se diversi sunt; estque uterque maximus; primus scilicet absolute; posterior respectu Ecclesiæ, cuius primarii pastores Apostoli sunt. At est ordo prior verè prior, dicereque possumus, quod est infimum supremi plus est quam supremum infimi. Est autem IOSEPH infimum supremi, siue hypostatici ordinis, ergo plus est quam supremum infimi, siue Apostolus quisunque. Tandem vero nequaquam difficile probatu est, etiam formaliter IOSEPHVM proprietates Apostolorum omnes statumque, & vocationis genus expressisse. Sed nunc ad alia calamus properat maiora dictis. Tu interim per te ipsum, quæ dixi, etiam tacente me, siquidem velis, assequi poteris.



IOSEPHINA
ELOGIVM LXXI.

IOSEPH

Major Sanctis Angelis.

Postquam MARIA Angelorum Regina esse coepit, IOSEPH, vir eius, non potest non etiam ipse Angelorum esse Rex. Si autem Rex est, utique maior est iis, quorum est Rex. Maior igitur Angelis est, quorum Rex, idem, hoc ipso, est, quia vir est Regine eorundem. At anne, inquires, IOSEPHVM, uxoris tantum dignitas, an, sua etiam Regem creavit? Ego hinc suæ assentior. Est enim illustrius longè, mereri, quam accipere honores. Sic ergo pro IOSEPHO argumentari lubet. Is demum meretur maximè Rex esse Angelorum, qui magnitudine ac varietate virtutum simillimus est Angelis, & unus decora omnium ac singulorum universa complexus est. At hic est ipsissimus IOSEPHVS noster, ut affirmant Carthag. lib. 4. Hom. 9. Clisorius in vita S. IOSEPHI, mihi fol. 109. Gratianus lib. 4. cap. 1. Palma IOSEPH. fol. 270. Meretur ergo, IOSEPHVS maximè, Rex esse Angelorum, utpote non tam fortunâ, quam virtute maior illis. Est autem in hoc syllogismo prima propositio per se clarissima, assumpta non parùm controversa. Verum hanc quoque magis magisque agnoscunt, nostratia tempora, postquam glaciem probationis fregère, citati Auctores, quorum nunc operæ armisque innitor, Igitur hunc in modum probatur ab ipsis,

ipsis, unâque me, propositio illa assumpta. IOSEPHVS noster unus omnium mortalium maxime implevit munia, triplicis Hierarchiæ cœlestis divisæ in novem choros. Ergo, quod in prima propositione requirebatur ad Angelorum Regem, Maioremque, dubitari non debet, haberi ipsissimum IOSEPHVM nostrum.

Antecedens inductione constabit. 1. enim *Angelorum* est, immediatè singulis annunciare, quæ eos seorsim concernunt, itemque singulos custodire, dirigere, ac movere, ad conveniens sibi bonû, Psal. 90 v. 11. *Angelis suis Deus mandavit de te, &c.* Atqui IOSEPHVS largissimè hoc totum præstitit, ut ostendi Elogio 15. & patet etiam ex eò, quia juxta litteram in omnibus viis custodivit IESVM & MARIAM, inque manibus suis, domi ac foris sæpissimè portavit; direxit etiam, jure Patris, ac Viri, utrorumque actiones, & quò videbat Deum velle, movit. 2. *Archangelorum* est quasi Apostolicos legatos à latere Dei mitti ad principes, regesque vel præcipuas mundi personas, in causis maximi momenti, ac totam communitatem concernentibus, Atqui Gratian. cit, fol. mihi 252. testatur, constare sanctorum scriptis, quòd IOSEPHVS responso in somnis more suò accepto tres reges admonuerit de Herodis insidiis. Et videtur scripturæ phrasibus Matth. 2. v. 12. pro hac opinione posse commodè explicari. 3. *Principatum* est, instar principum gubernare inferiores Angelos, in iis, quæ ad salutem omnium ac singulorum pertinent, ac præ-

cipue cum de religione agitur. Atqui talis Princeps imprimis IOSEPHVS est, gubernans Ioannem Baptistam, ne ab Herode occidatur, de quô dicitur Malach. 3. v. 1. *Ecce ego mitto Angelum meum, itemque MARIAM Reginâ Angelorum & IESVM Angelum testamenti ut ibidem vocatur.* 4. *Potestatum est, dæmones retundere, terrere, impedire &c.* Atqui IOSEPHVS id plenissimè præstitit, deiectis in ingressu Ægypti Dæmonum statuis, (saltem mediante Filiô suô.) & mysteriô incarnationis sapientissimè occultatò, ne ab iisdem agnosceretur. 5. *Virtutum est, grandia miracula patrare.* Atqui nemo maius fecit IOSEPHO, qui IESVM iustitiæ Solem per annos 30. arbitriô suô stitit ac movit. Videri etiam apud Castro. c. 10. potest, ficus arbor, & fons Matureæ prope balsami hortum, jam inde à IOSEPHI adventu plurimis hominibus salutares. 6. *Dominationum est, dominari principatibus.* Atqui vt supra legisti ipsamet MARIA IOSEPHO Domini nomê concessit. Barrij cap. 5. ex Revel. S. Brigittæ retulit. 7. *Thronorum est, esse sedem Dei, in quâ requiescit.* Atqui nullibi post MARIAM sæpius hic, quam inter IOSEPHI brachia requievit. Deut. 33. v. 12. 8. *Cherubim est possidere plenitudinem scientiæ, paradysum custodire, propitiatorio præesse &c.* Atqui nihil horum defuit IOSEPHO, qui MARIAM divinorum mysteriorum secretariam, ut eam Ignatius appellat, verèque voluptatis hortum, ac propitiatorium audivit, custodivit, ac rexit. 9. *Seraphim est, ardere divi-*

divini amoris igne, aliosque accendere. Atqui nemo eo arsit magis & accendit alios, quam IOSEPHVS & MARIA assidue coram IESV clamantes. *Sanctus, Sanctus, Sanctus.* Isa. 6. v. 3.

ELOGIVM LXXII.

IOSEPH

Major omnibus sanctis Deiparâ minoribus.

SI quis animo ab affectibus libero accedit, ad consideranda ea, quæ pro elogiô hâc comentaturus sum, nã ego canere triumphum ante victoriam, quam spe præcipio, possum. Habeo enim testes non pauciores novem, omni exceptione maiores, quos tibi ritè censos & approbatos produco. Ac primus est Gerson Cancellarius Gallix notissimus, in serm. de Nat. consid. 4 ante medium, ubi post multa profectò, inquit, si non mentiebatur IESVS qui ait, *Vbi ego sum, illic & minister meus erit, ille* (de IOSEPHO loquitur) *proximior videtur collocandus in cœlis, qui in ministerio fuit vicinior, obsequetior atq; fidelior, post Mariam inventus in terris* 2. Bernardinus de Bust. part. 4. Marial. serm. 12. ex quibus inquit, patet, quod nullus in cœlis est maior S. IOSEPHO, post beatam Virginem benedictam 3. S. Gertrudis in lib. re vl. suarum, cum illæ quæ diuinum officium in choro decantabant, S. IOSEPHI nomen pronuntiassent, fatetur, vidisse se, *sanctos omnes in cœlô capita*

ei, honoris causa submisisse, oculis in se mutuò cōn-
 versis. magnaque lætitiæ signa edidisse. 4. Sua-
 rez. in 3. p. q. 29. Disp. 8. § 2. Non existimo, inquit, esse
 temerarium, neque improbabile, sed pium potius & veri-
 simile, si quis opinetur, sanctum IOSEPHVM reliquos
 omnes in gratiâ & beatitudine antecellere, quia in scri-
 ptura nihil est, quod repugnet, neque in Patribus aliquid
 reperio; &c. 5. Carthagen. lib. 18. Homil. ult.
 fol. mihi 521. sicut, inquit, Humanitas Christi Domini eò
 abundantior gratiam, & gloriam obtinuit, quò pro-
 pinquior fuit verbo divino, & deinde B. Virgo, qua proxi-
 ma fuit filio, ita prudenter & pie existimamus sanctum
 IOSEPHVM, quasi tertium locum in abundantia gra-
 tiæ & gloriæ obtinuisse, quia post Virginem propinquissime
 attigit Christum, familiariusq; tractavit, atq; singularissi-
 mam coniunctionem cum ipso per multos annos habuit.
 6. Gratianus in vita lib. 4. cap. 1. in fine si quis in-
 quit in cœlò cōversari cum S Paulo velit, alio cogitationes
 suas non convertat, quam ad cœlestem Hierusalem, & ad
 domum IOSEPHI, ubi IESVM & MARIAM, itém-
 que Angelorum mania omnia, & virtutes sanctorum in
 huius Angelici viri corde inclusa reperiet Et hoc ip-
 sum paulò antè pluribus ostendit, probans IO-
 SEPHVM esse in gradu eminenti simul Patriar-
 cham, Præcursores, Evangelistam, Martyrè, Con-
 fessorem, Virginem, Coniugem. 7. Cornelius
 à Lapid. in Matth. mihi f. 47. Vna inquit, fuit in terris
 æguissima, imò cœlestis, & divina familia, in qua pater
 familiæ, ideoq; præses & rector erat IOSEPH: Mater
 familias, B. Virgo: Filius verò, Christus. In hac igitur tres
 sum-

summa & excellentissima totius orbis persona erant: prima Christus utpote Deus & homo: secunda, Deipara Virgo Christo coniunctissima, quasi Mater naturalis, tertia IOSEPH, quasi pater Christi matrimonialis. 8. Franciscus de sales in lib. Sac. Dissertat O! *quantus inquit est sanctus IOSEPHVS; neq̃, enim solum est patriarcha, sed Patriarcharum Coryphaeus, non est simplex confessor, sed confessore maior; in eius confessione clauduntur dignitates praesulum, generosa mens Martyrum, sanctorumq̃, reliquorum omnium.* 9. Paulus de Barry in almi. piet. cap. 8. *admodum verisimile est, inquit, IOSEPHVM sanctiorem esse, aliosq̃, sanctos omnes antecedentem, proximum post B. Virginem sponsam suam locum obtinere: qui etiam veritatem hanc saepius alijs in locis inculcat. Neque ego jam dubito lectorem meum, licet fortè ignarum, aut animi impetu abruptum transire ad partes nostras. Qui etiam probationes hinc, & ex alibi dictis eruet digna elogio praesenti. Eas certè ego aliam ob causam non repeto, quàm, ne repetitione mea cuiquam molestus sim.*

ELOGIVM LXXIII.

IOSEPH

Similis MARIAE Virgineæ Vxori suæ.

Postquam IOSEPHVS virtute ac gloriâ Sanctos omnes MARIA vxore suâ minores transcendit, reliquum nunc est, vt disquiram, an, quantumque Eidem similis sit, Vbi se mihi initio statim.

statim offerunt Gerson Cancellarius, & S. Bernardinus Senensis; quorum ille in Serm. de Nat. B. *Beatissimus IOSEPH*, inquit, *fuit super omnes homines puros, similis Virgini gloriosa.* Hic verò in Serm. de S. IOSEPH. *Erat*, inquit, *factus ad similitudinem Virginis Sponsæ suæ.* At inde, ut patet, nouarum surgit adorea laudum haud parum pretiosa. Quæ enim inter se similia sunt, quale est unum, tale est & alterum. Atqui MARIA, cui IOSEPH ponitur similis esse, laudibus omnibus humanis superior est. Est ergo etiam IOSEPH illis omnibus superior, in quantum eidem similis est. At est similis corpore, moribus, ac vitæ sanctitate, quemadmodum inter alios egregiè ostendunt Carthag. lib. 4. Hom. 7. & Barry cap. 2. Verum ego alieno ductu, pedibus verò meis incedere malo. Probantur igitur singula.

Ac 1. probò IOSEPHVM MARIE similè esse. 1. Quæ sunt eadem uni tertio, sunt eadem inter se. Atqui tam MARIA quàm IOSEPHVS est similis IESV. Ergo MARIA & IOSEPHVS sunt etiam inter se similes. Minor probatur de IOSEPHO; nam de MARIA per se constat; quia Gerson Cancellarius de IOSEPHO; *Facies*, inquit, *IESV erat similis faciei IOSEPHI.* Atqui IESVS est Psal. 44. v. 3. *Speciosus forma præ filiis hominum.* Rectè igitur subsumitur à Barry, IOSEPHVM quoque præ alijs fuisse speciosum formâ. Sed de hoc plura proximè dicemus. 2. Quò Matrimonium aliquod perfectius est, eò magis convenit Virum & uxorem esse similes inter se. Ideoque Deus Gen. 2.

v. 18. *Faciamus, inquit, ei adiutorium simile sibi.* Atqui Matrimonium inter IOSEPHVM & MARIAM est omnium perfectissimum; & quidem ab ipso Deo inde incarnando, delectu inter infinitos possibiles homines instituto, dispositum. Ergo IOSEPHVS & MARIA fuerunt maximè similes inter se. 3. Eà similitudine inter se & cum IESV similes isti erant, quæ fecit, ut Dæmones minus cognoscerent mysterium Incarnationis, utque Iudæi, adulterij infamiâ minus aspergere eosdem possent. Atqui hoc utrumque similitudo corporum aptissimè præstabat. Ergo.

Probatur 2. IOSEPHVM esse moribus similem MARIÆ. Et 1. quia moribus similes esse decet eos, qui sūt similes officio, quod gerūt. Atqui IOSEPH & MARIA sunt similes officio eo solo, quod matrè à patre distinguit, excepto. Ergo moribus quoque similes sunt. Minor inductione constat; quia utrorūq; officium est cum IESV, invicè, & cum Angelis conversari, &c. 2. Quia similitudo morum est conformatio morum. Atqui, ut docet S. Thom. quodlib. 10. a. 10. in c. & ad 2. *quilibet debet conformari moribus eorum, inter quos conversatur, nisi sint contra Deum.* Ergo IOSEPHVS debuit esse moribus similis MARIÆ; & consequenter re ipsa fuit. Atqui MARIÆ mores tria habebant, indolem blandam, vultum serenum, & modestiam Virgineam. Ergo hæc quoque habuit IOSEPHVS.

Probatur 3. Eundem esse similem MARIÆ sanctitate vitæ. 1. Quia hanc exigit summus amor Viri

&c

& vxoris, quò IOSEPH & MARIA vnuebatur, quò ad animà. Ideoq; sepe cit. S. Bernardin⁹, quomodo, inquit, cogitare potest mens discreta, quòd Spiritus S. tantà unione, coniugij scilicet, uniret menti tantà Virginis aliquà animam, nisi ei virtutum operatione simillimam? unde credo, IOSEPH fuisse mundissimum in Virginitate, profundissimum in humilitate, ardentissimum in charitate, altissimum in contemplatione, ut esset adiutorium simile Virgini. 2 Quia, scripturà teste, eadem egère, eadem passi sunt, & eadem accepere beneficia à Deo. Ergo prudenter præsumi potest esse similes vitæ sanctitate. Hic antecedens probarunt locò nostrò. Gerson in serm. de Nat. B. V. & Carthag. lib. 4. ab Hom. 7. & deinceps; probarique ulterius posset, inductione virtutum. Verum de his infra agatur.

ELOGIVM LXXIV.

IOSEPH

Similis IESV Filio suo.

Implicat, inquit, IOSEPHVM esse similem Deo. At IESVS filius IOSEPH Deus est. Ergo implicat IOSEPHVM esse similem IESV suo filio. Maior probatur, quia implicat similitudo, ubi implicat proportio. Atqui implicat proportio inter IOSEPHVM & DEVM. Ergo inter IOSEPHVM & Deum implicat similitudo. Minor constat quia Isaia 14. v. 14. non nisi impro-

bissi.

bissimis tribuitur illa vox. *Ascendam super altitudinem nubium, similis ero altissimo.* Atqui similitudo cū IESV tribuitur IOSEPHO in testimonium meritiſſimæ laudis. 2. quia, ut axioma habet, finiti ad infinitū nulla est proportio. Atqui Deus est infinitus, IOSEPHVS finitus. Ergo nulla est proportio inter IOSEPHVM & Deum. At anne propterea jubeam auferri præfixum honoris titulum? Minime gentium: non enim illum amor veri ignorans, sed Veritas ipsa æterna, IESVS, inquam, jam olim dum viveret nobiscum in carne mortali coram Discipulis imposuit, dicens, *inter natos mulierum nemo mihi similior fuit formâ corporis, moribus, conditione Vita, patiendi ardore, quam IOSEPHVS.* Id quod ex orientali historia refert Gratianus lib. 2. cap. 4. de cuius auctoritate supra diximus. Accedit autem etiam autoritas Iustini in dial. contra Tryphonem, Bernardini Sen. sermonede sancto. Gersonis Cancellarij proxime relata, Isolani. Bernardini de Bult. & Carthag. l. 18. Hom. ult. ut proinde recta ad Rationes abire possim, quibus etsi auctores mihi essent nulli, probabilis tamen reddatur assertio hæc, nepe IOSEPHVM esse similē IESV filio suo.

Igitur 1. ex quo quis pluribus accedit modis ad veram filiationis rationem, quæ originaliter in Verbo est, eò est similior filio Dei. Atqui IOSEPH pluribus modis accedit ad filiationem Verbi, quod IESVS est, ergo est similior illi. Maior est S. Thom. 1. p. q. 33. a. 3. in corp. Minor indidem probatur, quia quinque modis accessit IOSEPH ad filiationem

nem

nem. scilicet. 1. Per *similitudinem naturæ*, per amorem & cognitionem perfectissimè operantis, solâ Virgine exceptâ. 2. Per *similitudinem vestigij* imitantis vitæ genere mores Dei supra alias omnes, post eandem Virginem, creaturas. 3. per *similitudinem imaginis* continuâ contemplatione itidem præ aliis omnibus aptissime adumbrantis ipsam Dei imaginem. 4. per *similitudinem gratiæ*, sola Virginis gratia minoris, iam inde à primo suo ortu, copiosissimè ex Deo gratiarum abyssu haustæ. 5. Per *similitudinem gloriæ*, in resurrectione, Assumptione, ac cælorum regno proximè gloriam Christi participantis. Quæ alij uberius expendere poterunt. 2. Quo filius aliquis est similior patri, eo certius putatur talis patris, & non alterius genuinus esse filius. Atqui IESVS certissimè putatus est genuinus esse filius IOSEPHI à iudeis. Dicitur enim Luc. c. 3. v. 23. *Et ipse IESVS erat incipiens quasi annorum triginta, ut putabatur filius IOSEPH & Matth. 13. v. 55. Nonne hic est fabri filius.?* 3. In IOSEPHO & per IOSEPHVM præcipuè impleta sunt illa Apost. ad Philip. 2. v. 6. Verba. *Christus IESVS cum in forma Dei esset, non rapinam arbitratus est, esse se æqualem Deo: Sed semetipsum exinanivit formam servi accipiens in similitudinem hominum factus, & habitu inventus ut homo*, perinde enim est ac si diceretur; IESVS quia in forma, sive natura Dei erat, non fecit, nec se facere rapinam arbitratus est, esse sibi æqualia Deo patri sed semetipsum exinanivit, hoc est, fecit ex Domino servum, ex Deo hominem, ex Creatore creaturam.

ram, & poenalitates suscipiens in se, fabrilem quoque artem, quæ præcipue servorum est, sub Magisterio IOSEPHI per annos bene multos proficiens, in similitudinem substantialem hominum duorum MARIAE & IOSEPHI factus, & habitu, hoc est, corpore ac proprietatibus inventus, nullo nostro merito, sed ex sola misericordia Dei, ut homo IOSEPH, verè homo & rationalis, sine peccato, ignorantia, tarditate, tepiditate, &c. Est ergo IOSEPH similis filio suo.

ELOGIUM LXXV. IOSEPH

Similis Deo.

IN primis de Fide est, omnem hominem esse similem Deo, Genes. enim 1. v. 26. *Faciamus, inquit, Deus hominem ad imaginem & similitudinem nostram.* Et. v. 27. *Creavit Deus hominem ad imaginem suam: ad imaginem Dei creavit illum, masculum & feminam creavit eos.* Atqui juxta Dialecticos, quod dicitur de omni, dicitur & de quovis contentò sub omni. Continetur autem etiam IOSEPH sub omni, subintellige homine. Est ergo ipse quoque imago Dei, adeoque similis Deo. Atqui imago est similitudo alterius ab ipso procedens aliquò modò. Homo ergo, & IOSEPHVS, qui sunt imago Dei, debent 1. esse similitudo Dei. Atqui non sunt similitudo Dei in natura specifica. Ergo tantum sunt similitudo

P

in ali-

in aliquo specialiter repræsentante naturam specificam. 2. Debent esse similitudo procedens à Deo. De hoc autem nemo dubitat; quia sunt effectus physici à Deo per creationem procedentes; ut ipsemet Deus cit. loco testatur. Sed de conditione primâ maius est apud plerosque dubium; quod deponere me, licet inde non plus IOSEPHO, quàm exilibet alteri accedat, necessarium duco; subinde tamen adiungam modum etiam supernaturalis cuiusdam similitudinis IOSEPHO in paucis convenientis. Sic igitur ad prius quod attinet, est IOSEPHVS, & universim homo, teste Cornel. in 1. Gen. imago naturalis Dei decem modis 1. quòd hominis anima sit spiritualis & individua substantia. 2. Quòd sit immortalis & æterna. 3. Quòd prædita sit memoriâ, intellectu, & voluntate, tanquam Trinitas creata increatam aptissimè exprimens. 4. Quòd sit libera libertate contrarietatis & contradictionis. 5. Quòd cunctis animalibus sua potestate præsit ac dominetur. 6. Quòd sit capax omnis honestatis, sapientiæ, ac bonitatis. 7. Quòd sit finis quodammodo omnium creatorum & quasi omnipotens instar Dei. 8. Quòd omnia intelligat & saltem eminenter contineat in se, omnes gradus entis. 9. Quòd sit tota in totò, & tota in qualibet parte. 10. Quòd intelligendo se producat in mente suâ verbū intelligibile suiipsius expressivum, sibiq; simile: atque inde in voluntate eiusdem amorem producat. In quo quidem ratio imaginis naturalis Dei præcipuè elucet. Vtcrius autem iam ad alteram

ram imaginem, quæ supernaturalis est, gradum promoveo. Ea verò duplex est, gratiæ una, & alia gloriæ. Sed de gratiâ superius abundè egi, cum eâ IOSEPHVM plenum fuisse, probavi. Nunc de gloriâ superest, ut dicam, non quidem eâ quam modò obtinet in cœlis, quæ hoc ipso, quod verisimilia tibi nostra sint, uni cedit Virginis gloriæ; sed de illâ, quâ inter nos vivens speciali Numinis favore, ad tempus eidem placitû prælibavit; quæq; à cœlesti aliter non differt, quàm quòd illa habeat se per modû transiuntis, hæc cœlestis verò, se per modum habitûs, habeat. Igitur IOSEPH mihi adhuc in suo mortali corpore videtur pervenisse ad supremæ similitudinis cum Deo gradum. Et quidem, per claram divinæ essentiæ visionem tradunt Stemma Marianum Germanicè impressum ad diem 19, Martij. & Gratian. lib. 3. c. 5. & l. 5. tit. 3. quorum postremus affert verba S. Brigitt. Rev. l. 6. c. 58. Vbi sic, inquit, obediens erat IESVS, ut cum IOSEPH casu diceret ei, fac hoc vel illud, statim ipse faceret quia sic occultabat Deitatis suæ potentiam, ut nisi à me; & quandoque à IOSEPH sciri non posset, qui vidimus lumen admirabile multoties circumfulsisse eum, & Angelicas voces cantantes super eum audivimus.

Verum hæc revelatio non videtur præbere sufficiens argumentum assentiendi dictis. Alio proinde, ut confugiam, necesse est. Nempe 1. clara Dei visio, ut volunt gravissimi Doctores, multis alijs Viatoribus minùs sanctis, quàm sit IOSEPHVS speciali Dei beneficentiâ ad breve

concessa tempus est. Non est ergo hæc ipsa neganda IOSEPHO. 2. Visio ista videtur esse præmium extraordinarij amoris, quò fertur quis in Deum. At nullibi amor ardentior in Deum fuit, quàm in paterno corde IOSEPHI. 3. Visionem hanc ut IOSEPHO impetret. B. Virgo & concedat IESVS maximè videntur obligati, saltem ex decoro. Possumus ergo dicere, de facto illi hanc datam esse.

ELOGIUM LXXVI.

IOSEPH

Similis Deo Patri ingenito.

Patris nomen Deo multipliciter competit. ut 1. Creatione, quâ nos ex nihilo ad imaginem & similitudinem suam, hoc est, ad simillimam imaginem creavit. 2. Redemptione, quâ nos per Christi temporalem mortem liberavit à morte æternâ. 3. Regeneratione quâ nos per baptismum à peccato originali, per quod mortui eramus, in novam gratiæ vitam regeneravit. 4. Adoptione, quâ nos sibi in filios per gratiam adoptavit. 5. Vocatione, quâ nos cœlestis suæ gloriæ hæredes propter opera nostra absolutè prævisa instituit. Verùm hæc quinque Paternitatum genera communia sunt omnibus tribus divinis personis. Redemptione exceptâ, quatenus significat actiones talis suppositi ad salvandos homines missi. Vt enim habet axioma Theologicum; opera omnia ad extra com-

comunia sunt toti Trinitati. Iis ergo paternitatibus omissis, strictior aliqua solique primæ Personæ propria inquirenda est. Hæc autem est, prima eius constitutiva ratio, prima inquam, tum negativè, quia nulla est prius; tum positivè, quia alias omnes proprietates, etiâ innascibilitatē & spirationem activam antecedit. Quæ in meâ sententiâ duo significat, principium scilicet generativum, atque ipsam actualement generationē, quatenus dicit actualement intellectionem essentia divina; attributorum omnium, & personalitatum, ac demum creaturarum possibilium, ut possibiles sunt, seclusis actualibus, quatenus tales sunt. Ita communis Granad. Amici & Tanneri. Sed hæc aliam ob causam non affero, nisi ut fundamentum solidum ponam, cui præsens IOSEPHI Elogium tutò insitât.

Igitur ex dictis quatuor habeo mihi, ac foro meo, non parum idoneæ. 1. est Patrem cælestem esse Patrem omnium maximum, 2. Eundem generare sine carnis interventu, sine divisione sui, sine temporis mensurâ. 3. Eundem intelligendo generare, & ideo, quia semper intelligit, semper generare. 4. Huius intellectionis tam fecundæ obiectum esse Deum, & divina, terminum verò formaliter procedentem esse Verbum unigenitum, sive Filium Dei. Atqui, subsumo ego, habet per participationem, hoc est, modo quo creaturam habere decet, IOSEPH hæc ipsa quatuor. Est, ergo ipse, quod intende-
bam, Similis Ingenito cælesti Patri.

Neq; hic de Maiore se mihi quisquam opponet.

P 3

Probo

Probo ergo minorem, quæ sola probatione eget. Inprimis IOSEPH est omnium Patrum inter Personas creatas maximus. Si enim, vrex Ioanne Damasc. Cant. 3. in Nat. B. V. ipsum esse virum MARIE prorsus ineffabile est, & nihil præterea dici potest, quantum erit esse PATREM IESV. Iam verò nonne idem est Pater sine commercio carnis? Nonne idem semper, qui fuit, mansit, etiam suscepto è Virgineâ vxore filio? nonne, quod concepto, natoq; initio præstitit, porro per totam vitam præstare perrexit, sine omni temporis, nisi quò vita circumscripta fuit, mensurâ.

Sed neque tertium defuit IOSEPHO. Scenim religiosissimæ mentis penetralia ingrediar, quæ alia desideria iam inde à primâ sanctificatione, quæ vsum rationis ipsi ac gratiam attulit, audiebantur, quàm de Messix aduentu; quem cognoscere, credere, velle vnicè laborabat, ijs subinde Isa. 45. v. 8. vocibus vtens: *Rorate cæli desuper, & nubes pluant iustum. Aperiatur terra, & germinet Saluatorem.* Vbi actus voluntatis intellectus actibus, & hi illis, prout ferebat ardor, permiscebantur. Sed tamen actus intellectus physicè præstant & præsupponuntur actibus voluntatis, & ad naturam hominis propius accedunt, & vim dirigendi præcipuè exercent; ideo ergo generationi intentionali, siue intellectiōni actuali Incarnationis Dominicæ iugiter intēdit, iuxta Luc. 2. v. 33. *Et erat Pater eius & Mater, mirantes super his, quæ dicebantur de illo.*

Tandem verò tum obiectum mentis IOSEPHI,

PHI, tum terminus, quid, quæso, aliud est, quàm IESVS verbò intellectuali expressus, itémque alia quæ ducunt ad IESVM? Nihil ibi secundum quod cogitatur, mortale est, nihil præsens, præteritum & futurum. Æternitati vivit IOSEPHVS noster. Ideo à contingentiis præscindit tanquam à Fine, ut eò facilius ad principium æternitatis pertingat.

ELOGIUM LXXVII.

IOSEPH

Similis Filio Dei Vnigenito.

V T idem sit Filius eius, cuius est Pater, tam parùm implicat, quàm parùm implicat, eandem esse Filiam eius, cuius est Mater. At est de facto MARIA filia eius, cuius est Mater. Est ergo IOSEPH quoque Filius eius, cuius est Pater. Atqui MARIA est mater Filij Dei vnigeniti, & IOSEPH est Pater eius. Si ergo MARIA est Filia Filij Dei vnigeniti, IOSEPH quoque eius Filius est. Atqui Filius Dei, utiq; similis est Filio Dei. Si ergo ostendi possit, IOSEPHVM esse Filium Dei, & quidem interiore aliquo Filiationis genere, quàm sint vlli alij homines, consequens erit ipsum esse omniùm simillimùm Vnigenito Filio Dei; quod haud dubiè gloriosissimùm huic Sancto nostro est. At id probari potest euidenter ex Sacris Litteris, & Patribus docentibus hominem iustum esse Filium Dei. Eligo tamen vnum tantum alterumve locum, ut in 1. Ioan. 3. v. 1. *Videte, qualem charitatem dedit nobis Pater, ut Filij*

PHI incarnatum curam plus quam paternam super hunc Patrem suum exercuit. 3. Amor Dei erga IOSEPH tantus fuit, quanta fuit gratia, quâ ipsum perfudit; siue deinde amor & gratia idem sint, siue diuersa, quod probabilius est. Vide autem ipsemet effectus septem gratiæ apud Cornel. à Lap. in 2. Petri c. 1. v. 4. Et ego infra Elog. 85. de amore IOSEPHI in Deum, cui directè correspondet amor Dei in IOSEPHVM, ex proposito agam. 4. Iuxta 2. Pet. 1. per cognitionem Dei, qui vocauit IOSEPH propriâ gloriâ & virtute, per quam maxima & pretiosa nobis promissa donauit, idem IOSEPH effectus est speciali modo diuinæ consors naturæ, scilicet non accidentaliter tantum & per gratiam sibi inhærentem, sed substantialiter & per naturam diuinam sub ratione Auctoris gratiæ ipsi peculiariter communicatam, quâ super omnes in filium, & hæredem assumitur, & tanquam pulcherrimum aliquod templum consecratur, ac quodammodo deificatur, Ita Suar. l. 12. de Deo vno & trino cap. 5. n. 11. & 12. & idem Cornel. in 2. Pet. 1. v. 4. à f. 360. 5. IOSEPH, instar Dei virtute suâ factus est præ omnibus alijs, quantum nempe homo capax est, & decorum permittit, immutabilis, imperturbabilis, impeccabilis, iustus, misericors, constans, omniscius, patiens, rectus, fortis, longanimis, &c. Ac 6. Idem omnium primus promissam hereditatem adiit cum Christo, cum quo in cælum vnâ cum corpore assumptum esse Elog. 61. dixi. Est igitur IOSEPHVS Filius Dei, & quidem

primus siue primogenitus ex fratribus , & eatenus
 Filio Dei Vnigenito simillimus, hoc vno discrimi-
 ne, quod ipse nonnisi adoptivus sit, cùm Filius Dei
 sit Filius naturalis Dei.

ELOGIVM LXXVIII.

IOSEPH

Similis Spiritui Sancto.

Veritatem Elogij huius aperit nobis notissi-
 mum axioma : Similis simili gaudet. Si ergo
 IOSEPHVS similis est Spiritui S. simili gau-
 det, & si simili gaudet, similis est Spiritui S. Sed
 primum ex his probandum est prius : an quòd similis
 sit? an verò quòd simili gaudeat? Et ego quidem
 posterius eligo; quia nihil est causa sui ipsius. Dein
 verò probo & prius, nempe IOSEPHVM esse simi-
 lem Spiritui S. Atqui id, per quod probo esse simi-
 lem, debet esse hoc ipsum, quòd simili gaudeat, hoc
 est illo, quò gaudet Spiritus S. Hoc ipsum ergo,
 quòd simili gaudeat, probandum est. At ego idem
 inductione, quâ nulla videtur probatio efficacior
 esse posse, sic probo.

1. Est IOSEPH noster, etiam ipse, habens de
 Spiritu S. Ratio sufficiens est. Quia iustus est. Ut
 enim ad Rom. 5. v. 5. dicitur; *Charitas Dei diffusa est
 in cordibus nostris per Spiritum S. qui datus est nobis.*

2. Est quodam modo, ipse quoque Spiritus S.
 add. ob varias Rationes. 1. Quia, quod natum est

ex

ex Spiritu, Spiritus est. Ioan. 3. v. 6. Ergo quod natum est ex Spiritu S. quodam modo Spiritus S. est.

2. Quia vrex Trid. Sess. 6. c. 7. ostendit Suar. præc. eleg. cit. adoptatur iustus à Deo dupliciter; accidentaliter, & substantialiter. Est autem adoptionis accidentalis causa formalis ipsa gratia; at verò substantialis adoptionis causa formalis est ipse Spiritus S. animam iusti mediante gratiâ tanquam vinculo morali inhabitans.

3. Quia iustus, per hoc, quòd iustificetur, constituitur in summo gradu amicitiae diuinæ. Atqui hoc non fit, nisi per præsentiam Amici amati. Debet ergo Spiritus S. esse in eo, qui iustificatur.

4. Quia specialiter nobis promittitur Spiritus S. quia Ioan. 14. v. 16. *Rogabo Patrem, & alium Paraclitum dabit vobis, ut maneat vobiscum in æternum.* Et 26. *Paraclitus autem Spiritus S. quem mittet Pater in nomine meo, &c. v. 17, apud vos manebit, & apud vos erit.* Atqui, quò quis iustior est, eò gratia ipsi intensior inhæret. Ergo etiam, hoc ipso illi, magis inhæret Spiritus S. siue charitas diffusa in cordibus nostris. Vide hist. Lucie V. & M. & Corn. à Lap. in 2. Pet. c. 1. cuius doctrinam ut meam recipio à f. 360.

3. Spiritus S. est amor, non solum essentialiter, quo modo etiam prima, & secunda persona est, sed etiam notionaliter; cui tanquam formali origini appropriatur, tanquam radius Soli, omnis amor creatus. At est hic amor in IOSEPHO maximus, tum erga ipsum Spiritum S. tum erga reliquas personas, ac MARIAM Spiritus S. Sponsam, IESV Filij

lij matrem, æterni Patris filiam.

4. Sicut Spiritus S. tribus modis paraclitus est, ita est suo modo & IOSEPH. Nempe vterque est 1. aduocatus. 2. exhortator. 3. consolator; quæ tria nomen paracliti significat, iuxta græcum etymon.

5. Tam Spiritus S. quam IOSEPH est Sponsus MAIRÆ Virginis. Ac de IOSEPHO dubium non est. Is enim, cui desponsata est MARIA, vti que Sponsus est. Atqui Luc. 1. v. 27. *Missus est Angelus Gabriel ad Virginem desponsatam viro, cui nomen erat IOSEPH*, Similiter verò de Spiritu S. legitur ibid. v. 35. *Spiritus S. superueniet in te*. Et Matth. 1. v. 18. *Inuenta est in utero habens de Spiritu S. &c.*

6. Spiritus S. donum est 1. essentialiter; Potest enim donari ab aliquo, & ab aliquo haberi. 2. per appropriationem; quia est datio irreddibilis, siue per merè gratuita. 3. notionaliter; quia solus per modum doni vi processionis mittitur. At his simile per Dei & suum Amorem habet etiam IOSEPH: Cum autem ex donis Spiritus S. ad extra maximè conspicuum sit donum linguarum, idem eà fiducia, quæ Cornelius in Acta c. 1. fol. 77. ex Suárez dicit, id communicatum esse Mariæ in aduentu trium Regum, idem verisimile est, etiam

IOSEPHO, tunc, & in Ægypto, à Spiritu S. fuisse collatum.

ELOGIVM LXXIX.

IOSEPH

Cum IESV & MARIA Trinitas creata.

EX dictis liquet, IOSEPH vnum eundemq; esse intentionaliter & symbolicè Trinitatem increatam. Quod enim simile est alteri, tale est in ratione similis, quale est alterum. Atqui vt dixi, est vnus idemque IOSEPHVS similis Patri Ingenito, Filio Vnigenito, & Spiritui S. Est ergo intentionaliter ac symbolicè Trinitas increata.

Vbi mihi vtique nemo opponet infinitam distantiam Entis finiti ab infinito, creati ab increato, quia similitudo hæc non est physica, & in essendo, sed tantum moralis, & in significando, ac imitando, quâ ratione dixit Deus psal. 81. v. 6. *Ego dixi, Dy esis. & filij excelsi omnes*, Et Basil. hom. de Spiritu & *Huius gratiâ, inquit, Deus est, quisq; Sanctorum.*

Pace igitur legentium hoc licebit mihi agere, quod ago, & ad stabiliendas præsentis laudes transire, quas ante me iam pridem IOSEPHO conciliauere Cornel. à Lap. in 1. Matth. fol. 53. Carthag. lib. 4. Hom. 5. & 8. Barry cap. 3. Quibus facem, vt in multis alijs, dudum ante Gerson Cancell. prætulit, dum in Serm. de Nat. B.V. coram toto Constantiensi Concilio exclamauit, *Cuperem, vt mihi verba suppeterent ad explicandum tantum mysterium, tam admirandam, venerandamq; Trinitatem IESVS, MARIA, & IOSEPH.* Et ego quidem hæc verba etiam
vt me-

vt mea, imò omnium hominum collectivè ac distributivè accipiendorū, suscipi volo. Eoq; sensu Ioannes c. 21. in f. dixit: *Sunt autem & alia multa, quæ fecit IESVS*, (addo ego, quæ fecit MARIA; quæ fecit IOSEPH) quæ si scribantur per singula, nec ipsum arbitror mundum capere posse eos, qui scribendi sunt, libros, pares laudibus Trinitati isti ex IESV, MARIA, & IOSEPHO conflaturæ, debitis. Hanc ergo Trinitatem quidni & ego pro viribus exornem? At exornare facilius non possum, quam si quæ sunt in Trinitate increata, ostendam suo modo in hac Creatà esse.

Igitur IESVS MARIA IOSEPH sunt 1. Personæ sanctissimæ totius Mundi. 2. Canonizaturæ sunt omnes & singulæ à Spiritu S. eo ordine, quem Matth. c. 1. habet. 3. Vnum sunt vnitæ indissolubilis matrimonij, & quidem spiritualiter consummati. Ad hoc namque spectat, Vir, Mulier, & Proles legitimè ex muliere suscepta. Atqui Vir est IOSEPH, MARIA mulier, IESVS proles legitima. 4. In hac Vnitæ Trium istarum Personarum, IOSEPH præcipuè Patrem æternum spiritualiter generantem repræsentat; MARIA verò Spiritum S. quia est sanctissima, & quia concepit de Spiritu S. ac demum IESVS seipsum, hoc est, Filium Dei. In quo Cornelio nostro præ alijs antè citatis qui Matrem cum Patre, & IOSEPH cum Spiritu S. componunt, adhæreo. 5. Hic quoque est Auctor Salutis IESVS, MARIA mediatrix, IOSEPH eiusdem coadiutor. 6. Sicut Æternus Pater

Pater Verbum generat per intellectionem, & cum Verbo tanquam vnum adæquatum principium, per amorem, Spiritum S. spirat, ita personarum istarum vnica hæc vita & opus est, intelligere, manifestare, amare, & amorem propagare. 7. Etiam MARIA quasi stella maris, & aurora con-
furgens peperit Christum, *qui est candor lucis æterna.* Sap. 7. v. 25. & *Lumen ad revelationem gentium,* Luc. 2. v. 32. Atqui hoc principaliter fit in æternâ generatione, in qua Verbum procedit tanquam Lumen de Lumine, Deus verus de Deo verô. 8. Quem-
admodum Ioan. 1. c. 5. v. 7. dicitur: *Tres sunt, qui testimonium dant in cælo, Pater, Verbum, & Spiritus S.* Et hi tres unum sunt; ita IESVS, MARIA, & IOSEPH, in eodem sunt tres personæ omnibus maiores, quæ testimonium nobilissimum de Tri-
nitate increata perhibent, colligatæ inuicem ar-
ctissimæ vnitatis vinculo. 9. Etiam hæc tria no-
mina celebritatem consecuta sunt proximam tribus
diuinis nominibus; ideoque iam passim cani audi-
mus.

I E S V S	{	Hæc tria nomina
M A R I A		Bona sunt omnia
I O S E P H		Et mundi lumina,
		Et cæli limina.



ELO

ELOGIVM LXXX.

IOSEPH

Præcipuus Mariæ imitator.

SI mihi ingredi liceat IOSEPHI membra ac
 animum, dicam fidenter, IOSEPHI membra
 ac animum esse membra ac animum MARIE.
 Vti enim inter nos quotidie vsus fert, vt si quis
 alium magni nominis hominem constituat exem-
 plar sui, quod imitetur, eâ imitatione aliquanto
 tempore continuatâ, in eundem quodammodo to-
 tus immigret, ita IOSEPHVS noster, per tot an-
 norum curricula, intuens in MARIAM, eique se
 assidue conformans, videtur simili modo MA-
 RIAM induisse totus, & pro MARIA agnosci cre-
 didique posse. Vt enim S. Augustinus tr 2. in ep. 1.
 Ioan. ait, *Talis vnusquisq; est, qualis est eius dilectio.*
Terram diligit, terra eris; Deum diligit, Deus eris.
 Rursum autem, talis est alicuius dilectio, qualis
 est imitatio eius. Est autem imitatio IOSEPHI,
 MARIAM tanto tempore, tantâque curâ respici-
 entis, summa. Est ergo etiam dilectio eius summa.
 Ac proinde ritè argumentari possum. Quod quis
 diligit, & imitatur, id quis est. Atqui IOSEPH dili-
 git & imitatur MARIAM. Ergo est IOSEPHVS
 MARIA. Probo autem minorem, non quidem
 quod diligit, hoc enim superfluum est, quia Vir est
 MARIE; sed quod imitetur illam. At hoc sic
 probo.

probo. Omnis artifex imitatur exemplar sibi propositum, à conductore suo. Atqui MARIA est exemplar propositum IOSEPHO ceu artifice, à conductore Deo, IOSEPHVS ergo imitatur MARIAM. Hic tu quidem mihi minorem negabis. At ego illam probo: quia ut S. Bernard. apud Salazar c. 38. *Arca, inquit, testamenti, sive tabernaculum, typum tenet Dei genitricis.* Quod ergo de tabernaculo dicitur, debet typicè de MARIA accipi. Atqui Exod. 25. v. 40. *Inspice, dicitur, & fac secundum exemplar, quod tibi in monte monstratum est.* Ergo MARIA quoque est tale exemplum monstratum IOSEPHO, tanquam alteri Moyse attracto assumptoque, in monte contemplationis, vitæq; cœlestis. Atqui exemplar est, ut docet S. Thom. de Ver, q. 8. a. 8, ad 2. *id, ad cuius imitationem aliquid fit, ex intentione agentis.* Nihil igitur deest ex parte obiecti ad imitationem necessarium.

Atqui, ut prosequar discursum neque ex parte IOSEPHI deest aliquid. Ipse namque sibi *Beseleel*, hoc est, *Vir in umbra Dei*, est, quem Deus cum proponeret tabernaculo suo, potiore iure commendare potuit illis Exod. 31. verbis, *implevi eum Spiritu Dei, & scientia in omni opere, ad excogitandum quidquid sabre fieri potest ex auro, & argento, & ære, marmore, & gemmis, & diversitate lignorum.*

Videamus autem in specie, quomodo ad exemplar Tabernaculi Mariani ipse animam suam in tabernaculum transformarit Dei viventis. Ac 1. Psal. 45. v. 5. *Sanctificavit tabernaculum suum altis-*

simus per universam vitam supra alios omnes mortales. 2. Psal. 18. v. 6. *In sole, sive ut LXX. legunt, soli, posuit tabernaculum suum, scilicet, quia solis instar in domo Dei, Ecclesia inquam, posuit; vel etiam, quia Christo soli Iustitiæ peculiariter deservivit.* 3. Ecclesiastic. 24. v. 12. *Qui creavit me, requievit in tabernaculo meo, simul corporaliter per Christum, & spiritualiter per gratiam iugiter continuatam.* 4. Psal. 83. v. 2. Inter tria summè dilecta tabernacula Domini virtutum annumerari meretur; de quibus maiori iure cum S. Petro Matth. 17. v. 4. dicere possumus. *Faciamus hîc tria tabernacula.* Tibi, mi IESU, unum; tibi, MARIA alterum; & tibi, IOSEPHË, tertium. Vel si id facere non possumus, vos ipsi nobis tabernaculi Vicem exhibete. 5. In hoc Iosephino tabernaculo itidem omnia per idoneam allegoriam sunt, quæ sunt in Mariano. Nam ligna setim, sunt mundities cordis; coccus bis tinctus, utraque charitas; purpura, mortificatio; byssus, castitas; hyacinthus, contemplatio rerum cœlestium; pili caprarum, pauperas; pelles arietum rubricatarum, obedientia ad usque Martyrium constans; oleum, misericordia; Thymiana, exemplum bonum; candelabra, doctrina sacra; mensa & propositio panum, Christus; velamentum, Fides; aureum Thuribulum, anima charitate flagrans; tabulæ testamenti, observantia legis; arca testamenti, MARIA; urna aurea, matrimonium cum illâ; manna, consolationes; Virga Aaron

Aaron, Virga IOSEPHI, etiam ipsa reflorescens.
Manet ergo, IOSEPHVM esse MARIE præcia-
puum imitatore, Vide Corn. in Exod. c. 29.

ELOGIVM LXXXI. IOSEPH.

Præcipuus IESV imitator.

Magna est semper imitantim gratia, non so-
lum si is, quem imitaris etiam ipse sit gra-
tus, sed etiam si invisus sit, ille in seipso spe-
ctatus. At negari non potest tantò gratiorem esse
nam imitationem, quæ utrumque coniungit, nempe
obiectum omnibus gratijs circumfufum, & con-
formitatem actus alieni idem obiectum plenè per-
fectèq; exprimentis. Coniunxerunt autem utrum-
que hoc S. Franciscus Seraphicus, S. Catharina
Senensis, S. Ioanna de Cruce, quinque SS. Christi
stigmatibus insignes. Coniunxit deinde Aposto-
lus Paulus, & qui eundem imitantur, plurimi alij,
quorum mihi voces identidem audire videor. *De
cetero nemo mihi molestus sit* interrogans cuius con-
ditionis sim; ego enim *stigmata Domini IESV in cor-
pore meo porto*, Ad Gal. 6. v. 17. Qui etiam ulte-
rius cum eodem Paulo progressi, *Christo*, inqui-
unt, *singulatim, confixi sumus cruci: vivimus autem,
iam non nos; vivit verò in nobis Christus*, Ad Gal. 2.
v. 19. Debent ergo, hi omnes & singuli imitato-
res Christi meritò gratissimi esse, tum propter Chri-

stum, quem nobis coram exhibent, tum propter ipsam imitationem prototypo suo tam aptè conformatam.

Sed non est mihi hic prætereundus S. IOSEPHVS, non solum primus, verum etiam præcipuus imitator IESV. Est is primus, quia primus Christo convixit, tempore antecedens alios omnes, qui longò post intervallò præeuntem secuti sunt.

Est idem præcipuus 1. quia *Mysterium Incarnationis Dominicæ, causasque eius, & exequendi modos omnes, intimè penetravit.*

2. Quia sciebat, se patrem esse, simul ac ferum Christi Regis Regum. *At Regis ad exemplum totus componitur orbis.* Imitantur verò persæpe etiam Patres filios suos, quantumvis parvulos, & quodammodo repuerascunt cum illis; ut proinde mirari debeat nemo, si etiam IOSEPH cum æternâ Sapientiâ incarnata quasi repuerascere velit.

3. Quia bene longo tempore intuitus est imitabile obiectum, & quidem directè, reflexè, refractè, indirectè, in luce, & cum umbris; scilicet directè in contemplatione; reflexè in meditatione; refractè in MARIA; indirectè, in operibus; in luce diei, noctisvè umbris, domi nempe ac foris, privatim ac publicè.

4. Quia ad ritè contuendum hoc obiectum nemo magis instructus fuit, atque ipse. Nam & obiectum fuit in debitâ distantia, & medium lumine fidei ac scientiæ experimentalis sufficienter illustratum, & oculus mentis à concupiscentiæ fomi-

fomite, peccatis, ac moribus inordinatis, perpur-
gatus.

5. Quia videndi subsidia externa ipse pluri-
ma habuit. Nam 1. MARIA Præcursores amore
præcurrens; *Ecce*, inquebat quotidie ad IOSE-
PHVM, *agnus Dei, qui tollit peccata mundi*, 2.
omnibus rebus clariores illustrationes applicuit
eius animo Deus. 3. Perspicilia quòque sufficie-
bat fræquens Angelorum alloquium, quo quid esse
potest, quod assequi homo non possit?

6. Quia neque ad imitandum quidquam esse
idoneum potest, quod IOSEPHO gratia non de-
derit. Nam 1. figere oculos, quantum collibi-
tum fuit in obiectum imitationi destinatum po-
ruit. Imo memini me legere usurpasse IOSE-
PHVM illas Patris æterni voces. *Sede à dextris*
meis, Psal. 109. v. 1. 2. Hoc obiectum nulla re
magis, quam regulâ gaudet, & amissi. At his co-
rere faber iste noster non potest, cui, pro amissi,
est intentio recta; pro regulâ, conscientia Deo in-
nitens. 3. Imitationis fructus maximus quoti-
die ob oculos illi ponitur. Allicítque 4. artificem,
ipsum supra omnes Narcissos amabile obiectum, &
& ostendit imitandi modum, ex Matth. 11. v. 29.
Tollite iugum meum supra vos, & discite à me, quia mi-
ris sum, & humilis corde; multisque alijs eiusmodi
doctrinis, quas cogitare pronius est, quam expli-
care. 5. Condiscipulam nactus est MARIAM
Matrem IESV eius imitandi peritissimam; quam
si vocem felicissimum illud ætatis nostræ instru-
mentum

mentum parallelogramma dictum, quô, perbrevispatio & labore, pictores propositas imagines imitantur, utique non erravero. Vfus est hoc instrumento Ioannes Baptista; multo autem sæpius & diutius IOSEPHVS. Quis ergo ipsum præcipuum IESV imitatore neget esse?

ELOGIVM LXXXII.

IOSEPH

Vnum quid cum IESV.

QUod hîc docebo, fateor didicisse me ex Gratiano S. Teresiæ primogenito Virô, ut Riberæ videtur, ac nobis, egregiè doctò ac piò. Sed forma tamen deerat, scholis apta ac templo, quam materiæ oblata inducere calamus meus vult. Igitur; quæ diversa sunt, unum esse non possunt, nisi mediante unione. At quis neget IESVM & IOSEPHVM diversos esse? utpote Deum & hominem. Vnum ergo esse non possunt, nisi mediante Vnionem. Atqui rursus, res omnes quantumvis inter se diversæ, tot modis esse Vnum possunt, quot dantur Vnionum genera. Atqui dantur Vnionum genera quinque. Quinquè modis ergò IESVS & IOSEPHVS unum esse, possunt; imò corripo me, de facto unum sunt; quia dantur de factò inter ipsos illa quinque unionum genera; puta Vnio similitudinis Vnio propinquitatis, Vnio inhæsionis, Vnio conversionis, & Vnio naturalis, sive

sive quasi naturalis. Ita Gratian. de Vir. S. IOSEPHI d. 3, c. 3. & ostendo inesse IESV & IOSEPHO hæc singula genera.

1. Inest ei Vnio similitudinis; quia ut paulo ante dixi, hæc aliud non est, quam conformitas Vnius cum altero. At est hæc inter IESVM & IOSEPHVM triplex, corporis, morum, ac virtutum; prout itidem ostendi. Ergo in ijs Vnio similitudinis, inest, inquam, eo modo, quo Relatio similitudinis inest ei, quod refertur ad aliud, intrinsecè.

2. Inest Vnio propinquitatis; quæ est conjunctio plurium inter se; sive ratione loci, ut cum manus manum stringit; sive ratione familiæ, ut cum plures eundem patrem familias recognoscunt; sive ratione sanguinis, ut cum plures illum à comuni stipite trahunt; quod cognatorum est. At hæc quoque triplex unio propinquitatis in IESV & IOSEPHO est. Nam 1. quoties putas accepit IESVM in ulnas suas? quoties ori, oculis, ac pectori divinum IESV os, oculos, ac pectus adstrinxit? quoties expandit se atque mensus est super puerum hunc? nihil enim non licet Patri in tenerum Filij corpusculum, præcipuè si Deus dicat, accipe puerum & Matrem ejus, &c. 2. Fuit IOSEPHVS (ut ostendi Elog. 27.) pater familias omnium felicissimus, eiusq; filius familias unicuique ipse IESVS. At quis IOSEPHO litem tantæ necessitudinis intenter? 3. Et inter se propinqui,

& IOSEPHVS. Quin quod alteri nulli concessum est, hoc concessum est ipsis, ut simul sint in primo & tertio gradu propinquitatis.

3. Inest Vnio inhæsionis, quæ Vnio in hoc à prioribus differt, quod priores solam coëxistentiam, hæc autem dependentiam significet Vnius ab alio. Sic autem se habet digitus & cera; volucris, & viscus; lignum, & gluten; amici inter se, homo & Deus, & in particulari IESVS & IOSEPHVS, quibus accommo illud Deuteron, 10. v. 15. *En Domini Dei tui cælum est, & cælum cæli, terra, & omnia quæ in ea sunt: & tamen patri tuo conglutinator est Dominus, & amavit eum elegitq; semen post eum hoc est vos (IOSEPHI imitatores) de cunctis generibus sicut hodie comprobatur.*

4. Inest Vnio conversionis; qualis est inter vitem & palmites, copiosum Vinum & aquæ guttulam, ignem & lignum, alitum & alimentum. At hæc haud dubiè 1, & per se fuit inter IESVM & MARIAM utpote in qua VERBVM CARO FACTVM EST, & *habitavit in nobis.* Ioan. 1. v. 14. Sed tamen proximè IOSEPHVM affecit hæc ipsa Vnio cuius palmes, aquæ gutta, lignumq; ipse fuit. Alimenti quoque vicem Almus pater persæpè præbuit, nihil magis optans quam vt fieret frumentum Christi.

5. Inest Vnio naturalis, siue quasi naturalis, non quidem animæ cum materia; neque naturæ cum supposito; neque accidentis cum subiecto; sed tamen membri cum capite, quod est Christus: hæc

hæc autem Vnio hæc habet i. ut IOSEPHVS qui membrum est in omnibus subsit Christo. 2. ut alijs, quibus Christus non delegat potestatem, non subsit. 3. Vt memoriâ, intellectu, ac voluntate, tanquam re propria & independente, careat: hæc enim ad caput spectant. 4. Vt influxum recipiat à capite, sine exceptione, dilatione, defectu, &c.

ELOGIVM LXXXIII.

IOSEPH

Vnum quid cum MARIA.

Non te teneo Lector, sed syllogismô unicô persuadeo, quod dico, Vir est unum quid cum uxore sibi desponsata, Atqui IOSEPH est Vir, MARIA est eius desponsata uxor. Ergo IOSEPH est unum quid cum MARIA, Atqui si unum quid est cum MARIA, communem habet dignitatem cum illa. Est autem dignitas eius dignitatum omnium maxima, Est ergo IOSEPH ex hoc cum MARIA coniugiô dignitatem omniû maximam consecutus; cuius vindicandæ causa hac in arenâ cum quocunque lubens congregiar.

Verûm hîc illico nescio quis opponit se mihi, & annee exclamat; unum quid vir ille cum uxore sua esse potest, quando non sunt duo in carne unâ: quod tamen exigitur. Genes. 2. v. 24. Matth. 19. v. 5, Marc. 10. v. 1. ad Cor. 6. v. 16. ad

Ephes. 5. v. 31. Atqui nunquam IOSEPHVS & MARIA fuerunt duo in carne una per copulam carnalem, sicut nec fuere David & Abisag Sunamitis. vti enim 3. Reg. 1. v. 4. legitur *Rex verò non cognovit eam* ita habetur Matth. 1. v. 24. *Et non cognoscebat eam donec peperit filium suum primogenitum.* Ergo nunquam IOSEPH potest esse, credive, unum quid cum MARIA esse. At ego hominem hunc etiam levi, quod ajunt, brachio repello. Nam an non legit. Act 4. v. 32. *multitudo autem credentium erat cor unum, & anima una?* Atqui ubi cor unum, & anima una, est eatenus caro una. Non ergo solum duo, sed tota credentium multitudo potest eatenus esse in carne una. Ad hæc verò, an esse potest homo doctus qui tot diversis Scripturæ locis Deum repetentem hæc verba *Erunt duo in carne Vna*, respexisse censeat Viri & Mulieris commixtionem? Certè me hoc, quod profiteor docendi munus non finit. Nam 1. per brevitas est ea actio. 2. Localis tantum, & per contactum. 3. Vitalitatis propriè dictæ expers. 4. Multis alijs commixtionibus superatur, vbi tamen plura non dicuntur propriè in carne una esse.

Insuper eò haud dubiè sensu hæc sunt à Deo prolata verba, qui communis est omni matrimonio cuius naturam explicat. Atqui talis non est vnitas commixtionis, quia hæc in matrimoniò ratò, & inter Virgineos coniuges non habetur. Vel ergo IOSEPH & MARIA non sunt duo in carne vnâ, vel si sunt, commixtio ab hac maris & femi-

næ vnitate procul amandari potest. At sunt IOSEPH & MARIA adeò unum quid, vt nullum unquam coniugum par magis unum fuisse existimem.

Huius rationes sunt, 1. Quia ipse Deus prodigiosè hoc solum matrimonium coniunxit, ut Elog. 8. ex Patribus probavi. 2. Interest deinde Dei, ut hanc coniunctionem in manu forti & Brachio extento tueatur, ne à quoquam dissolvi possit, 3. Ipsi contrahentes nihil minus volunt, aut velle possunt, quàm dissolutionem initi matrimonij, maximè postquam Angelus Matth. 1. v. 20. dixit; IOSEPH fili David noli timere accipere MARIAM Coniugem tuam. 4. Idem in ijs in quibus alij inter se plurimum discrepant, summa consensione omnium auctorum invicem convixère, 5. Se suoque omnia referebant immediatè ad altissimum finem, qui Christus est, & ferè semper in oculis vtriùsque, ne dicam animis, versabatur. 6. Nulla unquam conjux plura, & maiora bona, viro suo obtulit, atque attulit MARIA IOSEPHO. quod quidem probatu difficile non esset. Sed contentus esse volo autoritate S. Bernardini. Sen. in serm. de laudibus IOEPI ubi, *cum omnia*, inquit, *quæ sunt Vxoris, sint viri, credo quod Beatissima Virgo, totum thesaurum cordis sui, quem IOSEPH recipere poterat, ei liberalissima exhibebat.* At ô mi Deus! quam magnus est thesaurus cordis MARIÆ! & quàm multum inde recipere IOSEPH potest! 7. nulli unquam prole nobiliore donati fuerunt, nullique plus pro eadem laboravère, timuère, ac passi sunt,

eo enim labori timor, ac passio gravior est, quo id est maius cuius causa labor, timor, & passio suscipitur. At nulla unquam proles Maior IESV fuit, nullaque charior parentibus. IESVS ergo se ipso univit, inter se, & sibi, hos suos parentes. Sunt ergo propter ipsum maximè unum quid inter se.

ELOGIVM LXXXIV.

IOSEPH

Amabilissimus Deo, Deiparæ, & Angelis.

PLus ne sit amari, quàm amare, problema non ignobile esse potest. Sed mihi, si, quod præmanibus est, intuear, utique plus est IOSEPHVM summè amari à Deo, Deiparâ, & Angelis, quàm vicissim ipsum amare istos. Quapropter cum iam iam proximè consequens Elogium explicaturus essem, repentè verto vela, & primas amoris illi, quò Deus, Deipara, & Angeli amaverunt IOSEPHVM, do.

Occurrit autem initiò statim Salomon. 2. Reg. 12. v. 25. qui primus cognomen accepit, *amabilis Domino, eo quod diligeret eum Dominus*. At quanto magis, inquiebam ego, hoc idem meretur IOSEPHVS meus, longè supra Salomonem amabilior Domino IESV? Certè de amore eius in IOSEPH, Paulus Barry cap. 5. Alim. Piet. mihi fol. 65. hæc habet. *Dubitandum, inquit, non est, quin Redemptor*

demptor Mundi nultò maiori IOEPHVM sic amore complexus, quàm Dei Mater potuit, quovis ipsum impendit amare: amor enim, quo IESVS illum prosequetur, omnem fidem excedit, neque Angelus pro dignitate explicare illius magnitudinem potest. Succumbit ergo multo magis animus meus. Et tamen tacere me non finit ô IOSEPHE amor tui, quò exardesco. Dum ergo modicum, quid balbutivero de te, tu interea manifesta te ipsum mundo, & amoris partem, quo te IESVS amavit, singulis lectoribus meis impetra.

Ac 1. qui IOSEPHVM amat, IESVS est, adeo amare Lazarum hospitem suum solitus, ut exclamarent Iudæi. *Ecce quò modo amabat eum?* Ioan. 11. v. 36. At quantò, hospite maior est IOSEPHVS. 2. Idem Ioanni amore suò perpetuum hoc epigramma scripsit: *Hic est discipulus, quem diligebat IESVS. Atqui non est utique Discipulus supra Magistrum. Ergo neque Ioannes supra IOSEPHVM est: hunc enim alio quàm Magistri nomine compellavisse videtur.* 3. Hic ipse IESVS ab æterno Patre meruit audire. Marc 9. v. 6. *Hic est Filius meus dilectus, in quo mihi complacui.* At debet ad hunc amorem proximè accedere amor Filij in Patrem IOSEPHVM. Verosimile ergo est, aut dixisse, aut, quod satis est, cogitasse IESVM. *Hic est Pater meus charissimus. Hic est Pater meus dilectus, in quo mihi complacui.* 4. Nemo præcepta Dei, quàm Filius Dei observavit magis. Supra omnes ergo IESVS Patrem suum & amavit, & honoravit.

5. Opti-

5. Optimum amoris pabulum mutua benèficentia est. Potèstne autem, tum IOSEPHI, tum IESV benèficentia, magis assurgere? Est namq; IESVS Salvator IOSEPHI, ut omnes norunt; est vicissim IOSEPHVS, Salvator eiusdem Salvatoris sui, utpote quem ab Herode voluntariò exiliò liberavit.

A IESV autem ad MARIAM abeo, cui itidem amabilissimus semper visus fuit IOSEPHVS. Fuit enim, ut primos solum titulos amoris supremi referam, Vir MARIÆ & Sponsus, & Custos, & Dominus, & Paterfamilias, & Ductor, & Procurator, &c. Simul autem accedunt & maxima illa nomina, quæ à IESV paternâ suâ providentiâ meruit, ut adeò nulli debeat mirabile videri, MARIAM ne quidem in hac cœlesti vitâ, amoris olim in suo corde flagrantis pertæsam esse, sed amare magis magisque hunc suum IOSEPHVM, tot sibi nominibus obstrictum.

Sed neque præterire debeo Angelos, quos IOSEPHO non solum ut Custodes, sed etiam Ministros amor eiusdem dedit. Hinc ei non minus quater in somnis apparuere. Hinc euntem duxere, & reduxere. Hinc Musico concentu, Pastorumque ac Regum adventu, recreavere. Hinc æmulatione ministerij Iosephini accensi, cum alibi non possent, fuerunt ipsi IESV ieiunantis IOSEPHI. Matth. enim 4. v. 11. *accefferunt Angeli & ministrabant ei*. Et quidni accederent, quò accedere IOSEPHVS ipse non potuit, quia prohibebat locorum

rum distantia, MARIE cura, negotiorum moles.
Et nempe hoc amantium proprium munus, ut
eadem facere gestiant, quæ fecerunt illi, quos
amant. At nihil magis consueuerat IOSEPHVS,
quàm accedere ad IESVM, & ministrare ei. Ad
idem ergo Angelos suos in IOSEPHVM amor,
etsi cætera defuissent, abundè impellebat, &c.

ELOGIUM LXXXV.

IOSEPH

Amore divino flagrantissimus.

Probémne id quod ex ijs, quæ dixi etiam te-
cente me, clarissime sequitur? Et quomodo
probem? Illud quidem necessarium est, quia
forte quæ dixi, memoriæ fallunt. Modus autem
multiplex esse potest; ac præcipuè ille à Gratiano
usurpatus l. 2. c. 1. dignissimus luce videtur. Sed
ab eò me auellit MARIA Mater Dei, quam ut
illaudatam prætermittam, nemo minùs, quàm
IOSEPHVS vult. Et possum tamen utrique col-
latitiâ operâ facere satis.

Igitur fundamenti locò sic argumentor. Quo
gratia est maior, amor est maior. Atqui, quò quis
propius accedit ad Christum, qui est principium
gratiæ, eò est gratia maior. Ergo etiam in illò
amor est maior. Atqui post Mariam proximè
accedit ad Christum IOSEPHVS. Ergo amor
IOSEPHI est proximè comparandus cum amore

MA-

MARIÆ, inter quem & amorem aliorum Sanctorum ille dici potest horizon. Atqui hoc fieri non potest nisi amorem MARIÆ propius contueamur. Sed ô MARIA illumina patrocinio tuo ac corrobora mentem, ut possim.

1. Amor MARIÆ cœpit, cum primum cœpit MARIA esse. Ita communior Theologorum. Ratio est, quia accommodantur illi verba Psalm. 86. v. 1. *Fundamenta eius in montibus sanctis*, hoc est, supra Sanctos, aut si malis in potentiâ Patris, Sapientia Filij, Bonitate Spiritus S. Itemque illa alia Ecclesiastici 24. v. 25. *In me gratia omnis via & veritatis*. Atqui fundamenta & via tunc incipiunt, cum incipit MARIA esse. Ergo, 2. Amor MARIÆ, cum primum MARIA cœpit esse, excessit perfectione suâ cuiuslibet Viatoris amorem. Ita Suar. in 3. p. disp. 18. sect. 1. Ratio est, quia ad MARIAM spectant Isaïæ 2. v. 2. verba. *Et erit in novissimis diebus, preparatus mons Domini in vertice montium, & elevabitur super colles, &c.* 3. Amor MARIÆ etiam incipiens meruit de congruò maternitatem Dei, unâ cum gratijs Maternitati convenientibus. Atqui Maternitas hæc est suprema dignitas creata. Ita Card. de Lugo de Incar. disp. 8. sect. 6. in fin. Ratio est, quia iam tum præparabatur à Spiritu S. ut dignum Filij Dei habitaculum effici mereretur. 4. Amor MARIÆ, ex quo tempore cœpit, deinceps continuus fuit, etiam somni tempore. Ita Vasq. 1. p. disp. 118. cap. ult. Ratio est, quia ipsa significatur per Rubum, qui ardebat in-

com-

combustus. Atqui quod ardet, & non comburitur, semper ardet, quia semper adest causa ardendi. 5. Amor MARIE pervasit omnes corporis & animæ vires. Ita SS. Patres, Hieronym, serm. de Assumpt. Virg. Ildephons. itidem in serm. de Assumpt. & Bernard. in serm. Signum magnum. 6. Amor MARIE ferventissimus fuit. Ita S. Bern. cit. loco inter alia inquit: *nihil in eâ, non dicam, tenebrosum, vel minus lucidum, sed ne tepidum quidem, aut non ferventissimum liceat suspicari.* 7. Amor MARIE fuit semper secundum plenitudinem charitatis, ita ut subsequens actus plus merueris, quam præcedens, & saltem postremus longè excellerit omnium Sanctorum simul sumptorum qualescunque amores. Ita Suarez Sect. 4. qui hoc incrementum explicat per dupla proportionalia singulis instantibus correspondentia; quæ fortasse alij rectius negant secuti cursum naturæ intensiōnem continuantis, si nihil obstat. Interim tamen Ratio assertio est, quia *multa filia congregaverunt divitias, tu supergressa es universas.* Prov. 31. v. 29.

Sed iam obsecro te, qui hæc legis, refer animum ad præstructum fundamentum. Eius vi IOSEPHVS accedit proximè ad dignitatem MARIE. Ergo etiam proximè accedit ad gratiam & amorem MARIE. Atqui non desunt Sancti, qui in utero sanctificati fuere, coeperuntque illico ardere amore divino, etiam in somno, iidemq; postea multiplicarunt, actus amoris Dei per brevi spatio supra hominum libem; & in dies intensius

R

ope-

operati sunt, adeò ut totà die Deum exquirerent,
 & nihil aliud cogitarent, loquerentur & cuperent,
 quàm placere Deo. Quid ergo dicamus de amore
 IOSEPHI? Accipe compendium. Maior est super
 amorem mulierum, etiam Magdalene: maior super amo-
 rem Discipulorum, etiam Ioannis: maior super amorem
 Apostolorum, etiam Petri: maior super amorem Angelo-
 rum, etiam Seraphim. Vis autem causam scire? Pater
 est IESU, & MARIA Vir. Quid nemo aspirare potest, nisi
 amore divino sit flagrantissimus.

ELOGIVM LXXXVI.

IOSEPH

Summè conformis Voluntati divinae.

Iungamus matri filiam, amori, inquam, divino,
 conformitatem cum voluntate divina; quæ tam
 pretiosa est in oculis Dei, ut nos quodammodo
 deficiet. Vide enim, quid dicat Apost. 1. ad Cor. 6.
 v. 17. *Qui adheret Domino, unus Spiritus est cum illò.*
 Nempe sicuti Rex Legato suo non solum volunta-
 tem, sed etiam auctoritatem communicat, itemque
 sicut sigilli & ceræ eadem est figura, ita homo Deo
 per consensionem voluntatis exhibet nobis ipsum
 Deum, Deique sapientiam, quæ ad Hebr. 1. v. 3.
 vocatur figura substantiæ eius. Sic certè Deus
 Exod. 7. v. 1, ad Moysen dixit. *Ecce constitui te Deum*
Pharaonis; quia nempe obedisti voci meæ, iam nunc
 etiam

etiam potestatem tibi meam impertivi, alterumque Deum meo loco renunciavi. At quanto conformior cum voluntate Dei fuit IOSEPH noster? Longè igitur certiore iure dicendus erit nobis Deus Mundi. Sicut enim Moyses per hoc, quòd divinæ fuerit interpres Voluntatis, coram uno Pharaone, eius deinde Deus appellatus est, ita IOSEPHVS agens causam totius Mundi, Dei loco, meretur dici Deus Mundi.

Ad hoc utique essentialiter intelligendum non est, pro ut olim illuminati quidam, Rusbrochio teste, in lib. de alta Contempl. volebant, sed accidentaliter tantum, aut moraliter substantialiter iuxta Elog. 76. Non est tamen etiam ipsa hæc qualiscunq; Deificatio momenti exigui res. Cur enim ipse Dei filius Patrem rogaret Ioan. 17. v. 21. *ut omnes unum sint, sicut tu Pater in me, & ego in te, ut & ipsi in nobis unum sint?*

Proinde nulli utique grave erit, doceri à nobis, quæ se aliquis possit conformare perfectè cum voluntate Dei. Id autem, quam brevissimè præsto. 1. Nihil debeo velle, quod prohibet Deus. 2. Nihil debeo velle, quod minùs placet Deo. 3. Debeo velle id ipsum, quod vult Deus. 4. Debeo velle, quia vult Deus. 5. Debeo velle & affectu, & modo, quò vult Deus. De quibus gradibus consuli ulterius potest S. Bernard. apud Rosignol. de Discipl. Christ. Perfect. l. 5. c. 24. & Corn. in Epist. 1. ad Cor. 6. 17.

Verum non sufficere hi licet altissimi gradus.

R 2

IOSE-

IOSEPHO nostro, sed ultra illos longè adhuc sublimius evolavit ad Deum, cuius voluntatem pro Cynosura habebat. Atque imprimis vivere sibi non videbatur, nec intelligere, nec velle, nec posse quidquam, sed, velut revertens ad statum possibilitatis, exclamabat ad Deum Creatorem suum, *Vtinam vivam secundum voluntatem Dei!* 2. Voluntatem Dei insatiabili studio iugiter inquirebat, observans non solum imperium, consilia, nusus, exemplum filij Dei, & sui, sed nunc **MARIAM** conjugem, quam à Secretis eiusdem intimis sciebat esse, nunc Angelos, nunc vero seipsum præmisso intellectus scrutinio consulens. Idque partim Evangelistæ, partim ingens, quam de **MARIA IOSEPH** concepit, opinio persuadent. 3. Insuper hoc eius præcipuum, imò unicum votum erat, ut omnes agnoscerent voluntatem Dei, & agnitam adimplerent, mensurâ scilicet bonâ, & confertâ, & coagitâ, & supereffluente, Luc. 6. v. 38. Adhæc autem, ut ipse videret adimpletam voluntatem Dei. Quod quidem fortè aliqui, sat scio affectui magis, quam Veritati tribuent. Sed hos meminisse volo testimonij **MARIÆ** Virginis per **Brigittam** toti mundo attestatæ, cui illa lib. 6. c. 59. post alias **IOSEPHI** laudes; ipse etiam, inquit, sic mortuus erat mundo, & carni, ut nihil desideraret, nisi cœlestia. sicq; erat credulus promissioni Dei, ut continuò diceret, *Vtinam vivam, & videam adimpletam voluntatem Dei!* Et rationem addit, quia totum desiderium suum fuit obedire voluntati Dei. Conclisitque.

Ideo

Ideo nunc gloria sua magna est. Ob hanc causam conformandis se Deo, omni morte acerbiora passus est. Ipsa adeo sacratissima humanitate Christi, ac Matre Dei MARIA, quia sic placitum erat coram Deo, carere non recusavit. Quod mihi tantum videretur, ut negem explicari posse. Manet igitur, ipsum fuisse summe conformem cum voluntate Dei.

ELOGIVM LXXXVII.

IOSEPH

Paupertatis studiosissimus.

Vllane alia Religio pluris faciat paupertatem quam Societas IESV viderint alij. Mihi interim certum est, illam ab hac permagni fieri. Nam primo diligi vult, ut matrem, conservari ut murum; ut propugnaculum, defendi. Dein Professos singulos speciali voto obstringit, ne quid in ijs, quæ de paupertate statuta sunt, quavis occasione relaxent, itemque ne consentiant relaxantibus, etiam in conventu totius Societatis congregatæ. Demum verò talibus legibus circumscribit, quas olim tria suprema Religiosorum capita, IESVS, MARIA, IOSEPH observasse videntur. Sed nobis hic de IOSEPHO tantum sermo est.

Ille igitur paupertatis studio nihil proprium habuit. Ita Suarez in 3. p. Disp. 28. sect. 2. Ratio est, quia, ubi omnia communia sunt, nihil est proprium. Atqui in familia illa sanctissima omnia

(inquit) erant communia. 2. Administravit omnia, tanquam Patrimonium Christi, cuius œconomiz præposuit ipsum Deus. 3. Semper vixit in aliena domo, & quidem plerisque vitæ annis in *Templa*. Nam quidni *Templum* dicam Nazarethanam Domum, postquam in ea Verbum Caro factum est? 4. Experimento peregrinationis longinquæ, quam nunc Socieras IESV imitatur, omnium primus paupertatem Religiosam periclitatus est. Est enim in eâ non pauciores ducentis leucis per desertum emensus; adistque deinde Hermopolim ut Evagrius est auctor; tum Memphim, Heliopolim, Cayrum, Babylonem Ægypti, Tanaim quoque, Nitriam & Alexandriam, prout Brocardus, Abulensis, Ludolphus, & Saligniacus apud Tauschium de B. Matre dolorosa l. 2. c. 10. referunt. Quin & magnam anni partem, dum Nilus totam Ægyptum inundaret, per duos minimum menses, Augustum & Septembrem, quotannis, huc illuc naviculis vectum esse, idem Tauschius, nescio quo vel teste, vel auctore commemorat. Quem tamen sua Virtus idoneum testem cuivis probaverit. 5. Superfluis omnibus illico abdicavit se, solis necessariis contentus. Ideoque B. Virgo apud S. Brigittam l. 6. c. 59. *Necessaria, inquit, provenerunt nobis quandoq; ex compassione piarum mentium, quandoq; ex labore nostro, ita ut haberemus necessaria ad solam sustentationem, & non ad superfluitatem, &c.* 6. Nascente Christo, ob paupertatem, locum in diversorio, non potuit obtinere, sed ad commune pecorum

habu-

stabulum diuertere debuit. 7. Eidem recens nato neque de pannis, neque de cunis providere potuit, quoad à Regibus munera acciperet; de quibus tamen ultra id, quod necessarium existimabat, non retinuit. 8. Paupertatem palàm professus est variis modis. Nam 1. nonnisi par turturum, aut columbarum pro coniuge obtulit purificationis causâ. 2. Artem fabrilem pauperibus propriam secutus est. 3. Vili amictu se suosque vestivit. 4. præcipuè peregrinationis tempore mendicato vixit. 9. Filio suo, ac coniugi, licet Charissimis, nihil proprius tanquam proprium reliquit; non agrum, domum, (usu excepto) censum, pecora, ideoque 1. Filius non habuit, ubi caput reclinaret. 2. Persæpe mendicato vixit. 3. Idem prædicandi officio lassus, sæpè non habuit, qui se mensâ, lectôve exciperet. 4. MARIAM quoque alienæ charitati permittere debuit; quam proinde filius Ioanni, seu alteri filio, commendavit de cruce. 10. Denique paupertatis comites, hoc est, ea quæ pauperibus propria sunt, seu Sodales sibi gratissimos amplexus est per omnem vitam, satis sibi dives visus, si IESVM & MARIAM haberet, pro quibus contumelia, honor; nuditas, opulentia; dolor, voluptas; infamia, fama; exilium, patria; mors ipsa denique, vita videbatur. Nimirum media hæc sunt, non finis. At media per se amabilia non sunt, nisi in quantum finis est amabilis, & in quantum iuvant ad eum prosequendum. Cæterum autem est, in spirituali Regno Christi, & paupertatem, & pau-

pertatis comites, plurimum prodesse. IOSEPHVS ergo primus Christi discipulus, ijs se intimè associasse credi potest; & præluxisse etiam minimæ Societati IESV, quæ eius ab exemplo paupertatem suam accommodasse videtur ad officia eidem IESV placita.

ELOGIVM LXXXVIII.

IOSEPH

Castissimus.

SI S. P. N. Ignatius imitari suos voluit Angelicam puritatem, dubitari non debet IESVM in sua prima Societate voluisse, eam etiam à IOSEPHO quàm perfectissimè exprimi. At prius ostendunt Verba constitutionum Societatis p. 6. c. 1. §. 1. Verum ergo est & posterius. Probèque verum esse. 1. Nam imprimis habuit IOSEPHVS quod habent Angeli. Deinde habuit adhuc amplius aliquid, quod non habent Angeli. Excelluit ergo plurimum Angelicâ puritate. Hæc consequentia evidens est, si tamen pars neutra antecedentis negari possit.

At negari non potest pars prima. Quia duo habent Angeli. 1. quod neque nubant, neque nubantur propter filios. 2. quod ne quidem potentiam habeant, ut nubant, aut nubantur. At hoc utrumq; in IOSEPHO est. Et de 1. nemo nunc, nisi impius, dubitat. Ait enim Damianus, hanc esse

Eccle-

Ecclesie fidem, & assentiuntur Augustinus, Hieronymus, Anselmus, Chrysologus, Thomas Aquinas, & innumeri alij, ex quibus aliquos iam supra Elog. 14. laudavimus. At verò 2. probatur ex voto Castitatis nuncupato à IOSEPHO, de quibus iidem superius actum à nobis. Possum ergo ex doctrinâ Christi Marc. 12. v. 25. subsumere, IOSEPHVM adhuc in terris esse sicut Angelos in cœlis. Idque operosum non est etiam ex comparatione magis particulari illius cum his, deducere. Sicut enim carnem alienam spectat, tractâtque Angelus, ita IOSEPHVS suam aliâmq; habet. Ambo expertes generationis sunt, Angelus quidem necessariò, sed IOSEPHVS libere. Vterque fomite caret; ideoque ignem non concipit, nec propagat. Vterque fruitur purissimis voluptatibus ex amore Dei largissime profluentibus. Vterque ad sui imitationem purissimam alios invitat, iuvat, ac pertrahit. Est igitur iterum IOSEPHVS castitatē suâ sicut Angelus Dei.

Seq. iam probanda est altera quoque pars, quæ castitatem IOSEPHI longè attollit supra Angelorum castitatem. Hanc verò probavit ante nos Gratian. l. 4. c. 2. hoc argumento. Illa castitas maior est alterâ, quæ est in carne mortali, & ex se generationis capax; cum altera tantum sit in substantia immortalis, ac generationis simpliciter incapax. Prior enim tantum per gratiam, quæ utique perfectior est naturâ, habetur. Atqui castitas IOSEPHI est in carne mortali; & ex se genera-

tionis capace, & hoc quidem per gratiam; non est autem castitas Angelorum: Ergo maior est castitas IOSEPHI, quam Angelorum.

Verum ô Gratiane utut alijs hæc tua ratio cinatio efficax videatur, mihi tamen, & fortè alijs, minor videtur castitate IOSEPHI, quàm utique dum supra Angelos attollere cupimus, simul attollere supra homines debemus. At, si te audimus, non attollitur IOSEPHVS supra homines castos. Omnibus enim hoc commune est castitatis *thesaurum habere in vasis fictilibus*, 2. ad Cor. 4. v. 7. vel ut habetur 1. ad Thess. 4. v. 4. *possidere vas suum in sanctificatione*, hoc est, per gratiam. Habet ergo per te IOSEPHVS vi propositi argumenti communem cum hominibus castitatem.

At ego, ne quidem te ipso repugnante, laborem suscepi, constituendi IOSEPHVM, æquè supra homines, atque supra Angelos, nisi quid gravius obstat: nihil autem eiusmodi obstat, sed potius occurrunt aliqua, quorum intuitu omnes tum Angeli, tum homines substernunt IOSEPHO palmas superatæ per ipsum Castitatis suæ. Ac 1. est, quia ipse solus post Deum patrem est Virgo pater. Cuius symbolum palma est, quæ ut sæcundetur, solâ comparis præsentia, non contactu, opus habet, 2. Vir, Custos, & Testis est matris Dei, ac coniugis suæ, semper Virginis. Id quoque palma significat semper virens, pulchra, excelsa, à morbis custodiens, victoriæ index, & quasi testis. 3. Primus est Virginum voventium. Quod itidem palma exprimit,

primit, quæ prima inter arbores falsa & arenosa terra, castigationem carnis significante, delectatur. At cuius unquam castigatio maior fuit, quàm IOSEPHUM votum constringentis? cum enim à S. Tho. 2, 2, q. 188, a. 5. in c. septem modi tradantur munijendi castitatem, abstinencia; vigiliæ, contemplatio, studium scripturarum, exercitium per laborem, angustia, & sollicitudo, in ijs omnibus supra omnes ipse excelluit. Idque si necesse sit ex ipsis SS. litteris existimo probari posse.

ELOGIVM LXXXIX.

IOSEPH

Obedientissimus.

IOSEPHVM nostrum, Christi typum, figuram, que clarissimam fuisse, certum mihi est. At fieri hoc nequaquam potest, nisi prima ac præcipua vitæ Christi exempla, præ cæteris omnibus ipse expresserit. Expresitne autem? inquires, & eorum nobis ideam perfectiùs designavit?

Ad hoc, ut respondeam, statuendum est fundamenti locò id quod Suarez docet, & res ipsa loquitur. Christum prima ac præcipua vitæ suæ exempla in obedientiâ constituisse. Conceptus est enim ex obedientiâ Patri debitâ per obedientiam Virginis. Ita deinde natus, educatusque est, obedientiâ puerum, iuvenem, virumque assidue regente. Ac demum functus ex obedientia prædicandi labore, eius

eius consummandæ causâ crucem, ceu thronum proprium, conscendit, ibique spiritum suum, ac vitam, ut hostiam, victimam, & holocaustum, eidem obedientiæ impendit. Vis ergo nunc scire, an IOSEPHVS, prima, ac præcipua Christi vitæ exempla, tanquam typus figuræque clarissima, præ quibuscunq; aliis, expresse, respice obedientiam viri, quàm fuerit similis obedientiæ Christi.

Ac mihi quidem ea visa est, esse quàm simillima, sive ut verbis exprimam, quibus eam opinionem concepimus, tam est visa similis obedientiæ Christi, quàm est dissimilis visa obedientiæ nostræ. At est certè dissimillima nostræ. Est ergo longè simillima obedientiæ Christi. Hic ego præter minorem hanc postremam, quid probem, invenio nihil. Eam verò si probare velim ac debeam, melius certiusq; non possum; quàm si quisque nostrum suam cum obedientiâ IOSEPHI componat. Quia tamen comparatio hæc odiosa quibusdam videtur, ideo, per me licet, ipsam, prout esse debet, obedientiam intueamur.

1. Pèculiari voto se Deo ac Prælatis obligat Obèdientia. 2. Idem votum exequitur. 3. Ultra votum extendit se ad ea, quæ sine præcepto Superiores exigunt. 4. Modò conveniente perficit mandata; hoc est libenter, simpliciter, hilariter, fortiter, velociter, humiliter, atque constanter. 5. Iungit operi voluntatem. Tandemq; 6. cœcâ quadam subiectione imperata omnia ad amussim facit,

Vbi

Vbi nemo non videt aperiri mihi latissimum campum, in quo de Christi, IOSEPH, ac nostrâ obedientiâ philosophari diutissimè possim. Verùm succumbit oneri mens mea; dicatque ratio, ut thesauros, alicubi latentes solum commonstrem, effodiendos & occupandos ab aliis, quibus mea indicia non displicent.

Sed tamen, ne dum Ipsi durescunt, ageam ego, placet intueri oculatissimam illam cœcitatem, quæ obedientiam in supremò fastigio iuxta Doctores mysticos constituit, traxitque imprimis IOSEPHVM nostrum in amorem sui. Pone ergo te in ijs occasionibus, in quibus ille fuit; eodem modo, tu quoque cæcò impetu illico ad ea amplectenda proueres, ad quæ se totum sine morâ effudit IOSEPH? Nonne, inquam, hyemem, opificium, iter, puerperium uxoris proximè instans obtenderes? Nonne hominum Dei que fidem implorares, ne te ac familiam tuam stabulo, ceu iumentum adiudicarent? Nonne Filium, Legis Dominum ac prorsus innocentem subduceres Circumcisionis legi propter nocentes latæ? Nonne profectiorem fugamve in Ægyptum causareris esse probrosam tibi, ac tuis? Nonne mille modos alios, quibus iuari posses, obtenderes? Nonne opponeres id, quod paulò ante dixerat Angelus? *Ipse autem saluum faciet populum suum à peccatis eorum.* Nonne saltem locum, tempus, modum, exilij commutari velles? Nonne hostium tuorum mortem frequentibus ad Deum precibus maturares? Nonne denique

que vitam à filio vitæ tuæ Domino longiorem posceres? At horum nihil IOSEPHVS opposuit; & sciebat tamen ijs longè plura; sed velut alij captivant intellectum in obsequium fidei, ita ipse se in obsequium IESV captivavit, imò immolavit, factus obediens usque ad mortem, & carentiam nudissimam omni morte acerbiozem.

ELOGIVM XC.

IOSEPH

Patientissimus.

DVbitare non possum, aliquos ex ijs, qui hæc lecturi sunt Regiam Crucis viam inter ærumnas varias pertransire. Quorum Dux utique IESVS est. Sed is exultavit ut Gigas ad currendam hanc viam, ut, nos pumili, haud æquis passibus sequi præeuntem possimus. Igitur ô IOSEPHE sis tu Dux viæ nostræ. Qui enim sequitur te, sequitur utique IESVM, quem ipse secutus es. At sequi nemo potest alterum in arenosò loco, nisi probe ipsum & vestigia respiciat. Agite ergo una mecum, & in IOSEPHVM oculos animumque intendite. Cuius patientiam Iosephina palma (liber est Germanicus Augustæ recentissimè impressus) coronavit rosis decem; at vero Gratianus sæpe cit. duodecim præcinxit. Ego autem, qui patientiæ Iosephinæ candidatis præcipuè faveo, adhuc ijs omnibus rosas alias quatuor adiungam, solatio simul

mul & exemplo eorum, quotquot simile theatrum ingressi sunt, spectaculum facti Deo, Angelis, & hominibus.

Quòd ergo bene vertat Deus, est IOSEPH rosa primâ *Labor*, quod IOSEPH ipso corporis cultu, callosis manibus, exercitato vultu, prout est fabrorum mos, intrepidè coram omnibus proficitur, & vide sis, quàm hæc placeat rosa divino IESV. Simul enim apparuit in terrâ nostra, currit in odorem eius, & asciam, bipennem, & dolabram ipsemet apprehendit Patrem imitans, iure ut dici posset, fabri filius. *Altera* rosa *Zelus* est domus Dei, quæ per id tempus, quo Christus est natus, pænè iam conciderat. Iam enim auctione publicâ vendebatur Sacerdotium; Templum profanabatur; Ministri, ambitione, gulâ, ac libidine æstuebant. Hæreses diversæ eandem domum à fundamentis convellere videbantur. Aspicit autem hæc omnia IOSEPHVS Fabrorum maximus; & incitante Zelo exclamat ad filium. *Quis mihi det, ut readificem domum Domini Dei nostri?* Verrum dissimulat audire Patrem filius offerens pia severitate rosam tertiam, quæ est *Anxietas cordis*, non iam decerpta de domo aliqua, sed de MARIA Virgine, civitate refugij. At quantò civitas est pretiosior domo? Atqui tamen vix illam custodiendam suscepit IOSEPH; & ecce! intimam eius partem, utrum inquam, occupat ipse custodis custos Deus, cui claves totâmq; curam dum cedere cupit, angitur animo, ne graviter delinquat.

At

At successit rosæ quartæ locò, *Tristitia crudele animarum tormentum*, ut Chrysost. epist. 8. ad Olympiam loquitur; & iudicium *omni iudicio vindictæ deterius*. Cui pabulum ac materiam dedere gravissima impendentia mala, quæ evitare nullis molationibus poterat. Simul autem ultro in caput IOSEPH involârunt tres aliæ rosæ; pro rosis enim habet patiens; quidquid patitur pro Deo; nempe *Tedium* in peregrinâ terrâ; *Timor* propter Archelaum; *Mæstitia* ob Christum toto triduo frustra requisitum. Sed non sufficiunt corollæ nostræ; rosæ hæcenus decerptæ. Igitur *Vulnus* Filij in circumcissione octavam porrigit; datque nonam transiens cor matris & suum *gladius* Simeonis; relicta immani plaga. Tum verò decima *pudore contemptuq;* confurgit; trahens post se *Paupertatem* sæpe necessariis destitutam. Quæ quidem *Paupertas* undecima rosa est; a paucis cognita, IOSEPHO tamen tantopere adamata; ut tanquam celeste munus amplectatur. Et annecti duodecimo locò debet *Terror*, quo cum primum se fugæ dedit Egyptum versus; totis artibus contremuit; nunc respiciens retrò; nunc aures ad remotos clamores arrigens; nunc accelerans gradum; nunc filium peratori adstringens. Terrorem subinde multiplex *molestia exilij* excepit; quam neque lenire potuit Psal. 136. Acceperuntque postea per omnem vitam varij corporis dolores & *afflictio mentis* multiplex; ex itineribus, periculis, insidijs, infortunijs, persecutionibus provenientes; donec tandem rosarum ultimas;

sed

sed Deo gratissima *agonia* simul omnia, etiam Christum vitæ gratiæq; auctorem ac MARIAM dulcissimam coniugem abstulit. At est *agonia* relictio sensualitatis non sustinentis sibi auferri conveniens bonum. Bonum autem, quo IOSEPHVS fruebatur, fuit ipsi convenientissimum. Fuit ergo etiam *agonia* eius longè gravissima; cui perferendæ par esse aliàs non potuit.

ELOGIUM XCI.

IOSEPH

Humillimus.

QUOD Signum quid est evidentius electorum? cō pluris idem fieri meretur. Atqui, ut ait Gregor. l. 34. *moral. evidentissimum signum reproborum est superbia, electorum verò humilitas.* Humilitas ergo plurimi fieri meretur. Atqui inter electos tertio statim loco IOSEPHVS est. Eius ergo humilitas humilitati IESV ac MARIE qui electorum capita sunt, debet esse vicinissima. At non cognoscunt multi aliam IOSEPHI humilitatem, quam quæ pro vilitate accipitur, & in fabro, cui ne quidem in diversorio locus est, hoc ipso maxima esse debet. Si ergo velim, ut deinceps humilitatem, quatenus virtus est, eidem IOSEPHO altissimam tribuant omnes, de illa quoque dicendum mihi erit.

Est autem humilitas virtus inclinans hominem,

nem, ut se subiiciat Deo. Ita S. Thom. 2. 2. q. 16. a. 2. ad 2. & S. P. N. Ignatius in lib. Exerc. Sp. de 5. Gradib. humilitatis. At eò quis se magis subiicit alteri, quò alterum magis attollit, seque sub illo, siue respectu illius, magis deprimat. Atqui nemo magis unquam extulit Deum, nemòque se depressit magis, atque IOSEPHVS. Vides ergo, non tam voluntate, quàm necessitate argumenti, cogi me tribuere eidem humilitatem altissimam, etiam in ratione virtutis. Sed tamen ne consequentia hæc per se quidem manifesta, verùm præmissis innixa earum vitio concidat, probò ego minorem, quæ una ruinæ propior videri posset.

Ac 1. quanto magis iustus Deum cognoscit, tanto magis extollit Deum, atqui IOSEPHVS iustus, magis, quàm alij, Deum cognovit. Cognovit enim, ut in Elog. 75. dictum est, intuitivè essentiam eius, quantû viatori fas est, cognovit & abstractivè essentiam eius, per contemplationem, institutionem, revelationem IESV, Mariæ & Angelorum; cognovit denique ex ijs, quæ incarnationem Dominicam circumstetere, miraculis ac virtutibus, quæ ceu radij solem latentem, Dei maiestatem clarissimè ipsi demonstrabant. Ergo IOSEPH iustus, magis, quàm alij, extulit Deum, quod prima pars probandæ minoris dicebat.

2. Ille se magis sub Deo deprimat, qui cum sit dignus summis honoribus, eius causâ repudiat omnes, minimo contentus. At est IOSEPHVS haud dubiè summis honoribus dignus, tum merito

virtu-

virtutis, tum dignitatis, & tamen repudiat omnes, minimo contentus. Ergo nemo magis se, quàm IOSEPHVS unquam depressit: quæ fuit pars altera eiusdem minoris.

Hic autem unâ mecum interiunge pauxillum, & eum, de quo agitur, IOSEPHVM subtilius discerne. Est ille nobilissimo, & antiquissimo Regum sanguine natus; est aviti regni genuinus hæres; est Pater Regis Regum; maximi Filij Dei; est Sponsus ac Vir MARIÆ; Dominæ supremæ; est amicus ab Oriente professorum Magorum; est Cognatus Summi Pontificis, & magnatû Iudæ, qui familiam David inter divitias honoresq; eâ adhuc ætate sustinebant. Et tamen velut oblitus horum omnium, tantopere exinanivit se, ut mallet faber esse ac videri, formam servi vilissimi accipiens, & ad extremum usque in summo omnium contemptu retinens.

Sed tu hæc apud te penitus exputa. Ego autem id ipsum adhuc aliter ostendo. Nempe is deprimat se magis, qui se magis subijcit ei, qui se depressit ad infimum locum. Atqui IOSEPHVS maximè se subiecit Christo, qui se ad infimum locum depressit. Ergo ipse se magis, quàm alij, depressit. Minor probatur, quia permisit excludi se domo, qui tot antè domus fabricatus est; quia in præsepi adoravit Deum hominem, qui in cunis imò throno facilè potuisset; quia inter aulicos natû Regis primos omnium pastores adlegit, ac deinde primû Orientis Reges; qui Angelos de cælo ad-

vocare potuit; quia etiam ignotus, exul, ac contemptus, omnem reliquam ætatem exegit, qui celebrari honorarique ab omnibus merebatur.

Multa equidem hic alia omitto humilitatis argumenta. Verum hæc quæ dixi, adamatæ brevitati sufficiunt. Et tu ipse aspicere potes IOSEPHVM fabрили operi intentum, simul Magistrum Magistri humilitatis, ac discipulum. Te quoque eundem in discipulum deposcit, si te eius non pudet, cuius non puduit Christum. At pudere non debet, inter hæc humilitatis exempla, nisi à præ-excelis filiorum Dei cogitationibus impudenter degenerare velimus.

ELOGIVM XCII.

IOSEPH

Exemplar totius Evangelicæ Beatitudinis.

ITerum gratias Gratiam debeo, qui l. 3. c. 50 Elogium hoc primus memoriæ prodidit, ac pertrahavit. Sed IOSEPH tot est suarum laudum præcones meritis, ut licet eodem in stadio ego quoque circa eandem auriger metam, fastidio tamen non videar futurus.

Igitur Beatitudo Evangelica est status in Evangelio propositus proximè ducens ad Beatitudinem coelestem, cui apprimè similis est. Sicut enim Beatitudo coelestis consistit in cognitione clara, & intuitu.

intuitiva Dei, prout est in se, ita Evangelica consistit in cognitione eiusdem, prout est in speculo, & ænigmate. Vtraque etiam amorem parit; inamissibilem illa, & patriæ convenientem; hæc amissibilem, & propriam Viæ. Est tamen hæc quoque magnopere expetenda. Quam parum enim datur actio in distans nisi transito medio, tam parum potest obtineri Beatitudo cœlestis, nisi prius habeatur Evangelica. Imò tanta est proportio, paliter illa, quanta est ista. Cum ergo ne quidem IOSEPHVM, Primalem Beatorum, renunciare possim, nisi eâ ipsâ Evangelicâ Beatitudine viatores alios antecellat, Beatitudines octo particulares, quæ totidem sunt Spiritus S. gratiæ atque virtutes uti Suar. l. 2. de necessit. grat. censes, quam brevissimè in eodem IOSEPHO, tanquam exemplari optimo, considerabo.

Est is 1. *Spiritu* tam *pauper* ut omni se dominio particulari rerum temporalium abdicarit; omne à se removerit eiusdem dominij desiderium; palam professus sit vitam pauperum; præter necessaria nihil habuerit; ex ipsis tamen necessarijs, alijs pauperibus sæpenumero subvenerit; eumque in finem durissimo manuum labore, & quandoque etiam mendicato vixerit. Sed neque minus pauper spiritu quoad alia interiora animæ bona fuit; quia procul erat in ijs quoque dominium omne, procul desiderium dominij, procul usus independens, procul fruitio & complacentia. Quæ tamen metuo an omnes intellectu sint, qui de Mystica

Theologia minus solliciti sunt. At IOSEPHO ne quidem ista interior Spiritus paupertas deesse potuit; quia mens eius in uno Deo absolute & finaliter amabili semper quievit. Ut adeo iam tum, cum nobiscum esset, Regnum cœlorum, quasi anticipatò possidere cœperit in terra. 2. Idem fuit instar Moïsis vir mitissimus super terram, ne quidem contra filium paterni doloris causam, cum Ierosolymis subsisteret, mutire ausus. Atque propterea MARIA Virgo omnium conscia, nullum unquam ab eius ore mormurosum verbum, aut iracundum auditum esse; ut in Revel. S. Brig. l. 6. c. 59. habetur. Quare terram præ quam alius possidet: sive deinde eius nomine intelligas Cœlum, quod est terra viventium. Psal. 26. v. 13. sive mundum hunc nostratem, quem precibus suis apud Deum sustinent mites, & ut cum potestate regant, aptissimi sunt, utpote victores sui. 3. *Luxit* etiam IOSEPHVS peccata, non quidem suâ, si eorum expers fuit, sed aliena populi sui, illa precipuè, quæ circa personam Filij Dei, ex ignorantia, passione ac malitia quotidie fiebant. Cui tunc ita lugenti haud dubie consolationis loco, dulcissima hæc verba opposuit, is ipse Filius. Ego salvum faciam populum meum à peccatis suis. 4. Non minus *esurivit & sitivit iustitiam*, ut enim S. Thom. 2. 2. q. 119. a. 2. explicat, intelligitur ibi insatiabile desiderium, tam particularis, quàm universalis iustitiæ. At fuit IOSEPH supra Danielem *Vir desideriorum*, ut ex dictis colligi potest. Fuit ergo

ergo unus omnium maximè saturatus. 5. Insuper imitatus proximè est *misericordiam Dei*, ut dubitari non possit, ab eodem si pro nobis oret celerrimè audiendum. 6. Simul verò enituit *mundities cordis*: quidquid enim agebat, id nonnisi Iustitiæ ductu agebat, ad IESV ac MARIE exemplum, & voluntatem. Vidit ergo salutare Dei, & gavisus est. 7. Ad hæc omnia *pacis* genera complexus, plus longè Salomone pacifico filiationem Dei intimam obtinuit, sicut Pater, & Filius. Demum 8. *persecutiones gravissimas* non solum propter Iustitiam, sed etiam propter Iustitiæ auctorem promptissime passus est. Atqui sicuti paupertas primo omnium aperit Regnum Cælorum, ita patientia idem claudit, atque subsignat. Est ergo IOSEPHVS huius Regni Dominus ius habens aperiendi, & claudendi.

ELOGIVM XCLII.

IOSEPH

Summa Dulia dignus.

ESt hic ætatis nostræ genius, ut nulli ferè quicumque credere, nisi legitimè testato velit. Parco igitur genio huic, & ego; & Cornelium à Lapide in 1. Matth. ad v. 12. Testem do, virum quolibet dignum foro. Is fol. 48. *Debetur*, inquit, *Christo cultus adorationis & latriæ, B. Virgini hyperdulie, IOSEPHO summa dulie*. Additque verba mihi ac IOSEPHO aptissima. *Quo circa errat vul-*

archa. At huic Gen. 41. v. 40. dixit Pharao. *Tu eris super domum meam, & ad tui oris imperium cunctus populus obediet; unô tantum regni folio te præcedam.* Et 44. *Absque tuo imperio non movebit quisquam manum, aut pedem, in omni terra Aegypti, &c.* 2. quia ipsa Dei mater eum Dominum suum appellare consuevit. Imò ut Brigittæ l. 6. c. 59. revelavit, ad opera eius minima humiliavit se. 3. quia nec ipse Dei filius ei dedignatus est subesse. Luc. 2.

At 2. pro Paternitate summa, stat Suarez disp. 8. ser. 1. at Rationes sunt 1. quia Paternitas hæc IOSEPHI simillima est Paternitati Divinæ & æternæ, à qua ut ait Apost. ad Ephes. 3. v. 15. *omnis Paternitas in cœlis, & in terra nominatur.* 2. quia Paternitas dignitatem trahit à Filio. Pater enim & Filius correlativa sunt. Atqui Paternitatis IOSEPHI Filius est IESVS, Deus & Homo. 3. quia hæc eadem Paternitas est universalis, continens in se omnia Paternitatum genera, sola carnali exceptâ. Demum 3. pro sanctitate quoque summa Rationes sunt. 1. quia non nisi summa sanctitas accommodata est muneri, quod suscepit ab auctore sanctitatis, gessitq; propter eundem. 2. quia nemo post B. Virginem tot habuit media, motiva, exempla, atque occasiones adipiscendæ sanctitatis. 3. quia tanta est sanctitas, quanta est charitas Dei. Nullius autem charitas esse maior posse videtur, secundum nobis cognitâ Dei providentiam, quam IOSEPHI. Erego paulô antè, de hoc charitatis divinæ incendio, quantum satis esse potest, egl.

Igitur tria hæc, Dominium, inquam, Paternitas, & Sanctitas summa, verè competunt IOSEPHO.

Neque iam scio quid aliquis adhuc, nisi sui, quàm IOSEPHI amantior, opponere possit. At quis esse velit, nisi similis Hæreticis, quorum hæc non infima cura est, abrenunciare Sanctis. Hi sanè reipsa usurpare videntur illa fratrum Iosephi, de hoc nostro, verba Gen. 37. v. 29. *Ecce somniator venit, venite occidamus eum*, auferendo Religiosam memoriam eius, & mittamus in cisternam veterem oblivionis. Dicemusq; fera pessima, hæresis nempe, devoravit eum: Et tunc apparebit, quid illi prosint somnia sua. At ô mi Deus, averte impius has voces à tuo meoque IOSEPHO; quem Filius tuus, ac Mater Filij, per obedientiam ac reverentiam præstitam, non recusarunt adorare; quem etiam tu ipse tantopere polymitâ veste Virtutum ac Gratiarum exornasti, ut dici possis diligere IOSEPH super omnes filios tuos, quemadmodum olim Israel suum v. 3. dilexit.

ELOGIUM XCIV.

IOSEPH

Postremis Ecclesiæ temporibus vaticinio promissus.

Nimis multa non cognoscuntur à multis, quæ tamen sunt. At cognoscuntur tamen omnia ab uno omnium principio, Deo ter Opumo, ac

ac Maximo, Hic deinde in nos, qui inde procedimus, ceu particulam auræ divinæ, dispensat cognoscendi vim cuius accomodam, placitam sibi. Si ergo IOSEPH olim pauci cognoverunt, non est id vitium eius, aut imminutæ gloriæ signum, sed opus dexteræ excelsi. Nec propterea minor se ipso fuit, minúsque magnus, gloriosus, & Sanctus. Adhuc enim illum ab æterno elegit Deus in Patrem Filij sui; adhuc & Filius in eundem consensit; Virgoque MARIA, in virum, Dei nutu, assumpsit. Atqui hæc nonnisi cum respectu ad cognitionem facta sunt. Præcessit ergo in ijs cognitio, & ea quidem ex bonitate obiecti cogniti, movens ad huiusmodi electionem, consensum, & assumptionem. Neque enim nisi idoneus placere eligenti, consentienti, atque assumentis potest. Quid igitur nunc amplius desideret IOSEPHVS, quem idoneum summæ dignitati cognovit Deus; Dei Filius, ac MARIA, cognitumque evexit, & ad-amavit. Sed tamen, tres isti præcipui amatores, accendere subinde suâ luce, flammæque amoris, mortalium aliquos, qui, cum & ipsi concepissent ignem, neq; tamen idoneam ignis materiem reperissent, libros super IOSEPHI laudibus scripsere; sermones ad populum instituere, Fraternitates erexere.

Quia tamen nonnisi paucis quidquam persuasum est, enimvero fatiscentem sub eò ardore animum, vaticinijs ac spe proventuræ aliquando messis sustentabant. Quorum vaticiniorum even-

sum,

rum, quæ Dei miseratio est, nostra nunc videt ætas, cœpitque videre antecedens, incitata exemplis S. Teresiæ, B. Caspari Boni, B. Margaretæ de Castro, B. Agathæ de S. Cruce, Francisci de Sales, Balthasaris Alvarez, Alphonsi Rodriquez, de quorum plerisque egregiè differuit Barry. cap. 5.

Verum ego iam aliud non ago, quàm ut seræ posteritati promissum esse IOSEPHVM demonstrarem: Sic enim fiet, ut quidquid hætenus ad gloriam eius laboratum est, & laborabitur deinceps promptiore animo suscipiatur; *stat autem in ore duorum, vel trium testium, omne verbum.* Matth. 18. v. 16. duos ergo minimum, si producam, amplius exigi à me nihil iure potest.

Ac 1. Gerson Cancellarius, uti ætate, ita doctrinâ prior compareret, qui in tract. 12. super Magnificat, in fin. hæc sub annum Christi 1420. in persona Mariæ habet. *Veniant generationes, quando scribet aliquorum devotio plurima super istis pie speculanda; multa prosaice; quadam heroico carmine: cui IOSEPHINA nomen erit: quadam aliter, & aliter. Nonnulli de laudibus iusti virginalis Sponsi mei, fidissimiq, custodis, & testis delegati, multa sua posteritati legendo relinquent, statuent Consummationem in ipsius pretiosâ morte, quâ presentibus filio meo, & me, pieq, flentibus, appositus est ad patres suos in senectute bonâ, cuius memoria in generationes seculorum.*

2. Gersonem sequitur Isidorus Isolanus ex S. Dominici Ordine, Vir æquè doctus ac pius. Hic in vita S. IOSEPHI part. 3. c. 6. ante annos 159.

Spiri-

Spiritus Sanctus, inquit, non cessabit excitare corda fidelium, donec Ecclesia militans universa exultabunda, divino viro IOSEPHO novos honores decernat, monasteria adificet, templa & altaria ad venerationem eius erigat. Eius honorandi causâ festa instituentur, multi vota vovebunt Domino, & reddent. Dominus revelabit interiores auriculas cordium, & intellectus magnorum & excellentium virorum, mysteria Dei explorandi, quæ in S. IOSEPHO latebant; & inveniendi pretiosum thesaurum, quæ in SS. Patribus veteris Testamenti non potuerunt reperire, tanta enim copia spiritualium donorum in S. IOSEPHO emicuit, ut ei par alibi reperiri non possit. Hæc Isolanus. Quæ ego quidem tanta ubertate impleri cupio, ut ijs, qui me in laudando IOSEPHO secuturi sunt, etiam corrigiam calceamentorum solvere paratus sim. Dum enim Sanctum hunc, unâque me, considero, ille mihi lux est, & ego ne quidem umbræ vicem rectè sustineo.

ELOGIUM XCV.

IOSEPH

Diu olim à paucis agnitus.

Mirissimum mirum mihi aliisque est, IOSEPHVM à tam paucis tot annorum decursu agnitum fuisse. Nam 1. ipsum Spiritus S. immediate primùmq; omnium canonizavit Matth. 1. v. 19. 2. Eadem MARIA Dei Mater humili-

gatis

ratis studio postposuit se. Luc. 2. v. 48. *Ecce Pater tuus, & ego dolentes, &c.* 3. Eius pænè tam frequens in Evangelio mentio fit, quàm frequens fit **MARIE**. Ut enim Louberius, in tract. de cognatis **MARIE**, impresso Anno 1479. Burgdorfij Ber-nensis ditionis, observet non minus de **IOSEPHO**, atque de **MARIA**; novem leguntur Evan-gelia per annum. Nempe de **MARIA** 1. festo Conceptionis. 2. Nativitatis suæ. 3. Præsentationis. 4. Nativitatis Christi. 5. Visitationis. 6. Purificationis. 7. Assumptionis. 8. Conceptionis, quod in Sabbato intra Pascha & Pentecosten legitur. Et 9. B. Virginis ad Nives. Vicissim autem de **IOSEPHO** legitur. 1. in vigilia Nativitatis Christi. 2. in Nocte eiusdem Nativitatis. 3. in festo Innocentium Martyrum. 4. in Dominica infra octavam Nativitatis. 5. in vigilia Epiphaniæ. 6. in Domi-nica infra octavam Epiphaniæ. 7. in festo Purificationis. 8. in festo Annuntiationis. 9. in festo Conceptionis.

Et tamen **IOSEPHVS**: si cultum publicum, publicamque religionem spectemus, prope ad nostram usque memoriam latuit, sub modio oblivionis, à paucis agnitus, præteritus à plerisque. Tacerene igitur possum divini Consilij causas, quæ movère Deum ad hoc immeritum silentium? Aperire eas ante me tentavit Barry cap. 4. à fol. mihi 44. Tentare ergo me quoque iuvat, sed eâ modestiâ ut ipsi sua relinquam, proprijs contentus, ne gratia libro utilissimo pereat. Occurrunt autem istæ,

1. Duo

1. Duo sunt genera Sanctorum. Vnum publicorum. Alterum occultorum. Atqui debetur utrisque congruum aliquod caput. MARIA autem caput est publicorum, Est ergo IOSEPH caput occultorum. Neque enim scire possum ullum alium ex ijs, qui occulti sunt, qui sanctitate ac dignitate eidem vel præferendus, vel etiam comparandus sit. 2. Multi regnum Christi in miraculis, vaticinijs, extasi, alijsque gratijs gratis datis, & externo Virtutum apparatu constituunt, ideòque si ardeant tantum, & non luceant, animo deficiunt, ac retro respiciunt. At hi iam possunt respicere IOSEPHVM unâ suâ internâ sanctitate tantopere se probantem Deo, ut esse ac dici mereatur Pater IESV, ac vir Mariæ, &c. 3. Est Deus, ille Evangelicus Paterfamilias, qui profert de thesauro suo nova & vetera. Matth. 13. v. 52. ut alias iam diximus. Atqui thesaurus eius est multitudo ingens Sanctorum. Inde ergo profert nunc novos, nunc veteres Sanctos; Veteres enim Sancti sunt Ioachim, Bibiana, Martina, & modò IOSEPHVS. 4. Et si IOSEPHVS meo ac multorum iudicio, maior sit Sanctis omnibus, est tamen minor IESV & MARIA. Debet ergo primùm his consuli; ac deinde ipsi. Neque enim simul consuli potest omnibus, At ut his consuleretur, stabiliri debuit divinitas & incarnatio Virginea Christi; tum vero maternitas Dei, summâque potestas orandi pro nobis, eidem maternitati annexa, Tantisper ergo IOSEPHVS expectare debuit,

dum

dum IESV & MARIE consuleretur. 5. Negari non potest, amore Dei, latere in vita ac morte, itémque post mortem, esse bonum inprimis honestum, ac expetibile à Viatore, Hoc enim videmus de facto placuisse non solum Sanctis ut peterent; sed etiam Deo, ut petentibus annueret. Cum ergo IOSEPH amore simul ac humilitate alijs omnibus præstiterit, verisimile est, idem latendi studium, quoad consequi posset, quàm longissime extendere voluisse. 6. Nequidem ipsa Trinitas in-creata illico innotuit humano generi, ac nominatim Spiritus S. diu ab Asiæ Ecclesijs est Patre & Filio creditus esse minor. Debuit ergo etiam Trinitas creata IESVS, MARIA, IOSEPH, similem fortunam subire, & inter hos præcipuè IOSEPH latere, qui Sponsalitis honore, & amore accedit ad Spiritum S. Postremo autem huc itidem faciunt peculiare horum temporum morbi, quibus opponi debuit, Medicus aliquis cœlestis, alijs præstantior. At esse non potest præstantior IOSEPHO. Hic ergo in hæc tempora meritò servari debuit.

ELOGIVM XCVI.

IOSEPH

Periclitantium in castitate Patronus!

Victoria pugnæ, pugna hosti commensa est,
 At est hostis eò gravior, quo interior; amor
 autem carnis est hostis noster maximè inter-
 nus.

nus, Est ergo idem hostis longè gravissimus, & consequenter pugna quoq; ac victoriâ difficillima. Hæc autem cogitatio meritò intendit militum curam, ut sibi Duces Patronosque præponant, quorum imperijs, consilijs, exemplis, auctoritatè, Viris quoque superiores ex eo bellò evadere possint. *An invenire poterimus talem virum, qui Spiritu Dei ita plenus sit, sicut est IOSEPH noster, cuius Patriarcha figura ac typus fuit? An inquam sapientiorum & consilium eius poterimus invenire?* Gen. 41. v. 38. & 39. Equidem iam multis argumentis ostendi, non posse. Sed nunc occurrunt nova aliqua, quæ Castitatis conservandæ ac promovendæ ardor, ut eloquar impellit.

Hic 1. Patrocinium Virtutis, est præmium Virtutis. Maius igitur patrocinium maiorem sequitur Virtutem. Atqui Castitas IOSEPHI virtus fuit maxima in terris. Ergo patrocinium eius in cælis itidem maius esse debet patrocinio aliorum Sanctorum.

2. Quem Deus ipsemet primo loco elegit custodem atq; patronum supremæ Castitatis, eum utique nos homines adoptare custodem patronumque possumus Castitatis nostræ. Atqui IOSEPH primò loco elegit Deus custodem, ac patronum supremæ Castitatis, quæ est in MARIA Matre suâ. Nihil igitur desiderari potest, quò minus etiam Castitatis nostræ custos atque Patronus ipsemet sit. Dixi autem *primo loco*, quia duos elegit Deus custodes ac patronos supremæ Casti-

T

tatis

tatis IOSEPHVM & Ioannem. Atqui primò loco elegit IOSEPHVM, & deinde post annos bene multos eidem iam defuncto substituit Ioannem. Nemo igitur est huius, de quò agitur, patrocini cum IOSEPHO competitor.

3. Ille est optimus patronus Virtutis alicuius, qui vix adiit patrocini munus, & confestim adiuuit eius patrocini indigentes. Atqui IOSEPHVS hoc ipsum præclare fecit. Si enim Ludolpho, Carth. in vita S. Annæ creditur, cum primùm is inter Candidatos Matrimonij Virginei, præsentisque, quod annexum erat, patrocini steteret, adfuit simul Iuvenis quidam, Agabus nomine, beneficijs quærens quod Virtute debebat. At hic ubi illud dilectum superis Sponsorum par intuitus est, confestim & beneficia posuit, & Castitatem tantopere adamavit, ut in Carmeli monte Carmelitam deinceps egerit, donec postea à Christo discipulis septuaginta duobus adscriptus fuit.

4. Custos ovium est eorundem patronus aptissimus. Atqui IOSEPH est custos ovium Christi, imò custos est ipsius Christi, hoc est, Agni, de quo dicitur Apoc. 14. v. 4. *Hi sunt, qui cum mulieribus non sunt coinquinati: Virgines enim sunt. Hi sequuntur Agnum quocunque ierit. Hi empti sunt ex hominibus primitia Deo & Agno, &c.* Atqui Agnus iste sequitur IOSEPHVM, utpote, cui subditus erat. Luc. 2. v. 51. *Erat, inquam, subditus; & necdum fuit, quia adhuc remanet, in quo non subdatur eidem, pro nobis agriculis periclitantibus deprecanti.*

5. Patronum constituit potestas, & voluntas, patrociniandi. Atqui utraque in IOSEPHO summa est. Ergo est is Patronus omnibus numeris absolutus, Minorem autem probo hîc tantum quoad secundam partem. Prima enim partim ex di&is iam constat, partim non multo potest probabitur. Nempe Voluntas colligitur in IOSEPHO summa esse ijs omnibus modis, quibus illa exterius ostendit se; & in specie 1. ipsa Castitatem perpetuò voto adstrinxit sibi. 2. Perpetuo obsequio se addixit, IESV & MARIE castissimis Virginibus. 3. Neminem ita amavit, aut amare potuit, atque eosdem. Amor autem amati bonum maximè promovere vult. At bonum IESV & MARIE maximum est multitudo Castorum; ideòq; huius expressè mentio sit. Apoc. cit. c. v. 3. Est ergo Voluntas IOSEPHI summa, hoc ipsum bonum patrociniò suo promovere satagens. Vide Barry c.8. Med.7. & c. 13.

ELOGIUM XCVII.

IOSEPH

Peregrinantium Patronus.

Non ignara mali miseris succurrere disco, in-
 quiebat apud Virgilium Dido. Non minus
 autem & alij in ijs malis, quibus exerciti
 ipsi olim sunt, vel auferendis, vel mitigandis, im-
 pensè allaborant. Est ergo credibilius, neq; IOSE-
 PHVM

PHVM hac una in re velut immemorem sui, communisq; honestatis connivere ad ærumnas nostras, quas quotidie cœlesti ex Theatrô intuetur. At est in his non infima peregrinantium ærumna, quâ terrâ marique, implicantur, ac sæpe obruuntur.

Dicam ergo aliquid de hoc ipso eorum patrocinio, quod supra cæteros, ceu munus proprium sibi suscepit in se idem IOSEPHVS. Hoc autem agnovit antè me Eckius, illud Catholicæ Germaniæ columen, qui in Hom. 1. de S. IOSEPHO omnes, *insuper*, inquit, quibus periculosa instituuntur profectiones, locaq; adeunda sunt, parùm tuta, semet S. IOSEPHO committere debent, & ex illo comitatem, seu citatem, tutelam, & intercessionem petere, ac fideliter sperare. Tum verò, Eckio citius, Ecclesia Hispanensis in Hymno quodam festi S. IOSEPHI cecinisse dicitur apud Carthag. l. 18. Hom. 14.

O custos matris Domini

Devotos tuo nomini

IOSEPH alme, per aspera

Salva semper, & prospera

Adesse tuis famulis

Dignare dux amabilis:

Sentiant nostra pectora

Tua semper iuvamina:

Tu salus & protectio,

Nostraq; iubilatio.

Idemq; ibidem confirmat Carthag. tribus authenticis historijs, quas hoc in loco rectius præterire posse videor, ut suus maneat rationibus honor.

Inter

Inter has autem eminet illustrissimum tum IESV tum IOSEPHI exemplum : si enim percunctetur aliquis ex me, 1. quid IESVS egerit ; ac deinde quid IOSEPHVS ? quid aliud respondere possum, quàm peregrinatos esse ? Certè in has vitales auras nondum exierat IESVS ; nondum, inquam, fuisset pedibus insistere poterat, maternum intra uterum clausus, iam peregrinari debuit pedibus matris, & patris imperio.

Neque verò tam leve, ut videri posset, hoc primum fuit iter. Sunt enim, qui Nazarethô Galilææ usque Cariatharbe, quo MARIA festinatò abiit ad salutandam Elisabeth, computent horas minimum triginta. At has ipsas horas revertens cum parentibus puer, post impensum Charitati, atque humilitati trimestre tempus, denuò emensus est, nec multum deinde temporis intercessit, cum iam tertium iter Bethlemium usque, IOSEPHO duce, nondum natus suscepit. Ibi verò vix octiduum, quo natus, & adoratus à pastoribus est, substitit, sed Ierosolymam, ut domino offerretur, trium horarum spatio delatus est ; iterùmque alterò tantò relatus Bethlemium. Vbi quàm diu manserit, incertum est : certum tamen non mansisse admodum diu. Repentè enim IOSEPH, impellente Angelo, exsurgens è somno fugit cum IESV, & MARIA in Ægyptum ; idque totum viæ spatium per desertum quod una & quadraginta mansionibus, totidemque annis Moyses, cum Israëliticò populò emensus est peragravit. Excepit tunc IOSEPHUM

PHVM longissima peregrinatione perfunctum, itèmq̃ue familiam eius, primò Hermopòlis Thebaidis Vrbs. At illuc minimum ducentis horis pervenire potuit. Hermopoli autem totam ferè Ægyptum obivère iuxta eam Tòpographiam, quam superius constitui, Elog.87. Solum moneo debuisse infumi minimum 70. Horas. Deum revocante in patriam Angelo, qui exire iusserat, discessère Alexandrià, ac denuo post 200. minimum horarum spatia, soli peregrinationi data Nazarethum regressi sunt. Vnde **IOSEPHVS** deinceps iter fecisse non traditur in sacris literis, quàm illud annum Ierosolimam versus, quod triginta horas poscit.

Sic ergo patet, **IOSEPHI** vitam meram peregrinationem fuisse. Expertus proinde pericula eius, labores, & incommoda. Et potèstne adhuc esse aliquis, qui neget esse peregrinantium patronum? Atqui multa sunt officia patroni talis; quidquid enim peregrinanti non solum necessarium, sed etiam utile, iucundum, ac gloriosum est, complecti debet. Quidni ergo omnes patronum hunc pronis animis optamus, & adoptamus, ij præcipuè, qui vi Instituti diversa loca peragrabere debent, & vitam agere, in quavis mundi plagà,

ubi maius Dei obsequium, & anima-

rum auxilium spera-

tur.

ELO.

ELOGIUM XCVIII.

IOSEPH

Vitam spiritualement agentium
Patronus.

DVplex homo, duplex vita. Scilicet homo alius est homo animalis, & alius spiritualis. *Animalis autem homo non percipit ea quæ sunt Spiritus Dei. 1. ad Cor. 2. v. 14. Spiritualis autem iudicat omnia, & ipse à nemine iudicatur. v. 15.* Est ergo duplex etiam vita hominis, animalis, & spiritualis. Atqui duo isti homines, & vitæ, sibi invicem relativè opponuntur. *Caro enim concupiscit adversus Spiritum; Spiritus autem adversus carnem. ad Gal. 5. v. 17.* Quot modis ergo aliquid dicitur animale, tot vicissim modis dicitur spirituale. Atqui id tribus modis fit, nempe secundum corpus; concupiscentiam sive passiones; & sensus, quibus servit homo. Hoc ergo posterius itidem fit his tribus modis, quatenus homo dominatur corpori, concupiscentiæ sive passionibus, ac sensibus. Clarum autem est etiam hic generationem unius, esse corruptionem alterius. Vis ergo vir vere spiritualis fieri vivendo secundum spiritum, hoc est, rationem Deo soli subditam, exue animale vitam quæ instar bruti sequitur desideria carnis. At hoc sine Duce ac Patrono huiusmodi spiritualis vitæ nemo assequetur. Non enim, ut hæretici sibi stolidè simul ac impie

arrogant; spiritualis homo indicat omnia, absolute, sine exceptione, ac restrictione solumque per se; sed tantum indicat per se vel alios rerum peritos, & ea sola quæ necessaria sunt ad spiritualem vitam; *Quis enim cognovit sensum Domini, qui instruat eum?* Ibid. v. 16.

Talis nempe Dux patronusque assumi debet à spirituali homine, qui sensum Domini cognovit. Atqui, ut tandem ad id veniam, quod isthic, quaeritur, IOSEPHVS optimè cognovit sensum Domini. Nemo igitur Dux patronusque spiritualis vitæ rectius assumitur, quam IOSEPHVS. Hic autem maior propositio immediate, ut vides, SS. litteris innitur; Minor naturis rerum. Pater enim optime novit Filij sensum. Atqui IOSEPHVS pater est, eiusque Filius est Dominus. Optimè igitur IOSEPHVS cognovit sensum Domini.

Verum argumentum hoc de paternitate, ac familiari necessitudine IOSEPHI cum IESV plus satis forsitan propositum iam est; quare ad aliud huic causæ non minus idoneum converto me, quod experientia suppeditat. Videamus enim, quis de factò, quantum ex vitis Sanctorum legendo consequi possumus, sensum Domini subtilius perspexerit, & tanquam dux ac patronus spiritualis vitæ clarius explicarit, ac IOSEPH?

Est inter eas vitas hæc ætate celeberrima S. Terefiæ; quæ cum clientem se huius ipsius Divi palam professa sit, ignorare profectò non potuit Iosephini patrocini præstantiam. At ego fidenter

ter pronuncio, nihil hanc Virginem, in hoc suo patrono, etiam desiderare amplius potuisse. 1. enim illi sanitatem frustra à medicis quæsitam restituit; scilicet ne vitæ spirituali congruum subiectum deesset. In vita cap. 6. 2. In quodam suo pervigilio, humi prostratam versatilis rotæ, quâ aqua ex puteo adtrahitur, gravissimo impetu, etiam sine vulneris vestigio servavit. Alias etiam in Morenæ montibus aberrantem cum suis, ad spectabili formâ, per ignotum callem eduxit. In vita Didaci de Iepes l. 2. c. 27. 3. Sanctioris vitæ desiderium immisit; ac peccatorum gravitatem declaravit, ijs utens medijs, quorum fructus in totam vitam redundaret. Ribera l. 1. c. 9. 4. Gratijs in dies maioribus extulit; evenitque, ut eas à MARIA & ipsomet IOSEPHO impetratas esse, à Domino cognosceret. Ibid. 5. Salutari timore perculit, ut caveret, ne in oratione præstigijs dæmonum seduceretur. Et propterea se regi sineret ab alijs. Idem. 6. Vnâ cum MARIA, Assumptionis festo, candidissimâ ac splendidissimâ veste in signum dimissorum omnium peccatorum exornavit. l. 1. c. 15. 7. Eodem tempore per MARIAM ostendit, gratam sibi esse venerationem sui; vellèque se cæptis eius favere traditò in pignus pretiosissimò monili ac cruce inde appensa. 8. Omnium votorum compotem fecit; ideoque si quæ vota essent de minore bono, prius in sanctiorem formam transtulit. In vita c. 6. Barry, c. 5. 9. Per ipsam præcipue voluit innotescere Mundo. Et videmus

dum IESV & MARIE consuleretur. 5. Negari non potest, amore Dei, latere in vita ac morte, itémque post mortem, esse bonum inprimis honestum, ac expetibile à Viatore, Hoc enim videmus de facto placuisse non solum Sanctis ut peterent; sed etiam Deo, ut petentibus annueret, Cum ergo IOSEPH amore simul ac humilitate alijs omnibus præstiterit, verisimile est, idem latendi studium, quoad consequi posset, quàm longissime extendere voluisse. 6. Nequidem ipsa Trinitas in creata illico innotuit humano generi, ac nominatim Spiritus S. diu ab Asiæ Ecclesijs est Patre & Filio creditus esse minor. Debuit ergo etiam Trinitas creata IESVS, MARIA, IOSEPH, similem fortunam subire, & inter hos præcipuè IOSEPH latere, qui Sponsalitio honore, & amore accedit ad Spiritum S. Postremo autem huc itidem faciunt peculiare horum temporum morbi, quibus opponi debuit, Medicus aliquis cœlestis, alijs præstantior. At esse non potest præstantior IOSEPHO. Hic ergo in hæc tempora meritò servati debuit.

ELOGIVM XCVI.

IOSEPH

Periclitantium in castitate Patronus!

Victoria pugne, pugna hosti commensa est,
At est hostis eò gravior, quo interior; amor
autem carnis est hostis noster maximè inter-
nus.

nus. Est ergo idem hostis longè gravissimus, & consequenter pugna quoq; ac victoriâ difficillima. Hæc autem cogitatio meritò intendit militum curam, ut sibi Duces Patronosque præponant, quorum Imperijs, consilijs, exemplis, auctoritatè, Virtuteque superiores ex eo bellò evadere possint. At an invenire poterimus talem virum, qui Spiritu Dei ita plenus sit, sicut est IOSEPH noster, cuius Patriarcha figura ac typus fuit? An inquam sapientiorum & consimilem eius poterimus invenire? Gen. 41. v. 38. & 39. Equidem iam multis argumentis ostendi, non posse. Sed nunc occurrunt nova aliqua, quæ Castitatis conservandæ ac promovendæ ardor, ut eloquar impellit.

Hic igitur 1. Patrocinium Virtutis, est præmium Virtutis. Maius igitur patrocinium maiorem sequitur Virtutem. Atqui Castitas IOSEPHI virtus fuit maxima in terris. Ergo patrocinium eius in cælis iridem maius esse debet patrocinio aliorum Sanctorum.

2. Quem Deus ipsemet primo loco elegit custodem atq; patronum supremæ Castitatis, eum utique nos homines adoptare custodem patronumque possumus Castitatis nostræ. Atqui IOSEPH primò loco elegit Deus custodem, ac patronum supremæ Castitatis, quæ est in MARIA Matre suâ. Nihil igitur desiderari potest, quò minus etiam Castitatis nostræ custos atque Patronus ipsemet sit. Dixi autem primo loco, quia duos elegit Deus custodes ac patronos supremæ Casti-

T

tatis

tatis IOSEPHVM & Ioannem. Atqui primò loco elegit IOSEPHVM, & deinde post annos bene multos eidem iam defuncto substituit Ioannem. Nemo igitur est huius, de quò agitur, patrocini cum IOSEPHO competitor.

3. Ille est optimus patronus Virtutis alicuius, qui vix adiit patrocini munus, & confestim adiuvit eius patrocini indigentes. Atqui IOSEPHVS hoc ipsam præclare fecit. Si enim Ludolpho. Carth. in vita S. Annæ creditur, cum primùm is inter Candidatos Matrimonij Virginei, præsentisque, quod annexum erat, patrocini stetit, adfuit simul Iuvenis quidam, Agabus nomine, beneficijs quærens quod Virtute debebat. At hic ubi illud dilectum superis Sponsorum par intuitus est, confestim & beneficia posuit, & Castitatem tantopere adamavit, ut in Carmeli monte Carmelitam deinceps egerit, donec postea à Christo discipulis septuaginta duobus adscriptus fuit.

4. Custos ovium est eorundem patronus aptissimus. Atqui IOSEPH est custos ovium Christi, imò custos est ipsius Christi, hoc est, Agni, de quo dicitur Apoc. 14. v. 4. *Hi sunt, qui cum mulieribus non sunt coinquinati: Virgines enim sunt. Hi sequuntur Agnum quocunque ierit. Hi empi sunt ex hominibus primitiæ Deo & Agno, &c.* Atqui Agnus iste sequitur IOSEPHVM, utpote, cui subditus erat. Luc. 2. v. 51. *Erat, inquam, subditus; & necdum fuit, quia adhuc remanet, in quo non subdatur eidem, pro nobis agniculis periclitantibus deprecanti.*

5. Pa-

5. Patronum constituit potestas, & voluntas, patrociniandi. Atqui utraque in IOSEPHO summa est. Ergo est is Patronus omnibus numeris absolutus, Minorem autem probo hîc tantum quoad secundam partem. Prima enim partim ex dictis iam constat, partim non multo potest probabitur. Nempe Voluntas colligitur in IOSEPHO summa esse ijs omnibus modis, quibus illa exterius ostendit se; & in specie 1. ipsa Castitatem perpetuò voto adstrinxit sibi. 2. Perpetuo obsequio se addixit, IESV & MARIE castissimis Virginibus. 3. Neminem ita amavit, aut amare potuit, atque eosdem. Amor autem amati bonum maximè promovere vult. At bonum IESV & MARIE maximum est multitudo Castorum; ideòq; huius expressè mentio sit. Apoc. cit. c. v. 3. Est ergo Voluntas IOSEPHI summa, hoc ipsum bonum patrociniò suo promovere satagens. Vide Barry c.8. Med.7. & c. 13.

ELOGIUM XCVII.

IOSEPH

Peregrinantium Patronus.

Non ignara mali miseris succurrere disco, in-
 quiebat apud Virgilium Dido. Non minus
 autem & alij in ijs malis, quibus exerciti
 ipsi olim sunt, vel auferendis, vel mitigandis, im-
 pensè allaborant. Est ergo credibilis, neq; IOSE-
 PHVM

PHVM hac una in re velut immemorem sui, communisq; honestatis connivere ad ærumnas nostras, quas quotidie cœlesti ex Theatrô intuetur, At est in his non infima peregrinantium ærumna, quâ terrâ marique, implicantur, ac sæpe obruuntur.

Dicam ergo aliquid de hoc ipso eorum patrocinio, quod supra cæteros, ceu munus proprium sibi suscepit in se idem IOSEPHVS. Hoc autem agnovit antè me Eckius, illud Catholicæ Germaniæ columen, qui in Hom. 1. de S. IOSEPHO omnes, *insuper*, inquit, *quibus periculosa instituuntur profectioes, locaq; adeunda sunt, parùm tuta, semet S. IOSEPHO committere debent, & ex illo comitatem, seucritatem, tutelam, & intercessionem petere, ac fideliter sperare.* Tum verò, Eckio citius, Ecclesia Hispanensis in Hymno quodam festi S. IOSEPHI cecinisse dicitur apud Carthag. l. 18. Hom. 14.

O custos matris Domini

Devotos tuo nomini

IOSEPH alme, per aspera

Salva semper, & prospera

Adesse tuis famulis

Dignare dux amabilis:

Sentiant nostra pectora

Tua semper iuvamina:

Tu salus & protectio,

Nostraq; iubilatio.

Idemq; ibidem confirmat Carthag. tribus authenticis historijs, quas hoc in loco rectius præterire posse videor, ut suas maneat rationibus honor.

Inter

Inter has autem eminet illustrissimum tum IESV tum IOSEPHI exemplum : si enim percunctetur aliquis ex me, 1. quid IESVS egerit ; ac deinde quid IOSEPHVS ? quid aliud respondere possum,quàm peregrinatos esse ? Certè in has vitales auras nondum exierat IESVS ; nondum, inquam, suismet pedibus insistere poterat, maternum intra uterum clausus, iam peregrinari debuit pedibus matris, & patris imperio.

Neque verò tam leve,ut videri posset,hoc primum fuit iter. Sunt enim, qui Nazarethô Galilææ usque Cariatharbe, quo MARIA festinatò abiit ad salutandam Elisabeth, computent horas minimum triginta. At has ipsas horas revertens cum parentibus puer, post impensum Charitati, atque humilitati trimestre tempus, denuò emensus est, nec multum deinde temporis intercessit, cum iam tertium iter Bethlemium usque,IOSEPHO duce, nondum natus suscepit. Ibi verò vix octiduum, quo natus, & adoratus à pastoribus est, substitit, sed Ierosolymam,ut domino offerretur, trium horarum spatio delatus est ; iterùmque alterò tantò relatus Bethlemium. Vbi quàm diu manserit, incertum est : certum tamen non mansisse admodum diu. Repentè enim IOSEPH, impellente Angelo, exurgens è somno fugit cum IESV, & MARIA in Ægyptum ; idque totum viæ spatium per desertum quod una & quadraginta mansionibus, totidemque annis Moyses, cum Israëliticò populò emensus est peragravit. Excepit tunc IOSE-

T 3

PHYM

PHVM longissima peregrinatione perfunctum, itèmq; familiam eius, primò Hermopblis Thebaidis Vrbs. At illuc minimum ducentis horis pervenire potuit. Hermopoli autem totam ferè Egyptum obivère iuxta eam Topographiam, quam superius constitui, Elog. 87. Solum moneo debuisse insumi minimum 70. Horas. Deum revocante in patriam Angelo, qui exire iusserat, discessère Alexandria, ac denuo post 200. minimum horarum spatia, soli peregrinationi data Nazarethum regressi sunt. Vnde IOSEPHVS deinceps iter fecisse non traditur in sacris literis, quàm illud annum Ierosolimam versus, quod triginta horas poscit.

Sic ergo patet, IOSEPHI vitam meram peregrinationem fuisse. Expertus proinde pericula eius, labores, & incommoda. Et potèstne adhuc esse aliquis, qui neget esse peregrinantium patronum? Atqui multa sunt officia patroni talis; quidquid enim peregrinanti non solum necessarium, sed etiam utile, iucundum, ac gloriosum est, complecti debet. Quidni ergo omnes patronum hunc pronis animis optamus, & adoptamus, ij præcipuè, qui vi Instituti diversa loca peragere debent, & vitam agere, in quavis mundi plagâ,

ubi maius Dei obsequium, & anima-

rum auxilium spera-

tur.

ELO.

ELOGIVM XCVIII.

IOSEPH

Vitam spiritualement agentium
Patronus.

DVplex homo, duplex vita. Scilicet homo alius est homo animalis, & alius spiritualis. *Animalis autem homo non percipit ea quæ sunt Spiritus Dei. 1. ad Cor. 2. v. 14. Spiritualis autem iudicat omnia, & ipse à nemine iudicatur. v. 15.* Est ergo duplex etiam vita hominis, animalis, & spiritualis. Atqui duo isti homines, & vitæ, sibi invicem relativè opponuntur. *Caro enim concupiscit adversus Spiritum; Spiritus autem adversus carnem. ad Gal. 5. v. 17.* Quot modis ergo aliquid dicitur animale, tot vicissim modis dicitur spirituale. Atqui id tribus modis fit, nempe secundum corpus; concupiscentiam sive passionem; & sensus, quibus servit homo. Hoc ergo posterius itidem fit his tribus modis, quatenus homo dominatur corpori, concupiscentiæ sive passionibus, ac sensibus. Clarum autem est etiam hic generationem unius, esse corruptionem alterius. Vis ergo vir vere spiritualis fieri vivendo secundum spiritum, hoc est, rationem Deo soli subditam, exue animale vitam quæ instar bruti sequitur desideria carnis. At hoc sine Duce ac Patrono huiusmodi spiritualis vitæ nemo assequetur. Non enim, ut hæretici sibi stolidè simul ac impie

ter pronuncio, nihil hanc Virginem, in hoc suo patrono, etiam desiderare amplius potuisse. 1. enim illi sanitatem frustra à medicis quæsitam restituit; scilicet ne vitæ spirituali congruum subiectum deesset. In vita cap. 6. 2. In quodam suo pervigilio, humi prostratam versatilis rotæ, quâ aqua ex puteo adtrahitur, gravissimo impetu, etiam sine vulneris vestigio servavit. Alias etiam in Morenæ montibus aberrantem cum suis, adspectabili formâ, per ignotum callem eduxit. In vita Didaci de Iepes l. 2. c. 27. 3. Sanctioris vitæ desiderium immisit; ac peccatorum gravitatem declaravit, ijs utens medijs, quorum fructus in totam vitam redundaret. Ribera l. 1. c. 9. 4. Gratijs in dies maioribus extulit; evenitque, ut eas à MARIA & ipsomet IOSEPHO impetratas esse, à Domino cognosceret. Ibid. 5. Salutari timore perculit, ut caveret; ne in oratione præstigijs dæmonum seduceretur. Et propterea se regi sineret ab alijs. Idem, 6. Vnâ cum MARIA, Assumptionis festo, candidissimâ ac splendidissimâ veste in signum dimissorum omnium peccatorum exornavit. l. 1. c. 15. 7. Eodem tempore per MARIAM ostendit, gratam sibi esse venerationem sui; vellèque se cæptis eius favere traditô in pignus pretiosissimæ monili ac cruce inde appensa. 8. Omnium votorum compotem fecit; ideoque si quæ vota essent de minore bono, prius in sanctiorem formam transtulit. In vita c. 6. Barry, c. 5. 9. Per ipsam præcipuè voluit innotescere Mundo. Et videmus

nunc, eventum felicissimum notitiæ huius, magis magisque se diffundentis. Barry cap. 9. Et hæc nonnisi è pluribus elegi, ut meo tuoque in Tere-
siam affectui saltem aliquid tribuerem. At scire vis causam, cur Terefia IOSEPHVM tanti fecerit? Ipsammet audi. IOSEPHO subditus fuit IESVS, ut patri filius: cuius poenitere ipsum ne quidem in cælo potest.

ELOGIUM XCIX.

IOSEPH

Societatis IESV Patronus.

NEquaquam invita consensit Societas IESV Ioanni Bourghesio, cùm librum suum hac epigraphe emitteret in lucem; *Societas IESV Deipara sacra*. An ergo repugnabit illa mihi pari studio inflammato, si modò *Societatem IESV* inscribam *Deipara ac IOSEPHO sacram*? Minime Gen-
tium. Esse enim, ut in Scholis loquimur, sequi-
tur denominari. At est haud dubiè Societas IESV, etiam IOSEPHO sacra, & patrocinium eius non solum implorat, sed meretur. Denominari ergo iure potest ac debet, *Societas IESV etiam IOSEPHO sacra*. At, si quod est, denominatur, est utique eiusdem Societatis singularis Patronus IOSEPHVS. Ita ergo unum probandum nobis est, quòd reipsa sit huic Divo sacra, eiusque propiti-
am opem multis magnisque officiis ambiat.

Id

Id autem hunc in modum præsto. 1. Complures magni nominis Doctores excitavit ad promovendam in animis legentium, venerationem Sancti. Eminent autem Alphonsus Salmeron, Franciscus Suarez, Petrus Canisius, Petrus Cotonus, Paulus Barry, Cornelius à Lapide, Christophorus à Castro, Sebastianus Barradius, Petrus Morales; Itemque quos videre nondum potuimus, Laurentius Masellus, & Ludovicus Makeblidius vitæ Iosephinæ scriptores.

2. Suos omnes alumnos ab ipsô tirocinij tempore respicere iubet IOSEPHVM, non minus suum, quàm IESV Patrem; eundem imitari vult in ijs, quæ IESV causâ facturi passurive sunt; ac demum quotidianis precibus, ut in auxilium easusque obvios invocent, hortatur. Quæ tamen ipsa, quia ferè interna sunt, rectius latent intra nos, quibus sufficit, tanto Patri probari. Redeo autem ad ea; quæ nisi foras promicent, prodesse proximo non possunt.

Igitur 3. Ceream puerorum ætatem cum primùm Latinas litteras docere incipit, in ipso suô ad nos accessu, prensare sine mora iubet patrocinium IOSEPHI. Neque iam quisquam ferè est, qui non laboribus suis eius nomen cum IESV & Mariæ nominibus, præfigat, inscribatque, publicæ venerationis causâ.

4. His autem nequaquam contenta, peragit deinceps conceptos pietatis igniculos inflammare magis; & nunc quarti præcepti Religione ad honorandos

randos cœlestes parentes nostros, MARIAM, inquam, & IOSEPHVM quoad potest obstringit; nunc verò in Congregationem MARIAE Virginis alia Lege neminem ferè admittit, nisi præscriptâ Verborum formâ; IOSEPHVM quoque in Patrem, Patronum, & Advocatum eligit. Quod equidem de hac unâ, in quâ sum, Germaniæ Superioris Provinciâ, affirmare certò possum, ignarus quid alibi fiat. Facile tamen persuadeo mihi, sicut Filium, fas non est, separari à Matre, ita Matrem nullibi separari à Viro suo. *Quod enim Deus coniunxit, homo non separet.*

5. Eadem Societas Festum S. IOSEPHI ab Urbano VIII. fel. record. universæ Ecclesiæ imperatum licet obstare videretur festorum aliorum multitudo, passim in Germaniâ persuasit Episcopis, Principibus, ac Rebuspublicis, ut unanimi consensu admitterent Sanctissimum illud Romani Pontificis imperium.

6. Non minùs illa, gloriari potest, in amplissimo Galliæ Regnò, primam se templum S. IOSEPHO Lugduni extruxisse, Petri Cotonii nostri Concionatoris ac Confessarii Regij operâ, qui postea ipsò Sancti Festò nobiscum vivere desiit. Barry c. 5. Meretur autem hoc eodem officij genere celebrari etiam Provincia nostra, quæ Burckhusij Bavariz oppido, ubi Dicasterium est, à Serenissima Domo primum S. IOSEPHO inter Boios templum etiam ipsamet extrui impetravit.

7. Ipsa etiam, hœc IOSEPHI patrocinio, Gen.

Gentium Conversionem felicissimè promovet in novô Orbe, ac nominatim in novâ Franciâ, Americâ Meridionali, ac Canadæ regnô, Barry c. 13.

8. Eiusdem quoque Societatis est, religiosissimum FERDINANDI III. æternæ memoriæ CÆSARIS pectus, hoc in IOSEPHVM pietatis igne tantopere exarsisse. Qui sanè hunc non solum sibi, sed inprimis Bohemiæ Regno Patronum adoptavit, venerationis genere etiam Romæ placito, ad hoc utens. ~~Ita~~ Hebdom. S. IOSEPHO Regni Bohemiæ & Agonizantium Patrono sacrâ, Romæ 1658. Qui deinde ex Augustalibus Liberis suis, duos postremos, quos suscepit, Filios, eodem IOSEPHI nomine, in Baptismo compellari iussit; ex quibus, dum hoc scribo, ALOYSIVS quidem IOSEPHVS, tum IOSEPHO illi suo, à quo nomen accepit, tum Parenti optimo, præcipiti morte, coniunctus in cœlo, LEOPOLDVM Fratrem recens CÆSAREM renunciatum, communibus suffragis ad publicam Catholici Orbis utilitatem iuvat; CAROLVS verò IOSEPHVS etiamnum superstes, sub Magistrorum curâ, adolescit in spem Paternæ, ac verè Iosephinæ virtutis. Qui denique IOSEPHO hætenus culto dignus est visus, cui natali suo ac festo die, publicum Sydus supra Bohemiam accenderet in cœlo, admonens Clientem de imminente sibi morte, seu rectius vitâ cœlesti, & perpetuâ Societate secum, Palma Ioseph. fol. 486.

9. Inter hæc autem prætereundus non est
Sere-

Serenissimus PHILIPPVS WILHELMVS Princeps Neoburgicus, &c. qui post sua & aliorum religiosissima vota necquidquam, ut videbatur, impensa, demum consilio Societatis IESV S. IOSEPHVM Patronum sibi & dilectissimæ Coniugi delegit; & hoc ipso anno, die Parasceves, hoc est, 19. Aprilis, Filium ac Hæredem felicissimè suscepit; eumque IOANNEM WILHELMVM IOSEPHVM IGNATIVM nominari iussit. Quem illi IOSEPHVS iste meus utinàm de cœlo longissimè incolumem servet! Id sanè non Societas sola, sed etiam Germania Catholica tota, tum Parentis optimè meriti causâ, tum suâ, ab eodem, quantis potest desiderijs atque supplicijs non cessabit petere.

ELOGIVM C.

IOSEPH

Univèrsalis totius Ecclesiæ
Patronus.

Absit, ut negem id, quod est Fide divina certum. Huiusmodi autem est, quod Apost. in 1. ad Cor. 12. v. 8. ait. *Alij quidem per Spiritum datur sermo Sapientia, alij autem sermo scientia secundum eundem Spiritum: alteri fides in eodem Spiritu: alij gratia sanitarum in uno Spiritu: alij operatio virtutum, &c.* Et postea v. 30. *Nunquid omnes gratiam habent curationum? &c.* Sed tamen hæc ipsa Verba magis utique militanti Ecclesiæ conveniunt, quàm trium-

triumphanti. Magis, inquam, quia S. Augustin. in cit. locum commentans; *ita, inquit, nec in omnibus memorijs Sanctorum Deus miracula fieri voluit, quia dividit unicuiq., prout vult.* Sicut ergo in Viatoribus limitata vis est operandi ad extra per gratias gratis datas, pari modò vis est limitata in comprehensoribus suo patrocinio miracula patrandi nobiscum in terris.

Idque quotidiana fidelium Religio probat; dum ad preces nostras auxiliatur, Othilia oculis; Aurelia auribus; Apollonia dentibus; Agatha pectori; Blasius faucibus; Iulianus & Stephanus podagræ; Erasmus Colicis doloribus; Florentius calculo; Valentinus morbo caduco; Antonius igni sacro; Florianus, Laurentius, & Lucianus incendiis; Martinus febribus; Antonius de Padua ijs, qui perdiderunt aliquid; Leonardus captivis; Ignatius Lotola gravidis; Vitus pueris; Wilgefortis afflictijs; Nicolaus naufragis; Franciscus de Padua sterilibus; Barbara piam mortem optantibus, &c.

Verùm an nulli propterea sunt totius Ecclesie universales Patroni? Sunt utique speciali privilegio Dei, saltem MARIA, inquam, & IOSEPH. Cum enim in ijs virtus, dignitas, ac gratia ad divinitatem proximè accedant, etiam necessarium videtur, plus eos patrocinando apud Deum posse, quam aliàs possint singuli. Si ergo singuli collectivè sumpti, nihil non possint, longè magis omnia possunt MARIA & IOSEPH. At nunc de IOSEPH tantum

tum cura nos tenet. Pro illo ergo si quid adhuc virium superest, impendamus coronidi laudum eius.

Ac nobis hinc offerunt Carthageria. l. 18. Homil. 14. & Clisor. tres testes omni exceptione maiores, S. Thomam in 4. dist. 45. q. 3. a. 2. ad 2. S. Bernardin. Senens. serm. 12. p. 2. & Eckium Homil. 2. de S. IOSEPH. Verum ut mitissimè dicam, testes isti apud me muti, hac quidem in re instar piscium sunt. Admitti ergo nullo modò possunt, nisi ab ijs, qui alienis malunt oculis, quam propriis credere. Cæterum adhuc aliunde probari sufficienter potest veritas Elogij.

1. Namq; est Patriarcha Ioseph typus & figura nostri, Atqui nihil est adeò gloriosum illi, quam esse & dici Salvatorem Mundi, à quo omnes adiuvantur. Debet ergo hæc gloria imprimis inesse nostro.

2. Teresa perpetuum Carmeli decus, & IOSEPHO nostro addictissima, ut refert ipsamet in suâ propria vitâ cap. 6. post alias eius laudes dictitabat, videri sibi, Deum nolle nos aliorum Sanctorum ope iuvari, nisi in certo quopiam ærumnarum genere, veluti docere nos vellet, quemadmodum in terris ei, ut Patri suo obtemperavit, eodem omnino modò cum ipsò se in cœlis agere, ratasque eius omnes preces habere.

3. Idipsum videtur innuisse eiusdem nostri IOSEPHI filius IESVS apud Ioan. 14. v. 13. *Quodcumq; petieritis Patrem in nomine meo, hoc facite, ut glorificetur Pater in Filio. Et 16. v. 23. Si quid petieritis Patrem*

Patrem in nomine meo, dabit vobis. Quæ quidem verba in suô propriô & litterali sensu, haud dubiè de Patre æterno loquuntur. Sed quoniam ea quoque à bene moratis filijs ad suos carnales parentes proferri quotidie solent, ego, minus aliquid à Filio Dei longè liberalissimo dictum esse, non credo.

4. Inductione multiplicium exemplorum constat IOSEPHVM nostrum, reipsâ, in omnis generis ærumnis, patrocinari clientibus suis posse, & solere. Ideoque Iosephinz Palmæ Auctor, recte identidem ingeminat illud Pharaonis, Gen. 41. v. 56. *Ite ad Ioseph, & quidquid ipse vobis dixerit, facite.* Quô loquendi modô etiam MARIA Mater Dei est usa, Ioan. 2. v. 5. & nunc de cœlo unâ cum Filio nos admonet officij nostri, iustæque spei de IOSEPHO conceptæ. Neque ipse spe hac minor esse potest, qui dignitate ac meritis maior est omnibus prout hætenus ostendi. Sed utinam etiam cultu ac veneratione ad hanc eius dignitatem ac merita, proximè accedamus. Nos quidem propterea calamum strinximus. Verum nisi Deus ipsemet illabatur legentium animis, quid nisi sibilus auræ tenuis sumus? Da ergo, ô mi Deus, mihi & alijs, qui legerint incrementum.



V

QVE

QVÆSTIO SINGVLARIS.

An IOSEPH sit conceptus sine peccato originali?

NE quod præcipuum videri potest, Lectior Benevole, præteritum à me, vel etiam ignoratum esse, arguas, en appendo coram omnibus ad Rationis libellam propositam quæstionem. Ac 1. in lance dextrâ sunt momenta omnia, quæ quidem mihi occurrunt, Sententiæ affirmantis

Nempe 1. est; Quia sine ulla Censura graviore per annos ducentos lecta & tolerata fuit, etiam post Concilium Tridentinum, in Mariali Bernardini de Bustis Serm. 12. de Despons. **MARIÆ**, part. 4. tit. Deus etiam præservavit **IOSEPH** ab originali: Vbi Auctor hæc habet. Posito, quod expressè dixisset Salvator; inter natos mulierum nullus surrexit vel surget maior in gloria paradisi Ioanne Baptista, adhuc posset teneri quod **S. IOSEPH** sit maior in gloria ipso Ioanne Baptista: Si tenere vellemus opinionem unius devoti ipsius **S. IOSEPHI**, qui opinatus est, quod sicut Deus voluit præservare Beatam Virginem à peccato originali, ut esset eius digna mater, ita etiam voluit præservare **S. IOSEPH**, ut esset Matris suæ dignus Sponsus, & eius idoneus Pater nutritius, & Minister purissimus; & quantum possibile esset conformaretur in puritate ipsi innocentissimæ Virgini; & hanc suam opinionem confirmat dicto Ioannis

annis Gerson in exord. Serm. de Nat. B. V. ubi ait, *“ Sicut decuit, ut MARIA tanta puritate niteretur, sicut dicit Anselmus, quâ sub Deo maior nequet intelligi, ita decuit, ut IOSEPH tantâ prarogativâ poilleret, quo similitudinem & convenientiam exprimeret talis Sponsi ad talem Sponsam, de quâ natus est IESVS Christus. Vnde sicut laus MARIE est laus Christi filij sui, ita laus IOSEPH in praconium redundat utriusq;, IESV scilicet & MARIE. Et sic ex adverso dicit sapiens Eccli. 3, quod dedecus filij est pater sine honore, similiter dedecus Sponsa esset Sponsus sine honore derelictus. Hæc Gerson. Dicit autem prædictus devotus, quod per hanc præservationem non sequitur, quòd Beatus IOSEPH sit æqualis Beatæ Virgini per omnia, sed solùm conformis. Nam excellentior fuit præservatio ipsius Matris Dei, quàm Sponsi sui. Ipsa enim purissima Virgo taliter fuit præservata; quòd nullam penitus infectionem sensit in anima, sed nec etiam in corpore; IOSEPH verò habuit corpus infectum sicut alij, sed antequam in eò infunderetur anima, purgatum fuit Sancti Spiritus sanctificatione; & tunc creata & infusa est anima, & ab originali peccato præservata, eò modò, quo credidit M. Paulus de Venetiis, præservatam fuisse gloriosam Virginem; quæ tamen ab aliis creditur fuisse excellentius præservata. Hactenus Bernardinus. Et meminit opinionis huius etiam Carthag. lib. 4. Hom. 12. nihil præterea definiens, securane sit, an reiectanea.*

2. Quia Elog. 1. ponitur IOSEPH ab æter-

V 2

nò, &

nò, & ante omnia, prædestinatus, ut à cum IESV & MARIA. Sicut ergo vi huius prædestinationis præservata est MARIA à peccato originali, utpote prævisa independentèr à peccato Adam, ita ipse quoque, simili prærogativa prædestinationis gaudens, ab eodem proportionaliter præservatus esse, dici potest.

3. Quia pro eodem pugnat non leviter, ferè totus ille discursus S. Thomæ in 3. p. q. 27. a. 4. in c. ex quo Recentiores pro immaculatâ Mariæ Conceptione argumentantur. Nam quidni totidem verbis dicam; *Respondeo dicendum, quod illos, quos Deus ad aliquid eligit, ita præparat & disponit, ut ad id, ad quod eliguntur, inveniantur idonei secundum 2. ad Cor. 3. Idoneos nos fecit ministros novi testamenti. Beata autem Virgo (itemque IOSEPH) fuit electa (electus) divinitus, ut esset mater Dei (Sponsus matris Dei, & Pater IESV exceptâ solâ carnali generatione.) Et ideo non est dubitandum, quin Deus per suam gratiam eam (eum) ad hoc, idoneam, (idoneum) reddiderit, secundum quod Angelus ad eam (eum) dixit, Invenisti gratiam apud Deum: ecce concipies, &c. (IOSEPH fili David, noli timere, &c.) Non autem fuisset idonea mater Dei, (idoneus vir Mariæ, & Pater IESV,) si peccasset aliquando: tum quia honor parentum redundat in prolem, secundum illud Prov. 17 Gratia filiorum, patres eorum: unde & per oppositum ignominia matris in filium redundasset. Tum etiam qui singularem affinitatem (sive propinquitatem) habuit ad Christum, qui ab ea (eo) carnem accepit (per pater*
nam

nam providentiam diuturnæ nutritionis.) *Dicitur autem* 2. ad Cor. 3. *Quæ conventio Christi ad Belial? Tum etiam, quia singulari modo Dei filius, qui est Dei Sapientia in ipsâ (cum ipso) habitavit non solum in animâ, sed etiam in uterô (non solum spiritualiter, sed etiam corporaliter.) Dicitur autem Sap. 1. In malevolam animâ non introibit Sapientia, nec habitabit in corpore subdito peccatis. Et ideo simpliciter fatendum est, quod B. Virgo (IOSEPHVS) nullum actuale peccatum (Theologi complures addunt, originale) commisit, nec mortale, nec veniale: ut sic in ea (eô) impleatur, quod dicitur Cant. 4. Tota pulchra es amica mea, & macula non est in te. (Cant. 5. v. 9. Qualis est dilectus tuus ex dilecto, ô pulcherrima mulierum, &c. Et v. 15. Guttur illius suavissimum: & totus desiderabilis.)*

4. Quia multis alijs, cum Virgineâ sua Sponsa, communibus sibi privilegijs, condecoratus est; ex quibus tamen Auctores moventur ad asserendam Immaculatam prædictæ Virginis Conceptionem. Talia enim sunt, prædestinari & eligi ante omnes alios. Salaz. cap. 2. Esse immunem à peccatis actualibus. Cap. 25. & 26. Habere perfectissimam Virginitatem. Cap. 27. Plerisque effectibus peccati originalis carere. Cap. 28. Proximè coniungi cum Filio Dei. Cap. 29. Eundem summa cum potestate gubernare. Cap. 30. Confirmari in gratia. Cap. 32. §. 2. 3. Deum clarè vidisse. §. 4. Ergo indidem potest inferri immaculata IOSEPHI Conceptio.

V 3

5. Quia

5. Quia nihil obstat. Non enim obstat Censura, ut dictum est Mot. 1. Nec doctrina Devoti à Bernardino citati constituentis præservationem IOSEPHI in, nescio, quâ corporali infectione, quâ tamen caruerit MARIA. Absque eâ enim adhuc discrimen dari potest, inter MARIAM & Ipsum; si nempe dicamus, MARIAM quidem caruisse etiam debitò proximò originali; ipsum autem hoc contraxisse.

Iam verò & in sinistra Lance ponamus Negantis Sententiæ quantacunque consequi possumus, motiva.

Ex ijs autem 1. est. Quia saltem in genere graviter censetur opposita doctrina. Eam enim Tanner. disp. 4. q. 7. n. 32. temerariam & suspectam de hæresi vocat: quia à regulâ fidei absque fundamentò, & contra omnium Orthodoxorum sententiam exceptionem facit.

2. Quia etiam Trident. Sess. 5. in Decr. de Pecc. Orig. videtur condemnare contrarium. Nam 1. cum Apost. ad Rom. 5. ait, in unò homine omnes peccavisse, 2. Ad peccatum propagatione transfusum omnibus inesse, 3. Ibi non comprehendere se Beatam & Immaculatam Virginem MARIAM Dei Genitricem. De S. autem IOSEPHO prorsus tacet.

3. Quia neque unus quidem ex Catholicis Doctõribus ausus sit hoc ut probabile dicere; ut videre est ex Mot. 1. Si enim esset, cur potius ad Devoti opinionem confugeret? An ergo, in re tantâ,

tantâ, singularis opinio, & communi tantopere repugnans, tutò doceri potest?

4. Quia Motiva affirmantis non convincunt. Ut enim nil amplius dicam de primò, adhuc defendi potest prædestinatio IOSEPHI ab æterno & ante omnia, tametsi ea facta sit post prævisionem contracti peccati originalis. 3. verò in rigore non plus quàm immunitatem à peccato actuali extorquere potest. Adhæc autem minus utique pro IOSEPHO facit, quàm pro MARIA. Id quod etiam de 4. dici debet. Neque enim vel unicum privilegium in eo gradu concessum est IOSEPHO, in quo concessum est MARIE. Non igitur ex inæqualibus præmissis inferri debet Consequentiæ æqualis,

5. Quia affirmans Sententia addit onus novum oneri antiquo quò pro Immaculatâ MARIE Virginis Conceptione inter Articulus Fidei constituendâ tot iam annis, coram Summis Pontificibus, incassum decertatur. Potestne ergo aliquis, hac ipsâ nondum depugnatâ lite, ordiri pugnam aliam pro IOSEPHI immunitate, nihi utique profuturam, quàm ut Doctores collidantur inter se, & Hæreticis ansum præbeant, deridendi, aut scindendi doctrinam tunicæ inconsutilis Christi desuper contextæ per totum? In quo quidem aliqui remonent à se invidiam facti huius, propterea, quod opinionem istam de immaculato IOSEPHO, nonnisi ut verisimilem ac probabilem (extra Fidei Catholicæ orbitam) tradant. At hæc audire nolunt,

nolunt, quibus eadem Fides exosa est, ductò hinc novò argumentò, seu verius mantelò contumaciæ suæ, quòd tam facile doctrinis vanis & peregrinis abducamur, contra Apost. monitum, ad Hebr. 13. v. 9.

Resolutio Quaestionis.

1. Tutior longè est Sententia Negans.
2. An Sententia affirmans dici possit probabilis ac verisimilis, Doctõribus alijs omnibus tacentibus, mihi non liquet.
3. Si cui tamen post immaculatam Dei Genitricem, hoc speciale immunitatis Privilegium, probabiliter concedi potest, existimo concedendum esse IOSEPHO.

Ad cuius maiorem Laudem, utinam! Deus cogitationes nostras omnes converteret!

ORATIO VOTIVA

Ad

S. IOSEPHVM.

Beatissime IOSEPH, Pater Nutritie IESV Christi Filij Dei, & Sponse sanctissimæ Matris eiusdem Dei, Virginis MARIÆ. Ego N. te hodie in Patrem, Patronum, & Advocatum eligo, firmè terque statuo, ac propono, me nunquam

te deficietum, neque contra te aliquid unquam dictum, aut factum, neque permissum, ut à meis subditis aliquid contra tuum honorem unquam agatur. Obsecro te igitur, suscipe me in Seruum perpetuum: adsis mihi in omnibus actionibus, ac necessitatibus meis; nec me deferas in horam mortis meæ, Amen.

ALIA ORATIO.

Ad eundem Sanctum.

AVE IOSEPH fili David, qui meruisti audire ab Angelo: noli timere accipere MARIAM coniugem tuam: quod enim in illâ natum est, de Spiritu sancto est; pariet autem Filium, & vocabis nomen eius IESVM. Hunc ô IOSEPH exora, ut me quoque saluum faciat à peccatis meis; liberet à N. N. donet sanitate, sapientiâ, ac sanctitate; tandemque perducât ad se in horam mortis meæ,
Amen.



V 5

APPRO-

APPROBATIO R. P. PROVINCIALIS.

Cum Tractatum, quem P. Iacobus Reiss, Societatis IESV Theologiæ Professor sub nomine IOSEPHINÆ LUCERNENSIS conscripsit, aliquot eiusdem Societatis Theologi ad id deputati legerrint, probaverintque; Ego Georgius Muglinus Societatis IESV per superiorem Germaniam Præpositus Provincialis, factâ mihi ab Admodum R. P. N. Generali Gofwino Nickel, potestate, ut typis vulgetur, permitto. Atque id meâ manu, & officij Sigillo confirmo. Lucernæ 10. Augusti
Anno 1658.



Georgius Muglinus.

INDEX



INDEX

ELOGIORVM

S. IOSEPHI.

Elogium.	Folio.
1. <i>Primus predestinatorum post IESVM & MARIAM.</i>	1
2. <i>Sanctificatus in utero materno.</i>	4
3. <i>Sine fomite concupiscentia natus.</i>	7
4. <i>Nomini suo apprimè conformis.</i>	9
5. <i>Ab omni peccato actuali immunus.</i>	12
6. <i>Plenus gratiâ.</i>	15
7. <i>Particeps omnium Benedictionum.</i>	18
8. <i>Miraculosè desponsatus MARIA.</i>	21
9. <i>Felicissimus Sponsus.</i>	23
10. <i>Vir MARIA, de quo natus est IESVS, qui vocatur Christus.</i>	26
11. <i>Verò, Licitò, Sanctòque Matrimonio MARIA Virgini obstrictus.</i>	29
12. <i>Dignus MARIA dexteram contingere annulo ornare, ac eam pallio obnubere.</i>	31
13. <i>Primus Virginum coniunx.</i>	34
14. <i>Primus Virginum emulatus votum Virginitatis à MARIA emissum.</i>	37
15. <i>Dominus MARIA Domine Suprema.</i>	40
16. <i>Perpetuus Comes MARIA.</i>	42
17. <i>Prefectus primus Congregationis MARIA Virgini An-</i> <i>nunciate.</i>	46
18. <i>Proximus IESV & MARIA Consanguineus.</i>	49
19. <i>Consanguineus plurimorum Sanctorum.</i>	53
20. <i>Nat.</i>	

I N D E X.

Elog.	Folio.
20. Nunquam MARIAM coniugem cognoscens.	57
21. Inveniens Virginem in utero habentem de Spiritu Sancto.	59
22. Inveniens IESVM natum, priusquam esset natus.	62
23. Ab ipso Deo iussus manere cum MARIA coniuge sua.	65
24. Pater spiritualis IESV.	69
25. Pater legalis IESV.	71
26. Pater civilis IESV.	74
27. Paterfamilias IESV.	77
28. Pater matrimonialis IESV.	80
29. Pater nutritius IESV.	83
30. Pater aliquo modo, naturalis IESV.	86
31. Pater superior IESV.	89
32. Pater sacramentalis IESV.	92
33. Compater Spiritus Sancti.	95
34. Minister IESV in circumcisione.	98
35. Angelus custos IESV.	100
36. Coadiutor IESV Redemptoris nostri.	103
37. Propheta magnus in Israel.	206
38. Exul primus propter fidem in IESVM.	109
39. Triginta annorum Auditor IESV.	112
40. Triginta annorum præceptor IESV.	114
41. Libri generationis IESV Christi pars ordine postrema, dignitate suprema.	117
42. Legatus Apostolicus IESV primus omnium.	120
43. Intimus amicor Angelorum.	123
44. Balsami inter Gentes propagator.	126
45. Faber omnium præstantissimus.	129
46. Magister filij Dei in arte fabili.	132
47. Musicus cælestis in terra.	135
48. Theologus profundissimus.	138
49. Religionem perfectissimam professus.	141
50. Vir secundum cor Dei.	143
51. Septem maximis doloribus exercitus.	146
52. Septem maximis gaudiis perfusus.	149

53. In.

I N D E X.

Elog.	Folio.
53. In virili etate omnibus Senibus maior.	152
54. Gravissimè vindicatus à Deo.	155
55. Baptizatus à IESV.	158
56. Antiquus Convictor IESV.	161
57. Ad mortem beatissimam preparatus à IESV.	164
58. A IESV & MARIA comploratus.	167
59. A IESV crucifixo revocatus ad vitam immortalem.	170
60. MARIE dilectissimæ coniugi gloriosus apparens.	172
61. Cum IESV ascendens ad Gloriam cælestem.	175
62. Aureolâ Virginum insignis.	178
63. Aureolâ Doctorum conspicuus.	181
64. Aureolâ Martyrum ornatus.	184
65. Similis Iosepho Patriarchæ.	187
66. Præstantior Iosepho Patriarchâ.	190
67. Iosephos omnes Evangelicos antegressus.	192
68. Maior sanctis Ioachimo & Annâ.	195
69. Maior sancto Ioanne Baptista.	198
70. Maior sanctis Apostolis.	201
71. Maior sanctis Angelis.	204
72. Maior omnibus Sanctis Deiparâ minoribus.	207
73. Similis MARIE Virgineæ uxori suæ.	209
74. Similis IESV filio suo.	212
75. Similis ipsi Deo.	215
76. Similis Deo Patri ingenito.	218
77. Similis filio Dei unigenito.	221
78. Similis Spiritui Sancto.	224
79. Cum IESV & MARIA summa Trinitas creata.	227
80. Præcipuus imitator MARIE.	230
81. Præcipuus imitator IESV.	233
82. Vnum quid cum IESV.	236
83. Vnum quid cum MARIA.	239
84. Amabilissimus Deo, Deiparæ, & Angelis.	242
85. Amore divino flagrantissimus.	245
86. Summè conformi voluntate divinæ.	248

87. Pan-

I N D E X.

Elog.	Folio.
87. <i>Paupertatis studiosissimus.</i>	231
88. <i>Castissimus.</i>	234
89. <i>Obedientissimus.</i>	257
90. <i>Patientissimus.</i>	160
91. <i>Humillimus.</i>	163
92. <i>Exemplar totius Evangelicae Beatitudinis.</i>	166
93. <i>Summa dulcia dignus.</i>	169
94. <i>Postremis Ecclesiae temporibus vaticinio promissus.</i>	272
95. <i>Diu à paucis agnitus.</i>	275
96. <i>Periclitantium in Castitate Patronus.</i>	278
97. <i>Peregrinantium Patronus.</i>	281
98. <i>Vitam spirituales agentium Patronus.</i>	285
99. <i>Societatis IESV Patronus.</i>	288
100. <i>Universalis totius Ecclesiae Patronus.</i>	292

Quaestio Singularis.

<i>An IOSEPH sit conceptus sine peccato Originali.</i>	196
<i>Oratio votiva ad S. IOSEPHVM.</i>	302
<i>Item, alia Oratio.</i>	303

PROTESTATIO AUCTORIS.

Quicquid ALEXANDER de Libro iusserit isto.
Id Legem æternam vult Liber esse sibi.

Errata:

Fol.	21. v. 5. à fine
	23. v. 4.
	45. v. 15.
	v. 17.
	50. v. 1.
	64. v. 13.
	108 v. ult.
	115. v. 11.
	122. v. 6. à fine.
	124. v. 15.
	125. v. 8.
	128. v. 6. à fine.
	131. v. 18.
	197. v. 7. à fin.
	205. v. 6.
	242. v. 1.
	243. v. 10.
	250. in med.
	258. v. 7. à fine.
	v. 5.
	266. v. 18.
	269. v. 7. à fine
	271. v. 11.
	272. v. 9.
	v. 11.
	v. 14.
	274. v. 18.
	276. v. 6.
	288. v. 3. à fin.

Sic corrige.

<i>Virga.</i>
<i>MARIE.</i>
5.
6.
<i>consanguineum IESV in 3. &</i>
<i>MARIE in 2. gradu.</i>
<i>thesauro.</i>
<i>antè & post.</i>
<i>precipiat.</i>
<i>Est enim semper,</i>
<i>apparendi.</i>
<i>idémq;.</i>
<i>Dioscorid.</i>
<i>tignarius.</i>
<i>effectus.</i>
<i>habere.</i>
<i>labor.</i>
<i>compellavisse non videtur.</i>
<i>supereffluente.</i>
3. <i>Vltra.</i>
4. <i>Modò.</i>
<i>Gratiano.</i>
<i>Parco.</i>
<i>sect. 1. &</i>
v. 10.
<i>oblivionis.</i>
<i>impia.</i>
<i>venient.</i>
<i>observat.</i>
<i>Id ergo.</i>

5-3-3

12